

თბილისის უნივერსიტეტის გერმანულ-ლათინური ბიბლიოთეკა

ГРЕЧЕСКО-ЛАТИНСКАЯ БИБЛИОТЕКА ТБИЛИССКОГО  
УНИВЕРСИТЕТА

BIBLIOTHECA GRAECO-LATINA UNIVERSITATIS TBILISSIENSIS



ТОМАС МОР

# У Т О П И Я

Перевод, вступительная статья, комментарии  
и указатель Н. Н. Гомартели

Под редакцией А. В. Урушадзе

Рецензенты: Л. Е. Горгиладзе, Г. Г. Жордания

THOMAE MORI

# U T O P I A

In linguam georgicam convertit prolegomenis commentariis  
et indicibus illustravit N. Gomartelli

Redactor: A. URUŠADZE

ИЗДАТЕЛЬСТВО ТБИЛИССКОГО УНИВЕРСИТЕТА  
ТБИЛИСИ 1983

SUMPTIBUS UNIVERSITATIS TBILISSIENSIS  
TBILISSIIS MCMLXXXIII

ტომას მორი

## უტოპია

ლათინურიდან თარგმნა, შესავალი წერილი, შენიშვნები და  
საძიებელი დაურთო ნინო გომართელმა



თბილისის უნივერსიტეტის გამომცემლობა  
თბილისი 1983

დიდი ინგლისელი მოაზროვნის, გამოჩენილ პუმანსტი-  
სა და საზოგადო მოღვაწის ტომას მორის „უტოპია“ უტო-  
პიური სოციალიზმის იდეების ამსახველი ერთ-ერთი თვალ-  
საჩინო ძეგლია. იგი ქართულ ენაზე - პირველად ქვეყნ-  
დება.

წიგნი განკუთვნილია ფილოსოფოსების, ისტორიკოსე-  
ბისა და მკითხველთა ფართო წრისათვის.

თსუ ბერძნულ-ლათინური ბიბლიოთეკის  
სარედაქციო კომისია:

ა. ალექსიძე, შ. აფაქიძე, ბ. ბრეგვაძე, რ. გორდუზიანი, გ. თევზაძე,  
რ. მიმინოშვილი, ო. ნოდია, ა. ურუშაძე (თავმჯდომარე), თ. ყაუხჩი-  
შვილი, ი. შენგელია, შ. ძიძიგური.

რედაქტორი ა. უ რ უ შ ა ძ ე  
რეცენზენტები: ლ. გ ო რ გ ი ლ ა ძ ე  
გ. ყ ო რ დ ა ნ ი ა

© თბილისის უნივერსიტეტის გამომცემლობა, 1983





## ტომას მორი და მისი „უტოპია“

1977 წლის თებერვალში შესრულდა გამოჩენილი ინგლისელი ჰუმანისტის, უტოპიური სოციალიზმის ფუძემდებლის და მეცნიერული სოციალიზმის ერთ-ერთი ყველაზე აღრინდელი წინამორბედის ტომას მორის დაბადების 500 წლისთავი.

მოსკოვში, კრემლის კედელთან, სოციალიზმის უდიდეს დამცველთა ხსოვნისადმი აღმართულ ობელისკზე, სხვათა გვერდით ტომას მორის სახელიცაა ამოტვიფრული.

ტომას მორი დაიბადა შეძლებული ლონდონელი იურისტის ოჯახში. მამამისი, ჯონ მორი, სამეფო სასამართლოს წევრი იყო. მორის სიტყვებით რომ ვთქვათ, მისი ოჯახი „ნაკლებად ცნობილი, მაგრამ პატიოსანი გვარისა“ იყო. მორის დაბადების თარიღის დადგენაზე დიდხანს დაობდნენ. 1886 წელს ინგლისელმა ისტორიკოსმა უილიამ რაიტმა კემბრიჯის სამების კოლეჯის ბიბლიოთეკაში მიაგნო მორის მამის ხელნაწერს, საიდანაც ირკვევა, რომ „უახლოეს პარასკევს, ნეტარი ქალწული მარიამის მირქმის დღესასწაულის შემდეგ, სახელდობრ თებერვლის მეშვიდე დღეს, ორიდან სამ საათამდე, ქვეყნად იშვა ტომას მორი, ძე ჯონ მორისა, ჯენტლმენისა, ედუარდ მეოთხისა ინგლისში გამეფების მეჩვიდმეტე წელს“. ამ დოკუმენტზე დაყრდნობით ირკვევა ტ. მორის დაბადების ზუსტი თარიღი. მირქმის დღესასწაული ძველი სტილით, ანუ იულიუსის კალენდრით ყოველთვის 2 თებერვალზე მოდის. რადგან ედუარდ IV გამეფდა 1461 წელს (ტაუნტონთან ბრძოლის შემდეგ), მისი მეფობის მეჩვიდმეტე წელი იქნება არა 1478, როგორც მეკლეერები ფიქრობენ, არამედ 1477, ხოლო რადგან 1477 წლის 2 თებერვალი კვირა იყო, „უახლოესი პარასკევი“ იქნებოდა 7 თებერვალი. ამ დოკუმენტიდან ნათელი ხდება, რომ ტომას მორი 1477 წლის 7 თებერვალს დაბადებულა.

ტომას მორმა პირველდაწყებითი განათლება წმ. ანტონიუსის გრამატიკულ სკოლაში მიიღო; რომელიც ერთ-ერთი საუკეთესო დაწყე-

ბითი სკოლა იყო ინგლისში. იმ დროს გავრცელებული ჩვეულების თანახმად 12—14 წლის ვაჟებს პაეებად გზავნიდნენ რომელსავე დიდებულის ოჯახში. ჯონ მორმა თავისი ვაჟი მიაბარა ლამბერტის სასახლეში კენტერბერის არქიეპისკოპოსს (შემდგომში კარდინალს) ჯონ მორტონს (1420—1500 წწ.). მისივე რჩევითა და რეკომენდაციით 1497 წელს მორი ოქსფორდის უნივერსიტეტში შევიდა.

XV—XVI საუკუნეების მიჯნაზე ოქსფორდის უნივერსიტეტი ინგლისის ჰუმანიზმის ცენტრს წარმოადგენდა. XVI საუკუნის 90-იან წლებში ჰუმანიტური იდეების გავრცელება ოქსფორდში უკავშირდება გამოჩენილ მეცნიერ-ჰუმანიტების უილიამ გროსინის, ტომას ლინაკრისა და ჯონ კოლეტის მოღვაწეობას.

1499 წელს მამის დაეინებულ იქნა თხოვნით ტომას მორმა დატოვა ოქსფორდის უნივერსიტეტი. სერ ჯონ მორს არ სურდა, რომ მისი შვილი „უფულო“ მეცნიერი გამხდარიყო. მორი ლონდონში დაბრუნდა და დაიწყო იურისპრუდენციის შესწავლა ინგლისური სამართლის სკოლაში. 1502 წელს მან დაამთავრა ეს სკოლა და „სრულუფლებიანი“ ადვოკატი გახდა. როგორც ერაზმ როტერდამელი აღნიშნავს, მორი იყო „ყველაზე სამართლიანი და კეთილსინდისიერი ადვოკატი, რომელიც საკუთარ თავზე უფრო ნაკლებად ზრუნავდა, ვიდრე სხვის კეთილდღეობაზე“.

1504 წელს, როცა მორი მხოლოდ 27 წლისა იყო, პარლამენტში თემთა პალატის წევრად აირჩიეს. ეს იყო უკანასკნელი პარლამენტი ჰენრი VII მეფობის პერიოდში. იმავე წელს მეფემ თემთა პალატისაგან მოითხოვა დამტკიცებინათ ახალი სუბსიდია, 38 ათასი გირვანქა სტერლინგის ოდენობით, ამ პარლამენტის მოწვევამდე ორი წლით ადრე გარდაცვალებული მისი უფროსი ძის, უელსის პრინც არტურის რაინდად კურთხევასა და მეფის ასულის, მარგარიტას გათხოვებასთან დაკავშირებული ხარჯების დასაფარავად.

დებუტატთა წინაშე გამოვიდა ტ. მორი და იმდენად გაბედულად და დამაჯერებლად უარყო მეფის მოთხოვნა, რომ თემთა პალატამ მას საესებით დაუქირა მხარი. მეფეს მოახსენეს, რომ ვიღაც „უწვერო ბიჭუნამ ჩაშალა მთელი მისი ჩანაფიქრი“. მეფე სიამოვნებით დასჯიდა მას, მაგრამ თემთა პალატის წევრები ხელშეუხებლად ითვლებოდნენ, ამიტომ მეფის მთელი რისხვა თავს დაატყდა მამამისს: ჰენრი VII იგი დამწყვდევინა ტაუერში, ვიდრე 100 გირვანქა სტერლინგის ოდენო-



ბით ჯარიმა არ გადაიხადა. ამ ინციდენტის შემდეგ მორმა, რეპრესიის შიშით, თავი დაანება პოლიტიკურ მოღვაწეობას.

ტომას მორის ჰუმანისტური მსოფლმხედველობის ფორმირებისა და განვითარებისათვის ძალიან დიდი მნიშვნელობა ჰქონდა მის შეხვედრას ერაზმ როტერდამელთან. მათი გაცნობა მოხდა ინგლისში ერაზმის ჩამოსვლის დროს, 1499 წლის შემოდგომაზე, ხოლო ნაცნობობა შემდგომ მჭიდრო მეგობრულ ურთიერთობაში გადაიზარდა.

1509 წელს ერაზმმა მორის სახლში, მისივე დაუნიებული თხოვნით, დაწერა „ხოტბა სისულელისა“, რომელმაც მორი ალაფრთოვანა. თხზულება გამოიცა 1511 წელს პარიზში მორის თაოსნობით.

1504—1509 წლებში ტომას მორმა იმოგზაურა ნიდერლანდსა და საფრანგეთში. მან ინახულა ლუვენის და პარიზის ცნობილი უნივერსიტეტები.

1509 წელს, მეფე ჰენრი VII გარდაცვალების შემდეგ, ტომას მორი დაბრუნდა სამშობლოში და კვლავ შეუდგა საზოგადოებრივ მოღვაწეობას. 1510 წლის იანვარში იგი აირჩიეს პარლამენტის დეპუტატად. ამავე დროს მორი დაინიშნა ლონდონის შერიფის ერთ-ერთი თანაშემწის ფრიად საპასუხისმგებლო თანამდებობაზე. პარალელურად იგი განაგრძობდა ლიტერატურულ მოღვაწეობას, რომელიც არ შეუწყვეტია მთელი თავისი სიცოცხლის განმავლობაში.

ტომას მორის შემოქმედება გამოირჩევა არა მარტო მდიდარი შინაარსით, არამედ ჟანრთა მრავალფეროვნებით. გარდა გამოჩენილი იტალიელი ჰუმანისტის პიკო-დელა მირანდოლას (1462—1494 წწ.) ბიოგრაფიისა, რომელიც მორმა 1510 წელს თარგმნა ლათინურიდან ინგლისურ ენაზე, მის ლიტერატურულ მემკვიდრეობას შეადგენს „რიჩარდ III ისტორია“, „უტოპია“, ძველი ბერძენი პოეტების ნაწარმოებთა თარგმანები, შესრულებული ლათინურ ენაზე, მდიდარი ეპისტოლარული მასალა და მწვავე პოლემიკური ტრაქტატები ლუთერისა და რეფორმაციის ინგლისელ მიმდევართა წინააღმდეგ.

1515 წელს ტომას მორი დიპლომატიური მისიით იმყოფება ფლანდრიაში. აქ მან გაიცნო გამოჩენილი ნიდერლანდელი ჰუმანისტი პეტრე ეგიდიუსი (1486—1533). აქვე იგი იწყებს თავის ცნობილ ნაწარმოებზე „უტოპიაზე“ მუშაობას. როგორც ერაზმ როტერდამელი აღნიშნავს, თავდაპირველად მორმა დაწერა მეორე წიგნი, ხოლო შემდეგ მიუმატა მას პირველი. 1516 წლის 3 სექტემბერს მორმა ლონდონიდან ლუვენში ერაზმს გაუგზავნა ახლად დამთავრებული წიგნის

ხელნაწერი. იგი აცნობდა ერაზმს, რომ წინასიტყვაობის მაგივრად იგი მომავალში წიგნს დაურთავდა ხელნაწერს, რომელიც დასათაურებულ იქნებოდა ასე: „შესავალი წერილი ჩემს მეგობარ პეტრეს“ (ე. ი. პეტრე ეგიდიუსს). მორის მეგობრების — ერაზმისა და ეგიდიუსის გულმოდგინების წყალობით, 1516 წლის შემოდგომაზე „უტოპია“ გამოქვეყნდა ბელგიის ქალაქ ლუვენში ასეთი სათაურით: „უთვალსაჩინოესი და ენამზეობით გამორჩეული ვაჟკაცის, ლონდონის სახელოვანი მოქალაქისა და ვიკონტის ტომას მორის — არანაკლებ სასარგებლო, ვიდრე გასართობი, — ჰემმარიტად ოქროს წიგნი სახელმწიფოს საუკეთესო წყობილებისა და ახალი კუნძულის უტოპიის თაობაზე“.

„უტოპიის“ გამოსვლისთანავე ტომას მორი მთელი განათლებული ევროპის ყურადღების ცენტრში მოექცა. მორის პოლიტიკურ პოპულარობასთან ერთად იზრდებოდა მისი, როგორც მეცნიერ-ჰუმანისტის დიდება.

1518 წელს მორი გახდა მეფის საიდუმლო საბჭოს ერთ-ერთი წევრი და იმ პეტრიციათა მომხსენებელი, რომელნიც შემოდოდა მეფის სახელზე. მორს უნდა მოეხსენებინა მეფისათვის განსახილველი საქმეების ვითარება და მის მიერ წინასწარ მოფიქრებული გადაწყვეტილებანიც.

1521 წლის მაისში მორი დაინიშნა ხაზინადრის თანაშემწის თანამდებობაზე. ამასთან ერთად მან მიიღო რაინდის წოდება და მონაწილეობდა დიპლომატიურ მისიებში, თან ახლდა კანცლერ უოლსს კალესა და ბრიუგეში. 1522 და 1525 წლებში, მეფის ბრძანებით მორს საჩუქრად გადასცეს მიწები ოქსფორდისა და კენტის საგრაფოებში.

ტომას მორის შემდგომ პოლიტიკურ მოღვაწეობაზე დიდი გავლენა მოახდინა რეფორმაციამ. გამოდიოდნენ რა თეოლოგ-სქოლასტიკოსებისა და კათოლიკური სამღვდლოების კრიტიკით, ჰუმანისტებმა ობიექტურად ბევრი რამ გააკეთეს რეფორმაციის მოსამზადებლად. მაგრამ მათ ამოცანად არ დაუსახავთ არსებული კათოლიკური ეკლესიისა და, მით უმეტეს, არსებული საზოგადოებრივი წყობილების დანგრევა. მათი კრიტიკის სუბიექტური მიზანი იყო ნაკლოვანებების გამოსწორება „ზევიდან“, ხალხთა ფართო მასების მონაწილეობის გარეშე.

ამიტომ, როდესაც ევროპაში გაიშალა რეფორმაციული მოძრაობა და მან მოიკცა საზოგადოების უფრო ფართო სოციალური წრეები, ჰუმანისტებმა ცივილიზაციის ბედი განათლებულ ადამიანთა წრეს მი-

ანდეს, რადგანაც ფიქრობდნენ, რომ მხოლოდ მას შეეძლო მსოფლიოს ბედის გადაწყვეტა და არა ხალხთა ფართო მასებს. სწორედ ამის გამო არა მარტო მორი, არამედ მისი მეგობარი ჰუმანისტებიც, მათ შორის ერანზო როტერდამელიც, მკვეთრად განუდგნენ რეფორმაციას.

მორი მარტინ ლუთერის გამოსვლისთანავე რეფორმაციის მოწინააღმდეგე გახდა. მორსავით მეფეც ასევე მტრულად შეხვდა ლუთერის რეფორმაციას. ჰენრი VIII ხშირად იხილავდა მორთან ერთად რეფორმაციის საკითხებს. 1521 წელს ჰენრი VIII ლუთერის წინააღმდეგ სპეციალური წიგნი გამოაქვეყნა—„შვიდი საიდუმლოს დასაცავად“. ტომას მორმა მონაწილეობა მიიღო ამ წიგნის რედაქტირებაში, მეტიც, არსებითად იგი მეფის თანაავტორი იყო. ამ შრომის საფასურად ჰენრი VIII პაპისაგან „რწმენის დამცველის“ საპატიო ტიტული მიიღო. გარდა ამისა, ყველა იმას, ვინც ამ წიგნს წაიკითხავდა, პაპი ჰპირდებოდა ცოდვების შენდობას. ამ დროიდან უკვე იწყება მორის პოლემიკური ბრძოლა რეფორმაციის წინააღმდეგ.

1523 წელს, მეფის თანხმობით, ტომას მორი აირჩიეს თემთა პალატის სპიკერად, ე. ი. თავმჯდომარედ, მაგრამ მეფისა და მისი პირველი მინისტრის, კარდინალ უოლსის იმედები არ გამართლდა — მორი არ გამხდარა მეფის მორჩილი იარაღი პარლამენტში.

1525 წელს მორმა ლანკასტერის საჰერცოგოს კანცლერის მაღალი პოსტი დაიკავა. ამასთან ერთად, იგი მონაწილეობდა მნიშვნელოვან დიპლომატიურ მისიებში.

1529 წელს, კარდინალ უოლსის ჩამოგდების შემდეგ, ტომას მორი ინგლისის ლორდ-კანცლერი გახდა. ეს იყო პირველი შემთხვევა, რომ ინგლისში ეს პოსტი დაიკავა ბურჟუაზიული წრის წარმომადგენელმა, მაგრამ მორს არ გამოუხატავს დიდი აღფრთოვანება, იგი არ ფიქრობდა თავისი შეხედულებების შეცვლას და მეფის მორჩილ იარაღად გახდომას. ტრადიციულ სიტყვაში, რომელიც წარმოთქვა ამ თანამდებობის მინიჭების ცერემონიალის დროს, მან ნათლად გამოხატა თავისი შეხედულება კანცლერის მოწოდების შესახებ: „მე ვფიქრობ, რომ ეს სავარძელი აღსავსეა შრომითა და საფრთხით და არა პატივით. რაც უფრო მაღალია თანამდებობა, მით უფრო მძიმეა დაცემა. ეს კარგად ჩანს ჩემი წინამორბედის (იგულისხმება უოლსი—ნ. გ.) მაგალითიდან. რომ არ ყოფილიყო წყალობა, ჩემს ადგილს მივიჩნევდი ისეთსავე სასიამოვნო ადგილად, როგორც დამოკლესათვის იყო სასიამოვნო მის თავზე აღმართული მახვილი“.

მორის შეჯახება ჰენრი VIII-სთან მორის დაღუპვით დამთავრდა და ეს სწორედ რეფორმაციის საფუძველზე მოხდა. ინგლისის ბურჟუაზია და ახალი თავადაზნაურობა მოითხოვდნენ და თანაუგრძობდნენ რეფორმაციას. ინგლისის ისტორიული განვითარება თვით განაპირობებდა ჰენრი VIII და პაპის კურიას შორის განხეთქილებას. გაბურჟუებული თავადაზნაურობა და ბურჟუაზია დაინტერესებული იყვნენ უფრო იათი ეროვნული ეკლესიის შექმნით, დიდ მოგებას უქადდა მათ საეკლესიო ქონების სეკულარიზაცია. როგორც ცნობილია, პაპთან უთანხმოების საბაბად იქცა მეფის განქორწინების ამბავი. მეფეს სურდა გაჰყოლოდა თავის პირველ ცოლს—ეკატერინე არაგონელს და დედოფლის ლამაზი სეფე-ქალი ანა ბოლეინი ცოლად შეერთო. მეფეს სჭირდებოდა პოლიტიკური მხარდაჭერა თავისი კანცლერისაგან — ტომას მორისაგან. მეფის იმედები არ გამართლდა. მორმა მხარი არ დაუჭირა ჰენრი VIII და 1532 წელს უარი განაცხადა კანცლერის თანამდებობაზე.

მის წინააღმდეგ დაუყოვნებლივ დაიწყო რეპრესიები. სასამართლომ მორს ბრალი დასდო „სახელმწიფო ღალატში“ და კენტენბერის მონაზვნის ელისაბედ ბარტონის მხარდაჭერაში, რომელმაც უწინასწარმეტყველა მეფეს დაღუპვა ანა ბოლეინზე დაქორწინების შემთხვევაში.

1534 წლის 17 აპრილს მორი ტაუერში გადაიყვანეს, სადაც მან წელიწადზე მეტი დაჰყო. მისი მდგომარეობა კიდევ უფრო გაუარესდა მას შემდეგ, რაც 1534 წლის ნოემბერში მიიღეს სპეციალური აქტი, რომლითაც მეფე ოფიციალურად ცნეს „ინგლისის ეკლესიის უზენაეს მეთაურად“. ამავე დროს გამოაქვეყნეს აქტი „სახელმწიფო ღალატის შესახებ“. ღალატად ითვლებოდა მეფის რომელიმე ტიტულის უარყოფა. ამის შემდეგ პარლამენტმა დაამტკიცა, რომ ფიცი, რომლის დადებაც უარყო მორმა, „ჭეშმარიტია“ და სრულიად შეესაბამება ახალ აქტს „ტახტის მემკვიდრეობის შესახებ“.

ტ. მორს ბრალად დასდეს სახელმწიფო ღალატი და თავს დაატეხეს ათასგვარი უბედურება: ჩამოართვეს 1522 წელს მეფის მიერ ნაბოძები მიწები, მისი ოჯახი ყოველგვარი შემოსავლის გარეშე დატოვეს. დაიწყო ხანგრძლივი სასამართლო პროცესი.

1535 წლის 1 ივლისს მორი უკანასკნელად წარსდგა სასამართლოს კომისიის წინაშე. მას მრავალრიცხოვანი ბრალდება წაუყენეს და გამოუცხადეს სასტიკი განაჩენი: „იგი უნდა წაიყვანოს კონსტებლ უი-

ლიამ კინგსტონმა სასამართლოდან ტაუერში, საიდანაც გადაიყვანენ ტაიბერში. იქ სახრჩობელაზე უნდა ჩამოკიდონ, სანამ ნახევრად არ მოკვდება. შემდეგ გადაჭრან თოკი, მოკვეთონ სასქესო ორგანო, გაუფატრონ მუცელი, გამოპვლიჯონ და დაწვან შიგნეულობა, შემდეგ ოთხად გაკვეთონ და დაკიდონ მისი სხეულის ოთხი ნაწილი ქალაქის კარიბჭეზე, ხოლო თავი — ლონდონის ხიდზე“. შემდგომში მეფემ ერთგვარად „შეამსუბუქა“ განაჩენი და ბრძანა „მხოლოდ თავი მოეკვეთათ დამნაშავეისათვის“. შორი განაჩენის მოსმენის შემდეგ მიხვდა, რომ უსაფუძვლო იყო თავისი შეხედულებების დამალვა. ამიტომ მან განაცხადა: „მე შვიდი წელი ვსწავლობდი ეკლესიის ისტორიას და ვამტკიცებ, რომ საერო ხელისუფალი არ შეიძლება იყოს ეკლესიის მეთაური“.

განაჩენი სისრულეში მოიყვანეს სასამართლოს უკანასკნელი სხდომიდან ოთხი დღის შემდეგ. 1535 წლის 6 ივლისს, დილაადრიანად, ტაუერში მივიდა მორის მეგობარი — ტომას პოპი, რომელმაც აუწყა მორს, რომ დასჯიდნენ ცხრა საათზე და რომ მეფემ მტანჯველი სიკვდილი „შეუმსუბუქა“ თავის მოკვეთით. ამაზე მორმა წამოიძახა: „ღმერთო! შენ დაიფარე ჩემი მეგობრები მეფის ამგვარი მოწყალები-საგან“. ეს არაჩვეულებრივი სიმტკიცე მორს ეშაფოტზეც არ დაუკარგავს. მას აუკრძალეს სიკვდილის წინ ხალხისათვის მიემართა. ალბათ მეფეს ეშინოდა არ გამომჟღავნებულყო მორის მკვლელობის ნამდვილი მიზეზი. როდესაც მორი ეშაფოტზე აღიოდა, მედილეგეს უთხრა: „დამეხმარეთ ასვლაში, ჩამოსვლას კი თვითონ შევეცდები“. მორმა წარმოთქვა მოკლე ლოცვა და სიკვდილით დასჯის წინ ჯალათი გაამხნევა: „ცოცხლად, მეგობარო! ნუ გეშინია შენი მოვალეობისა, კისერი მოკლე მაქვს, კარგად დაუმიზნე, რომ არ შერცხვე“. უკანასკნელ წუთებში კი წამოიძახა: „ცოტა დამაცადე, წვერი გადავწიო, მას ხომ არ მიუძღვის ბრალი სახელმწიფო ღალატში“.

ასე დაიღუპა XV—XVI საუკუნეების ინგლისის დიდი ჰუმანისტი და სახელმწიფო მოღვაწე ტომას მორი, „ინგლისის ერთადერთი გენიოსი“, როგორც უწოდა მას თავისმა თანამედროვე მეცნიერ-ჰუმანისტი-მა ჯონ კოლეტმა.

მორის ტრაგიკულ ბედთან ერთად დასამარდა ჰუმანისტური ილუზიები, კეთილი მრჩეველებით გარშემორტყმული განათლებული მონარქისადმი რწმენა. ჯერ კიდევ 1519 წლის ივლისში ერაზმ როტერ-

დამელი აღნიშნავდა, რომ „ბედნიერნი იქნებოდნენ სახელმწიფონი, თუ მათი მმართველნი ქვეყნის სათავეში ჩააყენებდნენ მორის მსგავს თანამდებობის პირთ“.

\* \* \*

ძნელია მოიძებნოს XVI საუკუნის ინგლისის სოციალ-ეკონომიკური და პოლიტიკური განვითარების პრობლემა, რომელიც მეტ-ნაკლებად არ იყოს განხილული „უტოპიაში“. ამ ნაწარმოებში ტომას მორმა არა მარტო დაგვიხატა XVI საუკუნის ინგლისის ეკონომიკური განვითარების ნათელი სურათი, არამედ გვიჩვენა „კაპიტალის ეგრეთ-წოდებული თავდაპირველი დაგროვების“ შედეგად გამოწვეული ეკონომიკური ცვლილებების სოციალური შედეგები, რომლებიც გამოიხატა ათასობით წერილი მესაკუთრის მასობრივ ექსპროპრიაციასა და გალატაკებაში.

ტომას მორმა ამასთანავე მოგვცა მისი თანამედროვე ინგლისის სოციალ-ეკონომიკური და პოლიტიკური წყობილების ღრმა კრიტიკა და შეეცადა ემხილებინა სოციალური უთანასწორობისა და მშრომელი მასების ექსპლუატაციის მთავარი მიზეზი. ამ თვალსაზრისით, ტ. მორის „უტოპია“ წარმოადგენდა ძლიერ პროტესტს არა მარტო შემოდგომათა — მშრომელთა ამ მძიმე და ძალდატანებითი ექსპროპრიაციის — წინააღმდეგ, არამედ მთელი სოციალურ-პოლიტიკური წყობილების წინააღმდეგაც, რომელიც დამყარებული იყო ადამიანის მიერ ადამიანის ექსპლუატაციაზე და კერძო საკუთრების ბატონობაზე.

ტომას მორის თანამედროვე სოციალური წყობილების წინააღმდეგ პროტესტის თავისებურ გამოხატულებას წარმოადგენდა მის მიერ დაწერილებით შემუშავებული კომუნისტური საზოგადოების სქემა. მორის უტოპიურ-სოციალისტური იდეალი პროტესტია არა მარტო ხრწნადი ფეოდალური წყობილების წინააღმდეგ, არამედ, აგრეთვე, მზარდი კაპიტალისტური წყობილების წინააღმდეგაც. უკანასკნელ შემთხვევაში ტომას მორი თავს აღწევს ფილოსოფოს-ჰუმანისტის ბურჟუაზიულ შეზღუდულობას, მისი სახით ჩვენ გვევლინება სოციალისტ-უტოპისტი. მორის სოციალისტური სქემა ობიექტურად ასახავდა ანტაგონიზმს, რომელიც წინაპროლეტარიატსა და ბურჟუაზიის ფორმირებად კლასს შორის ისახებოდა.

ტომას მორის მიერ „უტოპიაში“ დახატული იდეალური სოციალისტური წყობილების სქემაში ფანტასტიკურ ნიშნებთან ერთად მოი-

ძებნება ისეთი ნიშნებით, რომლებსაც დღესაც ალტაცებაში მოვყავართ. ესაა „გენიალური იდეებისა და გენიალური აზრების ჩანასახები, რომლებიც ყველგან გამოსჭვივის ფანტასტიკური საბურველის ქვეშ“<sup>1</sup>.

„უტოპიაში“ ინგლისის სოციალ-ეკონომიკური განვითარების დრმა კრიტიკა, ე. წ. „კაპიტალის თავდაპირველი დაგროვების“ პერიოდში, მორის მგზნებარე პროტესტი შემოღობვათა შედეგად მშრომელთა ძალდატანებითი ექსპროპრიაციის წინააღმდეგ, ტიუდორთა ფეოდალურ-აბსოლუტისტური სახელმწიფოს კლასობრივი არსის მხილება, ექსპლუატატორთა სიძულვილი, ხოლო მშრომელთა მიმართ მხურვალე თანაგრძნობა და სიმპათია — ყველაფერი ეს გვიხასიათებს ტომას მორს, როგორც ორიგინალურ მოაზროვნეს, რომელმაც გადალახა ჰუმანიზმის ბურჟუაზიული შეზღუდულობა.

ტომას მორმა მოგვცა თავისი თანამედროვე საზოგადოებრივი წყობილების, კერძოდ აბსოლუტიზმის, როგორც ფეოდალიზმის უკანასკნელი პოლიტიკური ფორმის, კრიტიკა; ამავე დროს მორი გვევლინება ბურჟუაზიული იდეოლოგიის წარმომადგენლად, თავისი დროის მოწინავე ბურჟუაზიულ-პოლიტიკური იდეების წინასწარმეტყველად. ხოლო როდესაც მორი ამხელს თანამედროვე საზოგადოების სოციალურ მანკიერებებს და ყველა უბედურების მიზეზად, სოციალური უთანასწორობისა და მშრომელთა ექსპლუატაციის ძირითად წყაროდ კერძო საკუთრებას მიიჩნევს, იგი წინ უსწრებს თავისი ეპოქის ყველაზე უფრო მოწინავე მოაზროვნეებსაც კი.

ფეოდალურ-აბსოლუტისტური სახელმწიფოს კლასობრივი პოლიტიკის მხილების დროს მორმა შესძლო დაენახა ბურჟუაზიული სახელმწიფოს ექსპლუატატორული არსი, რომელიც დამყარებულია კერძო საკუთრების ბატონობის პრინციპზე.

„ფეოდალური შუასაუკუნეობრიობის ზღურბლზე და კაპიტალისტური ეპოქის დასაწყისში“ ტ. მორმა არაჩვეულებრივი ძალით გამოკვეთა ბურჟუაზიული საზოგადოებრივი წყობილების ძირითადი ნაკლოვანებები: კერძო საკუთრების ბატონობა, როგორც მშრომელთა ექსპლუატაციის წყარო, და ბურჟუაზიული სახელმწიფო, როგორც „ერთ მუჭა მდიდართა შეთქმულება ჩაგრულთა წინააღმდეგ“. გამოდიოდა რა ე. წ. „კაპიტალის თავდაპირველი დაგროვების“ ბარბარო-

<sup>1</sup> ფ. ე. ნ. გ. ლ. ს. ი. „ანტი-დიურინგი“, სოციალიზმი, ისტორიული ნარკვევი, თბ., 1952, გვ. 305.

სული მეთოდების წინააღმდეგ, მორმა მოგვცა მისი თანამედროვე საზოგადოების გაბატონებული ფენების გამანადგურებელი კრიტიკა, ამხილა სასულიერო წოდების, თავადაზნაურობისა და ბურჟუაზიის სოციალური პარაზიტობის და ექსპლუატატორული არსი.

ამავე დროს, განსხვავებით თავისი თანამედროვე ჰუმანისტებისაგან, კერძოდ, ნ. მაკიაველისა და თ. გვიჩარდინისაგან, რომლებიც ზიზღით იყვნენ განწყობილი ხალხისადმი (მშრომელ მასებს უყურებდნენ როგორც „ბრბოს“, „შავ ხალხს“ და ისტორიის შემოქმედად მიიჩნევდნენ ძლიერ პიროვნებებს), მორი არა მარტო თანაუგრძნობდა ჩაგრულთა მდგომარეობას, არამედ საზოგადოებრივ ცხოვრებაში გადამწყვეტ მნიშვნელობას ანიჭებდა მშრომელებს, „ყველა მატერიალური დოვლათის შემქმნელს, რომლის გარეშე, — როგორც იგი აღნიშნავს, — არ იარსებებდა არავითარი საზოგადოება“.

თავის თანამედროვე ფეოდალურ-აბსოლუტიტურსა და, აგრეთვე, მომავალ ბურჟუაზიულ წყობილებას, რომლებიც დამყარებულნი არიან კერძო საკუთრების პრინციპზე, მორმა დაუპირისპირა „უტოპიის“ სოციალისტური იდეალი. ამ ნაწარმოებში მან დაგვიხატა უკლასო საზოგადოება, სადაც არ არსებობს კერძო საკუთრება და ადამიანის მიერ ადამიანის ექსპლუატაცია.

ტ. მორმა გენიალურად იწინასწარმეტყველა მომავალი კომუნისტური საზოგადოების ისეთი დამახასიათებელი ნიშნები, როგორიცაა ექსპლუატატორთა და ექსპლუატირებულთა კლასების და კერძო საკუთრების მოსპობა, ქალთა ემანსიპაცია, ექვსსაათიანი სამუშაო დღე, ფიზიკურ და გონებრივ შრომას შორის, აგრეთვე ქალაქსა და სოფელს შორის არსებულ დაპირისპირებულობათა ლიკვიდაცია, ყველა ადამიანის მოვალეობა — იშრომოს შესაძლებლობისდა მიხედვით, მატერიალური სიმდიდრის სიუხვე და განაწილების უმალესი კომუნისტური პრინციპი: „თითოეულისაგან უნარის მიხედვით, თითოეულს — მოთხოვნილების მიხედვით“.

გენიალური აზრების გვერდით, ტ. მორის სოციალისტურ უტოპიას სუსტი მხარეებიც გააჩნია:

1. ტექნიკური პროგრესის გაუთვალისწინებლობა, აქედან უტოპიურობა მატერიალურ სიმდიდრეთა სიუხვის შექმნის შესაძლებლობის საკითხის გადაწყვეტაში. ტ. მორი ამ პრობლემის გადაწყვეტას ცდილობს საყოველთაო შრომის ვალდებულების შემოღებით და სოციალური პარაზიტობის მოსპობით.



2. ტექნიკური პროგრესის უქონლობის გამო კუნძულ უტოპიაზე არსებობენ მონები, რომელთა მთავარი ფუნქციაა ყველაზე მძიმე და უსიამოვნო სამუშაოთს შესრულება, მაშინ როცა მონების, როგორც სოციალური კატეგორიის, არსებობა უცხოა სოციალისტური იდეალისათვის და აშკარად ეწინააღმდეგება მას.

3. მორს არ ესმოდა საზოგადოების განვითარების ობიექტური კანონზომიერებანი, რომლებიც მიიყვანდნენ მას სოციალისტური იდეალის გამარჯვებამდე. ამიტომ ბედნიერი საზოგადოებრივი წყობილების შესახებ თავისი ოცნების განხორციელების შესაძლებლობა მას თვითონაც არ სჯეროდა. „ვალიარებ, რომ უტოპიურ სახელმწიფოში ბევრი რამაა ისეთი, რასაც ჩვენს ქვეყნებს ვუსურვებდი, თუმცა კი ამ სურვილების აღსრულების არავითარი იმედი არა მაქვს“, — წერს ტომას მორი თავისი ტრაქტატის დასასრულს.

ტომას მორის სოციალურ-პოლიტიკურ შეხედულებათა ასეთი შეზღუდულობა ისტორიულად გამართლებული იყო იმ პირობებში, როდესაც კაპიტალიზმი ჯერ კიდევ იბადებოდა, ხოლო პროლეტარიატი, — ერთადერთი კლასი, რომელსაც უნარი შესწევდა დაემხო კერძო საკუთრების ბატონობა და მოესპო ადამიანის მიერ ადამიანის ექსპლუატაცია“ — ჯერ კიდევ არ არსებობდა.

ტომას მორის ეპოქაში შეიძლება ვისაუბროთ მხოლოდ წინაპროლეტარიატზე, რომელიც ჯერ კიდევ მოკლებული იყო „დამოუკიდებელი პოლიტიკური მოქმედების უნარს“<sup>1</sup>. სწორედ ამ ისტორიულმა მდგომარეობამ, — აღნიშნავდა ფრ. ენგელსი, — გავლენა მოახდინა სოციალიზმის დამაარსებლებზე. კაპიტალისტური წარმოების უმწიფარ ვითარებას უმწიფარი თეორიები შეესაბამებოდა. საზოგადოებრივი ამოცანების გადაჭრა, რომელიც ჯერ კიდევ განვითარებულ ეკონომიკურ ურთიერთობაში იყო დამალული, ადამიანის თავში უნდა შექმნილიყო. საზოგადოება სავსე იყო ნაკლოვანებებით. მათი მოსპობა მოაზროვნე გონების ამოცანას შეადგენდა“<sup>2</sup>.

ტომას მორის სოციალისტურმა ოცნებებმა ობიექტურად გამოხატეს გაჭირვება და უიმედობა წინაპროლეტარიატისა — უღარიბესი გლეხობისა და ხელოსნებისა, რომლებიც იტანჯებოდნენ. ე. წ. „კაპიტალის თავდაპირველი დაგროვების“ ეპოქაში. როგორც ხაზგასმით აღნიშნავდა ფრ. ენგელსი, XVI და XVII საუკუნეების უტოპიური თე-

<sup>1</sup> ფრ. ენგელსი, ანტი-დიურიგი, 1952, გვ. 304.

<sup>2</sup> იქვე.

ორიები, რომლებმაც დაგვიხატეს იდეალური საზოგადოებრივი წყობილების სურათი, უცილობლად თან ახლდნენ „ჭერ კიდევ ჩამოუყალიბებელი კლასის (პროლეტარიატის) რევოლუციურ გამოსვლებს“<sup>1</sup>. და თუმცა მორი სუბიექტურად კიცხავდა ქვედა ფენების რევოლუციურ გამოსვლებს და პროტესტს აცხადებდა არსებული წყობილების წინააღმდეგ ყოველგვარი ძალადობითი გამოსხდომების მიმართ, მთელი თავისი სოციალისტური იდეებით ობიექტურად გამოხატავდა ინგლისის საზოგადოებაში მზარდ კლასობრივ წინააღმდეგობებს „კაპიტალის თავდაპირველი დაგროვების“ ეპოქაში.

ტომას მორის გენიალურობა და მისი, როგორც უტოპიური სოციალიზმის ერთ-ერთი ფუძემდებლის, უდიდესი ისტორიული დამსახურება იმაში მდგომარეობს, რომ მან მოგვცა ახლად ჩასახული ბურჟუაზიული წყობილების ღრმა კრიტიკა. უტოპიური სოციალიზმის ეს უდიდესი დამსახურება აღნიშნეს მარქსიზმ-ლენინიზმის კლასიკოსებმა: „როდესაც ბატონყმობა დაემხო და დღის სინათლეზე „თავისუფალი“ კაპიტალისტური საზოგადოება გამოვიდა, მაშინვე გამოაშკარავდა, რომ ეს თავისუფლება მშრომელთა ჩაგვრისა და ექსპლუატაციის ახალ სისტემას ნიშნავდა. დაუყოვნებლივ იწყო წარმოშობა სხვადასხვა სოციალისტურმა მოძღვრებამ, როგორც ამ ჩაგვრის ანარეკლმა და პროტესტმა მის წინააღმდეგ“<sup>2</sup>.

უტოპიური სოციალიზმის ფუძემდებლებმა პირველებმა დააყენეს საკითხი ბურჟუაზიული წყობილების გარდაქმნისა სოციალისტურ წყობილებად, სადაც არ იქნებოდა კერძო საკუთრება, ადამიანის მიერ ადამიანის ექსპლუატაცია, სწორედ ამაშია მორის, როგორც უტოპიური სოციალიზმის ერთ-ერთი ფუძემდებლის, უდიდესი დამსახურება. უტოპიური სოციალიზმის ისტორიული როლი იმაში მდგომარეობს, რომ იგი წარმოადგენს მეცნიერული კომუნისმის წინამორბედს, მარქსიზმის ერთ-ერთ ძირითად წყაროს. ვ. ი. ლენინი ხაზგასმით აღნიშნავს, რომ დიდი უტოპისტები „იქითკენ იყურებოდნენ, საითკენაც ნამდვილი განვითარება მიემართებოდა, ისინი მართლაც წინ უსწრებდნენ ამ განვითარებას“<sup>3</sup>.

1 ფ. რ. ენგელსი, ანტი-დურინგი, გვ. 23.

2 ვ. ი. ლენინი, მარქსიზმის სამი წყარო და სამი შეზღვეული ნაწილი, თბზ., ტ. 19. გვ. 8.

3 ვ. ი. ლენინი, ეკონომიური რომანტიზმის დახასიათებისათვის, თბზ., ტ. 2. გვ. 296.

მათი ფანტაზია ხშირად ხატავდა იდეალური წყობილების უცნაურ სურათებს, მაგრამ ამ ფანტასტიკურ საბურველში მოჩანდა იმ დიდ იდეათა ჩანასახები<sup>1</sup>, რომლებიც განავითარა და პრაქტიკულად განხორციელა მეცნიერულმა კომუნიზმმა.

სოციალ-უტოპისტების უდიდესი დამსახურება კაცობრიობის იდეურ განვითარებაში, პირველ ყოვლისა, იმაში გამოიხატება, რომ მათ მოგვეცეს კაპიტალისტური წყობილების მკვეთრი კრიტიკა. დამაჭერებლად გვიჩვენეს, რომ კერძო საკუთრებასა და ექსპლუატაცი-აზე დაფუძნებული საზოგადოებრივი წყობილება ვერ მისცემს ხალხს თავისუფლებას, თანასწორობასა და ძმობას. სოციალისტ-უტოპისტებს მომავალი საზოგადოების უმნიშვნელოვანეს პრინციპად მიაჩნდათ საზოგადოების ყველა წევრის აუცილებელი შრომა. ისინი მიხედნენ, რომ მომავალ საზოგადოებაში შრომა საპატიო საქმედ იქცევა. უტოპისტებმა წამოაყენეს პროგრესული იდეა ქალაქსა და სოფელს შორის, გონებრივ და ფიზიკურ შრომას შორის არსებული დაპირისპირებულობის ჭადალახვის შესახებ. ისინი დიდ ყურადღებას აქცევდნენ მატერიალური დოვლათის განაწილების საკითხებს, გამოთქვამდნენ ღრმა აზრებს შრომისა და მოთხოვნილების მიხედვით პროდუქციის განაწილების შესახებ.

„პირვანდელი სოციალიზმი, — აღნიშნავს ვ. ი. ლენინი, — უტოპიური სოციალიზმი იყო. იგი აკრიტიკებდა კაპიტალისტურ საზოგადოებას. ჰგომბდა, წყევლიდა მას, ოცნებობდა მის მოსპობაზე, ფანტაზიორობდა უკეთეს წყობილებაზე, არწმუნებდა მდიდრებს ექსპლუატაციის უზნეობაზე. მაგრამ უტოპიურ სოციალიზმს არ შეეძლო... გამოენახა ისეთი საზოგადოებრივი ძალა, რომელსაც უნარი შესწევს გახდეს ახალი საზოგადოების შემოქმედი“<sup>2</sup>. სოციალ-უტოპისტები ისაზღვრებოდნენ ისტორიული პირობებით და არ შესწევდათ საზოგადოებრივი განვითარების კანონთა გაგების უნარი. სწორედ ამიტომ ისინი უძლურნი იყვნენ განეხორციელებინათ მათ მიერ დასახულ იდეალური ამოცანები. მხოლოდ განვითარებული კაპიტალიზმის პირობებში, ეყრდნობოდა რა საზოგადოების განვითარების ობიექტურ კა-

<sup>1</sup> ფ. ე. გ. ე. ს. ი. ანტი-დიურინგი, გვ. 305.

<sup>2</sup> ვ. ი. ლენინი, მარქსიზმის სამი წყარო და სამი შემადგენელი ნაწილთა თხ., ტ. 19, გვ. 8—9.

ნონებს, კ. მარქსის მეცნიერულმა სოციალიზმმა „გარდამქმნელი მისწრაფებანი განსაზღვრული კლასის (პროლეტარიატის) ბრძოლას დაუკავშირა“. მხოლოდ ამის შემდეგ „სოციალისტური ოცნებანი მრავალი მილიონი ადამიანის სოციალისტურ ბრძოლად გადაიქცა“<sup>1</sup>.

ამასთანავე მეცნიერული სოციალიზმი წარმოიშვა „როგორც ფილოსოფიის, პოლიტიკური ეკონომიისა და უტოპიური სოციალიზმის უდიდეს წარმომადგენელთა მოძღვრების პირდაპირი და უშუალო გაგრძელება“<sup>2</sup>. ყველაფერი ეს ჩვენ საშუალებას გვაძლევს ჯეროვნად შევაფასოთ ტომას მორის, როგორც უტოპიური სოციალიზმის ფუძემდებლის, აზრთა უდიდესი ისტორიული მნიშვნელობა.

უტოპიური სოციალიზმის უდიდესი ძეგლი—ტ. მორის „უტოპია“ წარმოადგენს უძვირფასეს წყაროს ე. წ. „კაპიტალის თავდაპირველი დაგროვების“ ეპოქაში ინგლისის ისტორიის შესასწავლად. ტომას მორის „უტოპიას“, როგორც ინგლისის შემოღობვათა ისტორიის მნიშვნელოვან დოკუმენტს, დიდი შეფასება მისცა კ. მარქსმა, რომელმაც იგი გამოიყენა როგორც ერთ-ერთი მთავარი წყარო XVI საუკუნის ინგლისში ე. წ. კაპიტალის თავდაპირველი დაგროვების პროცესის დახასიათებისას<sup>3</sup>.

ვ. პ. ვოლგინი სამართლიანად აღნიშნავს, რომ „სოციალისტური აზრის ისტორიაში, თვით XVIII საუკუნის საფრანგეთის რევოლუციის ჩათვლით, არ შეიძლება მოინახოს ისეთი ნაწარმოები, რომელიც თავისი მნიშვნელობით გაუტოლდება „უტოპიას“. ტომას მორი, — დასკვნის ვოლგინი — სრული უფლებით შეიძლება ჩაითვალოს უტოპიური სოციალიზმის მამამთავრად და მის ერთ-ერთ უდიდეს წარმომადგენლად“<sup>4</sup>.

## „უტოპიის“ გამოცემები და თარგმანები

გ ა მ ო ც ე მ ე ბ ი :

ტომას მორის „უტოპიის“ ლათინური ორიგინალის ხელნაწერი არ შემორჩენილა. პირველი ნაბეჭდი გამოცემა განხორციელდა 1516

<sup>1</sup> ვ. ი. ლენინი, ბურჟუაზიული და პროლეტარული სოციალიზმი, თბზ., ტ. 9, გვ. 545.

<sup>2</sup> ვ. ი. ლენინი, მარქსიზმის სამი წყარო და სამი შემადგენელი ნაწილი თბზ., ტ. 19, გვ. 4.

<sup>3</sup> კ. მარქსი, კაპიტალი, ტ. 1, გვ. 923—924.

<sup>4</sup> В. П. Волгин, Историческое значение «Утопии», Т. Мор, Утопия, М., 1953, გვ. 28.

წელს ქ. ლუვენში. ამ პირველ გამოცემას ხელმძღვანელობდნენ მორის მეგობრები ერაზმ როტერდამელი და პეტრე ეგიდიუსი, რომლისადმიც მიმართულია „უტოპიის“ შესავალი წერილი. „უტოპიის“ პირველი გამოცემა (A) უიშვიათეს წიგნთა რიცხვს მიეკუთვნება. დასავლეთში მისი მხოლოდ ოთხი ეგზემპლარია ცნობილი. სსრ კავშირში მარქს-ენგელს-ლენინის სახ. ბიბლიოთეკის იშვიათ წიგნთა ფონდში ინახება ამ გამოცემის ერთი ეგზემპლარი. მეორე გამოცემა გამოვიდა 1517 წელს, პარიზში, ჟილ დე გურმონის (Gilles de Gourmont) საფასით. ეს გამოცემა (B) შეიცავს რიგ საინტერესო ვარიანტებს. ჩვენთან ეს გამოცემა ინახება ლენინგრადის საჯარო ბიბლიოთეკაში. ამ ორი გამოცემის შემდეგ ერაზმ როტერდამელმა მიმართა ბაზელში ცნობილ გამომცემელს—ტიპოგრაფ ფრობენს. 1518 წლის მარტსა და ნოემბერში განხორციელდა „უტოპიის“ ორი გამოცემა (C), დანარჩენებისა — უკვე ტ. მორის სიკვდილის შემდეგ. A გამოცემაზე დაყრდნობით გამოვიდა „უტოპიის“ ვიქტორ მიხელსისეული (Michels) გამოცემა „XV და XVI საუკუნეების ლათინური ლიტერატურული ძეგლების“ სერიით (ბერლინი, გამომც. ვეიდმანი, 1895).

1895 წელს „უტოპია“ გამოსცა ლუპტონმა (Lupton)—კომენტარებითურთ. The Utopia of sir Thomas More in Latin from the edition of March 1518 and in English from the first edition of Ralph Robynson's translation in 1551 with additional translations, introduction and notes by J. H. Lupton... Oxford, 1895.

#### თ ა რ გ მ ა ნ ე ბ ი :

XVI საუკუნეში „უტოპია“ ითარგმნა გერმანულ (1524), იტალიურ (1548), ფრანგულ (1550 და 1559), ინგლისურ (1551 და 1556) და პოლანდიურ (1562) ენებზე. 1551 წელს რალფ რობინსონმა (Ralph Robynson) გამოსცა „უტოპიის“ პირველი ინგლისური თარგმანი. ფრანგულ ენაზე აღსანიშნავია გიოდევილის (Guedeville) გამოცემა, რომელიც წარმოადგენს არა თარგმანს, არამედ „უტოპიის“ თხრობას. ამ გამოცემის მთავარი ღირსებაა ის, რომ ერთვის გრავიურები. ეს იყო „უტოპიის“ ილუსტრირების პირველი ცდა, თუ არ ჩავთვლით ჰანს პოლბაინის რამოდენიმე ნახატს C გამოცემაში. ეს წიგნი გამოვიდა 1715 წელს ლეიდენში.

მეორე ფრანგული თარგმანი ეკუთვნის ტომას რუსოს, იაკობინელთა კლუბის არქივარიუსს. ეს თარგმანი ზუსტად საფრანგეთის

დიდი რევოლუციის დროს, 1789 წელს, გამოვიდა. რუსოსეული თარგმანი განმეორებით 1888 წელს გამოსცეს. გერმანულ ენაზე ცნობილია კოთის (Kothe) თარგმანი, რომელიც გამოსცა ცნობილმა ფირმამ „რეკლამამ“ 1864 წელს და შემდეგ დაიბეჭდა „უნივერსალური ბიბლიოთეკის“ სერით.

რუსმა მკითხველმა ტომას მორის პირველად ვ. კ. ტრედიაკოვსკის მეშვეობით გაიცნო. რაც შეეხება საკუთრივ „უტოპიას“, მისი ორი თარგმანი XVIII საუკუნის დამლევს გამოსცეს: 1. Картина всевозможного лучшего правления, или Утопия. Сочинение Томаса Мориса, Канцлера Аглинского, в двух книгах. Переведена с Аглинского на Французский г. Руссо, а с Французского на Российский. С дозволения Управы Благочиния. В Санкт-Петербурге, на иждивении И. К. Шнора. 1789 года.

2. Философа Рафаила Гитлоде странствование в новом свете и описание любопытства достойных примечаний и благоразумных установлений жизни миролюбивого народа острова Утопии. Перевод с Аглинского языка, сочинение Томаса Мориса. Цена без переплета 1 руб. В Санкт-Петербурге. С дозволения Управы Благочиния. На иждивении И. К. Шнора. 1790 года.

1901 წელს ე. ვ. ტარლემ გამოაქვეყნა თავისი სამაგისტრო დისერტაცია „უტოპიის“ თარგმანის დამატებით. «Общественные воззрения Томаса Мора в связи с экономическим состоянием Англии его времени». (СПб., 1901).

მისი შეფასება მოცემულია ვ. ვ. ვოდოვოხოვის სტატიაში „ინგლისის სოციალური ისტორიის ახალი გამოკვლევა „Народное хозяйство“, 1901, кн. 10, ст. 161—176. „უტოპიის“ რუსული მორიგი თარგმანი შეასრულა ა. გ. გენკელმა. Томас Мор. Утопия. Перевод с латинского А. Г. Генкель при участии Н. А. Макшеевой. С биографическим очерком Т. Мора, составленным Н. А. Макшеевой (с портретом Т. Мора), СПб., 1903. ეს თარგმანი რამდენიმეჯერ იქნა გამაცემული. მისი მესამე გამოცემა გამოვიდა 1918 წ. პეტროგრადში, „მუშათა და წითელარმიელთა პეტროგრადის დეპუტატების საბჭოს გამოცემა“, ხოლო მეოთხე—ხარკოვში (1923).

1935 წელს სსრკ მეცნიერებათა აკადემიამ გამოსცა ა. მალენინის

თარგმანი: „Томас Мор. Золотая книга, столь же полезная, как забавная, о наилучшем устройстве государства и о новом острове Утопии. Перевод и комментарии А. И. Малейна. Предисловие В. П. Волгина. АСADEMIA, 1935. М.—Л. ეს თარგმანი შემდეგ ორგზის გამოიცა—1947 და 1953 წლებში. Томас Мор. Утопия. Перевод с латинского и комментарии А. И. Малейна. Вступительная статья В. П. Волгина. МСМXLVII. Издательство Академии наук СССР. М.—Л., „Томас Мор, Утопия, перевод с латинского и комментарии А. И. Малейна и Ф. А. Петровского. Вступительная статья В. П. Волгина. М., 1953. ეს გამოცემა განმეორდა 1971 წელს. „უტოპიის“ ახალი თარგმანი უკავშირდება 1978 წელს მორის დაბადების 500 წლისთავს და მიჩნეულია საუკეთესო თარგმანად: Т. Мор. Утопия, перевод с латинского Ю. М. Каган. Комментарии Ю. М. Каган и И. Н. Осиновского. Вступительная статья И. Н. Осиновского. Изд. „Наука“, 1978.

„უტოპიის“ ქართულ თარგმანზე მუშაობის დროს ჩვენ გამოვიყენეთ 1895 წლის ლებტონის ზემოთ დასახელებული გამოცემა და ვ. მიხელსისა და თ. ციგლერის მიერ გამოქვეყნებული „XV და XVI საუკუნეების ლათინური ლიტერატურული ძეგლები“.





უთვალსაჩინოესი და ენამზეობით  
გამორჩეული ვაჟკაცის,  
ლონდონის სახელთფანი მოქალაქისა და  
ვიკონტის ტომას მორის —  
აჩანაკლებ სასარგებლო, ვიდრე კასართობი, —  
ჭეშმარიტად ოქროს წიგნი  
სახელმწიფოს საუკეთესო წუობილებისა და  
ახალი კუნძულის უტოპიის<sup>1</sup> თაობაზე..



## ტომას მორი სალამს უძღვნის პეტრე ეგიდიუსს<sup>2</sup>

ძვირფასო პეტრე ეგიდიუს, მართალი გითხრა, ცოტა მრცხვენია კიდეც ამ წიგნის გამოგზავნისა უტოპიელთა სახელმწიფოს თაობაზე ასე დაგვიანებით, თითქმის ერთი წლის შემდეგ, რადგან მას, ალბათ, თვენახევარში მაინც მოელოდი. მეტადრე იცოდი, რომ ამ ნაშრომში მასალის მოპოვების ტვირთიც მოხსნილი მქონდა და გეგმაზე ფიქრიც კი არ მქირდებოდა. მარტო ის უნდა მომეწერა, რაც შენთან ერთად მოვისმინე რაფაელისაგან. არც მკვევრმეტყველებაზე დამდგომია ჭაფა, რაკი თვით მთხრობელის სიტყვაც ერთობ ნაუცბადევი და მოუშაადებელი<sup>3</sup> გახლდათ. თანაც, ვითარცა უწყი, ეს სიტყვა ეკუთვნის კაცს, ვინც ისე ვერაა განსწავლული ლათინურში, როგორც ბერძნულში; და რაც უფრო მიუახლოვდებოდა ჩემი გადმონაცემი მის უბრალოდ მონათხრობს, მით უფრო ახლოს იქნებოდა იგი ქეშმარიტებასთან. ამ ნაშრომში კი მე მხოლოდ ამაზე უნდა ვიზრუნო და აკი ვზრუნავ კიდეც.

ვადიარებ, ჩემო პეტრე, რომ ამ უკვე მზა მასალამ თითქმის სრულიად ამაცილა თავიდან შრომა, ვინაიდან მასალის მოფიქრება და მისი დაგეგმვა საკმაო ნიჭს, სათანადო განსწავლულობასა და გარკვეულ დროსა და გულმოდგინებას მოითხოვდა; ხოლო თუ საჭირო იქნებოდა საგნის გადმოცემა არა მარტო ქეშმარიტების, არამედ მკვევრმეტყველების თვალსაზრისითაც, მაშინ ამისთვის არ მეყოფოდა არც დრო და არც გულმოდგინება. მაგრამ რაკი ასეთი საზრუნავი აღარ მქონდა, რის გამოც ამდენი ოფლის დაღვრა იქნებოდა საჭირო, მე მხოლოდ ისლა დამრჩენოდა — უბრალოდ ჩამეწერა მოსმენილი; ეს კი უკვე მეტად იოლი საქმე იყო; და მაინც ამ მეტად იოლი საქმის შესასრულებლადაც კი ჩემი სხვა საქმენი ჩვეულებრივ სულ მცირეზე ნაკლებ დროს მიტოვებდნენ. მე ხომ მუდამ ხან სასამართლო საქმეებზე ვხარჯავ დროს (ზოგი მე მიმყავს, ზოგს ვისმენ, ზოგს ვამთავრებ, ვითარცა შუამავალი, ზოგსაც ვწყვეტ მოსამართლის უფლებით), ხან ზოგიერთი პირი მყავს სანახავი, ზოგი მოვალეობის, ზოგი კი — მართლა საქმეთა გამო. და აი, ვწირავ რა მსხვერპლად თითქმის მთელ დღეს სხვებს და ცოტას ახლობლებს ვუთმობ, ჩემთვის — მწერლობისათვის აღარაფერი მრჩება.

მართლაცდა, შინ დაბრუნებული ცოტა ცოლსაც ხომ უნდა ება-  
ასო, ბავშვებს ეტიტინო, მსახურთ გაესაუბრო. ყველაფერი ეს მე საქ-  
მედ მიმიჩნია, რადგან აუცილებელია მათი შესრულება (დიახ, აუცი-  
ლებელია, თუ არ გინდა საკუთარ სახლში უცხოდ გიგულონ). საერ-  
თოდ კი უნდა ეცადო, რაც შეიძლება სასიამოვნო იყო იმათთვის, ვინც  
შენ ცხოვრების თანამგზავრად გერგო ან ბუნების ძალით, ან შემთხ-  
ვევის წყალობით, ან კიდევ შენივე არჩევანით; მაგრამ ესეც კია, არ  
უნდა გააფუჭო ისინი ალერსით ანდა შენი გულმოწყალებით მსახურე-  
ბი ბატონებად არ უნდა აქციო. ამ საქმეებში გადის დღეები, თვეები,  
წლები. აბა, როდისღა უნდა ვწერო? თანაც მე არაფერი მითქვამს  
ძილზე, ისევე როგორც სადილზე, რასაც ზოგიერთები არანაკლებ  
დროს უთმობენ, ვიდრე თვით ძილს, რომელსაც ისედაც ცხოვრების  
ნახევარი მიაქვს. მე კი ჩემთვის მოვიხელთებ ხოლმე იმ დროს, რო-  
მელსაც ძილსა და ჭამა-სმას ვპარავ; რა თქმა უნდა, ეს ცოტაა, მაგ-  
რამ მაინც რაღაცას შეადგენს. ამიტომაც, როგორც იქნა, დავასრულე  
„უტოპია“ და წასაკითხად გამოგიგზავნე შენ, ჩემო პეტრე. გთხოვ  
წაიკითხო და შემახსენო, თუ რაიმე გამომჩნა. მართალია, ამ მხრივ  
თითქოს ეჭვი არ მეპარება და მინდა ჰქუაც და განსწავლულობაც  
ისეთივე მქონდეს, როგორც მეხსიერება, მაგრამ საკუთარ თავს იმდენ-  
ნად მაინც ვერ ვენდობი, რომ ვიფიქრო, არაფერი დამვიწყებია-მეთქი  
აი, მაგალითად, ჩემმა აღზრდილმა, იოანე კლემენტიმ<sup>6</sup>, ვინც, რო-  
გორც იცი, ჩვენთან ერთად იყო (მას ხომ არ ვუკრძალავ დასწრებას  
არც ერთ საუბარზე, რომელმაც შეიძლება რაიმე სარგებლობა მოუტა-  
ნოს, ვინაიდან დროთა განმავლობაში საუცხოო ნაყოფს ველოდები იმ  
მცენარისაგან, რომელმაც ამწვანება დაიწყო ბერძნულსა და ლათინუ-  
რში მისი მეცადინეობის წყალობით), მეტად უხერხულ მდგომარეო-  
ბაში ჩამავდო. რამდენადაც მახსოვს, ჰითლოდეოს<sup>7</sup> ჰყვებოდა, რომ  
ამაუროტის<sup>8</sup> ხიდი, რომელიც მდინარე ანიდრუსზეა<sup>9</sup> გადებული, სიგრ-  
ძით ხუთასი ნაბიჯია. ჩემი იოანე კი მეუბნება, რომ საჭიროა ორასის  
გამოკლება, რადგან მდინარის სიგანე სამას ნაბიჯს არ აღემატებაო.  
გთხოვ აღიდგინო შენს მეხსიერებაში ეს. თუ შენც ამ აზრისა ხარ,  
მაშინ მეც დაგეთანხმებით და ვალიარებ ჩემს შეცდომას. მაგრამ თუ  
ვერ გაიხსენებ, მაშინ დავტოვებ ისე, როგორც დავწერე, სწორედ  
იმას, რაც თვითონ მახსოვს. რა თქმა უნდა, ყოველ ღონეს ვიხმარ იმი-  
სათვის, რათა ჩემს წიგნში არავითარი სიცრუე არ იყოს; თუმცა სხვა  
მხრივ, საექვო შემთხვევებში, სიცრუეს უნებურად უფრო ვიტყვო

ვიდრე შეგნებულად დავუშვებ მას, ვინაიდან მირჩევნია პატიოსანი ადამიანი უფრო ვიყო, ვიდრე მოხერხებული!

ამ სადარდებელს ადვილად ეშველება, თუკი რაფაელს ჰკითხავ პირადად ანდა წერილობით; ამის გაკეთება კი საჭიროა ჩვენთან წამოჭრილი მეორე სიძნელის გამოც, რაც, არ ვიცი, ვისი მიზეზით მოხდა: ჩემი, შენი თუ თვითონ რაფაელისა. სახელდობრ, არც ჩვენ მოგვსვლია აზრად და არც მას უთქვამს, ახალი ქვეყნის რომელ ნაწილში მდებარეობს უტოპია. მე, რასაკვირველია, მზად ვარ გამოვისყიდო ეს დაუდევრობა რიგიანი თანხით; ჩემთვის ხომ მეტად სამარცხვინოა არ ვიცოდე, რომელ ზღვაში მდებარეობს კუნძული, რომელზეც ამდენს ვლაპარაკობ; მეორე მხრივ, ჩვენთან იმყოფება რამდენიმე ცნობისმოყვარე პიროვნება, განსაკუთრებით კი ერთი სათნო კაცი, ხელობით ღვთისმეტყველი, ვინც შეპყრობილია გასაოცარი სურვილით, მოინახულოს უტოპია არა ახირებული ჟინის ან ახლის ნახვის ცნობისმოყვარეობის გამო, არამედ იმიტომ, რომ დაამშვენოს, დაიცვას და განამტკიცოს ჩვენი რელიგია, რაც იქ ასე კარგად დაიწყო. ამიტომ მან გადაწყვიტა წინასწარ მიიღოს ზომები, რათა იგი იქ გაამწესოს პაპმა და უტოპიელთა ეპისკოპოსადაც აირჩიონ; მას სრულიადაც არ აკავებს ის, რომ ამ წოდების მოპოვება ესოდენ დიდი თხოვნით უხდება. მას წმიდათაწმიდად მიაჩნია ასეთი ცდა, რომელიც პატივმოყვარეობით და გამორჩენის ანგარებით კი არაა ნაკარნახევი, არამედ ღვთის წინაშე მოკრძალებითაა ჩაგონებული.

ამიტომ გთხოვ, ჩემო პეტრე, მიმართო ჰითლოდეკს ან პირადად, თუ ეს შენთვის მოსახერხებელია, ანდა წერილობით და მიიღო ზომები, რათა ჩემს ნაშრომში არ იყოს არავითარი სიცრუე, ან არ გამომჩინოს რაიმე ჭეშმარიტება. ეგებ ჯობდეს ეს წიგნი ვაჩვენოთ მას. მასავით ხომ არავის შეუძლია აქ დაშვებული შეცდომების გასწორება; თვითონ კი ამას ვერ შეძლებს, თუ ბოლომდე არ წაიკითხავს ჩემს ნაწერს. ამ გზით შევიტყობ იმასაც, მოსწონს თუ არა ეს თხზულება. თუკი მან თვითონ გადაწყვიტა თავისი მოგზაურობის აღწერა, მაშინ ალბათ არ მოისურვებდა, რომ ეს მე გამეკეთებინა. ყოველ შემთხვევაში, მე არ ვისურვებდი უტოპიელთა სახელმწიფოს შესახებ ჩემი ნაშრომის გამოქვეყნებით მის ისტორიას სიბნელის სურნელეობა და სილაზათე დავუქარგო.

სიმართლე გითხრა, ბოლომდე არც კი ვიცი, გამოცემ თუ არა ამ წიგნს. ადამიანთა გემოვნება ზედმიწევნით მრავალფეროვანია, ხასიათები ახირებული, მათი ბუნება მეტისმეტად უმადური; მსჯელობა კი

ხანდახან სრულ უაზრობამდე მიდის. ეტყობა, შედარებით ბედნიერად უფრო ისინი გრძნობენ თავს, ვინც განცხრომითა და მხიარულად ცხოვრობს და თავის კიას ახარებს, ვიდრე ისინი, ვინც იტანჯება იმის გამოცემაზე ზრუნვით, რასაც სხვებისათვის — ამპარტავანთა და უმადურთათვის—სარგებლობის ან კმაყოფილების მოტანა შეუძლია. ადამიანთა დიდი უმრავლესობა არ იცნობს მწერლობას, ბევრი ზიზ-ლითაც უყურებს მას. ბარბაროსი მძიმე ტვირთივით ჩამოიშორებს ხოლმე ყოველივეს, რაც მთლად ბარბაროსული არ არის; ნახევრად უმეცარნი უკუაგდებენ ყოველივეს, ვითარცა უხამსობას, რაც არ არის გაღატაკებული დრომოქმული სიტყვებით; ზოგიერთს მხოლოდ ძველ-მანი მოსწონს, უმრავლესობას კი — მხოლოდ საკუთარი; ერთი იმ-დენად კუშტია, რომ ვერ ურიგდება ხუმრობას, მეორე კი იმდენად ბრიყვი, რომ მახვილგონიერებას ვერ ეგუება; ზოგიერთი ისეთი უკმუ-რია, რომ ყოველგვარ ოხუნჯობას ისე უფრთხის, ვით ცოფიანი ძალ-ლისაგან დაკბენილი — წყალს. ზოგი ისეთი მერყევიცაა, რომ დამჯღა-რი ერთს აქებს, ფეხზე წამომდგარი — მეორეს<sup>8</sup>. ზოგიერთები დუ-ქანში სხედან, სასმისით ხელში მწერალთა ნიჭზე მსჯელობენ და ყვე-ლაფერს, რასაც კი მოისურვებენ, დიდი რიხით კიცხავენ ხოლმე, ყო-ველ მწერალს თავისი ნაწერისათვის, ასე ვთქვათ, თმით ათრევენ, თვი-თონ კი სამიზნიდან შორს უქირავენ თავი. ეს ვაჟბატონები ისეთი მჩა-ტე და ისე პირწმინდად გადაპარსულნი არიან, რომ ბეწვის დასახიცი არ გააჩნიათ ხელის წასავლებად! იმდენად უმადური ადამიანებიც არსე-ბობენ, რომ ნაწარმოებით ძალზე დატკბობის შემდეგაც კი არავითარ განსაკუთრებულ მოწიწებას არ გრძნობენ ავტორისადმი. ისინი როდი განსხვავდებიან იმ უმადური სტუმრებისაგან, რომლებიც მდიდრულ ნაღიმზე გულუხვად ღრეობის შემდეგ გამძლარნი ბრუნდებიან შინ და მასპინძელს მადლობასაც კი არ უხდიან. მოდი და გამართე საკუ-თარ ხარჯზე ნაღიმი ასეთი ღრჯუ ხასიათისა და სხვადასხვა გემოვ-ნების მქონე, ამასთანავე ასეთი უმადური ადამიანებისათვის.

და მაინც, ჩემო პეტრე, მომიგვარე ჰითლოდეგსთან ის საქმე, რა-ზედაც შემოგვიკივლე. შემდეგ კი, ცხადია, სრული შესაძლებლობა მექ-ნება ახალი გადაწყვეტილება მივიღო. დავასრულე რა წერა, გვიან მოვედი გონს. ამიტომ, თუკი ეს ემთხვევა მის სურვილს გამოქვეყნე-ბის თაობაზე, დაუუქარებ მეგობრებისა და, უპირველესად, შენს რჩე-ვას. ახლა კი კარგად იყავი, ჩემო ტკბილო პეტრე ეგიდიუს, შენს მშვენიერ მეუღლესთან ერთად<sup>9</sup>, მინდა წინანდებურად გაყვარდე, მე კი სულ უფრო და უფრო მეტად მიყვარხარ!

პირველი წიგნი საუბრისა, რომელიც გამართა  
გამორჩენილმა კაცმა რაფაელ ჰითლოდგესმა  
სახელმწიფოს საუკეთესო წუობილების თაობაზე  
და გადმოსცა უსაჩინოესმა ვაჟკაცმა,  
ბრიტანეთის სახელოვანი ქალაქის ლონდონის  
მოქალაქემ და ვიკონტმა ტომას მორმა.





ინგლისის უძლეველ მეფე ჰენრის<sup>10</sup>, ამ სახელით მერვეს, გამოჩენილი ხელმწიფის ყველა თვისებით უხვად შემკულს, ახლახან მეტად მნიშვნელოვანი სადავო საქმეები ჰქონდა კასტილიის მეფე კარლოსთან<sup>11</sup>. მათი განხილვისა და მოგვარებისათვის მეფემ ელჩად ფლანდრიაში<sup>12</sup> გამგზავნა და წილად მხვდა ვყოფილიყავი თანამგზავრი და ამხანაგი შეუღარებელი ვაჟკაცისა — კატბერტ ტუნსტალისა<sup>13</sup>, რომელიც ამ ცოტა ხნის წინათ, ყველას სასიხარულოდ, მეფემ სასულიერო არქივების მცველად დანიშნა. არაფერს ვიტყვი მის საქებად, მაგრამ იმის შიშით კი არა, რომ მასთან მეგობრობა ჩემი გულახდილობის უტყუარ საბუთად არ გამოდგება, არამედ იმიტომ, რომ მისი სიამამაც და ცოდნა ჩემს ყოველგვარ შეფასებას აღემატება. მისი სიქველე და განსწავლულობა იმდენად საჩინოა და გასხივოსნებულო, მათ გამოცხადებას რომ შევდგომოდი, იგივე იქნებოდა, მზე გამეშუქებინა ლამპრით.

ბრიუგეში<sup>14</sup> (როგორც დაითქვა) შევხვდით მათ, ვისაც მეფემ საქმის წარმოება დაავალა. ყველანი უსაჩინოესი ვაჟკაცი იყვნენ. მათ შორის პირველი და მოთავე იყო ბრიუგეს პრეფექტი, ხოლო მათი სული და გული — გეორგ ტემზიციუსის<sup>15</sup>, კასელის ტაძრის წინამძღვარი, მჭევრმეტყველი არა მარტო განსწავლულობით, არამედ ბუნებითაც. ამასთანავე იგი სამართლის საუკეთესო მკოდნე და მოლაპარაკების წარმართვის დიდოსტატი იყო, როგორც თავისი ჰკუის, ისე დიდი გამოცდილების წყალობით. რამდენიმე შეხვედრაზე ჩვენ ვერ მივალწიეთ სრულ თანხმობას ზოგიერთ საკითხში. ამიტომ ისინი ჩვენთან გამომშვიდობების შემდეგ ცოტა ხნით ბრიუსელში გამგზავრნენ თავიანთი ხელმწიფის ნება-სურვილის გასაგებად, მე კი ამასობაში (სხვადასხვა გარემოების გამო) ანტვერპენს ვეწვიე.

იქ ყოფნის დროს ყველაზე უფრო სასიამოვნო კაცი, ვინც კი მიხანხულა, იყო პეტრე ეგიდიუსი, ანტვერპენის მკვიდრი, ადამიანი, რომელიც თანამოქალაქეთა შორის დიდი ნდობითა და პატივით სარგებლობს და კიდევ უფრო მეტიც ეკუთვნის. არ ვიცი, რომელი სჭარბობს

ამ ქაბუკში — მისი განსწავლულობა თუ ზნეობა, რადგან იგი მშვენიერი ადამიანიცაა და დიდად განათლებული პიროვნებაც. გარდა ამისა, იგი ყველასთან ერთნაირად სათნოა, მეგობრებისადმი კი — განსაკუთრებით კეთილგანწყობილი, უყვარს ისინი, მათი ერთგულია, ისე გულთბილად ექცევა, ძნელად თუ მოიძებნება მეორე, მეგობრობაში რომ შეედაროს. პეტრე ეგიდიუსი უჩვეულოდ თავმდაბალიცაა, მისთვის უცხოა მაღალფარდოვნება, გაბღენძვა; მასში საოცრადაა შეზავებული გულწრფელობა და კეთილგონიერება. იშვიათი მოლაპარაკეა, თანაც ენამაზვილი, მაგრამ უწყინარი. მასთან ზედმიწევნით სასიამოვნო ურთიერთობამ და საამო საუბრებმა მართლაც რომ შემიმსუბუქეს სამშობლოსთან და ოჯახურ კერასთან, ცოლთან და შვილებთან დაშორებით გამოწვეული სევდა, მე ხომ უკვე ველარ ვითმენდი და სულმოუთქმელად მოველოდი შინ დაბრუნებას (მაშინ უკვე ოთხ თვეზე მეტი ხნის წამოსული ვიყავი სახლიდან).

ერთხელ ღვთისმსახურებას ვესწრებოდი ღვთისმშობლის ტაძარში, ამ ულამაზეს შენობაში, სადაც მხოლოდ უწარჩინებულესნი დადიან. წირვის დამთავრების შემდეგ ის-ის იყო სასტუმროში დაბრუნებას ვაპირებდი, რომ უცებ, შემთხვევით, დავინახე პეტრე, რომელიც ერთ ხანში შესულ, მზისაგან გარუჯულ, გრძელწვერა, ლაბადაწამოსხმულ უცხოელს ესაუბრებოდა. სახითა და გარეგნობით მეზღვაურს მივამსგავსე უცნობი. როგორც კი შემამჩნია, პეტრე მომიახლოვდა და მომესალმა. სანამ სალამზე ვუპასუხებდი, მან განზე გამიხმო და მკითხა: „ხედავ ამას?“ და სწორედ იმ კაცზე მიმითითა. „მინდოდა, — მითხრა მან, — აქედან პირდაპირ შენთან წამომეყვანა...“. „მისი მოსვლა ჩემთვის ძალიან სასიამოვნო იქნებოდა შენს გამო“, — ვუპასუხე მე. „არა, — მომიგო მან, — შენ რომ ამ კაცს იცნობდე, გამოვიდოდა, რომ უფრო მის გამო. სხვა არავინ მეგულება ქვეყნად ისეთი, ამდენი ისტორიის მოყოლა შეეძლოს უცნობ ადამიანებზე და ქვეყნებზე. მე ვიცი, რომ ამ ამბების მოსმენით უდიდეს სიამოვნებას მიიღებ“. „როგორც ჩანს, — ვუთხარი მე, — სწორად მივმხვდარე. პირველივე შეხედვით მივხვდი, რომ ეს კაცი მეზღვაურია!“ ამაზე პეტრემ მიპასუხა: „ო, როგორ ცდები. იგი მართლაც დიდხანს იყო ზღვაზე, მაგრამ არა როგორც პალინურუსი<sup>16</sup>, არამედ როგორც ულისე<sup>17</sup>, უფრო სწორად კი როგორც პლატონი<sup>18</sup>. ეს კაცი რაფაელია. საგვარეულო სახელად ჰითლოდეგს უწოდებენ; ლათინური კარგად იცის, მაგრამ ბერძნული კიდევ უკეთესად. იგი უფრო გულმოდგინედ სწავლობდა

ბერძნულს, ვიდრე რომაულს (ვინაიდან მთლიანად შესწირა თავი ფილოსოფიას. ამ მეცნიერების სფეროში კი, როგორც მან შეიტყო, ლათინურ ენაზე არ არსებობს რაიმე მნიშვნელოვანი, გარდა სენეკას<sup>19</sup> და ციცერონის<sup>20</sup> ზოგიერთი თხზულებისა). რაც რამე გააჩნდა შინ მამისეული, რაფაელმა ძმებს დაუტოვა (იგი ლუზიტანელია)<sup>21</sup>, თვით კი, მსოფლიოს გაცნობის სურვილით, ამერიგო ვესპუჩის<sup>22</sup> შეუერთდა და უკვე საქვეყნოდ ცნობილ ოთხიდან სამ მოგზაურობაში მიაი განუყრელი თანამგზავრი იყო. მაგრამ ბოლო მოგზაურობიდან უკან აღარ ჩამოჰყოლია, რამეთუ ამერიგო დაითანხმა და იმ ოცდაოთხთა რიცხვში აღმოჩნდა, ვინც ციხე-სიმაგრეში დარჩნენ ბოლო ნაოსნობის შედეგად. რაფაელი იქ დატოვეს თავისი ხასიათის წყალობით, რადგან მოგზაურობა ერჩია შინ ჯდომასა და იქ ზარზეიმით დაკრძალვას. ამიტომ მას ჰუდამ პირზე ეკერა: „ვისაც ურნა არ გააჩნია, მას ზეცა დაფარავს“<sup>23</sup>; ან კიდევ: „საიქიოსაკენ მიმავალი გზა ყოველგნით ერთია!“<sup>24</sup>. ღმერთი რომ მისადმი კეთილგანწყობილი არ ყოფილიყო, ასეთი აზრები ძვირად დაუჯდებოდა. ვესპუჩისთან განშორების შემდეგ რაფაელმა ციხესიმაგრე ზუთ ამხანაგთან ერთად ბევრი ქვეყანა შემოიარა და ბოლოს გასაოცარი შემთხვევითობის გამო ტაპრობანაზე<sup>25</sup> აღმოჩნდა. აქედან იგი კალიკვიტში<sup>26</sup> ჩავიდა, სადაც მას ბედად ლუზიტანელთა ზომალდები დახვდა და, ბოლოსდაბოლოს, მოულოდნელად სამშობლოში დაბრუნდა“.

როცა პეტრემ თხრობა შეწყვიტა, მაღლობა გადაეუხადე იმ მზრუნველობისათვის, იმ დიდი მონღომებისათვის, რომელიც გამოიჩინა მან ჩემდამი და საშუალება მომცა, დავმტკბარიყავი ხსენებულ კაცთან ესოდენ სასიამოვნო საუბრით. შემდეგ კი რაფაელს მიეუბრუნდი; ურთიერთმისალმებისა და იმ საყოველთაოდ მიღებულ მიმართვათა გაცვლის შემდეგ, რომლებიც ჩვეულებრივ ითქმება ხოლმე უცნობ პირთა პირველი შეხვედრისას, ჩემთან, შინისკენ გავემართეთ, იქ, მწვანე კორდით დაფარულ ბაღში, სკამზე ჩამოვსხედით და საუბარი გავაბით.

აქ რაფაელმა მოგვითხრო, თუ ვესპუჩის გამგზავრების შემდეგ მან და ციხე-სიმაგრეში დარჩენილმა მისმა ამხანაგებმა თანდათანობით და ტკბილი სიტყვებით როგორ მოიპოვეს იმ ქვეყნის მცხოვრებ-

თა კეთილგანწყობა. შემდეგ კი არა თუ საფრთხე აღარ ელოდათ, დამეგობრდნენ კიდევ მათთან. ბოლოს მათი მმართველის (არც ქვეყნის სახელი მახსოვს და არც ის, მმართველს რა ერქვა) კეთილგანწყობა და მოწყობაც დაიმსახურეს. მისი გულუხვობის წყალობით რაფაელმა და მისმა ხუთმა მეგობარმა უხვად მიიღეს სანოვაგე და ფული, ამავე დროს სანდო გამყოლიც იშოვეს (ისინი წყალზე ტივებით გადადიოდნენ, ხმელეთზე კი ურმებით მოგზაურობდნენ). გამყოლს მგზავრები სხვა თავკაცებთან უნდა მიეყვანა და კეთილი შუამდგომლობით წარედგინა. რაფაელმა თქვა, რომ მრავალდღიანი მგზავრობის შემდეგ იხილა დიდი და პატარა ქალაქები, მჭიდროდ დასახლებული სახელმწიფოები, სადაც არცთუ ურიგო წესწყობილება სუფევდა.

მართლაც, ეკვატორული ხაზის მახლობლად, მის ორივე მხარეს, რომელსაც მზის ბრუნვა მოიცავს, ხვატისაგან გამომშრალი ვრცელი უდაბნოებია გადაჭიმული. ყველგან ჭუჭყია, საგნებს უბადრუკი იერი დასდებია, ყველაფერი მკაცრია და მოუვლელი, ყველგან მხეცები და გველები დაბუდებულან, და ბოლოს აქვია ხალხი, რომელიც ურჩხულებზე ნაკლებად ველური და ბოროტი როდია; მაგრამ როცა წინ წაიწევი, ყველაფერი თანდათან შეიცვლება, თითქოს ცა იხსნება, ირგვლივ სიმწვანე და სიმშვიდე ისადგურებს, აი, ხალხიც გამოჩნდა. დიდ და პატარა ქალაქებში ვაჭრობა გაჩაღებულა, თანაც მარტო ურთიერთშორის და მეზობლებთან კი არა, შორს მცხოვრებ ტომებთანაც, სადაც კი სწვდებიან ზღვითა და ხმელეთით.

რაფაელს საშუალება ჰქონდა მრავალი ქვეყანა მოეარა, ვინაიდან არა მარტო მას, არამედ მის თანამგზავრებსაც სიამოვნებით ღებულობდნენ ნებისმიერ ხომალდზე, რომელიც ისე იყო აღჭურვილი, რომ ყოველგვარ მგზავრობას გაუძლებდა. პირველად ნანახ ქვეყნებში ნაირნაირი გემები ნახეს, ზოგს პაპირუსის ფოთლებისგან შეკერილი აფრები ჰქონდა, ზოგს — ღეროებისგან დაჭიმული, ზოგს — ტყავისა. შემდეგ მსხვილძირა გემები იხილეს, რომელთაც ტილოს აფრები ჰქონდათ; ბოლოს ჩვენი გემების მსგავსნიც უნახავთ. მათმა მეზღვაურებმა თურმე ზღვაც კარგად იციან და ცა. მაგრამ, როგორც რაფაელი ჰყვებოდა, თვითონაც დიდი გავლენა მოუხდენია მათზე, რამეთუ მაგნიტის გამოყენება<sup>27</sup> ასწავლა. აქამდე ისინი კრძალვით უყურებდნენ

ზღვას და მხოლოდ კარგ ამინდში თუ ენდობოდნენ მას. ახლა კი, რაც მაგნიტის ძალა იწამეს, უკვე არაფრად აგდებდნენ ზამთარში ცურვა-საც. ყველაფრის შედეგი კი ის იყო, რომ არათუ შიში აღარ ჰქონდათ არაფრის, უფრო უდარდელობა დასჩემდათ და ამიტომ მოსალოდნე-ლი იყო ახალი საშიშროება: ნიეთი, რომელსაც სარგებლობა უნდა მო-ეტანა ადგილობრივი მეზღვაურებისათვის, მათი არაგონიერულობის გამო, დიდი უბედურების მიზეზი არ გამხდარიყო.

რაფაელმა ისიც მოგვითხრო, თუ სად რა ნახა, მაგრამ ახლა ამის გადმოცემა საუბარს დიდად გაგვიგრძელებდა და ეს არც არის ამ ნა-წარმოების მიზანი, ამაზე სხვაგან შეიძლებოდა გვეთქვა. ახლა ჩვენ-თვის განსაკუთრებით სასარგებლო, რა თქმა უნდა, იმ სწორი და ბრძნული ღონისძიებების გაცნობა იქნება, რომლებიც რაფაელს იქ, კეთილმოწყობილ სახელმწიფოებში შეუნიშნავს. ჩვენ სხვადასხვაბით ვაყრიდით რაფაელს შეკითხვებს და ისიც ყველაზე უფრო დიდი სიამოვნებით ამაზე გველაპარაკებოდა. დროებით თავი ვანებოთ ყოველ-გვარ შეკითხვებს ურჩხულებზე, ვინაიდან აქ არაფერია ახალი. მართ-ლაც, მტაცებელ სკილეზსა<sup>28</sup> და კელენოებს<sup>29</sup>, კაციკამია ლესტრიგო-ნებსა<sup>30</sup> და მათ მსგავს უზარმაზარ ურჩხულებს თითქმის ყველგან შეხ-ვდები, ხოლო საღად და გონიერულად აღზრდილი მოქალაქენი ადვი-ლი საპოენი როდია.

და რაფაელი გვესაუბრა ამ ახალგაცნობილი ხალხის მრავალ მცდარ კანონზე, მეორე მხრივ კი ბევრი ისეთიც ჩამოთვალა, რომელ-თაგან მაგალითის აღება შეიძლება ჩვენი ქალაქების, ხალხების, ტო-მებისა და სამეფოების ცხოვრების წესის გამოსასწორებლად; ამათზე, როგორც უკვე ვთქვი, სხვაგან ვილაპარაკებ. ახლა კი მსურს გადმოგ-ცეთ რაფაელის მონაყოლი უტოპიელთა ჩვეულებებზე და დაწესებუ-ლებებზე, მაგრამ წინასწარ მაინც გავაცნობთ იმ საუბარს, რომელმაც ამ სახელმწიფოს დასახელებამდე მიგვიყვანა.

რაფაელმა მეტად ჰკვიანურად დაიწყო ამა თუ იმ შეცდომების ჩამოთვლა, რომლებიც ასე ბლომად აქვს ორივე მხარეს. ხოლო შემ-დეგ დაასახელა როგორც ჩვენი, ისე მათი ბრძნული და კეთილგონიერული კანონები. იგი ყოველი ხალხის ჩვეულებებსა და წამოწყებებს ისე აყალიბებდა, გეგონებოდა რომელიმე მხარეში მთელი სიცოცხლე გაუტარებიაო. აღტაცებულმა პეტრემ შესძახა: „გაოცებული ვარ, ჩე-მო რაფაელ, რატომ არ ამოუდგები მხარში რომელიმე მეფეს? მტკი-ცედ ვარ დარწმუნებული, რომ სავესებით მოახერხებ მისი გულის მო-

ნადირებას, რადგან შენი განსწავლულობის, ქვეყნებისა და ადამიანების ესოდენ დიდი ცოდნის გამო შეგიძლია არა მარტო გაართო იგი, არამედ ჰკუთის სასწავლი მაგალითიც მოუყვანო და ბევრი რჩევეაც მისცე. თანაც ამ ხერხით საკუთარ საქმეებსაც შესანიშნავად მოიწყობ და დიდ დახმარებას გაუწევ ყველა შენს ახლობელს“. „რაც შეეხება ჩემს ახლობლებს, — თქვა მან, — მეტისმეტად არ ვდარდობ მათზე. მიმაჩნია, რომ ჩემი ვალი მათ წინაშე შეძლებისამებრ მოვიხადე. არა მარტო ჭერ კიდევ სრულიად ჭანმრთელმა და მხნემ, არამედ ახალგაზრდამაც, ჩემს ნათესაებსა და მეგობრებს დავუნაწილე მთელი ჩემი ქონება. სხვები კი ქონებაზე მხოლოდ სიბერეში ან ავადმყოფობის ეპოს ამბობენ უარს, მაშინაც დიდის გაჭირვებით ელევიან და მხოლოდ იმიტომ, რომ უკვე აღარ ძალუძთ მისი შენარჩუნება. ვფიქრობ, ჩემი ახლობლები კმაყოფილნი უნდა იყვნენ ამ მოწყალების გამო და არ მოითხოვენ და არ დაელოდებიან იმას, რომ მათი გულისათვის მეფეებს დავემონო“. „კარგი სიტყვებია! — შენიშნა პეტრემ, — მაგრამ მგონია აქ იფულისხმება არა „დამონება“, არამედ „მომსახურება“.

„ამ სიტყვაში, — მიუგო რაფაელმა — ერთადერთი მარცვალა მეტი!“ „მე კი ვფიქრობ, — უპასუხა პეტრემ, — რომ რა სახელიც არ უნდა უწოდო შენს ამ საქმიანობას, სწორედ ის არის საშუალება, რომელთაც სარგებლობის მოტანა შეგიძლია არა მხოლოდ ადამიანთა ვიწრო წრისათვის, არამედ საზოგადოებისათვისაც და საკუთარი მდგომარეობის გასაუმჯობესებლადაც“. „გაუმჯობესდება კი იგი, — ჰკითხა რაფაელმა — იმ გზით, რომელიც ჩემს გულს არ ეკარება? ახლა ხომ ისე ვცხოვრობ, როგორც მინდა; დარწმუნებული კი ვარ, რომ ეს მხოლოდ უმცირესობის ხვედრია ძოწით მოსილთა შორისაც! განა ცოტანი არიან ისეთები, თვითონ რომ ეძებენ მეგობრობას მეუფეებთან და განა, შენი აზრით, დიდი უბედურება იქნება, თუკი ისინი უჩემოდ ან ჩემს მსგავსთა გარეშე შეძლებენ არსებობას?“.

მაშინ მე ვთქვი: „ჩემო რაფაელ, ცხადია, არა ხარ დახარბებული არც სიძლიდრეს, არც ძალა-უფლებას და, რა თქმა უნდა, ასეთი აზრების კაცს იმაზე ნაკლებ პატივს როდი ვცემ და ვაფასებ, ვისაც უმადლესი გააგებლობა უპყრია ხელთ. მაგრამ მგონია, შენი საქციელი მეტად ღირსეული იქნება როგორც შენთვის, ისე შენი ამალღებული და ჰუმბარიტად ფილოსოფიური გონებისათვის, თუკი შეეცდები გარკვეული პირადი ზარალის ფასადაც კი საკუთარი ნიჭი და გულმოდგინება საზოგადოების სამსახურს შესწირო; ამის ხორცშესხმას კი ისე ნაყო-

ფიერად ვერსად შესძლებ, როგორც იმ შემთხვევაში, თუკი რომელიმე დიდი ხელმწიფის მრჩეველი გახდები და (ექვეც არ მეპარება) მას სათანადო პატიოსან აზრებს ჩაუნერგავ. არ უნდა დაივიწყოთ, რომ ხელმწიფე, დაუშრეტელი წყაროს მსგავსად, მთელ ხალხს აწვდის როგორც კარგს, ისე ცუდს. შენ ყოველთვის, დიდი ცხოვრებისეული გამოცდილების გარეშეც, შესანიშნავი მრჩეველი იქნები ყოველი მეფისათვის შენი სრულყოფილი განაწავლულობის გამო, ანდა ამ განსწავლულობის გარეშეც, ესოდენი გამოცდილების წყალობით“. „ჩემო შორ, — მიპასუხა მან, — შენ ორჯერ შეცდი: ჯერ ერთი, ჩემს გამო და, მეორეც, თვით საკითხის არსში. მე არა მაქვს ის ღირსებები, რომელთაც მომაწერ და, კიდევ რომ მქონდეს და შევეწირო ამ საქმეს, მაინც ვერაფერს სარგებლობას ვერ მოვუტან სახელმწიფოს, პირველ ყოვლისა, ყველა მეფე უმრავლეს შემთხვევაში მთელ თავის ღროს უფრო დიდი სიამოვნებით მხოლოდ სამხედრო საქმეებს უთმობს (მე კი ამის არავითარი გამოცდილება არა მაქვს და არც მინდა მქონდეს), ვიდრე ქვეყნის სასიკეთო საქმეებს; ამას გარდა, მეფენი უფრო დიდი სიამოვნებით ზრუნავენ იმაზე, როგორმე კანონიერი ან უკანონო გზებით ხელში ჩაიგდონ ახალ-ახალი სამეფოები, ვიდრე იმაზე, როგორ უკეთ მართონ უკვე მოპოვებული. ამასთან, მეფეთა მრჩეველებს შორის არ მეგულება არავინ ისეთი, მართლა ჭკვიანი, სხვისი რჩევა არ სჭირდებოდეს, ანდა ვისაც საკუთარი თავი ისე ბრძენი ეგონოს, სხვისი აზრის მოწონება არ ეგებოდეს, არის გამონაკლისიც, როცა ისინი მლიქვნელურად და მდაბლად უხზიან თავს მეფესთან დაახლოებულ იმ პირთა სულელურ აზრებს, რომლებიც ხელმწიფის კეთილგანწყობით სარგებლობენ და ამ მლიქვნელობით ცდილობენ მათ მომადლიერებას. რასაკვირველია, ბუნებისაგან ისეა მოწყობილი, რომ ყველას თავისი ქმნილება მოსწონს, როგორც ყვავს თავისი ბახალა და მიამუნს — თავისი ნაშიერი.

ამიტომ, თუკი ამგვარ პირთა წრეში, რომელთაც სხვისი შურთ და მხოლოდ საკუთარს აძლევენ უპირატესობას, ვინმე გამოჩნდება და რაიმე ამბავს ამოიკითხავს შორეული წარსულიდან, ან სხვა ქვეყნებში ნანახს მოპყვება, მსმენელები შეშინდებიან, თითქოს მათ სიბრძნეს დაკნინების საფრთხე ემუქრება და ამის შემდეგ უმეცრებად გამოაცხადებენ. თუ ვერ მოახერხეს, მთხრობელს რაიმე მოუგონონ და სახელი გაუტეხონ. თუ სხვა ვერაფერი იღონეს, ისინი ამ აზრს მოიმარჯვებენ: ყველაფერი ეს ჩვენს წინაპრებს მოსწონდათ და ჩვენ ვისურვებდით

მათ სიბრძნეშიც გავტოლებოდითო. ამით ისინი მშვიდდებიან, რადგან მიაჩნიათ, რომ ამგვარი შენიშვნით თავი შესანიშნავად დაიცვეს. თითქოსდა რალაც საშინელი მოხდება, თუ ვინმე რომელიმე საქმეში თავის წინაპრებზე ჰკვიანი აღმოჩნდება. სინამდვილეში კი ყველაფერი, რასაც ისინი ასე მოხერხებულად დაადგენენ და რაშიც ჩვენ ასე აუღელვებლად ვეთანხმებით, ცხოვრებაში ფეხს იკიდებს და მკვიდრდება. მაგრამ თუკი რაიმე საბაბით შეიძლება რალაც გონივრულის მოტიქრება, ჩვენ მაშინვე გატაცებით ვეჭიდებით ამ საბუთს, მაგრამ აღრე დადგენილსაც აღარ ვეშვებით. ასეთ მაღალფარდოვან, უზარო და ჰირვეულ მოსაზრებებს არაერთხელ შევხვედრივარ სხვაგან, მაგრამ ერთხელ ინგლისშიც წააწყდი.

„მითხარი, გეთაყვა, — ვკითხე მე, — მამ შენ ნამყოფი ხარ ჩვენთან?“ „ღიახ, — მიპასუხა, — და იქ რამდენიმე თვე გავატარე დასავლეთ ინგლისელთა დამარცხების შემდეგ მეფის წინააღმდეგ გაჩაღებულ სამოქალაქო ომში, რომელშიც თვითონვე უმოწყალოდ განადგურდნენ<sup>31</sup>. ამასთან ერთად დიდად დავალებული დავრჩა ღრმად პატივცემული მამა იოანე მორტონისაგან<sup>32</sup>, კენტერბერის არქიეპისკოპოსისა და კარდინალისაგან, რომელიც მაშინ ინგლისის კანცლერიც იყო. ეს კაცი, ჩემო პეტრე (მორისათვის ცნობილი ამბავი უნდა მოგიტხრო), დიდ პატივისცემას იმსახურებდა როგორც თავისი მდგომარეობით, ისე კეთილგონიერებითა და სათნოებით. ტანად საშუალო კაცი იყო, საკმაო ხნისაც, მაგრამ ასაკს ვერ მოეხარა. მისი სახე მოწიწების გრძობას იწვევდა და არა შიშს. ურთიერთობაში მძიმე კი არ იყო, არამედ დინჯი და ზვიადი. მას ხანდახან უჩნდებოდა სურვილი, მეტად მკაცრად მოქცეოდა მთხოვნელებს, მაგრამ მათთვის ზიანის მიუყენებლად, რათა ამით გამოეცადა როგორი მოსაზრებულობით, სულის სიმტკიცით იყო დაჯილდოებული ყოველი მათგანი. მათ სიმამაცეში, რომელსაც საერთო არაფერი ჰქონდა თავხედობასთან, იგი დიდ სიამოვნებას პოულობდა, ვინაიდან ეს თვისება მისთვისაც ნაცნობი იყო და ასეთ ადამიანს საქმეში გამოსადეგად თვლიდა. მისი საუბარი დახვეწილი და გულშიჩამწვდომი იყო. სამართლის შესანიშნავი მცოდნე, დაჯილდოებული იყო ენამახვილობით, იშვიათი მეხსიერებით. ეს შესანიშნავი ბუნებრივი თვისებები მან სწავლით და ვარჯიშით განივითარა. მეფე სავსებით ენდობოდა მის რჩევებს (ჩემი იქ ყოფნისას), ისე ჩანდა, თითქოს სახელმწიფოც კი ეყრდნობოდა მათ. სიყრმიდანვე, პირდაპირ სკოლის მერხიდან მოხვდა იგი სამეფო კარზე, მთელი ცხოვრება მნი-



შენელოვანი საქმეების გარემოცვასა და ბედის ტრიალში გაატარა. მრავალპირნახულმა დიდი შიშის ფასად შეიძინა ესოდენი სახელმწიფოებრივი გამოცდილება (რომელიც არცთუ ისე მალე იკარგება, როცა ასეთი გზითაა დაგროვილი).

როცა ერთ დღეს, ბედნიერი შემთხვევის წყალობით, მის სუფრაზე მოვხვდი, აქვე შევხვდი ერთ ერისკაცს, თქვენი კანონების მცოდნეს. არ მახსოვს, რა საბაბით მონახა მან ხელსაყრელი შემთხვევა იმ მკაცრი მართლმსაჯულების ქებისათვის, რომელსაც მაშინ ქურდების მიმართ იყენებდნენ. თურმე ქურდებს, როგორც იგი ჰყვებოდა, ზოგჯერ ოც-ოცად ჰკიდებდნენ ერთ სახრჩობელაზე. მისი სიტყვებით, მით უფრო გასაკვირი იყო ის, რომ, თუ უნინშენელო უმცირესობა ხანდახან დაუძვრებოდა სასჯელს, რაღაც ბოროტი ძალის გავლენით ბევრი მაინც განაგრძობდა ავაზაკობას. მაშინ გავბედე და თავისუფლად დავიწყე ლაპარაკი კარდინალის თანდასწრებით: „აქ არაფერია გასაკვირი. ქურდების ამგვარი დასჯა სცილდება სამართლიანობას და არც სახელმწიფოს მოუტანს რაიმე კარგს. იგი მეტად შემადარწუნებელია ქურდობისათვის სასჯელად და მაინც უსუსურია მის აღმოსაფხვრელად. მართლაც, უბრალო ქურდობა არცთუ ისეთი დიდი დანაშაულია, რომ ქურდს თავი მოჰკვეთონ, ხოლო, მეორე მხრივ, არც ერთი სასჯელი არ არის იმდენად ძლიერი, რომ ძარცვა-გლეჯას გადააჩვიოს ისინი, ვისაც სარჩოს შოვნის არავითარი სხვა საშუალება არ გააჩნია. ამ მხრივ თქვენ, ისევე როგორც ადამიანთა უმრავლესობა მთელ ქვეყნებზე, ალბათ ცუდ მოძღვართ ჰბაძავთ, რომლებიც უფრო დიდი სიამოვნებით წკებლავენ თავიანთ მოსწავლეებს, ვიდრე ასწავლიან. მართლაც, ქურდს მძიმე და მკაცრ სასჯელს ადებენ, მაშინ როდესაც უკეთესი იქნებოდა ეზრუნათ მათთვის ცხოვრების სახსრების აღმოსაჩენად, რათა არავინ იყოს განწირული ისეთი მკაცრი აუცილებლობისათვის, ჯერ მოიპაროს და შემდეგ დაიღუპოს“. ამაზე სამართლისმცოდნემ მიპასუხა: „ამ მხრივ საკმაოდ არის მიღებული ზომები; არსებობს ხელობები, არსებობს შიშათმოქმედება; მათი საშუალებით შეიძლება თავის გატანა, თუკი ადამიანები თვითონ არ მოისურვებენ ცუდ გზაზე დადგომას“. მე ვუპასუხე: „არა, ასე ადვილად ვერ მოგეშვებით. თავი დავანებოთ პირველ რიგში იმათ, ვინც სხვა ქვეყნებთან ლაშქრობიდან ან სამოქალაქო ომიდან სახლში ხშირად ხეიბრად ბრუნდება, როგორც ეს თქვენთან ახლახან მოხდა კორნუელთან და ცოტა უფრო ადრე — გალიასთან ბრძოლის შემდეგ<sup>33</sup>. სახელმწიფოსა და მეფისა-

თვის ოცში დასახიჩრების შემდეგ მათ აღარ ძალუძთ ძველ საქმიანობას დაუბრუნდნენ, ხოლო ასაკი ახლის შესწავლის საშუალებას აღარ იძლევა, მაგრამ თავი დავანებოთ ამას, რადგან ომები მაინც დროის გარკვეულ მონაკვეთში ხდება ხოლმე. მოდი განვსაჯოთ ის, რაც ყოველდღიურია. ჭერ ერთი, არსებობს წარჩინებულთა უმრავლესობა. ისინი მამალი ფუტკრებივით უქმად, სხვისი შრომით ცხოვრობენ, სახელდობრ, თავიანთი მამულების იჯარაღართა ხარჯზე, რომლებსაც შემოსავლის გადიდების მიზნით ტყავს აძრობენ. აქ ასეთ სასტიკ სიძუნწეს იჩენენ ეს ადამიანები, ისე კი გალატაკებამდე ხელგაშლილები არიან. ეს კიდევ არაფერი, ისინი გარშემო იკრებენ პირად მცველთა უზარმაზარ ბრბოს<sup>34</sup>, რომლებსაც არასოდეს არსად არ უსწავლიათ სარჩოს მოპოვების არანაირი ხერხი. მაგრამ საკმარისია ბატონი მოკვდეს ან ეს მსახურები დასნეულდნენ, მათ მაშინვე გარეთ ისვრიან; ბატონები უსაქმურებს უფრო დიდი სიამოვნებით ინახავენ, ვიდრე ავადმყოფებს. ხშირად გარდაცვლილის მემკვიდრეს არ ძალუძს მამისეული ჯალაბის რჩენა. და, აი, ისინი განწირულნი არიან შიმშილისათვის, თუ ყაჩაღობაზე არ გადავიდნენ. მართლაცდა, რაღა დარჩენიათ მათ? როცა ისინი უქმად ხეტიალში რამდენიმე ხელ ტანსაცმელს გაცვეთენ და ზედ თავის ჭანმრთელობასაც მიაყოლებენ, მაშინ დასნეულებულთა და დამონძილთა მიღებას კეთილშობილნი არ მოისურვებენ, გლეხები კი ვერ გაბედავენ. ამ უკანასკნელებმა კარგად უწყიან ისინიც, ვინც აზიხად არიან გაზრდილნი უსაქმურობასა და ფუფუნებაში, მიჩვეულნი არიან დაშნას ცალ გვერდზე და ფარს მეორე ხელში, ამაყად უმზერენ მიწობლებს და საკუთარ თავთან შედარებით სხვები ჩირადაც არ უღირთ. ასეთი ადამიანი სულაც არ არის იმისთვის მზად, რომ წერაქვითა და სახნისით ხელში მცირე გასამრჯელოსა და მწირი საკმლისათვის ემსახუროს ღარიბებს“. ამაზე სამართლისმცოდნემ მოგვიგო: „ჩვენ განსაკუთრებით უნდა შევეუწყოთ ხელი ამგვარ ხალხს, მათში ხომ, როგორც უფრო ამაღლებული და კეთილშობილი განწყობილების ხალხში, უფრო მეტად, ვიდრე მიწის მუშებსა და ხელოსნებში (იმ შემთხვევაში, თუ საქმე ომამდე მივა), თავმოყრილია ლაშქრის მთავარი ძალა და სიმტკიცე!“.

„რასაკვირველია, — ვუპასუხე მე, — მაშინ ასევე შეგიძლიათ თქვათ, რომ ოპის მხარდასაპერად საქაროა ქურდების ხელისშეწყობაც, რასაც ვერასოდეს დააღწევთ თავს, სანამ ეს ხალხი გვეყოლებათ. რატომ ავაზაყებს არ შეუძლიათ გახდნენ ჯარისკაცები, ხოლო ჯარის-

კაცებს ავაზაკები, იმდენად ბევრი რამ აქვს საერთო ამ ორ საქმიანობას? თქვენში ქურდობის გავრცელების მიუხედავად, ეს მანკიერება არ წარმოადგენს თქვენს განმასხვავებელ თავისებურებას: იგი საერთოა თითქმის ყველა ხალხისათვის. რაც შეეხება გალიას<sup>35</sup>, მას ალტაკებს კიდევ ერთი ჭირი: მთელი ქვეყანა მშვიდობიანობის დროსაც კი (თუკი ამას მშვიდობიანობა ჰქვია) საესეა და გარშემორტყმულია დაქირავებული ჯარისკაცებით, რომლებიც მოწვეულნი არიან იმავე რწმენის ძალით, რომლის გავლენითაც თქვენ საქიროდ ჩათვალეთ აქ, ამ უსაქმო მსახურების დაქირავება. მართლაცდა, ამ ქვეყანი უგნურების აზრით, სახელმწიფოს კეთილდღეობა მდგომარეობს იმაში, რომ ყოველთვის მზად ჰყავდეს ძლიერი და მტკიცე თავდაცვა, რომელიც ძირითადად ვეტერანებისაგან შედგება. ეს ვაი-მოღვაწენი არ ენდობიან ახალწვეულებს. ამიტომ მათ უხდებათ ომის საბაბის ძებნა, თუნდაც იმისთვის, რომ ჯარისკაცებს გამოცდილება შესძინონ, ანდა საერთოდ ჰყავდეთ ხალხი ხოცვა-ჟლეტისთვის მზად. სხვაგვარად (სალუტიუსის<sup>36</sup> გონებამახვილური ნათქვამისა არ იყოს) მათი გონება და სული უმოქმედობისაგან გახვედება.

გალიამ საკუთარ უბედურებაზე გამოსცადა, თუ რამდენად დამლუპველია ასეთი ურჩხულების შენახვა. ამასვე ამტკიცებენ რომაელთა, კართაგენელთა, სირიელთა და საერთოდ სხვა მრავალი ხალხის მაგალითები. ამ ხალხთა მუდმივმა ჯარებმა სხვადასხვა მიზეზით გაანადგურეს არა მარტო მათი უმადლესი ხელისუფლება, არამედ შთანთქმეს დიდი სივრცეები და თვით ქალაქებიც. თუ რამდენად არ არის ეს აუცილებელი, კარგად ჩანს შემდეგი მაგალითიდან: თვით გალიელი ჯარისკაცებიც კი, ბრძოლებში ბავშვობიდან გამობრძმედილნი; თქვენს ახალწვეულებთან შეტაკებისას ხშირად ვერ დაიკვეცნიან გამარჯვებას. თუმცა მე აღარ გავაგრძელებ ამასე საუბარს თქვენი თანდასწრებით, რათა მლიქვნელობაში არ ჩამომართვათ. მაგრამ არა მგონია თქვინთანაც არისტოკრატთა უქმი მცველები მაინდამაინც დიდი შიშის ზარს სცემდნენ ქალაქის ხელოსნებს ანდა უბრალო და მოუქნელ მიწათმოქმედთ, გარდა ზოგიერთისა, ვინც თავისი აგებულებით, განსაკუთრებული ფიზიკური ძალითა და სიჩაუქით არ გამოირჩევა, ანდა ვისი სიმხნევეც სიღარიბეს გაუტეხია. ამიტომ არავითარი საფუძველი არა გვაქვს გვეშინოდეს, რომ ეს ფიზიკურად ძლიერი ადამიანები (არისტოკრატის წამხდარ ყურადღებას ხომ მხოლოდ რჩეულნი იმსახურებენ), რომლებიც ახლა უსაქმურობით ანდა თითქმის დიაცის შესაფე-

რისი საქმიანობით მისუსტებულან, ვერ დადგებიან ვაჟკაცები, თუკი სასარგებლო ხელობას ისწავლიან ან კაცურ საქმეში ჩაებმებიან. ყოველ შემთხვევაში, სულაც არ მიმაჩნია სახელმწიფოსათვის სასარგებლოდ ამგვარ ადამიანთა ურიცხვი ბრბოს შენახვა მხოლოდ იმ ომის მოლოდინში, რომელიც არასოდეს გექნებათ თქვენი ნება-სურვილის გარეშე; ისინი ზიანს აყენებენ მშვიდობას, რომლისთვისაც, ვფიქრობ, გაცილებით მეტი ზრუნვაა საჭირო, ვიდრე ომისთვის. მაგრამ ეს მაინც არ არის ქურდობის ერთადერთი მიზეზი. არის მეორე მიზეზი, რომელიც, როგორც ვფიქრობ, უფრო მეტადაა დამახასიათებელი თქვენთვის“. რომელი? — იკითხა კარდინალმა. „თქვენი ცხვრები, — ვუბახუხე მე, — ჩვეულებრივ ასეთი უწყინარნი და მცირედითაც კმაყოფილნი, ახლა (როგორც ამბობენ) კი ისეთი გაუმადლარნი და დაუოკებელნი გამხდარან, რომ ადამიანებსაც კი ჭამენ, ანადგურებენ და მუსრს ავლებენ მინდვრებს, სახლებს, ქალაქებს. სახელდობრ, სამეფოს იმ ნაწილში, სადაც უფრო ნაზ და ამიტომ ძვირფას მატყლს ამუშავებენ, წარჩინებული არისტოკრატები და თვით ზოგიერთი აბატიც კი, წმინდა მამა, არ სჭერდებიან იმ ყოველწლიურ შემოსავალსა და ნამატს, რომელიც ჩვეულებრივ იზრდებოდა მათი წინაპრების მამულების შემოსავლის ხარჯზე. არ კმაყოფილდებიან იმით, რომ მათ უსაქმო და ფუფუნებაში ცხოვრებას არათუ არავითარი სარგებლობა აღარ მოაქვს საზოგადოებისათვის, კიდევაც ზიანს აყენებს მას. ამიტომ თავიანთ მამულებში ისინი აღარაფერს ტოვებენ სახნავად — ყველაფერს საძოვრებად აქცევენ, სპობენ სახლებს, ანგრევენ ქალაქებს, ტაძრებს კი მხოლოდ ცხვრების სადგომად ტოვებენ. ეს „უწყინარი“ ადამიანები ყოველგვარ დასახლებას და დამუშავებული მიწის თითოეულ გოჯს უღაბნოდ აქცევენ, თითქოს უამისოდ თქვენთან ცოტა მიწა იკარგებოდეს ნადირთა სადგომებისა და სამხეცეთათვის ამრიგად, მას შემდეგ<sup>37</sup>, რაც მხოლოდ ერთი ღორმუცელა, ქვეყნის გაუმადლარი და სასტიკი წყლული ანადგურებს მინდვრების საზღვრებს, ერთიანი ღობით ფარგლავს რამდენიმე ათას აკრს, იგი ქუჩაში ყრის ზოგიერთ იჯარადარს, მოტყუებით ან ძალადობით ართმევს მას საკუთარ ქონებასაც კი, ანდა შეურაცხყოფილს აიძულებს გაყიდოს იგი. ყველა შემთხვევაში ხდება გაუბედურებული უსახლკაროების — კაცების, ქალების, ქმრების, ცოლების, ობლების, ქერივების, მცირეწლოვან შვილებიანი მშობლების გადასახლება თავისი მრავალრიცხოვანი ჯალაბით — ხენათესევა ხომ დიდძალ მუშახელს მოითხოვდა. ისინი, ვიმეორებ, იძულებულნი

არიან აიყარონ ნაცნობი და შეჩვეული ადგილებიდან და გადაიხვეწონ უცხო მხარეში. მთელ თავიანთ ღარიბულ ავლადიდებას მაშინაც კი, მყიდველი რომც იყოს და დაცდა შეიძლებოდეს, ისინი ჩალის ფასად ყიდნიან, რადგან იძულებულნი არიან მოიცილონ იგი და როცა ხეტი-ალში უცებ ესეც დაეხარჯებათ, სხვა რაღა რჩებათ, თუ არა ქურდობა და დამსახურებულად სახრჩობელაზე მოხვედრა, ანდა წანწალი და მათხოვრობა? თუმცა ამ შემთხვევაშიც, როცა მაწანწალები ციხეში ზვდებიან უქმად ხეტილისათვის, მათ მარჯვენას არავინ ჭირაობს, მიუხედავად იმისა, რომ ისინი თავგამოდებით სთავაზობენ თავიანთ თავს ყველას. სოფლის სამუშაოებს კი, რომელსაც ისინი ბავშვობიდანვე არიან შეჩვეულნი, რა უნდა იქ, სადაც არაფერს თესავენ. საკმარისია მხოლოდ ერთი ნაგაზის ან მეცხვარის გამოჩენა, რომ ის მიწა, რომლის დასათესად და სათანადოდ დასამუშაებლად ამდენი შუშახელი იყო საჭირო, საძოვრად გადაიქცეს. ამის გამო ბევრგან უსაშველოდ გაიზარდა აგრეთვე პურის ფასი. გარდა ამისა, თვით მატყლის ფასმაც ისე მოიმატა, რომ მისი შესყიდვა სრულიად შეუძლებელი გახდა იმ ღარიბი ხალხისათვის, ვინც მისგან ტანსაცმლის დამზადებას მისდევდა. ამიტომ მათი უმრავლესობაც ამ საქმეს თავს ანებებს და უსაქმურების რიცხვს ემატება. საქმე ისაა, რომ საძოვრების გაზრდის შემდეგ ცხვრის ურიცხვი რაოდენობა დაიღუპა ჭირისაგან, თითქოსდა ეს ჭირი ზეცამ მიუზღო მათ გაუმაძღრობისათვის. უფრო სამარლიანი კი იქნებოდა ჭირი ცხვრის მესაკუთრეებს შეჭყროდათ. მაგრამ ცხვრის რაოდენობა ძალიანაც რომ გაიზარდოს, მატყლის ფასი მაინც არ დაეცემა, ვინაიდან თუკი მის გაყიდვას არ შეიძლება მონოპოლია ეწოდოს, რადგან მას მხოლოდ ერთი პიროვნება არ მისდევს, მაშინ ყოველ შემთხვევაში ოლიგოპოლია<sup>აჰ</sup> მაინცაა. ეს საქმე ხომ მცირერიცხოვან და, ამასთან, მდიდარ ადამიანთა ხელში მოხვდა, რომლებსაც არავითარი აუცილებლობა არ აიძულებს გაყიდონ ცხვარი უფრო ადრე, ვიდრე ეს მათთვის ხელსაყრელი არ იქნება. მათ კი ეს არ მოესურვებათ, ვიდრე მათთვის სასარგებლო დრო არ დადგება. იგივე მიზეზი იწვევს საქონლის სხვა ჯიშების ერთნაირ სიძვირესაც და თანაც მით უფრო, რომ მამულთა რღვევისა და ხვნა-თესვის შეზღუდვასთან ერთად აღარ რჩება არავინ, ვინც საქონლის მომატებაზე იზრუნებდა. მდიდრები არც ბატკნებს ზრდიან და არც ხბოებს, ისინი ყიდულობენ მათ სხვაგან იაფად, ასუქებენ თავიანთ საძოვრებზე და შემდეგ ძვირად ყიდიან. მე. ვფიქრობ, ამგვარი მდგომარეობის მთელი სიმძიმე სათანა-

დოდ ჯერ კიდევ არ იგრძნობა, ვინაიდან ეს პირები საქონლის სიძვირეს მხოლოდ იქ ქმნიან, სადაც ყიდიან მას, მაგრამ როდესაც გაიტანენ შესყიდვის ადგილიდან უფრო სწრაფად, ვიდრე ის გამრავლებას შეძლებს, მაშინ მისი მარაგი იქაც თანდათანობით შემცირდება და ძალუწებურად მისი ნაკლებობა მეტად საგრძნობი გახდება.

ამრიგად, ერთი მუჟა ადამიანების გაუმადლობამ თქვენი კუნძულის დამლუპველად აქცია სწორედ ის, რის გამოც იგი განსაკუთრებით ბედნიერი ჩანდა. პურის ეს სიძვირე იმის მიზეზი გახდა, რომ ყველა გარეთ აგდებს რაც შეიძლება მეტ ადამიანს, მაგრამ საკითხავია, ვანა ეს სილატაკისკენ ან, რაზედაც უფრო ადვილად თანხმდებიან კეთილშობილი პირები, ძარცვა-გლეჯისკენ არ უბიძგებს მათ?

ამასთანავე ამ საცოდავ სილატაკესა და სიბეჩავეს ემატება უსაზღვრო ფუფუნება. დიდკაცების მსახურებსაც, ხელოსნებსაც და თვით გლეხებსაც კი, ერთი სიტყვით, ყველა წოდების ხალხს ტანსაცმელსა და ქამა-სამაში ზედმეტი ფუფუნება ეტყობა. ვანა პირდაპირ ძარცვა-გლეჯისკენ არ უბიძგებენ თავიანთ თაყვანისმცემლებს მათი საფულებების წინასწარ და სწრაფად დაცარიელების შემდეგ ეს სამიკიტნოები, სარდაფები, მეძავთა სახლები და ისევ სამეძაოები ღვინისა და ლუდის ჭიხურების სახით? და ბოლოს ამდენი უწყესო თამაში — ზარი, ბანქო, დისკო და სხვა?

მოცილებთ ეს დამლუპველი წყალები, დააწესეთ, რომ ფერმებისა და სოფლების განმანადგურებლებმა ან ალაღვიონ იქინი, ანდა დააცადონ მათ, ვისაც სურს აღდგენა და აშენება. შეუზღუდეთ მდიდრებს შესყიდვის უფლება, აუკრძალეთ თვითნებობა, რომელიც მონოპოლიაში გადადის, ნაკლები მუქთახორა არჩინეთ. ალაღვიეთ მიწათმოქმედება, განაახლეთ მატყლის დამუშავება, დაე, ის საპატიო საქმედ იქცეს! დაე, სარგებლობა მოჰქონდეს მას უსაქმური ბრბოსათვის, იმათთვის, ვინც აქამდე სიღარიბემ ქურდებდად აქცია, ან იმათთვის, ვინც ახლა მაწანწალაა და უსაქმური მსახური — ორივე ხომ მომავალი ქურდია. თუ თქვენ ვერ უმკურნალებთ ამ სატიკვარს, მაშინ ტყუილუბრალოდ დიეტრებაზეთ ქურდობის დასჯაში გამოცდილი თქვენი მართლმსაჯულებით, რომელიც უფრო გარეგნულად არის შთამბეჭდავი, ვიდრე სამართლიანი და სასარგებლო. თუ რომელიმე თქვენგანი ადამიანებს აძლევს შესანიშნავ აღზრდას, თანდათანობით სიყრმიდანვე აფუჭებს მათ ზნეობას, ხოლო სასჯელის ღირსად მათ თვლით მხოლოდ მაშინ, როდესაც ისინი, უკვე მოწიფულ ასაკში, სამარცხვინო

საქმეებს სჩადიან, მაგრამ ეს ხომ მათგან თავიდანვე იყო მოსალოდ-  
ნელი. ასეთი ქცევით თქვენ ხომ ქურდებს კიდევაც კმნით და იმავე  
დროს კიდევ სჯით?”

ამ ჩემი სიტყვის პასუხად ზემოხსენებული სამართლისმცოდნე  
გულმოდგინედ მოემზადა და გადაწყვიტა მიემართა მსჯელობის იმ ჩვე-  
ულებრივი ხერხისათვის, როცა უფრო დიდი გულმოდგინებით იმე-  
ორებენ მოწინააღმდეგის მტკიცებას, ვიდრე პასუხს სცემენ მათ; ასეთ  
მოპასუხეთა დამსახურების საწინდარი პირველ რიგში მათი კარგი  
მახსოვრობაა. „შენ, რა თქმა უნდა, ლამაზად ილაპარაკე, — თქვა  
მან, — მაგრამ ადვილია იმის მიხვედრა, რომ შენ უცხოელი ხარ, რო-  
მელსაც უფრო ადვილად შეეძლო რაიმე ყურმოკრულად სცოდნოდა  
ამ საქმეების შესახებ, ვიდრე მათზე რაიმე ზუსტი ცნობა ჰქონოდა,  
ამას სულ ადვილად დაგიმტკიცებ. პირველ რიგში თანამიმდევრობით  
ჩაპოვთვლი ყველა შენს მოსაზრებას, შემდეგ კი გიჩვენებ, რომელ  
პუნქტში შეცდი ჩვენი საქმეების არცოდნის გამო და, ბოლოს, გავა-  
ნადგურებ შენს ყველა დებულებას. დაპირებისამებრ, დავიწყებ პირ-  
ველიდან: შენ, როგორც მომეჩვენა, ოთხ პუნქტში..“ „გაჩუქდი, —  
შეაწყვეტინა კარდინალმა, — რადგან შენ ასე იწყებ, ჩანს, მოკლედ  
არ აპირებ პასუხის გაცემას. ამიტომ ჩვენ გაგათავისუფლებთ ამჟამად  
ამ მძიმე პასუხისაგან, მაგრამ ამ ამოცანას გადასაწყვეტად მთლიანად  
გიტოვებთ ჩვენი მორიგი შეხვედრისათვის. მე ვისურვებდი ამ შეხვე-  
დრას ხვალვე, თუკი არაფერი შეგიშლით ხელს არც შენ და არც რა-  
ფაელს. ამასთანავე, ჩემო რაფაელ, მე დიდი სიამოვნებით მოვისმენდი  
შენგან, რატომ არ მიგაჩნია საჭიროდ ქურდობის დასჯა სასჯელის  
უმაღლესი ზომით და რას დააწესებდი მის მაგივრად. ხომ არ მიგაჩნია  
ქურდობა მოსათმენად? და თუკი ახლა ადამიანები სიკვდილით დასჯის  
მიუხედავადაც კი ქურდობენ, ამ საშიშროების მოსპობის შემთხვევა-  
ში რა ძალა დააკავებთ ბოროტმოქმედთ? სასჯელის შემსუბუქებას  
ისინი ალბათ ისე შეხედავენ, როგორც ხელშეწყობასა და ბოროტ-  
მოქმედებისაკენ მიპატივებას“.

„ყოველ შემთხვევაში, მოწყალეო მეუფეო, — ვუპასუხე მე, —  
ჩემი აზრით, სრულიად უსამართლოა ფულის წართმევისათვის ადამი-  
ანს სიცოცხლე წაართვა. მიმაჩნია, რომ ერთი ადამიანის სიცოცხლაც  
არ შეიძლება შეედაროს მთელი ქვეყნიერების სიმდიდრეს, ხოლო თუ  
კი მეტყვიან, რომ ეს სასჯელი არის შურისძიება არა ფულისთვის,  
არამედ სამართლიანობის შებღალვისათვის, კანონების დარღვევისა-

თვის, მაშინ რატომ არ შეიძლება ამ უმაღლეს სამართალს უმაღლესი უსამართლობა ვუწოდოთ? მართლაცაა, როგორ შეიძლება მოვიწონოთ მანლიუსის კანონები<sup>39</sup>, რომლებიც მოგვიწოდებენ მახვილის აღმართვას წესრიგის უმნიშვნელო დარღვევისათვისაც კი, და გასაკიცხია სტოელთა<sup>40</sup> ის დებულებანიც, რომლებიც ყოველგვარ შეცოდებას იმდენად ერთნაირად თვლიან, რომ, მათი აზრით, არავითარი განსხვავება არ არის ადამიანის მოკვლასა და მისთვის გროშის მოპარვას შორის. სინამდვილეში კი ეს ორი დანაშაული, თუ ოდნავ მაინც მიუყერძობებალად განვიხილავთ, არაფრით არა ჰგავს ერთმანეთს. ღმერთი ხომ სასტიკად კრძალავს ადამიანის მოკვლას, ვინც არ უნდა იყოს იგი, ჩვენ კი ასე ადვილად ვუსწრაფებთ სიცოცხლეს მას უმნიშვნელო ფულადი თანხის წართმევისათვის. ხოლო თუ ვინმე მოინდომებდა ამის ახსნას ისე, თითქოს ღვთის ეს შეგონება კრძალავს მკვლელობას ყველა შემთხვევაში, გარდა ისეთისა, როდესაც იგი დაშვებულია ადამიანური კანონებით, მაშინ რაღა უშლის ხელს ადამიანებს ზუსტად ასევე შეუთანხმდნენ ერთმანეთს გარყვნილების, აღვირახსნილობისა და ფიცის დარღვევის შესახებ? ღმერთმა წაგვართვა არა მარტო სხვისი მოკვლის უფლება, არამედ საკუთარი თავისაც კი. მაშ, განა ადამიანთა მიერ მიღებულ შეთანხმებას ერთმანეთის მოკვლის შესახებ, რომელიც გარკვეულ სამართლებრივ პირობებში მიიღეს, ისეთი ძალა აქვს, რომ მის შემსრულებლებს ათავისუფლებს ღვთის ამ შეგონებისაგან? ისინი ხომ ღმერთის ყოველგვარი მითითების გარეშე კლავენ მას, ვისაც განაჩენი ადამიანთა მსჯავრმა გამოუტანა? ხომ არ იქნება ღვთის ეს შეგონება უფლებამოსილი მხოლოდ იმდენად, რამდენადაც ამას ადამიანური სამართალი დაუშვებს? ეს თუ ასეა, ადამიანებს ამგვარადვე შეუძლიათ საერთო დადგენილების მიღება იმაზე, თუ რამდენადაა საჭირო ღვთის სხვა მცნებათა შესრულება. დასასრულ, მოსეს კანონიც, მთელი მისი უმოწყალობისა და სიმკაცრის მიუხედავად (ის ხომ მონათა და თანაც ჯიუტ მონათა წინააღმდეგ იყო გამოცემული), ქურდობისათვის მაინც ფულადი გადასახდელით სჯიდა ადამიანს და არა სიკვდილით. არ უნდა ვიფიქროთ, რომ მოწყალების ახალ კანონში, რომელშიც ღმერთი ისე გვარიგებს, როგორც მშობელი შვილებს, იგი მეტ თავისუფლებას გვაძლევს ერთმანეთის წინააღმდეგ გასალაშქრებლად.

ამიტომ მიმაჩნია, რომ სიკვდილით დასჯა დაუშვებელია, ხოლო თუ რამდენად უაზროა და დამღუპველიც სახელმწიფოსათვის ქურ-



დისა და მკვლელის ერთნაირად დასჯა, ეს, მგონი, ყველასათვის გასაგებია. რაკი მძარცველმა იცის, რომ მარტო ქურდობისათვის მას იგივე სასჯელი ელის, რაც მკვლელობისათვის, ესეც უბიძგებს მას იმის მოკვლისკენ, ვისაც მხოლოდ გაძარცვავდა სხვა გარემოებაში. მართლაც, დაჭერის შემთხვევაში საფრთხე მისთვის სრულიადაც არ იზრდება, ხოლო მკვლელობის შემთხვევაში მცირდება კიდევ, ვინაიდან დანაშაულის მოწმის მოსპობის მერე მიმალვა უფრო ადვილია. ამიტომ ქურდებს მეტისმეტი დაშინების სურვილით კარგი ადამიანების მოსპობისაკენ უფრო ვუბიძგებთ.

რაც შეეხება ჩვეულებრივ შემდეგ კითხვას, თუ როგორი სასჯელია უფრო შესაფერისი, ამაზე პასუხის გაცემა, ჩემი აზრით, გაცილებით ადვილია, ვიდრე იმაზე, თუ როგორი სასჯელი შეიძლება იყოს უფრო სასტიკი. რატომ უნდა დაგვაეჭვოს ჩვენ დანაშაულისათვის მიგებული იმ სასჯელის საკმარისობამ, რომელსაც, როგორც ვიცით, ასე დიდი ხანია მიმართავდნენ რომაელები, სახელმწიფოს მართვის ამოღენა გამოცდილება რომ ჰქონდათ. დიდ ბოროტმოქმედთ ისინი ქვის სამტეხლოებსა და საბადოებში გზავნიდნენ, თანაც სამუდამო ბორკილებს ადებდნენ.

თუმცა ესეც უნდა ითქვას, რომ, ამ მხრივ, არსად არ შევხვედრით ვარ უკეთეს წესებს, ვიდრე ეს სპარსეთში<sup>41</sup> მოგზაურობისას ვნახე. აქ ცხოვრობს ერთი, არცთუ ისე პატარა, სავსებით მოწესრიგებული ხალხი — პოლილერიტები<sup>42</sup>. იმ ხარკის გარდა, რომელსაც ყოველწლიურად უხდის სპარსეთის მეფეს, ეს ხალხი თავისუფალია და მხოლოდ საკუთარ კანონებს ემორჩილება. პოლილერიტები ზღვისაგან მოშორებით ცხოვრობენ, თითქმის ყოველმხრივ მთებით გარშემორტყმულ ადგილზე. ისინი სჯერდებიან თავიანთი ქვეყნის მოსავალს, რომელიც არც ისე მწირია, თვითონაც იშვიათად დადიან სხვაგან და არც სტუმრები ჰყავთ ხშირად; უძველესი ეროვნული ჩვეულებისამებრ, ისინი არ ცდილობენ თავიანთი საზღვრების გაფართოებას, დაცვით კი კარგად იცავენ მთებისა და იმ გადასახადის წყალობით, რომელსაც თავიანთ მზრუნველს უხდიან. თვითონ სრულიად თავისუფალნი არიან სამხედრო სამსახურისაგან. მართალია, პოლილერიტები ფუფუნებაში ვერ ცხოვრობენ, მაგრამ ბედნიერად კი გრძნობენ თავს. იმდენად წყნარად და უშფოთველად მიდის მათი ცხოვრება, რომ მათი არსებობა მხოლოდ ახლო მეზობლებმა თუ იციან.

პოლიტიკები თავიანთ ქვეყანაში ნაქურდალს პატრონს უბრუნებენ და არა მეფეს, როგორც ეს ჩვეულებრივ ხდება სხვაგან. მათი აზრით, მეფეს იმდენივე უფლება აქვს ნაქურდალ ნივთზე, რამდენიც ქურდს. თუ ნაქურდალი დაიკარგება, შეფასების შემდეგ მის ღირებულებას ქურდების ქონებიდან გამოჰკითავენ, დანარჩენს კი მთლიანად უტოვებენ მათ ცოლ-შვილს. თვით ქურდებს საზოგადოებრივად სასარგებლო შრომა ეკისრებათ. თუ ქურდონა არ არის დამძიმებული სხვა დანაშაულით, მაშინ მძარცველებს არ სვამენ ციხეში, არც ბორკილებს ადებენ, ისინი თავისუფლად მუშაობენ, მაგრამ თუ დამნაშავენი თავს არიდებენ შრომას ან მათ უგულობას შეამჩნევენ, მაშინ ცემით უფრო აიძულებენ საქმის გაკეთებას, ვიდრე ბორკილებით. იმას, ვინც ბეჭითად იშრომებს, არაფერ არ შეურაცხყოფს. მათ დამდამობით სათითაოდ ამოწმებენ და საკნებში შეჰყავთ. გარდა იმისა, რომ მუდმივი შრომა აქვთ მისჯილი, მათი ცხოვრება სხვა მხრივ არ არის აუტანელი. ისინი ცუდად არ იკვებებიან: სახელმწიფოს სასარგებლოდ ვინც შრომობს, სახელმწიფოს ხარჯზეა, სხვა შემთხვევებში კი სხვადასხვაგვარად. ზოგჯერ მათი ხარჯებისათვის ფული შემოწირულებათა სახით იკრიბება. მართალია, ეს გზა არცთუ ისე საიმედოა, მაგრამ, ამ ხალხისათვის დამახასიათებელი გულმოწყალების გამო, იგი სხვაზე უკეთეს შედეგს იძლევა. სხვაგან ამ დანიშნულებისათვის გამოჰყოფენ გარკვეულ საზოგადოებრივ შემოსავალს, ზოგან კი საყოველთაო გადასახადს აწესებენ. არის ისეთი ადგილებიც, სადაც დამნაშავენი არაერთარ საზოგადოებრივ შრომას არ ასრულებენ, მაგრამ თუ ამა თუ იმ კერძო პირს ესაქიროება დაქირავებული მუშები, იგი ქირაობს ბაზარზე ნებისმიერ მათგანს გარკვეული საფასურით და შედარებით იაფად, ვიდრე თავისუფალ ადამიანს. გარდა ამისა, მონა (ასე უწოდებენ დამნაშავეს) სიზარმაცისათვის მათრახითაც შეიძლება დაისაჯოს.

საბოლოოდ ქურდები არაღოდეს არ არიან თავისუფალნი შრომისაგან და, საკუთარი თავის შესანახად მიღებული გასამრჯელოს გარდა, მათ შეაქვთ კიდევ გარკვეული თანხა სახელმწიფო სალაროში. მონებს ერთი რომელიმე ფერის ტანსაცმელი აცვიათ, თმას მათ არ პარსავენ, მხოლოდ კრეკენ ყურებზე ცოტა ზემოთ, ერთ-ერთ ყურს კი ოდნავ უმოკლებენ. მეგობრებს შეუძლიათ ყოველ მათგანს მიაწოდონ საკვები, სასმელი და შესაფერისი ტანსაცმელი, მაგრამ ფულის მიცემა მათთვის სისხლის სამართლის დანაშაულად ითვლება, როგორც იმისათვის, ვინც მისცემს, ისე იმისათვის, ვისაც აძლევენ. თავისუფალი ადამიან-

ნისათვის არანაკლებ სახიფათოა ფულის მიღება დამნაშავისაგან. გარდა ამისა, მონებს ეკრძალებათ იარაღის ტარება. თითოეული ოლქი თავის მონებს განსაკუთრებული ნიშნით განასხვავებს, მისი უგულებელყოფა სისხლის სამართლის დანაშაულად ითვლება, ისევე როგორც საკუთარ საზღვრებს იქით გამოჩენა და სხვა ოლქის მონასთან საუბარი. გაქცევაზე ფიქრიც კი ისევე სახიფათოა, როგორც თვით გაქცევა. ამგვარ გადაწყვეტილებაში თანამონაწილეობისათვის მონას მიესჯება სიკვდილი, თავისუფალს — მონობა, მაცნეს კი — ჯილდო, ამასთანავე, თავისუფალს — ფული, მონას — თავისუფლება, თანაც ორივეს — შეწყალება და არავითარი სასჯელი თანამონაწილეობისათვის; ამრიგად, ავი განზრახვის შესრულებისა და თუნდაც გაფიქრებისათვის საფრთხე ერთნაირია. კანონები და წესები ქურდობისათვის კი ისეთია, როგორც ზემოთ აღვნიშნე. ადვილი შესამჩნევია, რამდენად ჰუმანური და მისაღებია ისინი. განრისხება აქ მკლავდება იმდენად, რამდენადაც საჭიროა მანკიერებათა აღმოსაფხვრელად; თვითონ ადამიანები კი უვნებლად რჩებიან და ირგვლივ ისეთი პირობებია შექმნილი, რომ მათთვის აუცილებელი ხდება გამოსწორება და დარჩენილი სიცოცხლის მანძილზე იმ ბოროტების გამოსყიდვა, რომელიც სხვებს მიაყენეს. არც იმის არავითარი საშიშროება არის, რომ ისინი თავიანთ ძველ საქმეს დაუბრუნდებიან. უფრო მეტიც, აქ მგზავრები თავს უშიშრად მაშინ გრძნობენ, როცა მათი გამყოლები სწორედ ეს მონები არიან; მონებს კი ისინი რამდენჯერმე იცვლიან სხვადასხვა ოლქში. მართლაცდა, ძარცვა-გლეჯისათვის მონები ვერავითარ ხელშეწყობას ვერ ხედავენ: იარაღი არა აქვთ, ფულს მათთვის მხოლოდ უბედურება მოაქვს, დაპერის შემთხვევაში კი სიკვდილი არ ასცდებათ, არც სადმე გაქცევის არავითარი იმედი აქვთ. ანდა როგორ შეიძლება შეუმჩნევლად და ფარულად გაიქცეს ადამიანი, რომლის ტანსაცმელი ამდენად გამოირჩევა სხვებისაგან. შიშველი ხომ არ გაიქცევა? მაგრამ ამ შემთხვევაშიც გაქცეულს მისი ყური გასცემს. დასასრულ, შეიძლება კიდევ შეიქმნას იმის საშიშროება, რომ ისინი მოინდომებენ სახელმწიფოს წინააღმდეგ შეთქმულების მოწყობას, თითქოსდა რომელიმე ცალკეულ ოლქს შეიძლება გაუჩნდეს ასეთი სურვილი წინასწარ სხვა ოლქების მონებთან შეუთანხმებლად და დაუკითხავად. მაგრამ არათუ შეთქმულება მოაწყონ, მათ მისაღმებაც და სასაუბროდ შეკრებაც აკრძალული აქვთ. აქვე უნდა ვაღიაროთ, რომ ისინი უშიშრად გაანდობენ თავიანთ ამხანაგებს მხოლოდ ისეთ გეგმას, რომლის დაფარვაც,

როგორც ცნობილია, სახიფათოა, ხოლო გაცემა — ძალიან ხელსაყრელი. მეორე მხრივ, არც ერთ მონას არ დაუკარგავს იმის იმედი, რომ თუ იგი მორჩილი და თავმდაბალია, თავისი შეცდომის გამოსწორებას ცდილობს, შეიძლება თავისუფლება დაუბრუნონ. სწორედ ასე აჯილდოებენ ყოველწლიურად რამდენიმეს მათი მოთმინებისადმი პატივისცემის ნიშნად“, — ვთქვი და თან დავუმატე, რომ ვერ ვხედავ იმის საფუძველს, თუ რატომ არ შეიძლება ასეთმა მოქმედებამ გაცილებით მეტი ნაყოფი გამოიღოს ინგლისშიც, ვიდრე იმ სამართალმა, რომელსაც ასეთ ქება-დიდებას ასხამდა ხსენებული სჯულის მცოდნე. მაშინ ამ უკანასკნელმა შენიშნა: „არასოდეს არ შეიძლება მსგავსი რამის შემოღება ინგლისში, რადგან ამით სახელმწიფოს უდიდესი საფრთხე დაემუქრება“, — თქვა და თავი გადაიქნია, ტუჩი აიბზუა და გაჩუმდა. ყველა იქ მყოფი მაშინვე დაეთანხმა მის სიტყვებს. მაშინ კარდინალმა თქვა: „ძნელია განქვრეტა, მოჰყვება თუ არა ამას წარმატება, რადგან არავითარი წინასწარი ცდა არ ჩატარებულა. მაგრამ, თუ სასიკვდილო განაჩენის გამოტანისას მეფე ბრძანებს სიკვდილით დასჯის გადადებას, მაშინ შესაძლებელია მათი ჩვეულების გამოყენება და თავშესაფრების უფლებების შეზღუდვა. და, აი, აჰ, თუკი საქმის შედეგი მის სარგებლობას დაამტკიცებს, სწორი იქნებოდა ამ წესის შემოღება; წინააღმდეგ შემთხვევაში იმათი დამსახურებული სიკვდილით დასჯა, ვინც უკვე განიცხულია, ისევე სასარგებლო იქნებოდა სახელმწიფოსათვის და ისევე სამართლიანი, თითქოს იგი აღრევე მომხდარიყოს. ამასთან, ამას არავითარი საფრთხე არ შეიძლება მოჰყვეს. კიდევ მეტიც, ჩემი აზრით, ასეთი ზომების გამოყენება დიდი წარმატებით შეიძლება მაწანწალების მიმართაც. თორემ მრავალრიცხოვანი კანონების გამოცემის მიუხედავად, ჩვენ ვერავითარ შედეგს ვერ მივაღწიეთ მათ ალაგმვაში“.

როგორც კი კარდინალმა თქვა ეს, ყველამ ერთხმად მოიწონა მისი აზრი, მე კი უფრო აღრე ვთქვი იგივე, მაგრამ ჩემს ნათქვამს ათვალისწინებით შეხვდნენ. განსაკუთრებით მოიწონეს კარდინალის აზრი მაწანწალებზე, ვინაიდან ეს უკვე მისი საკუთარი დამატება იყო.

არ ვიცი, უკეთესი ზომ არ იქნება გავჩუმდე იმაზე, რაც შემდეგ მოხდა. ეს სასაცილოა, მაგრამ მაინც გიამბობთ, რადგან არცთუ ისე ურიგო ამბავია და გარკვეული კავშირიც აქვს ამ საგანთან.

ჩემი კამათის ღროს შემთხვევით იქ იდგა ერთი მუქთახორა, რო-

მელსაც, როგორც ჩანს, სულელად უნდოდა მოეჩვენებინა თავი, მაგრამ ვაი, რომ მართლაც ძალიან ჰგავდა მას. მისი ხუმრობა, რომლითაც საზოგადოების გაცინებას ცდილობდა, იმდენად უკბილო იყო, რომ მასზე უფრო ეცინებოდათ, ვიდრე მის სიტყვებზე. მაგრამ, წარმოიდგინეთ, ზოგჯერ მაინც წამოსცდებოდა ხოლმე რაიმე კვიკვიანური, ხომ გაგიგონიათ, ცდა ბედის მონახვერეაო<sup>43</sup>. ერთ-ერთმა სტუმარმა შენიშნა, რომ მე ჩემს სიტყვაში სათანადო ზომები მივიღე ქურდობის საწინააღმდეგოდ, კარდინალმა მაწანწალები ახსენა და ახლა სახელმწიფოს ისლა დარჩენია, მხოლოდ იმათზე იზრუნოს, ვინც სილატაკემდე ავადმყოფობამ ან სიბერემ მიიყვანა და საკუთარი თავის რჩენის უნარი აღარა აქვს. მაშინ ზემოხსენებულმა მუქთახორამ შენიშნა: „ნება მომეცით და ამასაც კარგად მოვაგვარებ. ძალიან მინდა თავიდან მოვიცილო ასეთი ხალხი. ისინი ხშირად მბებზრებენ თავს ფულის გაუთავებელი თხოვნით და შესაწყალებელი ოხვრით, მაგრამ მათ წუწუნს ჩემთვის გროშიც კი არ დაუცინცლავს. ყოველთვის ორიდან ერთი გამოდიოდა: ან მე არ მინდოდა მიმეცა, ანდა არც შემემძლო, რადგან არაფერი გამაჩნდა. ამიტომ ახლა მათ ჰკუა იხმარეს და, როცა ხედავენ, რომ მოვდივარ, თავს აღარ იწბილებენ და ჩუმად მატარებენ. ისინი არაფერს გამოელიან ჩემგან, თითქოს მღვდელი ვიყო. და, აი, შემომამქვს კანონი, რომ ყველა ეს მათხოვარი განაწილდეს და მოთავსდეს ბენედიქტინელთა მონასტრებში<sup>44</sup> — მამაკაცები ბერებად, ხოლო ქალები — მონაზვნებად“. კარდინალმა გაიღიმა, რადგან ეს ხუმრობად მიიღო, დანარჩენებმა კი სინამდვილედ ჩათვალეს.

მაგრამ მღვდლებისა და მონაზვნების შესახებ ამ შენიშვნამ განსაკუთრებით გაამხიარულა ერთი სწავლული ღვთისმეტყველი, თანაც ისე, რომ მასაც მოუნდა გახუმრება, თუმცა მეტად პირქუში კაცი იყო. „მაგრამ ამ შემთხვევაშიც კი, — შენიშნა მან, — თავიდან ვერ მოიშორებ მათხოვრებს, თუ არ იფიქრებ ჩვენზე — ბერებზე“. „ეს ხომ უკვე გათვალისწინებულია, — მიუგო მუქთახორამ — კარდინალმა საუცხოოდ იზრუნა თქვენზე, როდესაც გამოიტანა დადგენილება მაწანწალათა დაკავებასა და შრომაში ჩაბმაზე. თქვენ ხომ მთავარი მაწანწალები ბრძანდებით“. ამ სიტყვებზე ყველამ კარდინალს შეხედა და შეამჩნიეს, რომ იგი არც ცდილობდა ამის უარყოფას. ბერის გარდა ეს შენიშვნა ყველამ დიდი სიამოვნებით მიიღო, იგი კი (რაც არცაა გასაკვირი), გაოცებული ასეთი ენამწარობით, გაშმაგდა და იმდენად გაწიწმატდა, თავი ველარ შეიკავა და მოჰყვა ლანძღვას. მან მოწინა-

აღმდეგვს ცულლუტი, არაზხადა, ცილისწამებელი და წაწყმედის ნა-  
 შიერი უწოდა, თანაც საშინელი მუქარის სიტყვებს იშველიებდა საღე-  
 თო წიგნიდან. მაშინ მასხარამ თავისი ხელობა მთლიანად მოიმარჯვა  
 და ნამდვილ ხუმრობაზე გადავიდა: „ნუ განრისხდები, კეთილო ძმაო,—  
 მიუგო მან, — საღეთო წერილში ნათქვამია: მოთმინებითა თქვენითა  
 მოიპოვეთ სული თქვენიო“. ამაზე ბერმა (ზუსტად დავიგოწმებ მის  
 სიტყვებს) ასე უპასუხა: „მე არ ვბრაზობ, გაიძვერავე; ყოველ შემთხვე-  
 ვაში, არ ვცოდავ. მეფსალმუნეც ამბობს: რისხავდეთ, მაგრამ არა სცო-  
 დავდეთო“<sup>45</sup>. შიშდევ კარდინალმა მორიდებულად ურჩია ორივეს შე-  
 ეკავებიანთ თავი. მაშინ ბერმა შენიშნა: „არა, მეუფეო, მე ისე ვლა-  
 პარაკობ, როგორც უნდა: ვლაპარაკობდე კეთილი განზრახვით“. წმინ-  
 დანებს ხომ კეთილი განზრახვა ჰქონდათ, ამიტომაც ნათქვამი: შენს  
 სახლზე ექვიანობამ შემკამაო<sup>46</sup>, ეკლესიებშიც ხომ გალობენ: „ელა-  
 სეს<sup>47</sup> ვინ დასცინოდა, როს ტაძარში შედიოდა“. მათ შენიშნეს მელო-  
 ტი ელისეს თავგამოდება, — ისევე როგორც ალბათ ეს დამციანავი,  
 მასხარა და უზრდელი ამბობს. „შენ, — უპასუხა კარდინალმა, — ალ-  
 ბათ კეთილი სურვილები გამოძრავებს, მაგრამ უფრო სწორად, ყოველ  
 შემთხვევაში, უფრო გონივრულად მოიქცევი, თუკი არ მოინდომებ  
 სულელ და სასაცილო ადამიანთან გააუქრებას“. „არა, მეუფეო, —  
 უპასუხა მან, — მე არ მოვიქცეოდი უფრო გონივრულად. თვით უბრ-  
 ძნესი სოლომონიც ხომ ამბობს: „სულელს მისი სისულელის მიხედვით  
 უპასუხეო“<sup>48</sup>. „სწორედ ასე ვიქცევი ახლა და მივეუთითებ მას ორმოზე,  
 რომელშიც მალე აღმოჩნდება, თუ კარგად არ გაუფრთხილდა თავს.  
 და თუკი ელისეს მრავალმა მასხარად ამგდებმა ამ ერთადერთი მე-  
 ლოტის თავგამოდება შენიშნა, მაშინ რამდენად უფრო ძლიერად იგრ-  
 ძნობს ამას თავისი ურიცხვი ძმის ერთი მასხარად ამგდები, ძმებისა,  
 რომელთა შორის ბევრია მელოტი? ამასთან ჩვენ პაპის ბულა გვაქვს,  
 რომლის მიხედვით, ყველა, ვინც ჩვენ დაგვცინის, განიკვეთება ეკლესი-  
 იდან“. კარდინალმა იგრძნო, რომ ყველაფერ ამას მალე არ მოეღე-  
 ბოდა ბოლო, მუქთახორას თავი დაუკრა, გაისტუმრა და საუბარი ოს-  
 ტატურად გადაიტანა სხვა თემაზე, ხოლო ცოტა ხნის შემდეგ სუფრი-  
 დან წამოდგა, ჩვენც გამოგვემშვიდობა და მთხოვნელ ხელქვეითთა  
 საქმეებში გაერთო.

„აი, ჩემო ღორ, რა გრძელი ამბით მოგაბეზრე თავი; ძალიან მერი-  
 დებოდა ასე დიდხანს მასლაათი, მაგრამ, ერთი მხრივ, შენ ძალიან გინ-  
 დოდა ეს, ხოლო, მეორე მხრივ, ვამჩნევდი, როგორ ხარბად მისმენდი.

მაგრამ მე, თუნდაც ძალიან მოკლედ, უნდა მომეყოლა ეს შენთვის, ვინაიდან იმავე პირებმა, რომლებმაც უარყვეს ჩემ მიერ გამოთქმული აზრი, მაშინვე მოიწონეს იგი კარდინალის დადებითი შეფასების შემდეგ. ისინი ელაქუტებოდნენ მას იმ ზომამდე, რომ ეპირფერებოდნენ, თვით მისი მუქთახორის მონაჩმასაც კი, რომელიც, თუმცა კარდინალმა ხუმრობად მიიღო, მათ კინაღამ მნიშვნელოვნად მიიჩნიეს. აქედან შენ შეგიძლია განსაზღვრო, თუ რა ფასი გვექნებოდა მე და ჩემს აზრებს კარისკაცთა თვალში“.

„რა თქმა უნდა, ჩემო რაფაელ, — ვუპასუხე მე, — დიდად მასიზოვნე, იმდენად გონივრული და ამავე დროს დახვეწილი იყო შენი სიტყვა. გარდა ამისა, შენი საუბრის დროს თავი სამშობლოში მეგონა, თითქოს ბავშვობა დამიბრუნდა კარდინალის გახსენებაზე, მე ხომ მის კარზე ვიზრდებოდი. ჩემო რაფაელ, თუმცა ყოველთვის ძალიან ძვირფასი იყავი ჩემთვის, არ დაიჭერებ, ახლა კიდევ რამდენი მოგემატა ჩემს თვალში იმის გამო, რომ ასეთი მოწიწებით ეპყრობი ამ კაცის ხსოვნას. მაგრამ, მაინც, ჭერ არავითარ შემთხვევაში არ შემიძლია აზრის შეცვლა. სახელდობრ, თუკი გადაწყვეტ არ მოერიდო ხელმწიფეთა სასახლეებს, მაშინ შენი რჩევებით ძალიან დიდი სარგებლობის მოტანა შეგიძლია საზოგადოებისათვის. ამიტომ ამის შესრულება გევალება, პირველ ყოვლისა, როგორც პატიოსან ადამიანს. შენი პლატონიც ხომ ფიქრობს, რომ სახელმწიფოში მხოლოდ მაშინ დაისადგურებს ბედნიერება, როცა ფილოსოფოსები დაიწყებენ მეფობას, ან მაშინ, როცა მეფენი გაფილოსოფოსდებიან<sup>49</sup>. არცთუ მალე დადგება ეს ბედნიერი დღე, ჩემო რაფაელ, თუ ფილოსოფოსები არ ისურვებენ თავიანთი რჩევები მეფეებს გაუზიარონ“. „არა, — მიპასუხა რაფაელმა, — ფილოსოფოსები არც იმდენად უმადურნი არიან, რომ ეს დიდი სიამოვნებით არ გააკეთონ. პირიქით, ბევრმა უკვე შეასრულა კიდევ ეს თავისი წიგნების გამოცემით, ოღონდ კი ძლიერნი ამა ქვეყნისანი მისდევნებოდნენ მათ რჩევებს. მაგრამ პლატონი, უეპკველია, კარგად ხედავდა, რომ თუ მეფენი თვითონ არ გახდებიან ფილოსოფოსები, მაშინ ისინი, ბავშვობიდანვე მცდარი აზრებით გამსჭვალულნი და დაავადებულნი, ბოლომდე არასოდეს მოიწონებენ ფილოსოფოსთა გეგმებს. ეს თვით პლატონმა გამოსცადა დიონისიოსის კარზე<sup>50</sup>. როგორ, შენ ერთი წუთით მაინც ფიქრობ, რომ თუკი მე რომელიმე მეფეს შევთავაზებ გონივრული კანონების პროექტს და შევეცდები აღმოვფხვრა ზოროტი და დამღუპველი თესლები მის კარზე, დაუყოვნებლივ არ

გამაგდებენ და მასხარად არ ამიგდებენ? წარმოიდგინე, რომ გალიის მეფის კარზე<sup>51</sup> ვარ, მის მრჩევლად ვითვლები და მეტად საიდუმლო თათბირზე, რომელსაც თვით მეფე ხელმძღვანელობს, უჭკვიანეს ადამიანთა წრეში გულდასმით ვიხილავთ საკითხს, თუ რა საშუალებებითა და ხრიკებით შეუძლია მეფეს მედიოლანუმის<sup>52</sup> შენარჩუნება, ხელიდან გამსხლტარი ნეაპოლის<sup>53</sup> კვლავ დაბრუნება, ხოლო შემდეგ ვენეტების დარბევა<sup>54</sup>, მთელი იტალიის დამორჩილება<sup>55</sup>, ძალაუფლების მოპოვება ფლანდრიაზე, ბრაბანტზე, ბოლოს მთელ ბურგუნდიაზე<sup>56</sup> და, გარდა ამისა, სხვა ხალხებზე, რომელთა სამეფოებს ის ფიქრით უკვე არაერთხელ დასხმია თავს. აქ ერთ-ერთი მრჩეველი წინადადებას აძლევს მეფეს ვენეტებთან დაამყაროს კავშირი, რაც მანამ დარჩებოდა ძალაში, სანამ ხელსაყრელი იქნებოდა მეფისთვის, შეატყობინონ მათ თავიანთი გეგმები, დაუტოვონ კიდეც მათთვის ნადავლის გარკვეული ნაწილი, რათა უკანვე მოსთხოვონ საქმის სასურველად დაბოლოების შემთხვევაში; მეორე სთავაზობს მეფეს გერმანელთა დაქირავებას<sup>57</sup>, მესამე — ჰელვეტთა ფულით მოსყიდვას, მეოთხე აცხადებს, რომ ფულის ძლიერებით შეარბილონ მისი უდიდებულესობა იმპერატორის<sup>58</sup> რისხვა, მეხუთეს აუცილებლად მიაჩნია საქმის მოგვარება არაგონიის მეფესთან<sup>59</sup> და მშვიდობის საზღაურად უარის თქმა უცხო ნავარის სამეფოზე<sup>60</sup>, მეექვსე სთავაზობს კრებამს რალაც საქორწინო იმედებით გააბრუნონ კასტილიის მეფე<sup>61</sup> და გარკვეული ყოველწლიური გადასახადით გადმოიბირონ თავის მხარეზე თუნდაც რამდენიმე წარჩინებული კარისკაცი. აქ წამოიჭრა მთავარი დაბრკოლება — როგორი გადაწყვეტილება მიიღონ ინგლისის მიმართ. გამოითქვა აზრი, რომ, ყოველ შემთხვევაში, საჭიროა მასთან მოლაპარაკება მშვიდობის საკითხზე და ასეთი არამყარი კავშირის განმტკიცება საიმედო კავშირით, საჭიროა ინგლისელებს მეგობრები ვუწოდოთ, მაგრამ უნდა გვახსოვდეს, რომ ისინი არ არიან მეგობრები. ამიტომ ყოველთვის შემართული უნდა გვყავდნენ სკოტები<sup>62</sup> და ოდნავი ამოძრავებისთანავე მიეუსიოთ ისინი ინგლისელებს. ამისათვის საჭიროა ფარულად (ამის აშკარა განხორციელებას სამოკავშირეო ხელშეკრულებანი უშლის ხელს) დაუუჭიროთ მხარი რომელიმე წარჩინებულ დევნილს, რომელიც ამტკიცებს, რომ ეს სახელმწიფო მას ეკუთვნის, და ამ საშუალებით დაეთრგუნოთ ჩვენთვის საეჭვო ხელისუფალი. ასე რომ, როგორც ვთქვი, თუკი ასეთ დაძაბულ ვითარებაში, როდესაც ამდენი გამოჩენილი მრჩეველი ერთმანეთს არ აცლის თავისი საომარი გეგმების შეთა-



ვაზებას, უცებ ავდგები და შევთავაზებ იალქნები უკუღმა შემობრუნონ, ვურჩევ თავი დაანებონ იტალიას და ვეტყვი, რომ საჭიროა სახლში ჯდომა, რადგან მარტო გალიის სახელმწიფოც მეტისმეტად დიდია იმისათვის, რომ მას სათანადოდ მართავდეს ერთი ადამიანი და ამიტომ მეფემ უარი უნდა თქვას სხვა მიწების დაპყრობაზე, როგორ ფიქრობთ, როგორ მომექცეოდნენ მე?! შემდეგ შემძლო მათი ყურადღება მიმექცია და მომეყვანა მაგალითი ახორიელთა<sup>63</sup> ცხოვრებიდან. გამეცნო ხალხი, რომელიც უტოპიის კუნძულის პირდაპირ, მისგან სამხრეთ-აღმოსავლეთით ცხოვრობს. სწორედ ისინი აწარმოებდნენ ოდესღაც ომს, რათა თავიანთი მეფისათვის დაეპყროთ სხვა სამეფო, რომელიც, როგორც იგი ამტკიცებდა, მემკვიდრეობით ეკუთვნოდა ძველისძველი ნათესაური კავშირების ძალით. როცა, ბოლოსდაბოლოს, დაიპყრეს ეს სამეფო, სულ მალე იგრძნეს, რომ მისი შენარჩუნება არანაკლებ ძალებს მოითხოვდა, ვიდრე მის მოპოვებაზე დაიხარჯა. ახალი ქვეშევრდომნი შინაგანად მუდამ უკმაყოფილონი იყვნენ ან უცხოელთა დარბევის მსხვერპლი ხდებოდნენ. ამიტომ გამუდმებით საჭირო იყო ბრძოლა ან მათ წინააღმდეგ, ან მათ დასაცავად, რის გამოც ვერასდროს ვერ ახერხებდნენ ჯარის დათხოვნას, ამავე დროს კი ახორიელნი თვითონ ძარცვავდნენ საკუთარ თავს — ფული საზღვარგარეთ გადიოდა, ისინი კი სისხლს ღვრიდნენ უმაქნისი და ამავე დროს უცხო დიდებისათვის. ბოლოს მიხვდნენ, რომ მშვიდობა ასე ვერ განმტკიცდებოდა, ომმა წაბილწა ზნეობა მთელ სახელმწიფოში, მოსახლეობა ძარცვა-გლეჯას შეეჩვია, ხელი მიჰყვეს მკვლელობას, აბუჩად ივდებდნენ კანონებს. ამავე დროს მეფეს, რომლის ყურადღება ორ სახელმწიფოს შორის ნაწილდებოდა, აღარ შეეძლო რომელიმე ერთზე ეზრუნა გამორჩეულად. როცა უკვე აშკარა გახდა, რომ ამ დიდ გასაჰკირს ბოლო არ უჩანდა, მოითათბირეს და შესთავაზეს მეფეს თავისთვის რომელიმე ერთი ქვეყანა დაეტოვებინა, რომელიც სურდა, ვინაიდან ორი ქვეყნის მართვის ძალა არ შესწევდა. ისინი ამბობდნენ, რომ მეტად ბევრი არიან იმისათვის, რომ მათი მართვა შეეძლოს ნახევარ მეფეს, ხოლო, მეორე მხრივ, ნეტავ ვინ დაყაბულდება იმაზე, რომ თუნდაც საქონლის მწყემსიც კი სხვასთან საზიარო ჰყავდეს? ამრიგად, ეს კეთილი მონარქი იძულებული გახდა ახალი სამეფო დაეთმო თავისი ერთი მეგობრისათვის (რომელიც იქიდან მალე განდევნეს) და თვითონ ძველს დასჯერებოდა. გარდა ამისა, მე რომ მერჩია მეფისათვის, რომ ყველა ეს საომარი წამოწყება, რომლებსაც არევ-დარევა შეაქვთ

ხალხის ცხოვრებაში, გაალატაკებს მის სალაროს, ქვეშევრდომებს და რაივე შემთხვევითობის გამო შეიძლება სულაც უშედეგოდ დამთავრდეს და შემეთავაზებინა მისთვის ეზრუნა მამა-პაპათაგან მემკვიდრეობით ნაბოძებ სამეფოზე, შეძლებისდაგვარად აეყვავებინა იგი, შეეყვარებინა თავი ი ქვეშევრდომნი, დაემსახურებინა მათი სიყვარული, ეცხოვრა ნათთან ერთი ცხოვრებით, ემართა ისინი ლმობიერად და თავი დაენებებინა სხვა ქვეყნებისათვის, ვინაიდან ის, რაც მას ერგო, საკმარისზე მეტია თავისი მოცულობით, — როგორ ფიქრობ, ჩემო მორ, როგორი განწყობილებით მიიღებდნენ ისინი ამგვარ სიტყვებს?“ „რა თქმა უნდა, არცთუ დიდი სიამოვნებითა“, — მივუგე მე. „მაშინ წავუღეთ წინ, — თქვა მან. — დავუშვათ, რომ რომელიმე მეფის მრჩეველნი მასთან საუბარში განიხილავენ და იგონებენ საშუალებებს განძის გასამდიდრებლად. ერთი წინადადება იძლევა გაზარდონ მონეტის ღირებულება<sup>64</sup>, როდესაც ფულის გადახდა იქნება საჭირო, და დასცენ მისი ფაი, როცა საჭირო იქნება ფულის შეგროვება, — ამრიგად შესაძლებელი გახდება დიდი თანხის გადახდა ფულის მცირე რაოდენობით და პატარა თანხით დიდის შესყიდვა. მეორე სთავაზობს ეფეს ომისათვის მოჩვენებით მზადებას და ამ გზით ფულის შეგროვებას, ხოლო ამ მიზნის მიღწევის შემდეგ საზეიმო ზავის დადებას წმიდა ილდეღმსახურების თანხლებით და ამ გზით უბრალო ხალხში ისეთი წარმოღვევნის შექმნას, ვითომდა კეთილმა მეფემ აღამიანებზე ზრუნვის გამო შეწყვიტა სისხლისღვრა<sup>65</sup>; მესამემ, ვთქვათ, ამოქექა, რომელიც ძველისძველი, ჭიანჭაში კანონები<sup>66</sup>, უქმად ყოფნისაგან მოძველებულნი და რადგან აღარავის ახსოვს მათი არსებობა, ყველა არღვევს მათ და ამიტომ საჭიროა ჯარიმის გადახდევინება; აქედან მიღებული შემოსავალი უფრო უხვი და საპატიო იქნება, ვიდრე სხვა გზით მიღებული, რადგან იგი სამართლიანობის ნიღბით იქნება დაფარული; მეოთხის აზრით, დიდი ჯარიმის შიშით საჭიროა ბევრი ისეთი რაიმის აკრძალვა, რაც ხალხის ინტერესებს ეწინააღმდეგება, ხოლო შემდეგ მიღებული ფულის განაწილება მათ შორის, ვის მოგებასაც განსაკუთრებით ზღუდავს ეს კანონი; ამრიგად შესაძლებელია ხალხის გულის მოგება და ორგვარი სარგებლის მიღება: ერთი მხრივ, ჯარიმდებიან მხოლოდ ისინი, ვინც ამ ბაღეში მოგებისადმი სიხარბემ მოაქცია, ხოლო, მეორე მხრივ, პრივილეგიების მაღალი საფასური სრულიად ეთანხმება მშვენიერ ზნეობრივ თვისებებს იმ მეფისას, რომელიც ძნელად

თუ აჩუქებს რომელიმე კერძო პირს ისეთ რაიმეს, რაც ხალხის ინტერესებს ეწინააღმდეგება, და ისიც მხოლოდ მაღალი საფასურით; მეხუთე არწმუნებს მეფეს, რომ საჭიროა მოსამართლეთა მიმხრობა, ისინი ყოველგვარი საქმის გადაწყვეტისას მეფის უფლებებს მიიღებენ მხედველობაში, გარდა ამისა, საჭიროა მათი თავმოყრა სასახლეში და საქმეთა გარჩევა მეფის თანდასწრებით; მაშინ მეფის არც ერთი საქმე არ იქნება იმდენად უსამართლო, რომ რომელიმე მოსამართლემ ან წინააღმდეგობის სურვილით, ან იმის სირცხვილით, რომ იგივე არ გაიმეოროს, ანდა მბრძანებლის კეთილგანწყობის მოპოვებით დაბრმავებულია ვერ მოძებნოს ამ საქმის განხილვაში რაიმე ხერხი, რომელიც შარის მოდების საშუალებას არ იძლეოდეს. ამრიგად, მოსამართლეთა აზრის სხვადასხვაობისას თავისთავად სრულიად ნათელი საქმე იწვევს აზრთა გაცვლა-გამოცვლას, ხოლო ქვეშაირიტება მოითხოვს კამათს და სწორედ ეს აძლევს მეფეს საშუალებას, რომ კანონი თავის სასარგებლოდ გამოიყენოს; სხვები ეთანხმებიან მას ან სირცხვილის, ან შიშის გამო. ამიტომ ამის შედეგად აუღელვებლად ცხადდება შესაბამისი განაჩენი; მეფისათვის ხმის მისაცემად ხომ ყოველთვის მოიძებნება საზაბი; ამისათვის საკმარისია მის მხარეზე იყოს ან სამართლიანობა, ან კანონი, ანდა დოკუმენტი დახლართული აზრი, ან, ბოლოსდაბოლოს, ის, რაც პატიოსან მოსამართლეთა თვალში კანონებზე მაღლა დგას—ხელწიფის უცილობელი უპირატესობა.<sup>67</sup> ყველა ეს მრჩეველი ერთხმად აღიარებს კრასუსის<sup>68</sup> მცნების სისწორეს იმის შესახებ, რომ ოქრო რაც არ უნდა ბევრი ჰქონდეს, მაინც მისი არავითარი რაოდენობა არ ეყოფა მეფეს, რომელსაც ჯარი ჰყავს შესანახი, და კიდევ, მეფე ვერასდროს ვერ მოიტყვევა უსამართლოდ, ამის დიდი სურვილიც რომ ჰქონდეს, ვინაიდან ყველა და ყველაფერი მას ეკუთვნის, ხოლო ყოველ ადამიანს აქვს იმდენი, რამდენიც მეფემ დაუტოვა და არ ჩამოართვა თავისი გულმოწყალების გამო. ამასთანავე, მეფისათვის დიდი მნიშვნელობა აქვს იმას, რომ ასეთი საკუთრება რაც შეიძლება ნაკლები იყოს, ვინაიდან მისი ძალაუფლების მთავარი დასაყრდენი ისაა, რომ არ მისცეს ხალხს ღიმიდრისა და თავისუფლებისაგან განებივრების საშუალება: ასეთი მდგომარეობის დროს ადამიანები არცთუ ისე ადვილად ურიგდებიან სასტიკ და უღმობელ ბრძანებებს, იმ დროს, როდესაც, პირიქით, სილატაკე და უკმარობა აჩლუნგებს განწყობილებას, აჩვევს მოთმინებას და დამონებულთ მეამბოხის კეთილშობილს უღს უსპობს. და, აი, აქ თუ ისევ ავდგები და დავიწყებ კამათს იმა-

ზე, რომ ყველა ეს რჩევა მეფისათვის უღირსიცაა და დამღუპველიც, ვინაიდან არა მარტო მისი ღირსება, არამედ მისი უსაფრთხოებაც კი უფრო ხალხის კეთილდღეობაზეა დამოკიდებული, ვიდრე მეფის საკუთარ სალაროზე, შემდეგ აუუხსნი, რომ ისინი მეფეს ირჩევენ თავისთვის და არა თვითონ მისთვის, სწორედ იმიტომ, რომ მეფის შრომისა და კეთილგანწყობის წყალობით კეთილად და უწყინრად იცხოვრონ, და მეფესაც უფრო შეეფერება ხალხის კეთილდღეობაზე ზრუნვა, ვიდრე საკუთარ თავზე, ისევე როგორც მწყემსის მოვალეობა<sup>69</sup>, რამდენადაც ის საქონელს მწყემსავს, უფრო საქონლის გამოკვებაა, ვიდრე საკუთარი თავისა; თუ ვიტყვი, რომ მრჩეველები მწარედ სცდებიან, როცა ამბობენ, რომ ხალხის სილატაკე მშვიდობის დაცვას ემსახურება — მართლაცდა სად ხდება უფრო მეტი აყალმაყალი, თუ არა ლატაკთა შორის? ვინ უფრო მეტად ისწრაფვის გადატრიალებისაკენ, თუ არა ის, ვისაც სრულიადაც არ მოსწონს არსებული წესწყობილება? ბოლოს, ვის უფრო უჩნდება თავხედური მოთხოვნილება, არევა-დარევა გამოიწვიოს იმის იმედით, რომ რასმე გამორჩეს, ვიდრე იმას, ვისაც აღარაფერი აქვს დასაკარგი? თუ დავამტკიცებ, რომ როცა რომელიმე მეფე თავის ქვეშევრდომებში ისეთ ზიზღსა და სიძულვილს იწვევს, რომ მათი მორჩილებაში ყოლა მხოლოდ შეურაცხყოფით, ძარცვა-გლეჯითა და აღკვეთით, ხალხის გადატაკებამდე მიყვანის გზით შეუძლია, მაშინ, რა თქმა უნდა, მან უმჯობესია უარი თქვას სამეფოზე, ვიდრე შეინარჩუნოს იგი ისეთი საშუალებებით, რომელთა დროსაც, თუკი ის შაინც ახერხებს მბრძანებლის სახელის შენარჩუნებას, ყოველ შემთხვევაში კარგავს თავის დიდებულებას. მეფის ღირსებას არ შეეფერება ძალაუფლების გამოყენება ლატაკთა მიმართ, ეს დასაშვებია უფრო მდიდართა და შეძლებულთა მისამართით. სწორედ ეს აღნიშნა მაღალი და კეთილშობილი გონების ადამიანმა ფაბრიციუსმა<sup>70</sup> თავის პასუხში — რომ ის არჩევს მდიდართა მართვას და არა მდიდრად ყოფნას. და, რა თქმა უნდა, იმის დაშვება, რომ ერთნი ფუფუნებასა და განცხრომაში ცხოვრობდნენ, ხოლო მეორენი კენსოდნენ და ტიროდნენ, ნიშნავს იყო ციხის და არა სამეფოს მცველი; დასასრულ, თუ ვიტყვი, რომ სრულიად უმეცარია ექიმი, რომელსაც ავადმყოფის მკურნალობა მხოლოდ ავადმყოფობითვე შეუძლია, ასევე მან, ვისაც სხვა გზით არ შეუძლია მოქალაქეთა ცხოვრების წარმართვა, თუ მათ ცხოვრების სიკეთე არ წაართვა, უნდა აღიაროს თავისი უსუსურობა თავისუფალ ადამიანთა ცხოვრების მართვის საქმეში, უფრო მეტიც,

შან უარი უნდა თქვას ახირებულობაზე ან მედიდურობაზე: ამ ნაკლით ის ხალხში იწვევს ან ზიზღს, ან სიძულვილს; მან სხვისთვის ზიანის მოუტანლად უნდა იცხოვროს საკუთარი სახსრებით და ერთმანეთს შეუფარდოს შემოსავალი და გასავალი, ალაგმოს ბოროტმოქმედება, რათა ქვეშევრდომთა სამართლიანი გაძლიერებით უფრო აღმოფხვრას ბოროტმოქმედებანი, ვიდრე გაძლიერების საშუალება მისცეს მათ იმ მიზნით, რომ შემდეგ ამისათვის დასაჯოს სხვები; თუ დაეიწყებ მტკიცებას, რომ საჭირო აღარ არის იმ კანონთა აღდგენა, რომლებიც ცხოვრებამ უკუაგდო, განსაკუთრებით ისეთებისა, რომლებიც დიდი ხანია მომოდველდა და არც თავის დროზე ყოფილა დიდად სასურველი. არასოდეს ჯარიმის მომიზეზებით არ შეიძლება ისეთი რაიმის მიღება, რის ნებასაც მოსამართლე არ მისცემდა არც ერთ პატიოსან ადამიანს, როგორც უსამართლობითა და მოტყუებით მოპოვებულისას; და ბოლოს, თუ განვუმარტავ და შევთავაზებ აქ მაკარიელთა? კანონს, რომლებიც აგრეთვე უტოპიის მახლობლად ცხოვრობენ?! — მათმა მეფემ ტახტზე ასვლის პირველსავე დღეს, მსხვერპლის შეწირვის საზეიმო აღსრულების შემდეგ, ფიცი დადო არასოდეს ჰქონოდა ერთდროულად სალაროში ათას გირვანქაზე მეტი ოქრო ან ამ ოქროს ღირებულების შესაბამისი ვერცხლი. ამბობენ, რომ ეს კანონი დააწესა ერთმა შესანიშნავმა მეფემ, რომელიც სამშობლოს კეთილდღეობაზე უფრო ზრუნავდა, ვიდრე თავის გამდიდრებაზე. ეს კანონი დაბრკოლებას უნდა წარმოადგენდეს ისეთი დიდი თანხების დაგროვების წინააღმდეგ, რამაც ხალხში მათი ნაკლებობა შეიძლება გამოიწვიოს. მეფე ხედავდა, რომ ეს თანხა საკმარისი იქნებოდა იმისათვის, თუ მას მოუხდებოდა ბრძოლა მუამბოხეებთან, ანდა მის სახელმწიფოს დასჯირდებოდა მტრის თავდასხმის მოგერიება. მაგრამ ეს თანხა საკმარისი არ იქნებოდა იმისათვის, რათა შესაფერისი განწყობილება შექმნილიყო სხვის სამფლობელოებზე თავდასასხმელად. აი, ეს იყო კანონის გამოცემის უმთავრესი მიზეზი. მეორე მიზეზი, მეფის აზრით, ის იყო, რომ ხალხში ყოველდღიურად საბრუნავი ფულის ნაკლებობა დაეძლიათ, ხოლო ვინაიდან მეფე ვალდებულია გასცეს ყველაფერი, რაც სალაროში დაგროვდა კანონით დადგენილი ოდენობის ზევით, ამის გამო მას არ დასჯირდებოდა საბაბის მოძებნა ქვეშევრდომთათვის წყენის მისაყენებლად. ასეთი მეფე შიშის ზარს დასცემს ბოროტმოქმედთ და კარგი მოქალაქეების სიყვარულს დაიშაახურებს. ასე რომ, თუკი ამ და ამგვარ ზემოჩამოთვლილ დებულებებს თავს მოვახვევ სრულიად საწინააღმ-

დევო აზრის მქონე ადამიანებს, მაშინ ყრუთა წინაშე მქადაგებელს ხომ არ ღვემსგავსები?“.

„რა თქმა უნდა, — ვუპასუხე მე, — თანაც როგორ ყრუთა წინაშე! მართალი ვითხრათ, სულაც არ მაკვირვებს ეს, და უნდა ვაღიარო, აუცილებლადაც არ მიმაჩნია ამგვარი აზრების თავს მოხვევა და ისეთი რჩევების მიცემა, რომლებსაც, როგორც შენა ხარ დარწმუნებული, არასოდეს მიიღებენ. მართლაც, რა სარგებლობა უნდა მოუტანოს ან როგორ უნდა მოახდინოს გავლენა ასეთმა უცნაურმა გამოსვლამ იმათ განწყობილებაზე, ვის გულშიც ადრევე დაიბუღა სრულიად საწინააღმდეგო მოსაზრებამ? ახლო მეგობართა შორის გამართულ სასიამოვნო საუბრისას ამგვარი სქოლასტიკური ფილოსოფია შეიძლება სასიამოვნო აღმოჩნდეს, მაგრამ მეფეთა სათათბიროებში, სადაც მნიშვნელოვანი და მეტად ავტორიტეტული საქმეები წყდება, ამის ადგილი არ არის.“

„ზუსტად ამავე ვაშობდი: მეფეებს არ სცალიათ ფილოსოფიისათვის-მეთქი“. ვუპასუხე მე, — იმ სქოლასტიკური ფილოსოფიისათვის<sup>72</sup>, რომელსაც მიაჩნია, რომ იგი გამოსადეგია ყველგან და ყოველთვის. მაგრამ არის სხვა ფილოსოფიაც, უფრო საჭირო, რომელმაც იცის თავისი ადგილი და მის ხელთ მყოფ პიესაში თავის როლს ბოლომდე კეთილსინდისიერად ასრულებს. აი, შენ სწორედ ასეთი ფილოსოფია უნდა გამოიყენო. აი, დავუშვით, რომ იდგმება პლატუსის<sup>73</sup> რომელიმე კომედია, სადაც საცოდავი მონები ერთმანეთზე სისულელეებს ჩმახავენ, შენ კი უცებ მოვეკლინები ფილოსოფოსის მოსასხამით სცენაზე, წარდგები ყველაზე წინ და დაიწყებ „ოქტავიადან“<sup>74</sup> იმ ადგილის კითხვას, სენეკა რომ ნერონს ეკამათება. განა უკეთესი არ არის გამოხვიდე და ხმა არ ამოიღო, ვიდრე შეუფერებელი ტექსტის კითხვით ასეთი ტრაგიკომედია მოაწყო! შენ ხომ გაათუქებ და დაამახინჯებ ამ პიესას, აურ-დაურევ ყველაფერს მაშინაც კი, თუ შენი დამატებანი დედანზე უკეთესი იქნება. გახსოვდეს, რაც შეიძლება უკეთესად ითამაშე ის პიესა, რომელიც ხელთა გაქვს და ნუ დაანაგვიანებ მას ასე საშინლად იმით, რაც გაგახსენდება თუნდაც უფრო სრულყოფილი პიესიდან.

ასეთი მდგომარეობაა როგორც სახელმწიფოში, ისე მეფეთა სათათბიროებზეც. თუ არ შეიძლება ძირფესვიანად ამოიძირკვოს არასწორი აზრები, თუ გულწრფელად ხარ დარწმუნებული, რომ არ შეგიძლია განუჯრო ასე მტკიცედ ფესვგადგმული მანკიერებანი, შენ მაინც არ უნდა მიატოვო სახელმწიფო საქმეები, ისევე როგორც არ შეიძლება

ხომალდის მიტოვება ქარიშხალში იმ მიზეზით, რომ შენ ქარებს მაინც ვერ გაუმკლავდები. მაგრამ არც ის შეიძლება, ძალით მოახვიო თავს ახალი და უცნაური აზრები ხალხს, რომელიც პირიქით ფიქრობს, ვინაიდან ამ ახალ აზრებს მისთვის არავითარი ფასი არ ექნება; შენ როგორმე სხვა გზით უნდა ეცადო შეძლებისამებრ ყველაფერი კარგად შეასრულო, ხოლო ის, რის შობრუნებაც კარგისაქენ არ შეგიძლია, შეეცადე ოდნავ მაინც გააკეთილშობილო, ხომ არ შეიძლება ყველაფერი კარგად იყოს მოწყობილი, ყველა ადამიანი ხომ არ არის აუცილებლად კარგი. არა მგონია, რომ ეს სულ რამდენიმე წელში მოხდეს“.

„ამ საშუალებიდან სხვა არაფერი გამოვა, — მიპასუხა რაფაელმა, — გარდა იმისა, რომ თუ ვეცდები განვკურნო სხვათა სიმშაგე, თვით დავკარგავ გონებას მათთან ერთად. რაკი სიმართლის თქვა მინდა, აუცილებლად უნდა ვილაპარაკო, თუმცა არ ვიცი, ფილოსოფოსის საქმეა თუ არა სიცრუის ლაპარაკი, მაგრამ ყოველ შემთხვევაში ჩემი საქმე სიმართლის თქმაა. მართალია, ჩემი სიტყვა არაჰასიამოვნო და მძიმე იქნება მოწინააღმდეგეებისათვის, მაგრამ მაინც ვერ ვხვდები რატომ უნდა მოგვეჩვენოს იგი სისულელემდე უცნაურად. დავუშვათ, ვიტყოდი იმას, რასაც ფიქრობს პლატონი თავის „სახელმწიფოში“, ანდა რასაც აკეთებენ უტოპიელები თავიანთ ქვეყანაში; მართალია, ჩვენთვისაც უკეთესი იქნებოდა ის, რაც იქ სინამდვილეშია, მაგრამ მაინც უცხოდ მოგვეჩვენებოდა, ვინაიდან აქ ყველას აქვს კერძო საკუთრება, იქ კი ყველაფერი საერთოა. რაც შეეხება ჩემს სიტყვას, იგი გვაფრთხილებს და მიგვითითებს ამაზე, ამიტომ იგი შეიძლება უსიამოვნო იყოს მხოლოდ იმათთვის, ვინც საწინააღმდეგო მხარეზე სიარულისას უფსკრულში საკუთარ თავთან ერთად სხვების გადაჩეხვასაც ლამობს. სხვაგვარად რა იყო ჩემს სიტყვებში ისეთი, რის თქმაც ყველგან არ შეიძლებოდა ან სასურველი არ იყო? მართლაც, თუკი, როგორც უცხო და სულელური, უნდა გამოვიციხოთ ყველაფერი ის, რასაც ადამიანთა მანკიერმა ზნე-ჩვეულებებმა არაჩვეულებრივი სახე მისცეს, მაშინ ქრისტიანებთანაც უნდა დავფაროთ ბევრი რამ ქრისტეს მოძღვრებიდან, იგი კი არა მარტო კრძალავს ამის დამალვას, არამედ მოგვიწოდებს კიდევ აშკარად, ხმამაღლა ვიქადაგოთ ის, რაც ქრისტემ მათ ყურში ჩაახურჩულა. ყველაფერი ამის უდიდესი ნაწილი უფრო უცხოა თანამედროვე ზნე-ჩვეულებებისათვის, ვიდრე ჩემი სიტყვა იყო. მართლაც, მქადაგებლები, ცბიერი ადამიანები, მისდევენ შენს რჩევას და ხედავენ, რომ ადამიანებისათვის ძნელია თავიანთი დანაშაულის მისადაგება.

ქრისტეს მოძღვრებისადმი. მათ მისი მოძღვრება ისევე მიუსადაგეს ადამიანთა ზნე-ჩვეულებებს, როგორც მოქნილი ტყვიის სახაზავი, რათა ოღნავ მაინც შეუგუონ ისინი ერთმანეთს. როგორც ვხედავ, ამით მხოლოდ ცუდმა ადამიანებმა ისარგებლეს და უზრუნველ ცხოვრებას მიაღწიეს. და მე, რა თქმა უნდა, მეფეთა სათათბიროებში ასევე დიდ შედეგებს მივალწევ. ანდა ჩემი აზრების საწინააღმდეგო მოსაზრება რომ გავიზიარო, ეს იგივე არ იქნება, რომ არავითარი აზრი არ გამაჩნდეს? თუ ისე ვიფიქრებ, როგორც წინათ, ტერენციუს მიკიონის<sup>75</sup> სიტყვებით რომ ვთქვათ, რას წარმოადგენს ის სხვა გზები, რომლებითაც, შენი აზრით, უნდა ვეცადო ყველაფრის მოწესრიგებას? სასურველ მხარეს მაინც უნდა შევებრუნო იგი და რამდენადაც შესაძლებელია, გადავაქციო ნაკლებ ბოროტებად. იქ არაა ადგილი იმისათვის, რომ ვიმალებოდე ან ზერელედ მოვეკიდო ყველაფერს; საჭიროა აშკარად მოვიწონო მცდარი აზრები და ხელი-მოვაწერო ყველაზე ცუდ გადაწყვეტილებებს. მაგრამ უღირსი დადგენილებების ძუნწად შექმბაც კი ხომ მხოლოდ ჯაშუშის ან უბრალოდ გამცემის საქმე იქნებოდა. შემდგომ, იმ გარემოში მოხვედრისას, სადაც უფრო ადვილია შესანიშნავი ადამიანის წახდენა, ვიდრე ამ გარემოს გამოსწორება, შენ ვერ გააკეთებ ვერაფერს ისეთს, რითაც შესძლებდი რაიმე სარგებლობის მოტანას. ასეთი საზოგადოების მახინჯი წეს-ჩვეულებანი შენც დაგამახინჯებენ, ანდა დარჩები რა უცოდველი და უბიწო, შენ სხვისი სისულელის დამფარველად გამოხვალ. აქ ლაპარაკიც კი ზედმეტია ამგვარი გზით რაიმე წარმატების მიღწევაზე. ამიტომ პლატონი მეტად ლამაზი შედარებით წარმოგვიდგენს, თუ რამდენად სწორია ფილოსოფოსთა მიერ სახელმწიფო საქმეებში ჩარევისაგან თავის შეკავება. ფილოსოფოსები ხედავენ, რომ ქუჩაში გამოსული ხალხი კოკისპირულ წვიმაში მოჰყვამ, მაგრამ არ შეუძლიათ აიძულონ ისინი სახურავის ქვეშ შევიდნენ და თავი შეაფარონ, აი, ფილოსოფოსებმა იციან, თუ ქუჩაში გამოვლენ, ვერაფერს მიაღწევენ, გარდა იმისა, რომ ხალხთან ერთად თვითონაც დასველდებიან, და ამიტომ ისინი რჩებიან სახლში და კმაყოფილდებიან იმით, რომ რადგან არ ძალუძთ სხვისი სისულელის შევლა, თვითონ მაინც არ გაისულელეს თავი და დარჩნენ მშრალები. ო, ჩემო მორ, თუ გინდა იცოდე ჩემი ნამდვილი აზრი, მე ასე მგონია, რომ იქ, სადაც ბატონობს კერძო საკუთრება, სადაც ყველაფერი ფულით იზომება, თითქმის შეუძლებელია სახელმწიფო საქმეთა სწორად და წარმატებით მართვა. სხვაგვარად, ასეთ საზოგადოებაში გამართლებულად უნდა ჩაი-



თვალის ის გარემოება, რომ ყველაფერი საუკეთესო ყველაზე უფრო უღირსთ ხედვებით, ანდა ის, რომ ყველაფერი მხოლოდ ხალხის ძალიან მცირე ნაწილს აქვს განაწილებული და, წარმოიდგინე, ისიხიც ვერ ცხოვრობენ როგორც საჭიროა, დანარჩენებს კი სრულ სიღატაკში სძვრებთ სული.

ამიტომ აქ, ერთი მხრივ, საკუთარ თავთან მარტო დარჩენილი განვიხილავ უტოპიელთა ზედმიწევნით ბრძნულ და წმინდა წამოწყებებს, რომელთა მეშვეობითაც სახელმწიფოს მართვა შესაძლებელია კანონთა სულ მცირე რაოდენობით, მაგრამ ეს ისე კარგად კეთდება, რომ ზიკეთე სათანადო შეფასებას იმსახურებს და, მიუხედავად ქონების თანასწორობისა, ყველაფერში შეიმჩნევა საერთო კეთილდღეობა. მეორე მხრივ, პირიქით, მათ ზნე-ჩვეულებებს ვადარებ ბევრი სხვა ხალხის ცხოვრებას, რომლებიც სულ მუდამ იმის ცდაში არიან, როგორმე წესრიგი დაამყარონ, მაგრამ ამაოდ. თითოეული იქ თავის საკუთრებას უწოდებს ყველაფერს, რაც მოხვდება. ესენი ყოველდღიურად ურიცხვ კანონს სცემენ, მაგრამ არ ძალუძთ მათი მიღწევა, დაცვა. ამას კი ნათლად ადასტურებს უთავბოლო და დაუსრულებელი უთანხმოებანი. ასე რომ, ვიმეორებ, როდესაც ჩემთვის დაფიქრდები ამაზე, უფრო მეტ სამართლიანობას ვიჩენ პლატონისადმი და ნაკლებად მაკვირვებს მისი უარი იმ ხალხებისათვის რაიმე კანონების მიცემაზე, რომლებმაც უარყვეს წესდება ყოველგვარი ცხოვრებისეული სიკეთის თანაბრად განაწილებისა. ამ ბრძენმა ადვილად შენიშნა, რომ ერთადერთი გზა საზოგადოების კეთილდღეობისაკენ არის ქონებრივი თანასწორობის გამოცხადება, ხოლო ეს ძნელად თუ განხორციელდება იქ, სადაც ყველას კერძო საკუთრება აქვს და თუ ყოველი მათგანი თუნდაც კანონიერ საფუძველზე შეეცდება მიითვისოს იმდენი, რამდენსაც შეძლებს, მაშინ როგორი დიდიც არ უნდა იყოს დოვლათი, იგი მთლიანად მაინც მხოლოდ უმცირესობას ხედება წილად. დანარჩენების ხვედრი კი მხოლოდ სიღატაკეა. ჩვეულებრივ ისე ხდება, რომ მტაცებლები, უპატიოსნო და უმაქნისი ადამიანები იმარჯვებენ თავმდაბალ და უბრალო ადამიანებზე, რომლებსაც ყოველდღიური შრომით საზოგადოებისათვის უფრო მეტი სარგებლობა მოაქვთ, ვიდრე საკუთარი თავისათვის. ამიტომ მტკიცედ ვარ დარწმუნებული, რომ სახსრების განაწილება თანაბარი და სამართლიანი წესით და საერთო-სახალხო საქმეთა ჭეშმარიტად აღსრულება შესაძლებელია მხოლოდ კერძო საკუთრების სრული მოსპობის პირობებში, ხოლო თუ იგი მაინც დარჩება,

კაცობრიობის საუკეთესო და უდიდესი ნაწილი ვერასოდეს მოიშორებს სილატაკის მძიმე ტვირთს. მართალია, დასაშვებად მიმაჩნია, რომ იგი გარკვეული მოცულობით შეიძლება შემცირდეს კიდევ, მაგრამ გადაჭრით ვამტკიცებ, რომ სრულიად შეუძლებელია მისი მოსპობა. მაგალითად, შესაძლებელია დავადგინოთ შემდეგი: არავის არ უნდა ჰქონდეს გარკვეულ ოდენობაზე მეტი მიწის საკუთრების უფლება, თითოეულის ფულადი ქონების მოცულობა შესაძლებელია კანონით შეიზღუდოს; უნდა გამოიცეს გარკვეული კანონები, რომლებიც აუკრძალავს მეფეს მისი ხელისუფლების ბოროტად გამოყენებას, ხოლო ხალხს — ზედმეტ თავნებობას; შესაძლებელია აიკრძალოს თანამდებობათა შექმნა შესყიდვით ან ქრთამით. ამ თანამდებობებზე მუშაობას არ უნდა ერთვოდეს თან ხარჯები, ვინაიდან ეს ხელსაყრელ პირობებს შექმნის იმისათვის, რათა ეს ფული შემდეგ მოტყუებისა და ძარცვის გზით იქნეს ამოგებული და წარმოიქმნება იმის აუცილებლობა, რომ ამ თანამდებობებზე დაინიშნონ მდიდარი ადამიანები, მაშინ როდესაც ჰკვიანები გაცილებით უკეთ გაართმევდნენ თავს. ამგვარ კანონებს, ვიმეორებ, ძალუძთ გააადვილონ და შეამსუბუქონ ეს უბედურებანი ზუსტად ისევე, როგორც საფენებს, რომლებითაც ჩვეულებრივ აყუჩებენ უიმედო ავადმყოფის ტკივილებს. მაგრამ სანამ თითოეულს აქვს კერძო საკუთრება, გამოჯანმრთელებისა და სხეულის მდგომარეობის გაუმჯობესების არავითარი იმედი არ არის. კიდევ მეტიც, ერთი რომელიმე ნაწილის გამოჯანმრთელებაზე ზრუნვისას შენ სხვა ნაწილების ჰრილობებსაც აღიზიანებ. ამრიგად, ერთის მკურნალობა იწვევს მეორის დაავადებას, რაკი არ შეიძლება ერთს მივეუბნოთ რაიმე ისე, თუ მეორეს არ წავართვით“.

„მე კი პირიქით მეჩვენება, — შევეპასუხე რაფაელს, — არასოდეს არ შეიძლება მდიდრულად ცხოვრება იქ, სადაც ყველაფერი საერთოა. როგორ შეიძლება მივალწიოთ სანოვავის სიუხვეს, თუკი თითოეული თავს აარიდებს სამუშაოს, ვინაიდან მას აღარ იზიდავს კერძო მოგება, ხოლო, მეორე მხრივ, სხვისი შრომის იმედი სიზარმაცეს უწყობს ხელს? მაშინ კი, როდესაც ხალხს დააშინებს სახსართა ნაკლებობა და ვერავითარი კანონი ვერ დაიცავს თითოეული მათგანის შენაძენს, როგორც კერძო საკუთრებას, ხომ არ შეწუხდებიან ადამიანები მუდმივი სისხლისღვრითა და არეულობით? და ეს მოხდება მით უფრო, რომ გაჭრება ყოველგვარი პატივისცემა და მოწიწება ხელსუფლებისადმი, წარმოდგენაც არ შემიძლია იმისა, თუ რა ადგილი

მონახებოდა მათთვის ისეთ ადამიანებთან, რომელთა შორის არავითარი განსხვავება არ არის“. „მე არ მივირის, — მიპასუხა რაფაელმა, — შენ რომ ასეთი აზრისა ხარ, ვინაიდან სრულიად არ შეგიძლია ასეთი მდგომარეობის წარმოდგენა, ანდა მას მცდარად წარმოიდგენ. მაგრამ შენ რომ ჩემთან ერთად ყოფილიყავი უტოპიაზე და თვითონ გასცნობოდი მათ ზნე-ჩვეულებებს და კანონებს, ისე როგორც გვაუკეთე მე, რომელმაც იქ ხუთი წელი ვიცხოვრე და არასოდეს წამოვიდოდი იქიდან, რომ არ მქონოდა სურვილი, ყველასათვის მეამბნა ამ ახალი სამყაროს შესახებ, შენ ადვილად აღიარებდი, რომ არსად სხვა ადგილას არ გინახავს სახელმწიფოს უკეთესი წესწყობილება ვიდრე იქაა“.

„რა თქმა უნდა, — შენიშნა პეტრე ეგიდიუსმა, — შენ ძნელად დამარწმუნებ იმაში, რომ ხალხისათვის უკეთესი წესწყობილებაა იმ ახალ სამყაროში, ვიდრე ჩვენთვის ნაცნობში. ჩემი აზრით, აქ გონებაც უფრო ნაკლებად როდი უჭრით, სახელმწიფოებიც უფრო ძველია, ვიდრე იქ და ხანგრძლივმა გამოცდილებამაც ბევრი სიკეთე შესძინა ხალხს ცხოვრების გასაუმჯობესებლად; აღარაფერს ვამბობ ზოგიერთ ჩვენს შემთხვევით აღმოჩენაზე, რომლის გამოგონებასაც არავითარი გონება არ ეყოფოდა“.

„რაც შეეხება იმ სახელმწიფოების სიძველეს, — მიუგო რაფაელმა, — შენ უფრო სწორად განსჯიდი, თუ წაიკითხავდი იმ ქვეყნების ისტორიას, და თუ მას დაეჯერება, მაშინ მათ ქალაქები გაცილებით უფრო ადრე ჰქონიათ, ვიდრე ჩვენს ხალხს. შემდგომ იქაც და აქაც შეიძლებოდა ყველაფერი ის ყოფილიყო, რაც აქამდე გამოიგონა გონებამ ანდა შემთხვევით აღმოჩნდა. თუმცა, ვვარაუდობ, რომ, როგორც ჩვენ აღვემატებით მათ ნიჭიერებით, ისე ისინი გვისწრებენ თავიანთი გულმოდგინებითა და შრომისმოყვარეობით. მათი მატიანების ცნობით, ჩვენი გემების ჩასვლამდე მათ არასოდეს არაფერი გაუუგიათ ჩვენს საქმეებზე (ისინი ჩვენ ბუნიობის ხაზს იქით მცხოვრებთ გვიწოდებენ). ჰო, მართლა, ოდესღაც, ათას ორასი წლის წინათ, ერთი ხომალდი, რომელიც იქ ქარიშხლის გამო მოხვდა, უტოპიის კუნძულთან დაიღუპა; ნაპირზე გამოირიყნენ ვიღაც რომაელები და ეგვიპტელები, რომლებიც იქიდან აღარ დაბრუნებულან. დაუკვირდი, რა მოხერხებულად გამოიყენეს ეს შემთხვევა უტოპიელებმა. გამოირიყული უცხოელებისაგან მათ შეისწავლეს ყოველგვარი ხელოსნობა, რაც კი რომის იმპერიაში არსებობდა და რასაც რაიმე სარგებლობის მოტანა

შეეძლო; ანდა გაიჩნეს რა ამ ხელოსნობის მხოლოდ ჩანასახები, მათ ხელმეორედ გამოიგონეს ისინი. უტოპიელებს კარგად გამოადგათ ის გარემოება, რომ ზოგიერთი ჩვენგანი მხოლოდ ერთხელ მოხვდა მათთან. ადრე რომ ასეთ შემთხვევას ჩვენთან მოეყვანა რომელიმე იქაური, ეს ისევე აღმოიფხვრებოდა ჩვენი მეხსიერებიდან, როგორც ალბათ, ჩვენს შემდგომ თაობებს დაავიწყდებათ ოდესღაც ჩემი აქ ყოფნა, და ისევე, როგორც მათ პირველივე შეხვედრის შემდეგ შეითვისეს ყველაფერი, რაც ჩვენს მიერ ასე კარგად იყო მოფიქრებული. ვფიქრობ, დიდი დრო გავა, სანამ შევიტყობდეთ რამეს მათი წამოწყებების შესახებ, თუნდაც ისინი ჩვენსას აღემატებოდეს. ამის მიზეზი, ჩემი აზრით, მხოლოდ ისაა, რომ, მართალია, ჩვენ არ ჩამოვუვარდებით მათ არც ჭკუით და არც საშუალებებით, მათ მაინც, ჩვენთან შედარებით, სახელმწიფოს მართვის უკეთესი ხერხები აქვთ და ხალხიც უფრო ბედნიერად ცხოვრობს“.

„ამიტომ, ჩემო რაფაელ, — ვუთხარი მე, — დაჟინებით გთხოვ აგვიწერე ეს კუნძული: ენაწყლიანად, ნუ გამოიჩენ სიტყვაძუნწობას, დაწვრილებით მოგვიყვები ყველაფერი მისი მიწების, მდინარეების, ქალაქების, მოსახლეობის, ზნე-ჩვეულებების, დაწესებულებების, კანონებისა და, ბოლოს, ყველაფერი იმის შესახებ, რის გაცნობასაც ჩვენთვის სასურველად მიიჩნევ. შენ ხომ იცი, რომ ჩვენ ყველაფერი გვაინტერესებს, რაც ახალი და უცნობია ჩვენთვის“. „დიდი სიამოვნებით შევესარულებ ამას, — მიპასუხა მან, — რადგან ყველაფერი კარგად მახსოვს. მაგრამ ამას თავისუფალი დრო დასჭირდება“. „მაშინ წავიდეთ, — ვთქვი მე, — ვისადილოთ, ხოლო შემდეგ კი სურვილისამებრ გავანაწილოთ დრო“. ამაზე შევთანხმდით. ჩვენ შევედით სახლში სასადილოდ. სადილის შემდეგ კი დავბრუნდით, იმავე სკამზე ჩამოვსხედით და ვუბრძანეთ მსახურებს არავის შევეწუხებინეთ. მე და პეტრე ეგიდიუსმა დავიყოლიეთ რაფაელი, შეესარულებინა დანაპირები. როდესაც რაფაელმა დაინახა, როგორ ვიქეციით სმენად, ცოტა ხნის ღუმი-ღისა და ჩაფიქრების შემდეგ ასე დაიწყო:

პირველი წიგნის დასასრული

მეორე წიგნი საუბრისა,  
რომელიც გაბართა რაფაელ ჰითლოდევსმა  
სახელმწიფოს საუკეთესო წუობილების თაობაზე  
ლონდონელ მოქალაქესა და  
ვიკონტან ტომას მორთან.



უტოპიელთა კუნძულის<sup>76</sup> შუა—ყველაზე უფრო განიერი ნაწილი ორას მილზეა გადაკიშული, შემდეგ კი კარგა დიდ მანძილზე სივანეში ცოტათი კლებულობს, ხოლო თავსა და ბოლოში თანდათანობით ვიწროვდება, რაც კუნძულს ნამგალა მთვარის სახეს აძლევს. ამ ბოლოების ფარგლით შემოხაზვა რომ შეიძლებოდეს, ხუთასმილიან გარშემოწერილობას მივიღებთ. მის რქებს შორის შეჭრილია დაახლოებით თერთმეტმილიანი სიგრძის ყურე. მთელ ამ უზარმაზარ სივრცეზე ყოველი მხრიდან ხმელეთით გარშემორტყმული, ქარებისაგან დაცული წყალი დიდ ტბას წააგავს, რომელიც უფრო მდორეა, ვიდრე ბობოქარი. ამ ქვეყნის თითქმის მთელი შიდა ნაწილი ერთი დიდი ნეთსაყუდელია, რომელიც აქ მაცხოვრებელთა სარფიანი მოგებისათვის სულ სხვადასხვა მხარეს უშვებს ხომალდებს. ყურის შესასვლელი მეტად სახიფათოა, ერთი მხრივ, მეჩხეების, ხოლო მეორე მხრივ, ფრიალო კლდეების გამო. თითქმის შუა გზაზე წყლიდან ამოშვერილია ერთი ჭხიფათო კლდე და მასზე აღმართულია კოშკი, რომელშიც საგუშაგოა მოთავსებული. დანარჩენი კლდეები წყლითაა დაფარული და იქ სიფათია ჩასაფრებული. მათ შორის გასასვლელები მხოლოდ უტოპიელებმა იციან და ამიტომ შემთხვევითი არ არის, რომ ვერც ერთი უცხოელი ვერ შევა ყურეში უტოპიელი გამყოლის დაუხმარებლად. ზოგჯერ თვით უტოპიელთათვისაც სახიფათოა იქ შესვლა და მაშინ ზოგიერთ ნიშანს ნაპირიდან აძლევენ მათ. თუ საჭიროების დროს ასევე სხვა ადგილებიდანაც ანიშნებენ, მაშინ ადვილად შეიძლება მოწინააღმდეგის ურიცხვი ხომალდთკრებულის განადგურება. კუნძულის მეორე მხარეს ბევრზე ბევრი ნავსადგურია. მაგრამ ხმელეთთან მისასვლელი ყველგან ისეა გამაგრებული ან ბუნებრივად, ან ხელოვნურად, რომ ხმელეთზე მყოფ მცირერიცხოვან დამცველებსაც კი შეუძლიათ მტრის ურიცხვი ლაშქრის უკუგდება.

როგორც თქმულებები გადმოგვცემენ და თვით ხმელეთის ფორმაც გვიჩვენებს, ეს ქვეყანა ყოველთვის როდი ყოფილა ზღვით გარშემორტყმული. მაგრამ უტოპუსმა, რომლის მძლეთამძლე სახელსაც

ატარებს კუნძული, ადრე რომ აბრაქსა<sup>77</sup> ერქვა, გამარჯვებისთანავე ბრძანა გაეთხარათ თხუთმეტი მილი იქ, სადაც ეს ქვეყანა კონტინენტს უერთდებოდა, და ხმელეთს გარშემო ზღვა შემოარტყა. ამავე უტოპუსმა თავისი მოუქნელი და ველური ბრბო განსწავლისა და განათლების ისეთ დონეზე აიყვანა, რომ ახლა იგი ამ მხრივ თითქმის ყველა სხვა მოკვდავთ აღმატება. ეს სამუშაო რომ ვინმეს სამარცხვინოდ არ მიეჩნია, უტოპუსმა თავისი ჯარისკაცებიც ჩართო შრომაში. ერთდროულად შრომა მრავალ ადამიანზე რომ განაწილდა, იგი არნახული სისწრაფით დასრულდა. უტოპიელთა წარმატებამ განაცვიფრა და თანაც შეაძრწუნა მეზობლები, რომლებიც თავიდან დასცინოდნენ ამ ვითომ უსარგებლო წამოწყებას.

კუნძულზე ორმოცდათოთხმეტი ქალაქია<sup>78</sup>, ყველა ვრცელი და დიდებული; ენა, ზნე-ჩვეულებები, დაწესებულებები და კანონები მათ სავსებით ერთნაირი აქვთ. მათი მდებარეობაც ასევე ერთნაირია და ერთნაირადვე გამოიყურება, რამდენადაც ამის საშუალებას იძლევა ადგილმდებარეობა. ქალაქები ერთმანეთისაგან ოცდაათხი მილითაა დაშორებული. ამავე დროს არცერთი ქალაქი არ არის ისე მოწყვეტილი, რომ მეორე ქალაქამდე ფეხით ერთ დღეში არ შეიძლებოდეს მისვლა.

ყოველი ქალაქიდან ყოველწლიურად სამი მოხუცი და გამოცდილი მოქალაქე ამჟროტში<sup>79</sup> იკრიბება კუნძულის საერთო საქმეთა განსახილველად. ამ ქალაქს უპირატესობა ენიჭება, ვინაიდან იგი ქვეყნის შუაგულში მდებარეობს და ამდენად მოსახერხებელია ყოველი მხრიდან მივლინებულთათვის მისადგომად. ქალაქებს შორის მინდვრები იმდენად მარჯვედაა განაწილებული, რომ თითოეულს ცალ-ცალკე ყოველი მხრიდან არანაკლებ ოცი მილიმიწა აკრავს, ხოლო ერთი მხრიდან გაცილებით მეტიც კია, და ეს სწორედ იმ მხრიდან, საიდანაც ქალაქები უფრო მეტად არიან დაშორებული ერთმანეთს. არც ერთ ქალაქს არა აქვს თავისი საზღვრების გავრცობის სურვილი, ვინაიდან მისი მკვიდრნი საკუთარ თავს მიწათმოქმედებად უფრო მიიჩნევენ, ვიდრე ამ სამფლობელოს ბატონ-პატრონებად. სოფლებში ყველგან მოხერხებულად არის განლაგებული სახლები, სადაც სოფლის მეურნეობისათვის საჭირო იარაღები ინახება. იქვეა დასახლებული მაცხოვრებლები, რომლებსაც მორიგეობით უწევთ იქ ცხოვრება. არც ერთი სოფლის ოჯახის შემადგენლობა არ არის ორმოც კაცზე ნაკლები, მთრიცხვში შედის აგრეთვე ორი მიწერილი მონა. ოჯახის სათავეში დგანან ოჯახის მამა და დედა, პატივცემული და ხანდაზმული ადამიანები,



ხოლო ყოველი ოცდაათი ოჯახის სათავეში — ერთი ფილარქოსი<sup>80</sup>: თითოეული ოჯახიდან ოც-ოცი კაცი ყოველწლიურად ბრუნდება საცხოვრებლად ქალაქში. ეს ისინი არიან, ვინც სოფელში ორი წელი გაატარეს. მათ ადვილს იკებრენ ქალაქიდან ჩამოსულები, რათა ხელმძღვანელობა გაუწიონ იმათ, ვინც სოფელში ერთი წელი იცხოვრეს და ამიტომ უფრო მეტი გამოცდილება აქვთ სოფლის მეურნეობის საქმეებში. ამ ჩამოსულებმა შემდეგ წელს უნდა ასწავლონ სხვებს, რათა მოსავლის მოწევაში რაიმე შეცდომა არ მოხდეს, რაკი ყველა ერთნაირად ახალბედა და გამოუცდელი იქნება. თუმცა მიწათმოქმედთა გადახალისების ეს ხერხი საყოველთაოდ მიღებულია, რათა არავის არ მოუხდეს ნება-სურვილის გარეშე მეტად ხანგრძლივად ცხოვრება სოფლად, მკაცრ პირობებში, მაინც ისე ხდება, რომ ისინი, ვისაც ბუნებრივი მიდრეკილება აქვს სოფელში ცხოვრებისადმი, თავის მხრივ, იქ დარჩენას უფრო მეტ ხანს ითხოვს. მიწათმოქმედნი ამუშავენ მიწას, კვებავენ პირუტყვს, იმარაგებენ შეშას და ჩააქვთ ქალაქში როგორც მოეხერხებათ — ხმელეთით ან ზღვით. ისინი განუსაზღვრელი რაოდენობით, საოცრად უნარიანად ზრდიან წიწილებს. გამოსაჩეკად<sup>81</sup> კვერცხებს ქათმებს კი არ უწყობენ, არამედ ათასობით ცალს ერთად ათბობენ თანაბარი სითბოთი და ისე გამოჩეკენ. როგორც კი წიწილები გამოჩეკებიან ნაჭუჭიდან, ისინი უკვე უკან დასდევენ ადამიანებს, როგორც დედას, და, წარმოიდგინეთ, სცნობენ კიდევ მათ.

უტობიელებს ძალიან ცოტა ცხენი ჰყავთ, თანაც მხოლოდ ფიცხნი და ისიც მხოლოდ ჯირითში ახალგაზრდობის გასაწრთვნელად<sup>82</sup>. მთელი სამიწათმოქმედო და ტვირთსაზიდი შრომა ხარებს ეკისრებათ. უტობიელებს მიაჩნიათ, რომ ხარები სირბილში, მართალია, ჩამოუვარდებიან ცხენებს, მაგრამ გამძლეობით სჯობნიან მათ. გარდა ამისა, ხარებს ნაკლებად ემართებათ ავადმყოფობა, უფრო ადვილი შესანახი არიან და, როცა სამუშაოდ აღარ ივარგებენ, შეიძლება მათი საკვებად გამოყენება.

მარცვლეულიდან უტობიელები მხოლოდ პურს ამზადებენ, ხოლო ღვინოს ყურძნისას ან მსხლისას მიირთმევენ, ბოლოსდაბოლოს, ხანდახან მხოლოდ სუფთა წყალს, ხშირად კი თაფლის ან ალაოს ფესვის ნაყენს სვამენ. თუმცა მათ კარგად იციან (და თანაც მეტად ზუსტადაც), თუ რამდენი პური სჭირდება ქალაქს და მის მიმდებარე ოლქს, მაინც უფრო მეტი ნათესები აქვთ და საქონელსაც მეტს ზრდიან, რადგან ვარაუდობენ, რომ ზოგს მეზობლებს შესთავაზებენ. ყვე-

ლაფერს, რაც მათ ესაჭიროებათ და რაც სოფლად არ არის, ისინი ქალაქიდან ლეზულობენ, თანაც ძალიან ადვილად, ყოველგვარი სამაგიერო გაცვლის გარეშე. ქალაქში ისინი ყოველთვიურად თავს იყრიან დღესასწაულებზე. როდესაც მოსავლის აღების დღე დგება, მიწათმოქმედთა ფილარქოსები შეატყობინებენ ქალაქის ხელისუფალთ, თუ რამდენი მოქალაქის გამოგზავნაა საჭირო და რადგან მუშაკთა ეს ლაშქარი დროზე და ზუსტად ვადაზე ცხადდება, ისინი თითქმის ერთ მზიან დღეში ამთავრებენ მოსავლის აღებას.

## ქალაქებისა და უპირატესად ამაჟროტიხათვის

ის, ვინც გაეცნობა უტოპიის ერთ ქალაქს, უნდა ჩათვალოს, რომ დანაწიხნებაც გაეცნო, იმდენად ჰგვანან ისინი ერთმანეთს (ამას ხელს არ უშლის სხვადასხვა ადგილმდებარეობა) და რადგან ასეა, მეც აღვწერ ერთ რომელსამე მათგანს (დიდი მნიშვნელობა არც აქვს სახელდობრ რომელს). მაგრამ, აბა სხვა რომელია ამაჟროტზე უკეთესი? არც ერთი ქალაქი არაა მასზე ღირსეული, სხვები მას კიდევ ჩამოუვარდებიან, როგორც სენატის ადგილსამყოფელს; ამასთან არც ერთ ქალაქს არ ვიცნობ მასზე უკეთ, რადგან იქ ზედიზედ ხუთი წელი გაატარე.

ამაჟროტი მთის დამრეც ფერდობზეა გაშენებული და თითქმის კვადრატის ფორმა აქვს. დაწყებული ბორცვის მწვერვალიდან ცოტა ქვემოთ, იგი სიგანეზე გადაჭიმულია ორ მილზე, მდინარე ანიდრუსამდე, მისი ნაპირების გასწვრივ კი ქალაქის სიგრძე ცოტა უფრო მეტია. ანიდრუსი სათავეს იღებს ამაჟროტიდან ოთხმოციოდე მილის ზევით, პატარა წყაროდან, რომელიც თანდათან იზრდება სხვა მდინარეთა შენაკადებით (მათგან ორი საშუალო სიდიდისაა). შემდეგ ანიდრუსი ზედ ქალაქის მისადგომებთან ნახევარ მილამდე ფართოვდება, კიდევ უფრო იზრდება და სამოც მილს რომ გაივლის, ოკეანეს უერთდება. მთელ ამ სიგრძეზე ქალაქსა და ზღვას შორის და ქალაქის ზემოთ რამდენიმე მილზე ყოველ ექვს საათში ერთმანეთს ენაცვლება ზღვის მოქცევა და უკუქცევა. მოქცევის დროს ზღვა უკუაგდებს მდინარეს და ანიდრუსის მთელ კალაპოტს ოცდაათი მილის მანძილზე თავისი ტალღებით ავსებს. აქ და ცოტა უფრო შორსაც იგი მლაშე წყლით ამღვრევს მდინარის ნაკადს; უკუქცევისას ისევ მტკნარი წყალი იმარჯვებს და ქალაქში უკვე სუფთად მიედინება თითქმის ზედა შესართავამდე.

მდინარის გაღმა-გამოღმა გაშენებულ ქალაქს აერთებს შესანიშნავ ქვის თაღებზე და არა ბოძებსა და ხიმინჯებზე გაღებული ხილი. იგი მოწყობილია ქალაქის იმ მხარეს, რომელიც ყველაზე უფრო დაშორებულია ზღვას, რომ ხომალდებს ხელი არ შეუშალოს. აქ მეორე მდინარეც არის, მართალია, პატარა, მაგრამ ლივლივა და ლამაზი. იგი იმავე მთაზე იწყება, რომელზედაც ქალაქია გაშენებული, მის ფერდობებზე მიედინება და ანიდრუსს უერთდება. რადგან ეს მდინარე ქალაქიდან არც თუ ისე შორიახლოს მოედინება, ამაუროტის მცხოვრებლებმა იგი ქალაქში შემოიყვანეს და ჯებირებით გაამაგრეს, რომელიმე მტრის თავდასხმის შემთხვევაში რომ არც წყლის გადაგდება შეიძლებოდეს და არც კალაპოტის შეცვლა ან დაბინძურება. აქედან აგურის მილებით წყალი სხვადასხვა მიმართულებით მიედინება ქალაქის ქვედა ნაწილებში. იქ, სადაც ბუნებრივი პირობები ამის საშუალებას არ იძლევა, დიდ საცავეებში აგროვებენ წვიმის წყალს, რომელიც ასევე გამოსადეგია.

ქალაქს მაღალი და ფართო გალავანი არტყია, კედლებში კოშკები და სათოფურებია ჩატანებული. სამი მხრიდან სიმაგრეები გარემოცულია უწყლო, მაგრამ ფართო, ღრმა და კვრინჩხნარით შემოღობილი თხრილით. მეოთხე მხრიდან თხრილს თვით მდინარე ცვლის. მოედნები მოხერხებულადაა განლაგებული როგორც მგზავრობისათვის, ისე ქარისაგან დასაცავად. თვალში გეცემა სუფთა, ქათქათა შენობების გრძელი, უსასრულო რიგი, რომელიც მთელ ქუჩას გასდევს. მნახველის ყურადღებას იპყრობს სახლების გარეგნული იერი; კვარტალებს შუაზე ჰყოფს ოცი ფუტის სიგანის ქუჩა. სახლების უკანა მხარეს კი ქუჩის მთელ სიგრძეზე ფართო და ყოველი მხრიდან შემოღობილი ბაღებია. აქ ვერ ნახავთ ვერც ერთ სახლს, ორი ორფრთიანი კარი რომ არ ჰქონდეს, ერთი წინიდან — ქუჩაში და მეორე უკნიდან — ბაღში გამავალი: ყველა კარი ადვილად იღება მსუბუქი მიწოლით და შემდეგ თვითონვე იხურება, შესვლა კი ყველას შეუძლია<sup>83</sup>, იმდენად უცხოა კერძო საკუთრება. თვით სახლებსაც კი ისინი ყოველ ათ წელიწადში იცვლიან კენჭისყრით.

ბაღებს ამაუროტელები დიდად აფასებენ. აქ მოჰყავთ ყურძენი, ნაირნაირი ხილი, ბაღებს ამშვენებს ბალახი და ყვავილები. ყველაფერი იმდენად კარგად არის მოვლილი და ისე გამოიყურება, რომ სხვაგან არსად მინახავს. მსგავსი სიუხვე და სილამაზე. ისინი ასეთ გულმოდგინებას იჩენენ არა მარტო იმიტომ, რომ ეს სიამოვნებას ჰგვრით,

არამედ იმიტომაც, რომ ქუჩები ერთმანეთს ეჯიბრებიან საკუთარი ბალების მოვლაში. ყოველ შემთხვევაში ქალაქში უფრო საჭიროსა და თან ლამაზს ვერაფერს ნახავთ. ეტყობა, ქალაქის დამაარსებელი არაფერზე ისე არ ზრუნავდა, როგორც ამ ბალებზე.

ამბობენ, ქალაქის მთელი ეს გეგმა თავიდანვე უტოპუსმა შეადგინაო, მაგრამ მოსაკაზმავი და სხვა მოსართავი საქმეები, რასაც, როგორც თვითონაც გრძნობდა, არ ეყოფოდა ერთი ადამიანის სიცოცხლე, მან თავის შთამომავლებს დაუტოვაო. ამიტომ მათ მატრიანებში, რომლებსაც ისინი გულმოდგინედ ადგენენ და ფაქიზად ინახავენ, დაწყებული კუნძულის დაპყრობიდან 1760 წლის მანძილზე, ნათქვამია, რომ წინათ აქ დაბალი სახლები იდგა და ქოხებსა და გომურებს წააგავდა, შენდებოდა განურჩევლად ყოველგვარი ხისაგან, კედლები თიხით იყო შელესილი, წვეტიანი სახურავები — თივით დაფარული. ახლა კი ყოველი სახლი თავისი ფორმით იპყრობს ყურადღებას, სამსართულიანია, კედლები ქვის ან აგურისაა, შიგნით კი ცარიელი ადგილები მსხვილი ღორღითაა ამოვსებული. ბრტყელი სახურავები დაფარულია რაღაც საცხით, რომელიც, მართალია, იაფფასიანია, მაგრამ ისეთი შედგენილობისაა, რომ არ ეშინია ცეცხლისა, ხოლო ავდარში ტყვიაზე უფრო გამძლეა. ფანჯრებს ქარისაგან იცავს მინა<sup>84</sup>, რომელიც აქ ბევრზე ბევრია, ზოგჯერ მას თხელი ცხიმით პოხავენ ან ქარვის<sup>85</sup> ფენით ფარავენ. ეს ორმხრივ სასარგებლოა, ჯერ ერთი, მეტ სინათლეს ატარებს და, მეორეც, ქარიც ვერ ატანს.

## თანამდებობის პირთათვის

ყოველი ოცდაათი ოჯახი თავის მხრივ ყოველწლიურად ირჩევს თანამდებობის პირს, რომელსაც ადრე სიფოგრანტუსი<sup>86</sup> ერქვა, ხოლო ახალ ენაზე ფილარქოსი ჰქვია. ყოველ ათ სიფოგრანტუსს თავის ოჯახებიანად მეთაურობს კაცი, რომელსაც ძველებურად ტრანიბორუსი<sup>87</sup> ერქვა, ახლა კი პროტოფილარქოსად იწოდება.

ყველა სიფოგრანტუსი, სულ ორასი კაცი, ფიცის დადების შემდეგ იმის თაობაზე, რომ აირჩევს ყველაზე ღირსეულს, ფარული კენჭისყრით შეარჩევს თავადს (ბატონს), სახელდობრ, ერთ-ერთს იმ ოთხი პიროვნებისაგან, რომლებსაც მათ ხალხი შესთავაზებს. ქალაქის მოსახლეობის ყოველი მეოთხედი ირჩევს ერთ ტრანიბორუსს და შუამდგომლობას უწევს სენატში. თავადის თანამდებობა უცვლელია მთე-

ლი მისი ცხოვრების მანძილზე, თუკი რაიმე მიდრეკილებას არ გამოავლენს იგი ტირანიისადმი. ტრანიბორუსები ყოველ სამ დღეში, ზოგჯერ, თუ გარემოება მოითხოვს, უფრო ხშირადაც, დადიან სათათბიროდ თავადთან. ისინი ბჭობენ საზოგადო საქმეებზე და მყისვე შეწყვეტენ ხოლმე ყოველგვარ კერძო კამათს, თუკი ასეთი რამ წამოიჭრება. სიფოგრანტუსებიდან სენატში ყოველთვის უნდა იყოს ორი, თანაც ყოველდღე სხვადასხვა. არსებობს დადგენილება, რათა იმ საქმეთაგან, რომლებიც რესპუბლიკას ეხება, არც ერთი არ გადაიჭრას მანამ, სანამ არ განიხილავს სენატი გადაწყვეტილების მიღებამდე სამი დღით ადრე. სისხლის სამართლის დანაშაულად ითვლება საზოგადო საქმეებზე გადაწყვეტილების მიღება სენატის ან სახალხო კრების გარეშე. ამბობენ, რომ ეს ღონისძიება შემოღებულია იმ მიზნით, რომ არავინ გაბედოს სახელმწიფო წყობილების შეცვლა თავადისა და ტრანიბორუსების შეთქმულებით ან ხალხის დამორჩილება ტირანიით. ამიტომ ყოველგვარი საქმე, რომელსაც რაიმე მნიშვნელობა აქვს, სიფოგრანტუსთა კრებას მოხსენდება, ისინი თავის მხრივ აცნობენ მას თავთავიანთი განყოფილებების ოჯახებს, შემდეგ ერთმანეთში ითათბირებენ და თავის გადაწყვეტილებას სენატს აცნობებენ<sup>88</sup>. ზოგჯერ საქმე გადააქვთ მთელი კუნძულის კრებაზე. სენატს, გარდა ამისა, აქვს ასეთი წესიც: არც ერთი წინადადება არ გააჩიონ იმ დღეს, როდესაც იგი პირველად შევა, და გადადონ სენატის მორიგ თათბირამდე, რათა არავინ არ წამოროშოს, რაც ენაზე მოადგება. ასე რომ არ იყოს, მაშინ კაცი იმაზე იფიქრებს, თუ როგორ დაიცვას თავისი პირველი გადაწყვეტილება და არა იმაზე, თუ რა უფრო არგებს სახელმწიფოს. მახინჯი და ცრუ პატივმოყვარეობის გამო იგი უფრო ადრე დათმობს საზოგადოებრივ კეთილდღეობას, ვიდრე საკუთარ ნათქვამს, საკუთარ წარმოდგენას, ვითომდა მან ნაკლები იზრუნა იმაზე, რაზეც უნდა ეზრუნა, სახელდობრ — ელაპარაკა უფრო ღინჯად და დაფიქრებულად, ვიდრე სულსწრაფად და ნაჩქარევად.

## ხელობათათვის

ყველა ქალსა და კაცს ერთი საქმე აქვს — მიწათმოქმედება, რომლისაგანაც არავინ თავისუფლდება. პირიქით, მას ყველა სწავლობს ბავშვობიდანვე, ნაწილობრივ სკოლაში მოძღვრების დაუფლების გზით, ნაწილობრივ კი ქალაქის ახლომახლო მინდვრებზე, სადაც ბავშვები

თითქოსდა სათამაშოდ გაჰყავთ, მაგრამ ისე გამოდის, რომ იქ ისინი არა მარტო აკვირდებიან გარემოს, არამედ ფიზიკური ვარჯიშის სახით მუშაობენ კიდევ.

მიწათმოქმედების გარდა (რასაც, როგორც უკვე ვთქვი, ყველა მისდევს), თითოეული სწავლობს ერთ რომელიმე საკუთარ ხელობას, ჩვეულებრივ ეს ან მატყლის დართვაა, ან სელის გამოყვანა, ან ქვის-მთლელთა, მელითონეთა და ხის ოსტატთა ხელობა. შეიძლება ითქვას, რომ ამის გარდა მათ არა აქვთ სხვა რაიმე ისეთი, რომელიც აღნიშვნის ღირსი იყოს. რაც შეეხება ტანსაცმელს, იმის გარდა, რომ იგი გარეგნულად განსხვავებულია სხვადასხვა სქესის პირთათვის, როგორც მარტონხელათათვის, ისე დაქორწინებულთათვის, მისი შეკერილობა ყოველთვის ერთნაირი, უცვლელი და მუდმივია, შესახედავად საცხებით მოსაწონი, მოძრაობისათვის მოსახერხებელი და სიცხევა და სიცხესთან შეფარდებული. და, აი, ამ ტანსაცმელს თითოეული ოჯახი თვითონვე იშვადებს. სხვა ხელობებიდან ისინი სწავლობენ კიდევ ერთ რომელიმეს, თანაც სწავლობენ არა მარტო კაცები, არამედ ქალებიც. ქალები, როგორც შედარებით სუსტები, უფრო ადვილი საქმით არიან დაკავებულნი: ჩვეულებრივ ამუშავებენ მატყლს ან სელს. მამაკაცებს ეკისრებათ სხვა, უფრო ძნელი ხელობები. ხშირად ახალგაზრდები მამის ხელობას მისდევენ, უმრავლესობას მისკენ ბუნებრივი მიდრეკილება აქვს. მაგრამ თუ ვინმეს სხვა საქმიანობისადმი აქვს მისწრაფება, მას ისეთ ოჯახს მიაშვილებენ, რომლის საქმიანობისადმიც იჩენს სიყვარულს. ასეთ შემთხვევაში არა მარტო ამ ახალგაზრდის მამა, არამედ ხელისუფლებაც ზრუნავს იმაზე, რომ იგი დარბაისელსა და კეთილშობილ ოჯახის უფროსს ჩააბარონ. გარდა ამისა, თუ ვინმე ერთი ხელობის შესწავლის შემდეგ მოინდომებს მეორის შესწავლასაც, ამის ნებართვას ისევ იმავე გზით იღებს. როცა იგი ორივე ხელობას დაეუფლება, აირჩევს სამუშაოდ იმას, რომელიც თვითონ უნდა, თუ, რა თქმა უნდა, სახელმწიფოს უფრო სხვა არ ესაქიროება.

სიფოგრანტუსთა უმთავრესი და თითქმის ერთადერთი საქმიანობაა ზრუნვა და დაკვირვება იმაზე, რომ არავინ იჯდეს უქმად, თითოეული მუშაობდეს თავისი ხელობის მიხედვით, მაგრამ არა ადრე დილიდან გვიან ღამემდეგ<sup>89</sup>, რათა საქონელივით არ დაიქანტოს, თორემ ასეთი მძიმე შრომა ხომ მონების ხვედრსაც კი აღემატება, თუმცა ასეთ ცხოვრებას ეწევიან მუშები ყველგან, გარდა უტოპიისა. უტოპიელები დღე-ღამეს ოცდაოთხ თანაბარ ნაწილად ყოფენ და სამუშაოს აქედან

მხოლოდ ექვს საათს უთმობენ: პირველ სამ საათს შუადღემდე მუშაობენ, რის შემდეგაც სასაღილოდ მიდიან, სადილის შემდეგ ნაშუადღევის ორ საათს ისვენებენ და ისევ განაგრძობენ მუშაობას მეორე სამ საათს. საშუაო დღეს ვახშმით ამთავრებენ. ვინაიდან უტოპიელები პირველ საათს შუადღიდან ითვლიან, დაახლოებით რვა საათისათვის უკვე დასაძინებლად მიდიან. ძილისთვის გამოყოფილი აქვთ რვა საათი. მთელი დრო, რომელიც მუშაობას, ძილსა და ჭამას შორის რჩება, თითოეულს შეუძლია საკუთარი შეხედულებისამებრ გამოიყენოს, მაგრამ არა განცხრომისა და მცონარობისათვის, არამედ იმისათვის, რომ, თავისი ხელობისაგან თავისუფალმა, აზრიანად, სარგებლიანად გამოიყენოს ეს საათები რაიმე სხვა საქმისათვის. ამ დროს უტოპიელთა უმრავლესობა მეცნიერების შესწავლას უთმობს<sup>90</sup>. ისინი ჩვეულებრივ ყოველდღიურად გარიჟრაჟამდე<sup>91</sup> აწყობენ საჯარო კითხვას. ეს საქმე მინდობილი აქვს მხოლოდ იმას, ვინც საგანგებოდაა შერჩეული მეცნიერებისათვის. ამათ გარდა, ყველა წოდების როგორც კაცები, ისე ქალები, დიდ-დიდ ჯგუფებად იკრიბებიან და მიდიან ზოგნი ერთ, ზოგნი კი მეორე საჯარო კითხვაზე დასასწრებლად, იმის მიხედვით, თუ რომლისკენ აქვთ მისწრაფება. თუმცა ისიც ხდება, რომ თუკი ვინმე არჩევს ეს დრო ისევ თავის ხელობას დაუთმოს, და ასეთი კი ბევრია, ვისაც რომელიმე მეცნიერების დაუფლების სურვილი არა აქვს,— მას არავინ უშლის ხელს ამაში, უფრო მეტიც, ასეთი პიროვნება ქებასაც კი იმსახურებს, როგორც სახელმწიფოსათვის სარგებლობის მომტანი.

ნავახშმევს უტოპიელები ერთ საათს გართობაში ატარებენ: ზაფხულში ბაღებში, ზამთარში კი იმ საერთო დარბაზებში, სადაც სადილობენ. აქ ისინი ან მუსიკას უსმენენ, ან სასიამოვნო საუბრებს მართავენ. რაც შეეხება კამათლებით თამაშსა და სხვა ამგვარ უაზრო და დამლუპველ გასართობებს, წარმოიდგინეთ, მათ უტოპიელები არც კი იცნობენ. თუმცა მათთან გაერცელებულია ორი თამაში, რომელიც რალაციით წააგავს ჭადრაკს. ერთი—ესაა ციფრების ბრძოლა, სადაც ერთი ციფრი იჭერს მეორეს, და მეორე თამაში, როდესაც მანკიერებანი სამხედრო წესით ებრძვიან ღირსებებს. ამ თამაშში მეტად მოხერხებულადაა მითითებული როგორც მანკიერებათა შორის არსებულ განხეთქილებაზე, ისე მათ ერთსულოვნებაზე ღირსებების წინააღმდეგ ბრძოლაში, აგრეთვე იმაზე, თუ რომელი მანკიერება რომელ ღირსებას უპირისპირდება, როგორ ძალებს უცხადებენ ისინი აშკარა ბრძოლას,

როგორი ხრიკებით ეპარებიან შეფარვით, თავის მხრივ, რის დახმარებით ასუსტებენ ღირსებანი მანკიერებათა ძალებს, როგორი ხერხებით არიდებენ ისინი თავს თავდასხმას და, ბოლოს, როგორ იმარჯვებს ესა თუ ის მხარე.

მაგრამ აქ, შემდგომი გაუგებრობის თავიდან ასაცილებლად, აუცილებელია უფრო დაწვრილებით განვიხილოთ ერთი საკითხი. სახელდობრ, თუ მხოლოდ ექვსი საათი ეთმობა სამუშაოს, მაშინ აქედან, როგორც ჩანს, შეიძლება ვივარაუდოთ, რომ ამის შედეგად პირველი მოთხოვნილების საგნების გარკვეული ნაკლებობა შეიმჩნევა. მაგრამ ზინამდვილეში ეს ასე როდია; უფრო მეტიც, სამუშაო დროის ეს რაოდენობა არა მარტო სავსებით საკმარისია ცხოვრებისათვის აუცილებელი მარაგის შესაქმნელად, არამედ გარკვეულ დანაზოგსაც იძლევა. ეს გასაგები გახდება, თუ თქვენ უფრო ღრმად ჩაუკვირდებით იმას, თუ სხვა ხალხების მოსახლეობის რა უზარმაზარი ნაწილი ცხოვრობს უსაქმოდ: ჯერ ერთი, ასე ცხოვრობს თითქმის ყველა ქალი — საერთო მასის ნახევარი, ხოლო თუ სადმე ქალები მუშაობენ, ივარაუდება, რომ მაშინ იქ მამაკაცები ხვრინავენ. ამასთან, წარმოიდგინეთ, რა ვეეზერთელა და რა უსაქმურ ბრბოს შეადგენენ მღვდლები და ეკრეთ წოდებული ბერები. ამას დაუმატეთ კიდევ მდიდრები, განსაკუთრებით მემამულეები, რომლებსაც, ჩვეულებრივ, კეთილშობილებსა და წარჩინებულებს უწოდებენ; მიუმატეთ მათი ჯალაბი, აღკაზმული უსაქმურების მთელი ეს ხროვა, ბოლოს ჯანმრთელი და საღ-სალამათი მათხოვრები, რომლებიც რაიმე ავადმყოფობის მომიზეზებით უსაქმურად ცხოვრობენ — და იძულებული გახდებით საბოლოო ჯამში აღიაროთ, რომ იმათი რაოდენობა, ვისი შრომითაც იქმნება ყოველივე ის, რითაც მოკვდავნი სარგებლობენ, გაცილებით ნაკლებია, ვიდრე თქვენ გეგონათ. დაფიქრდით ახლა, ამ მართლა მშრომელი ადამიანებიდან რა ცოტანი არიან დაკავებული საქირო და აუცილებელი საქმით. სახელდობრ, რადგან ჩვენ ყველაფერს ფულით ვზომავეთ, გარდუვალია ბევრი ისეთი საქმიანობის გამოყენება, სრულიად უაზრო და ზედმეტისა, რომლებიც მხოლოდ ფუფუნებასა და უზნებობას ემსახურება. მართლაც, მთელი ეს ბრბო, რომელიც დაკავშირებულია სამუშაოთი, რომ განაწილდეს იმ მეტად მცირერიცხოვანი ხელობების მიხედვით, რაც საჭიროა ბუნებრივ მოთხოვნილებათა სათანადოდ დასაკმაყოფილებლად, მაშინ ასეთი უხვი წარმოებისას, რომელიც უეჭველად უნდა მოჰყვეს ამას, შრომის ფასი, ცხადია, გაცილებით ნაკლები იქნება იმაზე,



რაც მუშებს სჭირდებათ თავიანთი არსებობისათვის. მაგრამ ავიღოთ ყველა ის პიროვნება, რომელიც ახლა უსარგებლო ხელობებით არის დაკავებული, და კიდევ მთელი ეს უსაქმურობისა და მცონარობისაგან დასაუბრებული ხალხის რიცხვი, რომელთაგან თითოეული სხვისი შრომით შექმნილ იმდენ სანოვაგეს ნთქავს, რაც მის ორ დამამზადებელს ეყოფოდა. ასე რომ, ვიმეორებ, თუკი ამ პიროვნებათა მთელ ერთობლიობას სამუშაოს მიეუჩინო და თანაც სასარგებლოს, ადვილად შევამჩნევთ, თუ რა ცოტა დრო იქნებოდა საჭირო ყველაფერი იმის საკმაო და უფრო ჭარბი რაოდენობით საწარმოებლად, რასაც სარგებლიანობისა და მიზანშეწონილობის პრინციპები მოითხოვს (ამას მიუმატეთ კიდევ სიამოვნებანი, ოღონდ ნამდვილი და ბუნებრივი).

ყოველივე ამას უტოპიაში ცხადად ადასტურებს თვით სინამდვილე. სახელდობრ, იქ მთელ ქალაქში, თავისი ოლქიანად, იმ მამაკაცებისა და ქალებისაგან, რომლებიც თავიანთი შააკითა და ძალ-ღონით შრომისათვის ვარგისი არიან, მხოლოდ ხუთასი კაცი თუა განთავისუფლებული. მათ შორის სიფოგრანტუსები, რომლებსაც, მართალია, კანონით აქვთ უფლება არ იმუშაონ, მაგრამ მაინც არ არიდებენ შრომას თავს, რათა თავისი მაგალითით დანარჩენებს შრომის ხალხის შემატონ. ამავე შედეგათით სარგებლობენ ისინი, ვისაც ხალხი სასულიერო წოდების შუამდგომლობით და სიფოგრანტუსთა ფარული კენჭისყრით სამუდამოდ უბოძებს თავისუფლებას მეცნიერების საფუძვლიანად შესასწავლად. თუ რომელიმე ამ პირთაგან არ გაამართლებს მასზე დამყარებულ იმედს, მას უკან აბრუნებენ ხელოსნებთან. და, პირიქით, ხშირად ხდება, რომ რომელიმე მუშა ისე ბეჭითად მეცადინეობს მეცნიერებაში ზემოთ აღნიშნულ თავისუფალ საათებში და ისეთი სიბეჭითით გამოირჩევა, რომ მას ათავისუფლებენ თავისი ხელობიდან და მეცნიერთა თანრიგში გადაჰყავთ.

მეცნიერთა ამ წოდებიდან ირჩევენ ელჩებს, სასულიერო პირებს, ტრანიბორუსებს და, ბოლოს, თვით სახელმწიფოს მეთაურს, რომელსაც თავიანთ უძველეს ენაზე ისინი ბარზანს<sup>92</sup> უწოდებენ, ხოლო ახალზე — ადემუსს<sup>93</sup>. ვინაიდან უქმად თითქმის არავინ არ არის და ყველა სასარგებლო ხელობას მისდევს, ადვილი გამოსათვლელია, თუ რამდენ საჭირო საგანს ქმნიან ისინი და რა მცირე დროში. ჩემ მიერ მოტანილ მოსაზრებებს განამტკიცებს ის გარემოებაც, რომ აუცილებელ ხელობათა უმრავლესობა მათ გაცილებით ნაკლებ დროს ართმევს, ვიდრე სხვა ხალხებს. აი, მაგალითად, ავიღოთ მშენებლობის საქმე. შე-

ნობათა აგება ან შეკეთება ყველა ქვეყანაში ძალიან ბევრი მუშახელის განუწყვეტელ შრომას მოითხოვს, რადგან მფლანგველი მემკვიდრე თანდათან ანადგურებს მამის დანატოვარს. ამრიგად, ის, რისი შენარჩუნებაც მინიმალური დანახარჯებით შეიძლებოდა, მემკვიდრემ უნდა აღადგინოს დიდძალი თანხით. ესეც არ კმარა, ხშირად განებივრებული გემოვნების ადამიანი უსაფუძვლოდ იწუნებს სახლს, რომელიც სხვას აურაცხელი თანხა დაუჯდა, და როდესაც შეუქცებლად დარჩენილი ეს სახლი მოკლე დროში ინგრევა, პატრონი იშენებს სხვაგან მეორეს და ამაზე დიდ ფულს ხარჯავს. უტობიელებს კი, რომლებსაც ყველაფერი მოწესრიგებული აქვთ და რომელთა სახელმწიფოც კეთილმოწყობით გამოირჩევა, ძალიან იშვიათად უხდებათ ახალი ნაკვეთის შერჩევა სახლების ასაშენებლად. მუშები არა მარტო სწრაფად აღადგენენ უკვე დაზიანებულ შენობას, არამედ ისე აგებენ, რომ შეკეთება ნადრევედ აღარ დასჭირდეს. ამიტომ შრომის სულ მცირე დანახარჯებით შენობები ძალიან დიდხანს ძლებს და ამ ხელობის მუშები ძნელად შოულობენ სამუშაოს, თუ არ ჩავთვლით იმას, რომ ისინი იღებენ ბრძანებას, მასალა დროებით სახლში დაამზადონ, მაგალითად, გათალონ და გააპრიალონ ქვები, რათა საქმე წინ წაიგდონ.

და კიდევ, მიაქციეთ ყურადღება იმას, თუ რა მცირე შრომა სჭირდებათ მათ საკუთარი ტანსაცმლის დასამზადებლად. ჯერ ერთი, ვიდრე ისინი სამუშაოზე არიან, ზერელედ იფარავენ ტანს ტყავით ან ბეწვით, რომელიც მათ თითქმის შვიდ წელს ჰყოფნით. როდესაც ისინი ქუჩაში გამოდიან, ზემოდან იცვამენ გრძელ მოსასხამს, რომელიც ზემოაღნიშნულ უხეშ ტანსაცმელს ფარავს. ამ მოსასხამის ფერი ერთნაირია მთელს კუნძულზე და ამასთან ესაა შალის ბუნებრივი ფერი. ამიტომ აქ არა მარტო ყველაზე უფრო ნაკლები მაუდი იხარჯება, ვიდრე სადმე სხვაგან, არამედ მისი დამზადებაც გაცილებით ნაკლებ ხარჯებს მოითხოვს. სელის დამზადებაზე ხომ კიდევ უფრო ნაკლები შრომა იხარჯება და ამიტომ მას უფრო ფართოდ იყენებენ. მაგრამ ტილოში ისინი უპირატესობას პირველ ყოვლისა სითეთრეს ანიჭებენ, ხოლო შალის ქსოვილში — მხოლოდ და მხოლოდ სისუფთავეს. უფრო ნატიფ ნამუშევარს აქ არავითარი ფასი არა აქვს. ამის შედეგად მათთან თითოეული კმაყოფილდება ერთი ხელი ტანსაცმლით და ამასთან ჩვეულებრივ ორი წლის განმავლობაში ჰყოფნის. სხვა ქვეყნებში კი ერთ ადამიანს არ ჰყოფნის ოთხი ან ხუთი ხელი შალის ზედა ტანსაცმელი და ისიც ნაირფერი, და ამასთან ერთად აქვთ კიდევ ამდენივე აბრეშუ-

მის პერანგი, ზოგიერთ ნებიერას კი ათიც არ ჰყოფნის. უტოპიელს არავითარი საფუძველი არა აქვს ტანსაცმელზე მოთხოვნილებისათვის: რამოდენიმე ხელი ტანსაცმელი მას უკეთ ვერ დაიცავს სიცივისაგან და არც სხვაზე უფრო მორთულ-მოკაზმულად ჩაითვლება.

ვინაიდან უტოპიელები სასარგებლო შრომით არიან დაკავებული და მის შესასრულებლად საკმარისია მხოლოდ მცირე შრომა, მათ ყველაფერი უხვად აქვთ. ამის შედეგად მოსახლეობის დიდ რაოდენობას დრო რჩება და ხანდახან ქალაქგარეთ უხდება გასვლა გზების შესაკეთებლად, თუ ისინი გაფუჭებულია. ძალიან ზშირად, როცა არ არის რაიმე ამგვარი სამუშაო, სახელმწიფო აცხადებს სამუშაო საათების ნაკლებ რაოდენობას. ხელისუფლებას სულაც არ სურს იძულებით ამუშაოს ხალხი უფრო მეტ ხანს, ვიდრე საჭიროა. ამ მოვალეობის დაწესება პირველ ყოვლისა იმ მიზანს ემსახურება, რომ, რამდენადაც ეს შესაძლებელია საზოგადოებრივი საჭიროების თვალსაზრისით, ყოველი მოქალაქე უზრუნველყოფილი იყოს დროის მაქსიმალური ოდენობით, რათა ფიზიკური მონობის შემდეგ დრო გამოიყენოს სულიერი სიამოვნებისა და განათლებისათვის. ამაშია, მათი აზრით, ჰარმონია, ცხოვრების ბედნიერება.

## ერთმანეთთან დამოკიდებულებისათვის

ახლა კი, ვფიქრობ, უკვე დროა მოგიყვეთ, თუ როგორი ურთიერთობა აქვთ ცალკეულ მოქალაქეებს ერთმანეთში, რანაირია მთელი ხალხის ურთიერთკავშირი და როგორ ნაწილდება მათთან ყველა საგანი. პირველ ყოვლისა ვილაპარაკებ ქალაქებზე. ყოველი ქალაქი შედგება ოჯახებისაგან: ეს ოჯახები უმრავლეს შემთხვევაში აერთიანებენ ნათესავებს. სათანადო ასაკს მიღწეული და გათხოვილი ქალები საცხოვრებლად ქმრის სახლში გადადიან, ხოლო ვაჟიშვილები და შემდეგ შვილიშვილებიც ოჯახში რჩებიან და ნათესავთა შორის უხუცესს ემორჩილებიან, თუკი მისი გონებრივი შესაძლებლობანი არ შესუსტდა სიბერის გამო (მაშინ მას ცვლის მისი მომდევნო ოჯახის წევრი ასაკის მიხედვით).

ქალაქების მეტრისმეტად მეჩხერად დასახლების ან ჰარბი მოსახლეობის თავიდან ასაცილებლად მიღებულია სიფრთხილის ასეთი ზომა: ყოველ ოჯახში, რომელთა რაოდენობა თითოეულ ქალაქში, მიღამოთა გარდა, ექვს ათასს შეადგენს, არ უნდა იყოს ათზე ნაკლები და

თექვსმეტზე მეტი მოზრდილი. რაც შეეხება ბავშვებს, მათი რაოდენობა არავითარ აღრიცხვას არ ექვემდებარება. ამ ზომების დაცვა აღვილია მცირერიცხოვან ოჯახებში იმათი გადაყვანით, ვინც ზედმეტი მრავალრიცხოვანებში. ხოლო თუ ქალაქის გაზრდა საერთოდ დაარღვევს სათანადო ზღვრებს, უტოპიელები ამის ხარჯზე შეავსებენ სხვა ქალაქების მცირერიცხოვნობას. თუ ხალხის რაოდენობა ძალიან გაიზრდება მთელს კუნძულზე, ისინი ირჩევენ მოქალაქეებს ყოველი ქალაქიდან და თავიანთი კანონების მიხედვით აწყობენ კოლონიას უახლოეს მატერიკზე, სადაც კი უცხოელებს ზედმეტი და თანაც დაუმუშავებელი მიწა აქვთ. ამასთან უტოპიელები მოიხმობენ უცხოელთ და ეკითხებიან, თანახმანი არიან თუ არა, მათთან ერთად იცხოვრონ. თანხმობის შემთხვევაში უტოპიელები ადვილად ეთვისებიან მათ, სარგებლობენ რა ერთი და იმავე წესითა და ჩვეულებებით. ეს კი სასიკეთოა როგორც ერთი, ისე მეორე ხალხისათვის. თავიანთი წესებით უტოპიელები აღწევენ იმას, რომ ის მიწა, რომელიც ადრე მწირი და ხრიოკი ეჩვენებოდათ, ახლა ორივესთვის მსუყედ იქცევა. ხოლო იმ შემთხვევაში, თუ ადგილობრივი მკვიდრნი უარს ამბობენ უტოპიელთა წესების მიხედვით ცხოვრებაზე, ეს უკანასკნელნი განდევნიან მათ თავისთვის არჩეული საზღვრებიდან. წინააღმდეგობის შემთხვევაში უტოპიელები ომს იწყებენ. მათ ომისათვის სავსებით სამართლიან მიზეზად მიაჩნიათ ის შემთხვევა, როდესაც რომელიმე ხალხი, რომელიც ტყუილად და უმაქნისად ფლობს მიწა-წყალს, არც თვითონ სარგებლობს და არც სხვას ასარგებლებს, უარს ეუბნება სარგებლობასა და გამოყენებაზე იმათ, ვინც ბუნების კანონით მისგან უნდა იკვებებოდეს. თუ რაიმე უბედური შემთხვევის გამო თვით უტოპიელთა ზოგიერთი ქალაქის მოსახლეობა შემცირდება იქამდე, რომ მისი შევსება არ ხერხდება კუნძულის სხვა ნაწილებიდან (ეს კი, როგორც ამბობენ, სულ ორჯერ მოხდა სასტეკი და მძვინვარე შავი ჭირის შემდეგ), იგი შეივსება კოლონიიდან უკან გადმოსახლებულ მოქალაქეთა ხარჯზე. უტოპიელებს ურჩევნიათ კოლონიებს შეელიონ, ვიდრე კუნძულის რომელიმე ქალაქი დასუსტდეს.

ისევე ვუბრუნდები მოქალაქეთა ერთად ცხოვრების წესებს. როგორც უკვე ვთქვი, ოჯახს სათავეში უდგას უზუცესი. ცოლები ემსახურებიან ქმრებს<sup>34</sup>, შვილები — მშობლებს და საერთოდ — უმცროსები უფროსებს. ყოველი ქალაქი დაყოფილია ოთხ თანაბარ ნაწილად. თითოეული ნაწილის შუაგულში არის ბაზარი, სადაც ყველაფერია.

თითოეული ოჯახის ნახელავი მიაქვთ იქ, საგანგებო სახლებში, და სახეობათა მიხედვით ცალობით ანაწილებენ საწყობებში. იქიდან კი თითოეული ოჯახის უფროსი ითხოვს, რაც სჭირდება, და უფულოდ, ყოველგვარი სასყიდლის გარეშე მიაქვს შინ. რატომ უნდა უთხრან მას უარი? ჯერ ერთი, ყველაფერი ხომ საკმაოდ უხვადაა და, მეორეც, არ არსებობს იმის არავითარი საფრთხე, რომ ვინმე მოითხოვს იმაზე მეტს, რაც სჭირდება. რატომ უნდა ვიფიქროთ, რომ ზედმეტს მოითხოვს ის, ვინც დარწმუნებულია, რომ არასდროს არაფერი დააკლდება? მართლაცაა, ყოველ ცოცხალ არსებაში და მით უმეტეს ადამიანში ხომ სიხარბე და მტაცებლობა იმიტომ იღვიძებს, რომ სიღარიბისა ეშინია ანდა ეამაყება, როცა თავისი ქონებით სხვებს აღემატება. აი, ასეთი რამ უცხოა უტოპიელებისათვის.

ჩემ მიერ აღნიშნულ ბაზრებს მიეკუთვნება სურსათის ბაზრები, სადაც არა მარტო ბოსტნეული, ხილი და პური გამოაქვთ, არამედ თევზიცა და ხორცეულიც — ოთხფეხა პირუტყვისა და ფრინველის საქმელად ვარგისი ყველა ნაწილი. საინტერესოა, რომ უტოპიელებს ქალაქგარეთ მოწყობილი აქვთ საგანგებო ადგილები, სადაც მდინარის წყალი ჩარეცხავს ყოველგვარ ჭუჭყსა და სიბინძურეს. მათ იქიდან ჩამოაქვთ ხორცეული მას შემდეგ, რაც მსახურები დაკლავენ და გაატყავებენ პირუტყვს. უტოპიელებს აკრძალული აქვთ საქონლის დაკვლა-გატყავება ადგილებზე, ვინაიდან ამით, მათი აზრით, თანდათანობით ქრება გულმოწყალება. ჩვენი ბუნების ყველაზე უფრო ადამიანური გრძნობა. გარდა ამისა, კრძალავენ ქალაქში ყოველგვარი სიბინძურისა და ჭუჭყის შემოტანას, რადგან ლობა აბინძურებს ჰაერს და შეიძლება სხვადასხვა ავადმყოფობაც გამოიწვიოს.

გარდა ამისა, ყველა ქუჩაზე დგას ერთმანეთისაგან ტოლი მანძილით დაშორებული ფართო სასახლე. ყოველ მათგანს თავისი სახელი ჰქვია. მათში სიფოგრანტუსები ცხოვრობენ. თითოეულ ამ სასახლეზე მიწერილია ოცდაათი ოჯახი, თხუთმეტ-თხუთმეტი ორივე მხრიდან. ამ ოჯახებმა აქ უნდა ისადილონ. თითოეული სასახლის სამზარეულოს გამგე გარკვეულ საათებში მიდის ბაზარში და მოაქვს მათთვის საკმარისი საკვები.

უტოპიელები პირველ რიგში ზრუნავენ ავადმყოფებზე, რომლებსაც საზოგადოებრივ დაწესებულებებში მკურნალობენ. მათ ოთხი საავადმყოფო<sup>95</sup> აქვთ ქალაქიდან მცირე მანძილის დაშორებით. ეს საავადმყოფოები იმდენად დიდებია, რომ ამდენსავე დაბას შეიძლება

გაუთანაბრდეს. ეს იმიტომ, რომ, ჯერ ერთი, ავადმყოფებმა, რაც არ უნდა ბევრი იყვნენ, ვიწროდ და ამიტომ მოუხერხებლად არ იგრძნონ თავი, ხოლო მეორეც ის, რომ გადამდები დაავადებით შეპყრობილი რაც შეიძლება შორს იყვნენ ჯანმრთელებისაგან. საავადმყოფოები შესანიშნავადაა მოწყობილი, აღჭურვილია ყველაფრით, რაც კი ჯანმრთელობის აღსადგენადაა საჭირო; მოვლა აქ მეტად სათუთი და გულმოდგინეა, ავადმყოფებს თავს დასტრიალებენ ყველაზე უფრო გამოცდილი ექიმები. ამიტომ, მართალია, აქ არავის არ გზავნიან იძულებით, მაგრამ მთელ ქალაქში არ მოიძებნება ვინმე, რომელსაც ავადმყოფობის შემთხვევაში იქ ყოფნა არ ერჩივნოს სახლში წოლას.

მას შემდეგ, რაც საავადმყოფოს სამზარეულოს გამგეები მიიღებენ საკვებს ექიმთა დანიშნულების მიხედვით, ყველაფერი საუკეთესო თანაბრად ნაწილდება სასახლეებზე, სიფოგრანტუსთა რაოდენობის შესაბამისად, მათ შორის იგულისხმება აგრეთვე თავადი, მღვდელმთავარი, ტრანიბორუსები, ელჩები და ყველა უცხოელი (თუკი ასეთები არიან; ჩვეულებრივ კი ისინი ცოტანი არიან და თანაც იშვიათად; მაგრამ როდესაც კი გამოჩნდებიან, მათთვისაც აქვე კეთილმოწყობილი სახლები).

სასახლეებში სადილისა და ვახშმისათვის დადგენილ საათებში იკრიბება მთელი სიფოგრანტია, მათ სპილენძის საყვირი მოუხმობს (გარდა ჰოსპიტლებში ან სახლებში მწოლიარე ავადმყოფებისა). არავის არ ეკრძალება სასახლეში სადილობის შემდეგ ბაზრიდან საკვების მოტანა სახლისათვის, რადგან ყველამ იცის, რომ არავინ არ აკეთებს ამას ტყუილებრალოდ. მართლაცდა, თუმცა არავის არ ეკრძალება სახლში სადილობა, არავინ არ აკეთებს ამას სიამოვნებით, ვინაიდან უზნებოდ და სისულელედ ითვლება დროის დახარჯვა უარესი საკვების დამზადებაზე, როდესაც სასახლეში, რომელიც ასე ახლოსაა, მზადაა მდიდრული და უხვი სუფრა. ამ სასახლეში ყველა სამუშაოს, უფრო კუჭკუიანსა და ძნელს, მონები ასრულებენ. მაგრამ საკვების მომზადება და აგრეთვე საერთოდ მთელი სადილის გაძლოლა ეკისრებათ მხოლოდ ქალებს, თანაც მორიგეობით ყოველი ოჯახიდან. სადილის დროს მერნახენი შემოუხსნდებიან სამ ან მეტ მაგიდას, იმის მიხედვით, რამდენი არიან. მამაკაცები სხდებიან შიგნითა მხარეს, კედლის გასწვრივ, ხოლო ქალები — მოპირდაპირე მხარეს, რათა იმ შემთხვევაში, თუ მათ რაიმე შეემთხვათ მოულოდნელად (ეს კი ხანდახან ემართე-

ბათ ორსულებს), შეეძლოთ ადგომა და ძიებთან წასვლა სხვების შეუწყუხებლად.

ძიებები ცალკე სხედან ჩვილ ბავშვებთან ერთად საგანგებოდ გამოყოფილ სასადილოში, სადაც ყოველთვის არის ცეცხლი და სუფთა წყალი, ზოგჯერ კი აკვნებიც დგას, რათა შეიძლებოდეს იქ ჩვილ ბავშვთა ჩაწვენა ან, სურვილისამებრ, სახვევებისაგან გამოხსნა, ცეცხლთან ახლოს დასვენება, გართობა. ყოველი დედა თვითონ კვებავს თავის შვილს, სანამ ცოცხალია ან ავადმყოფობა არ შეუშლის ხელს. თუ ასეთი რამ მოხდება, სიფოგრანტუსთა ცოლები ეძებენ ძიძას, რაც არაა ძნელი: ქალები, რომლებსაც ამ მოვალეობის შესრულება შეუძლიათ, უფრო დიდი სიამოვნებით ასრულებენ მას, ვიდრე სხვა რომელიმე სამუშაოს, რადგან ყველას ქებას იმსახურებენ თანაგრძნობისათვის და აღზრდილიც თავის ძიძას დედად მიიჩნევს. ძიძათა თავშესაფარშია ყველა ბავშვი, რომელსაც ჯერ ხუთი წელი არ შესრულებია. რაც შეეხება დანარჩენ არასრულწლოვანებს, რომელთა შორისაც ირიცხება ორივე სქესის ყველა ახალგაზრდა, რომელსაც საქორწინო ასაკი არ შესრულებია, ისინი ან ემსახურებიან სუფრის წევრებს, ანდა, თუკი მათ ეს თავიანთი წლოვანების გამო არ შეუძლიათ, იქ მღუმარედ დგანან. ისინი იკვებებიან იმით, რასაც მათ მაგიდებთან მსხლმინი მიაწოდებენ, რადგან სხვა გარკვეული დრო არა აქვთ გამოყოფილი ჭამისათვის. პირველი მაგიდის შუა ადგილი უმაღლესად ითვლება და, ვინაიდან ეს მაგიდა სასადილო ოთახის ბოლოში გარდიგარდმო დგას, იქიდან მოჩანს მთელი შეკრება. აქ სხედან სიფოგრანტუსი და მისი ცოლი, მათ გვერდით ზის ორი უხუცესი, რადგან ყველა მაგიდასთან საერთოდ ოთხ-ოთხნი სხედან. თუ ამ სიფოგრანტიაში ტაძარიც არის, მაშინ მღვდელი და მისი მეუღლე სხდებიან სიფოგრანტუსთან, ისე რომ ისინი სუფრის თავში მოხვდნენ. სუფრას ორივე მხრიდან უზის ახალგაზრდობა, შემდეგ ისევ მოხუცები სხედან და, ამგვარად, მთელ სახლში ტოლები ერთად არიან თავმოყრილი და თანაც შეთვისებულ სხვა ასაკის ადამიანებთან. ამ ჩვეულების მიზეზი, როგორც ამბობენ, არის შემდეგი: ვინაიდან სუფრასთან დაუშვებელია რაიმე ისეთის გაკეთება ან თქმა, რაც არ შეეფერება უხუცესთა საზოგადოებას, მათი დარბაისლობისა და მათდამი პატივისცემის გამო, ეს აკავებს ახალგაზრდობას უადგილო და უხეში სიტყვა-პასუხის ან უკადრისი ქცევებისაგან. აქ კერძები რიგდება არა მიყოლებით, დაწყებული პირველი ადგილიდან, არამედ ყველაფერ საუკეთესოს პირველ რიგში

მიართმევენ უხუცესებს, რომელთა ადგილები საგანგებოდაა შერჩეული, ხოლო შემდეგ თანაბრად მიუტანენ სხვებსაც. უხუცესნი, თავის მხრივ, თავიანთი შეხედულებისამებრ ურიგებენ გარშემო მსხდომთ ნუგბარს, როცა მარაგი შედარებით ნაკლები აქვთ და უნდათ ყველას ამყოფინონ. ამრიგად, ხანდაზმულებს შენარჩუნებული აქვთ მათი კუთვნილი პატივისცემა და ყველანი კმაყოფილი რჩებიან.

ყოველი სადილი და ვახშამი იწყება რაიმე დამრიგებლური ხასიათის, თანაც ძალიან მოკლე კითხვით, რათა თავი არავის მოაბეზრონ. ამის შემდეგ უფროსები გააბამენ დინჯ საუბარს, არც უსიამოვნო მოსასმენს და არც გონებამახვილობას მოკლებულს. ისინი სულაც არ ანდომებენ ჭამის მთელ დროს გრძელ-გრძელი ამბების თხრობას, პირიქით, უფრო დიდი სიამოვნებით უსმენენ ახალგაზრდებს და იწვევენ კიდევაც მათ საუბარში. ამით მათ სურთ გაიგონ თითოეულის შესაძლებლობანი და ნიჭიერება, რაც სუფრასთან ძალდაუტანებელ ურთიერთობაში უფრო მელავენდება. სადილი საკმაოდ ხანმოკლეა, ვახშამი კი უფრო ხანგრძლივი, რადგან პირველს მოსდევს შრომა, ხოლო მეორეს—ძილი, მოსვენება, რაც უტოპიელთა შეხედულებით უფრო სასარგებლოა საკმლის მონელებისათვის. აქ არც ერთი ვახშამი არ ტარდება მუსიკის გარეშე, სადილზე დასაყოლებლად ყოველთვის აქვთ ტბილეული. ისინი ანთებულ სურნელოვან საკმეველს ასხურებენ ირგვლივ და საერთოდ ყველაფერს აკეთებენ, რასაც ჭამის დროს მხიარული განწყობის შექმნა შეუძლია. უტოპიელები განსაკუთრებული მონდომებით იზიარებენ იმ მოსაზრებას, რომ არ შეიძლება არც ერთი სახის სიამოვნების აკრძალვა, თუ იგი რაიმე უსიამოვნების მიზეზი არ გახდება.

აი, როგორ არის მოწყობილი უტოპიელთა თანაცხოვრება ქალაქებში; სოფლებში კი, სადაც ოჯახები უფრო შორ-შორს არიან ერთმანეთისაგან, თითოეული ოჯახი თავის სახლში სადილობს და ვახშამობს. აქ სურსათის ნაკლებობაზე ლაპარაკიც არ შეიძლება — სოფელი ხომ თვითონ კვებავს ქალაქს.

### უტოპიელთა მოგზაურობისათვის

თუ რომელიმე უტოპიელი მოისურვებს სხვა ქალაქებში მცხოვრები მეგობრების მონახულებას ან უბრალოდ ამ ადგილების დათვალიერებას, ამაზე თანხმობას ადვილად მიიღებს თავისი სიფოგრანტუ-



სისა და ტრანიბორუსისაგან, რა თქმა უნდა, რაიმე ხელის შემშლელი მიზეზი თუ არ იქნა. მოქალაქეთა გარკვეული ჯგუფები ერთდროულად გადიან სამოგზაუროდ. გამგზავრებისათვის გამგებლის ნებადამრთველი ბარათით, რომელშიც დაბრუნების დღეცაა აღნიშნული, ისინი ღებულობენ ოთხთვალას და სახელმწიფო მონას, რათა მან გარეკოს ხარები და მოუაროს მათ. თუ მოგზაურთა შორის ქალები არ არიან, ოთხთვალას, როგორც ზედმეტ ბარგს, უკან აბრუნებენ. თუმცა სამოგზაუროდ წასულებს თან არაფერი მიაქვთ, მაინც უზრუნველად არიან, ვინაიდან თავს ყველგან ისე გრძნობენ, როგორც საკუთარ სახლში. თუ რომელიმე ადგილზე ისინი ერთ დღეზე მეტ ხანს შეყოვნდებიან, თითოეული ხელს ჰკიდებს თავის ხელობას და ამავე ხელობის მასპინძლებსაგან დიდ მოწონებას იმსახურებს. მაგრამ თუ ვინმე საკუთარი სურვილით გადალახავს თავის საზღვარს, მაშინ მმართველის ნებართვის უქონლობის გამო დაკავებულს ყოველნაირად არცხვენენ; მას, როგორც გაქცეულს, აბრუნებენ და სასტიკად სჯიან, და თუ მეორედ გაბედავს წასვლას — მონად აქცევენ.

თუ ვინმე თავისი ქალაქის შემოგარენში ხეტიალს მოისურვებს, არავინ დაუშლის, ოღონდ ნებართვა ჰქონდეს ოჯახის უფროსისაგან და თანხმობა მეუღლისაგან. ეს კია, რომელ სოფელშიც უნდა მივიდეს, არსად არ გაუმასპინძლებიან, სანამ ნახევარი დღის სამუშაოს არ შეასრულებს (ანდა იმდენს, რამდენის გაკეთებაც არის დათქმული სამხრობამდე). ამ პირობით მას თავისი ქალაქის ახლომახლო ყველგან შეუძლია გასვლა, რადგან ნაკლები სარგებლობა როდი მოაქვს ქალაქისათვის, ვიდრე შინ რომ დარჩენილიყო.

როგორც ხედავთ, უსაქმურობისა და სიზარმაცისათვის უტოპიელებს არავითარი საბაზი არ გააჩნიათ. იქ არ არის არც ერთი სამიკიტნო, არც ერთი ლუდხანა, სამეძაო, არ ყოფილა მოსყიდვის არც ერთი შემთხვევა, ნაძირალათა არც ერთი ბუდე, არც ერთი უკანონო თავყრილობა. ისინი ერთად არიან, და ამიტომ დროს ჩვეულებისამებრ მუშაობაში ან გონივრულ დასვენებაში ატარებენ.

ამ დაკანონებულ ჩვეულების ბუნებრივი შედეგია ის, რომ ამ ხალხს ყოველთვის ჰარბი საქონელი აქვს, და რადგან თითოეულ კაცზე ყველაფერი თანაბრად ნაწილდება, გაჭირვებული და ღარიბი საბოლოოდ აღარავინ რჩება. როგორც კი ამაუროტის სენატში (რომლის შემადგენლობაში, როგორც აღვნიშნეთ, ყოველწლიურად თითოეული ქალაქიდან სამ-სამ წარმომადგენელს ირჩევენ) შეიტყობენ, რომ რაი-

მე სანოვაგე სადღაც ზედმეტია ან, პირიქით, ნაკლები, ცდილობენ მდგომარეობა გააწონასწორონ. ეს კეთდება უანგაროდ — სანაცვლოდ არაფერს ითხოვენ მათგან, ვისაც რაიმეს აჩუქებენ. რაკი თავიანთ ნამეტს რომელიმე ქალაქს აძლევენ და სამაგიეროს არ იღებენ, საქიროების შემთხვევაში ისინი სხვა ქალაქებიდან ღებულობენ ყველაფერს, თანაც ასევე უანგაროდ. ამგვარად, მთელი კუნძული თითქოსდა ერთ ოჯახად ცხოვრობს.

როდესაც უტოპიელები თავიანთთვის საკმარისად გაირჩებიან (და ამას ორი წლის სურსათის მარაგის დაგროვების შემდეგ მიიჩნევენ საჭიროდ, რადგან არ იციან, როგორი მოსავალი ექნებათ გაისად), დარჩენილი ჭარბი საქონელი — ხორბალი, თაფლი, მატყლი, სელი, ხეტყე, ძოწეულის ქსოვილები და ტანსაცმელი, ცვილი, ქონი, ტყავი და კიდევ დამატებით დიდძალი პირუტყვი სხვა ქვეყნებში გააქვთ. ამ საქონლის მეშვიდედ ნაწილს ისინი იქაურ უქონელ მცხოვრებთ უტოვებენ საჩუქრად, დანარჩენს კი ზომიერ ფასად ყიდიან. ასეთი ვაჭრობის შედეგად მათ თავიანთ ქვეყანაში შეაქვთ არა მხოლოდ ის საქონელი, რომელიც სჭირდებათ (ასეთი კი მხოლოდ და მხოლოდ რკინაა), არამედ დიდძალი ოქრო და ვერცხლი. ამ წესის ხანგრძლივად დამკვიდრების შედეგად უტოპიელებს ყველგან ურიცხვი რაოდენობით აქვთ განძეულობა. ამიტომ ახლა უკვე ისინი ნაკლებ ყურადღებას აქცევენ, თუ როგორ გაყიდიან საქონელს — ნაღდ ფულზე თუ სესხით, დიდ ფულს ხელშეკრულების საფუძველზე ვალში აბანდებენ. ამ ხელშეკრულების დადების დროს, გარკვეული წესების შესრულებისას, უტოპიელები კერძო პირთა თავდებობას კი არ მოითხოვენ, არამედ მთელი ქალაქისას. თავის მხრივ კი ქალაქი, როგორც კი მოვა გადახდის დრო, კერძო პირებისაგან ითხოვს ვალის დაფარვას, ფული ხაზინაში შეაქვს და მანამ სარგებლობს ამ თავნის ნამატით, სანამ უტოპიელები უკან არ მოითხოვენ. უტოპიელები კი უმეტეს შემთხვევაში არ თხოულობენ ფულს, რადგან, სანამ არ დასჭირდებათ, უსამართლობად მიაჩნიათ მისი წართმევა. სხვათა შორის ისინი ფულს მხოლოდ იმ შემთხვევაში თხოულობენ უკან, როცა აუცილებელი ხდება ფულის განსაზღვრული ნაწილის მიცემა სხვა ხალხისათვის, ან როცა ომი გარდაუვალაა. ასეთი შემთხვევისათვის ისინი თავიანთ საგანძურს ინახავენ, რათა მოულოდნელი საშიშროებისას გამოიყენონ, უფრო კი იმისათვის, რომ ნებისმიერი თანხის ფასად დაიჭირონ უცხოელი ჭარისკაცები, რომლებსაც უფრო ადვილად იმეტებენ ხიფათისათვის, ვიდრე თავისიანებს.

უტოპიელებმა იციან, რომ დიდი თანხით თვით მტრების მოსყიდვაც შეიძლება, რომლებიც მზად არიან არა მარტო უღალატონ, არამედ აშკარად ებრძოლონ ერთმანეთს. ამისათვის უტოპიელები აურაცხელ ოქრო-ვერცხლს საგანძურად კი არ ინახავენ, არამედ ისე იყენებენ, რომ მრცხვენია კიდევ ამაზე ლაპარაკი. თანაც, ვშიშობ, ჩემს სიტყვებს არ დაიჭვრებთ. ვშიშობ იმიტომ, რომ ყოველივე ეს ჩემთვისაც ძნელი დასაჭვრებელი იქნებოდა, საკუთარი თვალით რომ არ მენახა და მხოლოდ სხვისაგან გამეგონა. თითქმის ყოველთვის ასეა: რამდენადაც უცხოა ესა თუ ის მოვლენა სხვისი ადათ-წესებისათვის, იმდენად დაუჭვრებელია. მართალია, უტოპიელთა ცხოვრების წესის დანარჩენი მხარეებიც მკვეთრად განსხვავდებიან ჩვენეულისაგან და ამიტომ ის, ვინც გონივრულად შეაფასებს მდგომარეობას, ნაკლებად გაოცდება, რომ ოქროსა და ვერცხლის მოხმარება მათ საკუთარ ჩვევებს უფრო შეესაბამება, ვიდრე ჩვენსას. ისინი ხომ ფულთი თვითონ არ სარგებლობენ, ფულს მხოლოდ რაღაც შემთხვევისათვის ინახავენ, რომელიც ან მოხდება, ან არა.

ოქროსა და ვერცხლს<sup>98</sup>, რომლისგანაც მზადდება ფული, უტოპიელები ისე ეკიდებიან, რომ იმაზე მეტად არაფერ შეაფასოს, ვიდრე ბუნებრივად უნდა ღირდეს. ოქრო-ვერცხლი თავისი ღირსებით ხომ ბევრად ჩამორჩება რკინას? რკინის გარეშე, ისევე როგორც უცეცხლოდ და უწყლოდ, ადამიანს არსებობა არ შეუძლია. ამასთან ერთად, ბუნებამ ოქროსა და ვერცხლს არ მიანიჭა ისეთი თვისებები, ურომლისოდაც ჩვენ იოლად წასვლა გავვიჭირდებოდა, მაგრამ ადამიანმა თავისი სისულელით მათ ფასი იშვიათობის გამო დაადო. გარდა ამისა, ბუნებამ, როგორც მზრუნველმა დედამ, ყველა საუცხოო თვისება ჰაერს, წყალსა და თვით მიწას უბოძა, ხოლო ამო და უსარგებლო საგნები სიღრმეში ჩამალა. დაუეშვათ, რომ უტოპიელებმა ეს ლითონები რომელიმე კოშკში გადაამალეს, მაშინ ბრბოს უგუნურების წყალობით მმართველსა და სენატს ეჭვის თვალთ დაუწყებენ ცქერას, თითქოსდა მათ სურთ გაიძვერობით მოატყუონ ხალხი და ამით თვითონ რაიმე მოგება ნახონ. ვივარაუდოთ, რომ დაიწყეს ამ ლითონებისაგან თასების და სხვა ნაკეთობების ხელმარჯვედ დამზადება, შემდეგ კი, შემთხვევითი ჭარისკაცების დაქირავების თანხის გასასტუმრებლად კვლავ დასჭირდათ მათი გადაღობა; მაშინ, შესაძლებელია იმის ვარაუდი, რომ ძნელადლა დათმობენ მას, რაც ერთხელ გასართობად მიიჩნიეს. სწორედ ამის საწინააღმდეგოდ მათ თავიანთი ცხოვრების შესაბამისი ხერ-

ხი მოიგონეს, რომელიც ძალიან განსხვავდება ჩვენეულისაგან, სადაც ოქროს ასე დიდად აფასებენ და გულმოდგინედ იცავენ. ვისთვისაც ეს ხერხი ცნობილია, ის ნამდვილად დამიჯერებს. უტოპიელები, მართალია, იაფფასიანი, მაგრამ ოსტატურად ნახელავი თიხისა და მინის ჭურჭლიდან ჰამენ და სვამენ. ოქროსა და ვერცხლისაგან არა მარტო საერთო სასახლეებში, არამედ კერძო სახლებშიც ღამის ქოთნებს და სიბინძურისათვის განკუთვნილ ჭურჭელს ამზადებენ<sup>97</sup>. ამასთან, ამ ლითონებისაგან უტოპიელები ჰედავენ ჯაჭვებსა და მძიმე ხუნდებს, რომლებსაც მონებს ადებენ. ყველა დამნაშავეს ყურზე ოქროს რგოლს ჰკიდებენ, თითებზე ბეჭდებს უკეთებენ, ყელზე ოქროს მძივებს, თავზე ოქროს სალტეს აქდობენ. ამგვარად, ისინი ყოველგვარი საშუალებით ცდილობენ, ოქრო და ვერცხლი მათთან საძრახის საგნებად ითვლებოდეს. გამოდის, რომ უტოპიელები არავითარ ზარალს არ ნახავენ, თუნდაც ერთ მშვენიერ დღეს გამოიყენონ ლითონების მთელი მარაგი, რომლის დახარჯვაც სხვა ხალხს ისეთ ტანჯვას მიაყენებდა, ვით საკუთარი შიგნეულის წეწვა. უტოპიელებმა სულ ერთიანად რომ დახარჯონ ოქროს მთელი მარაგი, ამით არავის არაფერი დააკლდება. გარდა ამისა, ისინი ზღვის ნაპირზე აგროვებენ მარგალიტს, კლდეებში — ალმასს და ლალს, მაგრამ განა თავს იკლავენ მათი ძებნით, არა, შემთხვევით ნაპოვნს ამუშავებენ. ამ „ძვირფასეულობით“ რთავენ ბავშვებს, რომლებიც პატარობისას ამგვარი სამკაულებით ტრაბახობენ და ამყობენ, მაგრამ როგორც კი მოიზრდებიან და დაინახავენ, რომ ყველაფერი ეს მხოლოდ ბავშვთა გასართობია, მშობლების ყოველგვარი შეხსენების გარეშე, სირცხვილით გვერდზე აწყობენ. ჩვენი ბავშვები კი, როდესაც წამოიზრდებიან, მარტო კოჭებს, ბურთებს და თოჯინებს ანებებენ თავს. ამგვარი, სხვა ხალხებისაგან მკვეთრად განსხვავებული წეს-ჩვეულებანი წარმოშობს განსხვავებულ მსოფლმხედველობას, რაშიც განსაკუთრებით ნათლად დამარწმუნა ანემოლიელი ელჩების<sup>98</sup> ერთმა შემთხვევამ.

უტოპიაში ჩემი ყოფნის პერიოდში ანემოლიელები ამჟღავნებდნენ ერთი საჭირო საქმის გასარჩევად. უტოპიელებმა წინასწარ სხვადასხვა ქალაქიდან სამ-სამი წარმომადგენელი გამოგზავნეს. მეზობელი ხალხების ელჩებმა, რომლებიც იქ უწინაც ჩადიოდნენ, კარგად იცოდნენ უტოპიელთა ადამ-წესები, მათ გაგონილი ჰქონდათ, რომ მათთან ძვირფასი სამოსი არ ფასობდა, ფარჩეულობას აბუჩად იგდებდნენ, ხოლო ოქროს სამკაულების ასხმას საძრახისად მიიჩნევდნენ.

ამიტომ ისინი, ჩვეულებრივ, ძალზე მოკრძალებული სამოსით ჩავიდნენ. მაგრამ მოშორებით მცხოვრებმა ანემოლიელებმა, რომლებსაც უტოპიელებთან იშვიათად თუ ჰქონიათ ურთიერთობა, როდესაც გაიგეს, რომ უტოპიელებს ერთი და იგივე, თანაც უხეში ტანსაცმელი აცვიათ, იფიქრეს, რაც არა აქვთ, რას ჩაიცმევნო და გადაწყვიტეს, უფრო ქედმაღლურად, ვიდრე ბრძნულად, ღმერთების სახით, მთელი ბრწყინვალეობით წარმდგარიყვნენ და „საწყალი“ უტოპიელებისათვის თავიანთი ჩაცმულობის ელვარებით თვალი მოეჭრათ. ასე მიაღმა მათ სამი ელჩი ასი თანამგზავრის თანხლებით, ყველანი სხვადასხვაგვარ სამოსში, უმეტესობა ფარჩეულში გამოხვეული. თვით ელჩები (ცინაიდან ისინი საკუთარ ქვეყანაში ცნობილ პიროვნებებად ითვლებოდნენ) ოქრომკედით ნაქარგ მოსასხამებში იყვნენ გამოწყობილი, დიდი ყელსაბამები და ოქროს საყურეები ეკეთათ, თითები ოქროს ბეჭდებით ჰქონდათ დამშვენებული. მათ ქულებს ამკობდა მარგალიტებითა და ძვირფასი ქვებით მოოჭვილი მძივები. ერთი სიტყვით, ისინი იმით იყვნენ მორთულ-მოკაზმული, რითაც უტოპიელები მონებს სჯიან, ანდა საძრახისად და ბავშვთა გასართობ ნივთებად მიიჩნევენ. ერთ ნახვად ღირდა, თუ როგორ იფხორებოდნენ ანემოლიელები, როდესაც თავიანთ ჩაცმულობას უტოპიელებისას ადარებდნენ (მითუმეტეს, ამ დროისათვის ხალხი უკვე მოედანზე გამოეფინა). მეორე მხრივ, არანაკლებ სასიამოვნო იყო იმის ხილვა, თუ როგორ მწარედ გაუტარუვდათ იმედი და მოლოდინი ანემოლიელებს და რა შორს აღმოჩნდნენ ისინი სავარაუდო მისაგებელი პარტიისცემისაგან. და მართლაც, თითქმის ყველა უტოპიელის აზრით, ზოგიერთების გარდა, რომელთაც რაღაც შემთხვევის წყალობით ნანახი ჰყავდათ სხვა ხალხები, მთელი ეს ბრწყინვალე სამოსი მეტად სამარცხვინო იყო. ისინი დიდებულთა ნაცვლად ყოველ მდაბიოს მოწიწებით ესალმებოდნენ, ხოლო ოქროს ჯაჭვებით დამშვენებული ელჩები მონებად მიიჩნიეს და მათდამი არავითარი პარტიისცემა არ გამოიჩინეს. გარდა ამისა, იმასაც დაინახავდი, თუ როგორ უდიერად თამამობდნენ უტოპიელი ბავშვები მარგალიტებითა და ძვირფასი ქვებით. როცა ეს ნივთები ელჩების ქულებზე შენიშნეს, მუჯლუგუნს წაჰკრავდნენ დედას და ასე ეუბნებოდნენ: „აი, დედა, რა დიდი რეგვენია, ის ბიჭუნასავით ჯერ კიდევ მარგალიტებითა და ქვებით ერთობა!“ ხოლო მშობელი მთელი სიღინჯით უპასუხებდა: „ჩემად, შეილო, ეს ალბათ ელჩთა რომელიმე მასხარათაგანია...“ სხვები ზემოხსენებულ ოქროს ჯაჭვებზე ამბობდნენ, რომ ისინი ყველაფერში გა-

მოუსადეგარია, ვინაიდან იმდენად წერილია, რომ მონა ადვილად შეძლებს მის გაწყვეტას, თანაც იმდენად ხალვათია, რომ მას როცა მოეხასიათება, შეუძლია მოიგლიჯოს და გაიქცეს, სადაც მოესურვება შეუბოროკავი და თავისუფალი.

ორიოდე დღის შემდეგ ელჩებმა იქ ოქრო უზომო რაოდენობით იხილეს და მიხედნენ, რომ უტოპიელთათვის მას ფასი თითქმის არც ჰქონდა და იმდენად სამარცხვინო იყო, რამდენადაც ამათთვის პატივსაცემი. ანემოლიელებმა ისიც დაინახეს, რომ ერთი ლტოლვილი მონის ჯაჭვებსა და ხუნდებზე უფრო მეტი ოქრო და ვერცხლი იყო დახარჯული, ვიდრე სამივე ელჩის. მთელ აღკაზმულობაზე. ამიტომ ელჩებს მოეკეცათ ფრთები, განსაკუთრებით მაშინ, როდესაც უტოპიელებს მეგობრულად გაესაუბრნენ და მათი ადათ-წესები და შეხედულებები შეიტყვეს, ანემოლიელებმა იმ წამსვე ზიზღით მოიშორეს ყველაფერი ის, რითაც აქამდე ქედმაღლურად ტრაბახობდნენ. უტოპიელებს სწორედ რომ აოცებთ, თუ როგორ შეუძლია მოკვდავთაგან ვინმეს ციკქნა მარგალიტის ან ბრჭყვიალა ქვის საექვო ელვარებით აღფრთოვანდეს მაშინ, როცა მას არაფერ უშლის შეხედოს რომელიმე ვარსკვლავს და ბოლოსდაბოლოს, თვით მზის ჰერეტაც ნებადართულია. განა შეიძლება ვინმე იმდენად უჭკუო იყოს, რომ თავისი თავი კეთილშობილად წარმოიდგინოს იმის გამო, რომ ნაზი შალისაგან დამზადებულ ქსოვილის სამოსს ატარებს? რაც არ უნდა ნაზი მატყლისაგან იყოს დამზადებული, ამ მატყლს ხომ ოდესღაც ცხვარი ატარებდა და იგი არასოდეს სხვა არაფერი ყოფილა, თუ არა ცხვარი. უტოპიელთათვის ისიც გასაოცარია, რომ ოქროს, რომელიც თავისი ბუნებით გამოუსადეგარია, ამჟამად დედამიწის ზურგზე ისეთი დიდი ფასი ადევს, რომ თვით ადამიანი, რომლის სარგებლობისთვისაც მიიღო მან ასეთი ფასი, გაცილებით იაფია ოქროზე. საქმე იქამდე მიდის, რომ რომელიმე ყეყჩის, რომელსაც ჰქუა კუნძზე მეტი არა აქვს და რომელიც იმდენადვე ურცხვია, რამდენადაც სულელი, მონობაში ჰყავს ბევრი კარგი და ჰკვიანი ადამიანი მხოლოდ და მხოლოდ იმ მიზეზით, რომ მას ოქროს მონეტების დიდი გროვა ხვდა წილად, ხოლო თუ ბედი ან კანონთა რაიმე ფანდი (რომელსაც ბედზე ნაკლებად არ ძალუძს ყველაფრის ყირამალა ატარილებს) ოქროს ამ გროვას ხსენებულ ბატონს, მთელ მის ჯალაბს წაართმევს და ყველაზე საცოდავ და დამცირებულ უსაქმურს არგუნებს, ამის შედეგად ცოტა მოგვიანებით ბატონი, როგორც ფულზე დანამა-

ტი და დანაწონი, ყოფილი მსახურის კუთვნილებად იქცევა. მაგრამ უტოპიელებს გაცილებით აოცებთ და ეზიზღებათ ისინი, ვინც თითქმის ღვთიურ პატივს მიაგებს იმ მდიდრებს, რომელთაც მათი არც არაფერი მართებთ და არც არაფრით არიან დავალებული. ისინი ასე მხოლოდ მათი ქონებისადმი პატივისცემით იქცევიან, თუმცა ამავე დროს მათ უკიდურეს ძუნწებად და ხარბებად მიიჩნევენ და მტკიცედ არიან დარწმუნებული, რომ ამ მდიდართა სიცოცხლეში მათი ურიცხვი ფულიდან გროშიც კი არასოდეს ერგებათ.

ამგვარი აზრები უტოპიელებმა ბავშვობიდანვე შეითვისეს — ისინი ხომ ისეთ სახელმწიფოში აღიზარდნენ, რომლის წეს-ჩვეულებანიც შორსაა ყოველგვარი მსგავსი სიბრიყვისაგან, ნაწილობრივ კი ეს წიგნებიდანაც ისწავლეს. მართალია, თითოეულ ქალაქში ძალიან ცოტაა ისეთი, რომელიც განთავისუფლებულია ყოველგვარი შრომისაგან და თავს მხოლოდ მეცნიერებას სწირავს (ეს ის ადამიანებია, რომლებმაც ბავშვობაში ამა თუ იმ მეცნიერებების დაუფლების არნახული უნარი გამოიჩინეს), მაგრამ უტოპიაში ხომ ყველა ბავშვი სწავლობს და ადამიანთა დიდი ჯგუფები, კაცები და ქალები, შრომისაგან თავისუფალ მთელ დროს მეცნიერების დაუფლებას ახმარენ. ისინი სწავლობენ მშობლიურ ენაზე, რომლის სიტყვების მარაგი ღარიბი როდია, არც კეთილხმოვანებასაა მოკლებული და აზრსაც სხვაზე ნაკლებ როდი გადმოსცემს. თითქმის იგივე ენა (მეტ-ნაკლებად დამახინჯებული ფორმით) სამყაროს უდიდეს ნაწილშია გავრცელებული. ჩვენს ჩასვლამდე მათ ყურიც არ ჰქონდათ მოკრული იმ ფილოსოფოსების<sup>99</sup> სახელებისათვის, რომლებიც ჩვენთვის ცნობილ სამყაროში საქმოდ განთქმული არიან, მაგრამ მუსიკაში, დიალექტიკაში<sup>100</sup>, ათელისა და ზომის მეცნიერებების შესწავლა-დაუფლებაში მათ იმდენივეს მიიღწიეს, რამდენსაც ჩვენმა წინაპრებმა. უტოპიელები რამდენადაც ყველაფერში უტოლდებიან ძველ ხალხებს, იმდენად ჩამორჩებიან ახალ დიალექტიკოსთა<sup>101</sup> ყველა გამოგონებას, რამეთუ მათ არც ერთი შორსმჭვრეტელურად მოფიქრებული წესი არ შეუქმნიათ შემოფარგვლის, გაფართოებისა და შენაცვლების შესახებ, რომლებსაც აქ ყველგან ასწავლიან ბავშვებს „მცირე ლოგიკაში“<sup>102</sup>. რაც შეეხება „მეორე ინტენციებს“<sup>103</sup>, ისინი ისე შორს არიან მისი სრულყოფილი კვლევისაგან, რომ ვერც ერთმა მათგანმა ვერ შეძლო დაენახა „თვით ადამიანი საერთოდ“, თუმცა ის, როგორც იცით, ნებისმიერ გოლიათზე ღიღია, ჩვენ კი მისი ჩვენება თითოაც კი შეგვიძლია. სამაგიეროდ, უტოპიელები ციური სხეულების

ფრენასა და მოძრაობაში კარგად არიან გათვითცნობიერებული. უფრო მეტიც, მათ ოსტატურად გამოიგონეს სხვადასხვა სახის მოწყობილობა, რომელთა დახმარებითაც ძალზე კარგად იჭერენ მზის, მთვარის, აგრეთვე სხვა მნათობთა მოძრაობას, რომლებიც მათი ცის კამარაზე ჩანან. მაგრამ პლანეტების მეგობრობასა და განხეთქილებაზე, აგრეთვე ვარსკვლავების მიხედვით ცრუ წინასწარმეტყველებაზე ისინი სიზმარშია ცი არ ფიქრობენ. ქარს, წვიმას და ამინდის სხვა ცვლილებებს ისინი ზანგრძლივი გამოცდილებიდან კარგად ცნობილი ზოგიერთი ნიშნის მიხედვით წინასწარმეტყველებენ; მაგრამ ყველა ამ მოვლენის მიზეზზე და ზღვის მოქცევის, მისი სიმლაშის და საერთოდ ცისა და სამყაროს წარმოშობისა და ბუნების შესახებ ისინი წინაპართა მსგავსად მსჯელობენ. ახალი დასკვნების გამოტანისას კი არც უტოპიელები ეთანხმებიან ერთმანეთს, ისინიც დაობენ და ყველაფერში ვერ თანხმდებიან.

ფილოსოფიის იმ ნაწილში, რომელიც ზნეობას ეხება, უტოპიელები ჩვენსავით მსჯელობენ, იკვლევენ სულიერ, ხორციელ და გარეგნულ სიკეთეს, შემდეგ კი დაობენ იმაზე, მხოლოდ სულიერი ღირსებებისთვისაა ნიშანდობლივი სიკეთის ცნება, თუ ყველა ამათთვის ერთად. ისინი კამათობენ სათნოებასა და სიამოვნებაზე, თუმცა მათთვის უპირველესი და ძირითადია დავა იმის თაობაზე, თუ რაში მდგომარეობს ადამიანური ბედნიერება — რაიმე ერთში, თუ ბევრში. ამ საკითხში, ვფიქრობ, ისინი მეტისმეტად ემხრობიან სხვადასხვაგვარი სიამოვნებათა მომხრეების დაჯგუფებას<sup>104</sup>. მათი აზრით ადამიანის ბედნიერება სიამოვნებაშია.

შენ კიდევ უფრო გაგაკვირვებს ის, რომ ამ სასიამოვნო შეხედულებებისათვის ისინი რელიგიას იშველიებენ, რომელიც სასტიკი, მკაცრი და, ჩვეულებრივ, სევდიანი და შეუვალია. უტოპიელები ხომ ბედნიერებაზე ისე არასოდეს ლაპარაკობენ, თუ არ დაუკავშირეს იგი რელიგიიდან ან ფილოსოფიიდან აღებულ რაიმე საწყისს, რომელიც იყენებს გონების მოსაზრებებს. ისინი ვარაუდობენ, რომ ამის გარეშე თავისთავად ნამდვილი ბედნიერების კვლევა უსუსური და უძლური იქნება. ეს საწყისები კი ასეთია: სული უკვდავია და ღვთის ნებით ბედნიერებისათვისაა გაჩენილი, სათნოებისა და კეთილი საქმეებისათვის ჩვენთვის ჯილდოა დაწესებული, უკეთურობისათვის — სასჯელი, თუმცა ეს რელიგიას ეხება, ისინი მაინც ფიქრობენ, რომ გონება იქამდე მიგვიყვანს, რომ ეს დავიჭეროთ და ვაღიაროთ.



უტოპიელები ყოველგვარი ყოყმანის გარეშე აცხადებენ, რომ თუკი თავიდან ავიცილებთ ამ საწყისებს, მაშინ შეუძლებელი იქნება ისეთი ბრიყვის ნახვა, რომელიც ვერ მიხვდება, რომ საჭიროა, სამართლიანად თუ უსამართლოდ, სიამოვნებისავენ სწრაფვა; მხოლოდ ერთი რამის უნდა გვეშინოდეს: მცირე სიამოვნებამ ხელი არ შეუშალოს დიდს და რომ არ ესწრაფოს იმას, რისთვისაც ტანჯვით უნდა ავო პასუხი. ისინი ამბობენ, რომ დიდი უგუნურებაა მკაცრი და ძნელი სიკეთისაკენ სწრაფვა და არა მარტო ტკბილი ცხოვრების უარყოფა, არამედ საკუთარი ნებით ტანჯვის ატანა, რომლისგანაც ვერავითარ სარგებლობას ვერ ეღირსები (რ. სარგებლობაზე შეიძლება იყოს ლაპარაკი, თუკი სიკვდილის შემდეგ ვერაფერს მიიღებ, მთელ ცხოვრებას კი სიამოვნების გარეშე, ე. ი. უბედურად გაატარებ).

ახლა კი ისინი ფიქრობენ, რომ ბედნიერება ყოველგვარ სიამოვნებაში კი არა, პატიოსან და წესიერ სიამოვნებაშია. რამეთუ მისკენ, როგორც უმადლესი სიკეთისაკენ, თვით სათნოებაც იზიდავს ჩვენს ბუნებას და მოწინააღმდეგეთა ჯგუფიც<sup>105</sup> ბედნიერებას მხოლოდ და მხოლოდ სათნოებაში პოევენს. უტოპიელები ხომ სათნოებას განსაზღვრავენ როგორც ბუნების შესაბამისად ცხოვრებას, და სწორედ ხომ ამისათვის მოგვაგლინა ჩვენ ღმერთმა. იმისათვის, თუ რისკენ ვისწრაფოთ და რისკენ არა — უნდა მივდიოთ ბუნების იმ ლტოლვას, რომელიც გონებას ემორჩილება.

მეორე მხრივ, გონება მოკვდავთ, უწინარეს ყოვლისა, უღვივებს ღვთაებრივი სიდიადის სიყვარულსა და მოწიწებას, რომელსაც უნდა ვუმაღლოდეთ იმას, რომ ვარსებობთ და გვაქვს უნარი ვიყოთ ბედნიერნი. მეორე კი გონება გვასწავლის, რომ ჩვენ თვითონაც რაც შეიძლება მშვიდად და ბედნიერად ვიცხოვროთ, სხვა დანარჩენებსაც მეგობრულად დავეხმაროთ, რათა იმავეს მიაღწიონ, რასაც ჩვენ, რადგან იგი არასოდეს არ ყოფილა სათნოების ისეთი მკაცრი და სასტიკი ქომაგი და სიამოვნების ისეთი მოძულე, რომელიც მხოლოდ შრომაზე, ურჯასა და სევდაზე მიგიითივებდა შენ და ამასთან არ დაგაკისრებდა შეძლებისდაგვარად სხვისი სიღარიბისა და გაჭირვების შემსუბუქებას. იგი ქების ღირსად ჩათვლიდა იმ ადამიანურ თვისებებს, რომ ადამიანმა უნდა იზრუნოს მეორე ადამიანის კეთილდღეობასა და ნუგეშისცემაზე! თუკი ყველაზე ადამიანურია სხვათა ურვის შემსუბუქება და მწუხარების დაძლევის შემდეგ მათი მობრუნება ცხოვრების სიტკბობისაკენ, ე. ი. სიამოვნებისაკენ (არ არსებობს ადამიანისათვის უფრო

მეტად ჩვეული სათნოება), ბუნება რატომ არ აგულიანებს თითოეულს, საკუთარი თავისათვის იგივე გააკეთოს? ალბათ ტკბილი ცხოვრებაა ცუდი, ე. ი. ის, რომელიც სიამოვნებას გვანიჭებს, და თუკი ასეა, შენ არა მარტო უნდა დაეხმარო სხვას, არამედ რაც შეიძლება უნდა ეცადო ყველას ააცილო ის თავიდან, როგორც მანე და მომაკვდინებელი, ანდა შენ არა მარტო შეგიძლია, არამედ ვალდებულნიც ხარ სხვები ამგვარ ცხოვრებაზე, როგორც სიკეთეზე, დაითანხმო, მაშინ რატომ არ უნდა დაიყოლიო ამაზე ჯერ საკუთარი თავი? საკუთარი თავი შენ სხვაზე არანაკლებად უნდა შეიწყალო, როდესაც ბუნება შთაგაგონებს სხვებისადმი კეთილი იყო, იგი როდი გიბრძანებს პირიქით, შენი თავისადმი იყო მკაცრი და უმოწყალო. გამომდინარე აქედან, ამბობენ ისინი, ტკბილ ცხოვრებას, ანუ სიამოვნებას, ვითარცა ყველა ჩვენი მოქმედების საბოლოო მიზანს, თვით ბუნება გვიმზადებს. ცხოვრება ბუნების წებით — ასე განსაზღვრავენ ისინი სათნოებას. და რაკი ბუნება მოკვდავთ სთავაზობს, დაეხმარონ ერთმანეთს, რათა უფრო მხიარულად იცხოვრონ (იგი ამას ძალზე სამართლიანად აკეთებს, რამეთუ არავინ ისე არ მალდება ადამიანთა მოდგმის ზვედრზე, რომ ბუნება მხოლოდ მასზე ზრუნავდეს. იგი ერთნაირად მოწყალეა ერთ სახეობად გაერთიანებულთა მიმართ), ის, რა თქმა უნდა, გიბრძანებს კიდევ, თვალყური ადევნო, რათა შენთვის ხელსაყრელი პირობების შექმნით სხვას ზიანი არ მიაყენო.

ამიტომ უტოპიელები ფიქრობენ, რომ საჭიროა არა მარტო კერძო პირებს შორის დადებული შეთანხმებების, არამედ საზოგადოების კანონების დაცვა, რომელიც გამოსცა კეთილმა ხელისუფალმა, ან ერთხმად მიიღო ხალხმა, რომელსაც არ განუცდია ტირანიის უღელი და არ მოტყუებულა ცხოვრებისეული კეთილდღეობის, ანუ სიამოვნების საფუძვლების განაწილების შესახებ კანონის გაიმკვებობით. ამ კანონების დაცვასთან ერთად საკუთარ სარგებლობაზე ფიქრი კეთილგონიერი საქმეა, ხოლო ამასთან საზოგადოების ინტერესებზე ზრუნვა — ღვთისმოსაობის ნიშანი. მაგრამ საკუთარი სიამოვნებისათვის სხვისი სიამოვნების მითვისება უსამართლობაა. და, პირიქით, ადამიანურობისა და სიკეთის ვალია, მოაკლო საკუთარ თავს და მისცე სხვას, ეს მოვალეობა იმდენს არაფერს გვაკლებს, რამდენსაც გვმატებს, რამეთუ მადლით გვიბრუნდება უკან, და თვით სიკეთის შეცნობა და მათი სიყვარულისა და კეთილგანწყობის გახსენება, ვისაც შენ სიკეთე გაუკეთე, მეტ სიამოვნებას მიანიჭებს სულს, ვიდრე ის ხორციელი

სიამოვნება, რომლისგანაც შენ თავი შეიკავე. დაბოლოს (ჩვენ, ვინც ამაზე სიამოვნებით ვთანხმდებით, ადვილად ვრწმუნდებით რელიგიითაც), ხანმოკლე და მცირე სიამოვნებისათვის ღმერთი სამაგიეროს დიდი და სამარადისო სიხარულით იხდის. უტოპიელებმა გულდასმით მოიფიქრეს და აწონ-დაწონეს ყოველივე და მიაჩნიათ, რომ ჩვენი მოქმედებანი და მათ შორის თვით სათნოებანიც საბოლოო მიზნად სიამოვნებასა და ბედნიერებას გულისხმობენ.

სიამოვნებას უტოპიელები სულისა და სხეულის ყოველგვარ მოძრაობასა და მდგომარეობას ეძახიან. როდესაც სული და სხეული ბუნების ნებით შეხამებულად მოძრაობს, ადამიანი სიამოვნებას ღებულობს. ისინი ბუნებრივ მიდრეკილებას შემთხვევით არ ამატებენ, რამეთუ ბუნებრივად ყველაფერი სასიამოვნოა, რისკენაც მიისწრაფვის ადამიანი უსამართლობის ჩარევის გარეშე, რასაც სხვა უფრო სასიამოვნო არ ეწირება, ყველაფერი რასაც ტანჯვა არ მოსდევს, რასაც არა მარტო გრძნობა, არამედ კეთილგონიერებაც ესწრაფვის. არსებობს არაბუნებრივი სიამოვნებანიც. მოკვდავი ამოდ ფიქრობენ, რომ ეს სიამოვნებანი ტკბილია (თითქოს ადამიანებს შეუძლიათ შეცვალონ საგნები, ისევე როგორც მათი სახელწოდებანი). უტოპიელების აზრით, ყველაფერ ამას ბედნიერებისაკენ სულაც არ მივყავართ და უმეტეს შემთხვევაში მას ხელსაც კი უშლის, რადგან აღმოჩნდა, რომ ვისთანაც კი ამ სიამოვნებებმა ერთხელ გაიდგა ფესვი, იქ ჰემ-მარიტი და ნამდვილი სიხარულისათვის აღარ დარჩა ადგილი, მისი სული კი მთლიანად სავსეა სიამოვნების ცრუ გავებით. ხომ ბევრი რამა ისეთი, რასაც თავისი ბუნებით საამო არაფერი გააჩნია, პირიქით, მის მნიშვნელოვან ნაწილს სიმწარე ახლავს, და მაინც ბიწიერი სურვილები გვატლუნებენ, მივიჩნით ისინი არა მარტო უდიდეს სიამოვნებად, არამედ ცხოვრების ერთ-ერთ უპირველეს ღირსებად. ამ სახის ცრუ სიამოვნებას, უტოპიელების აზრით, განიცდიან ისინი, ვინც ზემოთ მოვიხსენიე: ადამიანები, რომელთაც ეჩვენებათ, რომ რაც უფრო კარგად აცვიათ, მით უკეთესები არიან. ამ ერთ საკითხში ისინი ორ შეცდომას უშვებენ, რამეთუ არანაკლებ ცდებიან, როდესაც ფიქრობენ, რომ მათი ტანსაცმელი მათზე უკეთესია. თუკი ვიფიქრებთ ტანსაცმლის სარგებლობაზე, რატომაა, რომ წვრილი ნართისაგან მოქსოვილი შალი მსხვილისაგან მოქსოვილზე უკეთესია? თუმცა ადამიანები ისე იფხორებიან, თითქოს კი არ ცდებიან, არამედ მართალი არიან, თანაც დარწმუნებულებიც ბრძანდებიან, რომ ამით მათ ფასი

ემატებათ. ამის გამო ისინი (თითქოს ძვირფასი ტანსაცმელი მათ ამის უფლებას აძლევთ) ესწრაფვიან პარტივისციემას, რომელზედაც ვერც კი გაბედავდნენ ოცნებას, ნაკლებად რომ ყოფილიყვნენ ჩაცმული, ხოლო, თუ კი მათ ყურადღებას არ აქცევენ, — ბრაზობენ.

ასეთივე უგუნურების ნიშანი ზომ არ არის სწრაფვა ფუჭი და უსარგებლო პარტივისაყენ? რა ბუნებრივ და ქეშმარიტ სიამოვნებას მიიღებ, თუკი ვინმემ ქულა მოგიხადა ან დაიჩოქა შენს წინაშე? განა ეს მოგიჩინებს მუხლის ტკივილს? ანდა გაგკურნავს უგუნურებისაგან? ასეთივე ყალბი სიამოვნების აღქმისას საოცრად სულელურად ნეტარებენ ისინი, ვინც ტრაბახობს და თავი მოაქვს თავისი წარჩინებულობით, აგრეთვე იმით, რომ წილად ხვდა ყოფილიყო იმ შტოს შთამომავალი, რომელიც მდიდრად ითვლებოდა იმიტომ, რომ მიწები ჰქონდა (ახლა ზომ წარჩინებულობა სწორედ ასე ესმით). ასეთმა ადამიანებმა არც კი იციან, რომ მათ დიდგვაროვნობას ოდნავადაც არ დააკლდებოდა რაიმე იმ შემთხვევაშიც კი, თუკი წინაპრები არაფერს დაუტოვებდნენ ან თვითონვე გაფლანგავდნენ დარჩენილ მემკვიდრეობას. მათ რიცხვს მიაკუთვნებენ უტოპიელები იმათაც, ვინც, როგორც ვთქვი, ძვირფასეულობისა და თვალმარგალიტის ტყვეობაშია, ვისაც თავი თითქმის ღმერთად წარმოუდგენია, რადგან ხელში ჩაიგდო რომელიმე სანუკვარი ქვა, განსაკუთრებით ისეთი, რომელიც ამ დროს ამ ქვეყანაში ყველაზე მეტი ღირს (რამეთუ ერთი და იგივე რამ ყველგან და ყოველთვის ერთნაირად არ ფასობს). ადამიანები ასეთ ქვებს მხოლოდ იმ შემთხვევაში იყიდიან, თუკი ოქროს რკალიდან ამოღებულია და გამყიდველი დაიფიცებს და დაარწმუნებს, რომ მარგალიტი ან ქვა ნამდვილია. სხვაგვარად მათ ეშინიათ, ვაითუ, ყალბი ქვა ნამდვილისაგან ვერ გაარჩიონ. მაგრამ ყალბმა ქვამ ნამდვილზე ნაკლები სიამოვნება რატომ უნდა მოგანიჭოს, მითუმეტეს, რომ თვალით ერთმანეთისაგან ვერც კი არჩევ? ჰერკულესს ვფიცავ, ერთიც და მეორეც შენთვის ისეთივე ძვირფასი უნდა იყოს, როგორც ბრმისათვის. განა ისინი, რომლებიც ჰარბ სიმდიდრეს ინახავენ ისე, რომ ამ გროვით სულაც არ სარგებლობენ და მხოლოდ ჰერეტით ტკბებიან, ნამდვილ სიამოვნებას განიცდიან, თუ, უფრო სწორად, თავს ცრუ სიამოვნებებით იწყნარებენ? ან ისინი, ვინც დაავადებულია სხვაგვარი მანკით და ოქროს ინახავს, რომელსაც არასოდეს გამოიყენებს და რომელიც შესაძლოა ველარც კი იხილოს. განა ეს ასე არ არის, თუკი მოაკლებ შენს თავს (და შეიძლება ყველა მოკვდავს) ოქროთი სარგებლობის საშუა-

ლებას და მას მიწას მიაბარებ? ჩაფლავ თუ არა მიწაში განძს, მშვიდ-  
დები და ხარობ. თუკი ვინმე მოგპარავს მას და ათი წლის შემდეგ შენ  
ისე მოკვდები, რომ განძის დაკარგვას ვერც კი გაიკვებ, რა მნიშვნე-  
ლობა ექნება შენთვის იმ ათი წლის განმავლობაში, რომელიც შენ  
იცხოვრე განძის დაკარგვის შემდეგ, იგი მოპარულია თუ საიმედოდ  
დაცული?

ასეთივე შეუფერებელ სიამოვნებას მიაკუთვნებენ უტოპიელები  
კოჭით თამაშს<sup>106</sup> (ამ უგუნურების შესახებ მათ მხოლოდ სმენიათ), ნა-  
დირობასა და ჩიტბადლობას<sup>107</sup>. მათ ვერ გაუგიათ, რა სიამოვნებაა და-  
ფაზე კოჭების დაყრა. შენ კი ეს იმდენჯერ გაქვს გაკეთებული, რომ  
ამაში რაიმე სიამოვნებაც რომ ყოფილიყო, იმდენჯერ გითამაშია, შე-  
იძლება მოგბეზრდა კიდეც. ანდა რა სიამოვნებაა ძაღლების ყეფისა  
და ყმუილის მოსმენა? ეს უფრო საზიზღრობაა. ანდა მეტია სიამო-  
ვნება, როცა ძაღლი მისდევს კურდღელს, ვიდრე ძაღლი — ძაღლს? თუ-  
კი შენ სირბილი განიჭებს სიხარულს, ორივე შემთხვევაში ხომ ერ-  
თი და იგივე ხდება — სირბილი.

თუკი შენ მკვლევობა გიზიდავს, მწვეარ-მეძებრებით ნადირო-  
ბამ, რომელიც შენს თვალწინ ხდება, იმის ხილვამ, თუ როგორ გაგ-  
ლეჯს ძაღლი კურდღელს, სუსტს — უფრო ძლიერი, მშვიშარასა და  
მხალს — დაუნდობელი, დაბოლოს, უდანაშაულოს — სასტიკი, ამან  
შენში უფრო თანაგრძობა არ უნდა გამოიწვიოს? ამიტომ ყოველგვა-  
რი ნადირობა, როგორც თავისუფალი ადამიანისათვის უკადრისი საქ-  
მე, უტოპიელებმა ყასბებს გადააბარეს (ზემოთ მე ვთქვი, რომ ეს საქ-  
მე მათთან მონებს ევალებოდათ). უტოპიელები ფიქრობენ, რომ ნა-  
დირობა ყასბების საქმიანობის ყველაზე მდაბალი მხარეა, ამ საქმი-  
ანობის სხვა მხარე უფრო საპატიო და საჭიროა, რამდენადაც მათ უფ-  
რო მეტი სარგებლობა მოაქვთ და კლავენ. პირუტყვს მხოლოდ და  
მხოლოდ იმიტომ, რომ აუცილებელია. მონადირე კი საბრალო ცხო-  
ველის მწვეარ-მეძებრებით დევნასა და მოკვლაში მხოლოდ სიამო-  
ვნებას ეძებს. უტოპიელები ფიქრობენ, რომ სიკვდილის, თუნდ ნადი-  
რის სიკვდილის ხილვის დაუოკებელი ჭურვილი სულის სისასტიკი-  
დან, ანდა ამ ველური სიამოვნების მუდმივი განცდიდან წარმოიშვება,  
ამას კი, ბოლოს და ბოლოს, გულქვაობა მოსდევს.

მიუხედავად იმისა, რომ ამას და სხვა ამგვარ რამეებს (ისინი კი  
საკმაოდ ბევრია) ადამიანები სიამოვნებად მიიჩნევენ, უტოპიელები,  
რა თქმა უნდა, მაინც ფიქრობენ, რომ რამდენადაც ამათში ბუნებრი-

ვად არაფერია სასიამოვნო, იმდენად მათ ჰეშმარიტ სიამოვნებასთან არაფერი აქვთ საერთო. ის, რომ ეს მანკიერებანი ავსებს გრძნობას სასიამოვნოთი (სწორედ ამას მიიჩნევენ ადამიანები სიამოვნებად), უტოპიელებს სულაც არ აიძულებს თავიანთ შეხედულებებზე უარი თქვან. ამის მიზეზი თვითონ ბუნება კი არ არის, არამედ ადამიანების მახინჯი ჩვევები. ამ მანკიერების გამოა, რომ ადამიანებს მწარე ტკბილად უჩვენებათ, ისევე როგორც ფეხმძიმე ქალებს თავიანთი წამხდარი გემოს გამო ფისი და ქონი თაფლზე ტკბილი ჰგონიათ. ავადმყოფობით ან ჩვევებით დამახინჯებული ვისიმე მსჯელობა არ ცვლის არც სხვა საგნებისა და არც სიამოვნების ბუნებას.

უტოპიელებს მიაჩნიათ, რომ არსებობს სხვადასხვაგვარი სიამოვნება, რომლებსაც ისინი ჰეშმარიტ სიამოვნებად მიიჩნევენ. ისინი ზოგიერთს — სულს, ზოგიერთს კი სხეულს აკუთვნებენ. სულს მიაწერენ გავებას და იმ სიამოვნებას, რომლებსაც ჰეშმარიტების ჰერეტა წარმოშობს. მასვე ეკუთვნის კარგად გავლილ ცხოვრებაზე სასიამოვნო მოგონება და მომავალი კეთილდღეობის უეჭველი იმედი. ხორციელ სიამოვნებას ისინი ორ სახედ ყოფენ. პირველი ისაა, რომელიც გრძნობას აშკარა სიამოვნებით ავსებს, ეს ხდება იმ ნაწილების აღდგენისას, რომელიც ჩვენი შინაგანი სიმხურვალით შთაინთქა. იგი საკვებითა და სასმელით აღდგება. მეორე სახის სიამოვნება კი იმის გამოდევნაა, რამაც ჩვენი სხეული გადატვირთა. ეს ხდება მაშინ, როდესაც ვითავისუფლებთ სტომაქს ანდა ვძაბავთ ძალებს მშობიარობისათვის, ანდა სხეულის რომელიმე ნაწილის ქავილს ხელის წასმითა და ფხანით ვიწყნარებთ.

ზოგჯერ სიამოვნება აღიძვრება და არ იძლევა იმას, რასაც ჩვენი სხეულის ნაწილები თხოულობს, არ აყუჩებს მათ ტკივილებს, თუმცა ეს სიამოვნება აღიზიანებს და აღელვებს ჩვენს გრძნობებს, იზიდავს თავისკენ რაღაც იღუმალის ძალით, შესამჩნევი მოქმედებებით. ასეთ სიამოვნებას ადამიანებს მუსიკა ანიჭებთ.

ხორციელი სიამოვნების სხვა სახეობა, ფიქრობენ უტოპიელები, სხეულის მშვიდი და აუღელვებელი მდგომარეობაა, ესაა თითოეულისათვის, ყოველგვარი ავადმყოფობისაგან თავისუფალი ჯანმრთელობა. მართლაც თუკი ადამიანს არაფერი არ სტკივა, ჯანმრთელობა თავისთავადაა სიამოვნება იმ შემთხვევაშიც კი, როცა არავითარი გარედან მიღებული სიამოვნება არ ახლავს მას, თუმცა ეს ნაკლებ შესამჩნევია და გრძნობას ნაკლებად აღელვებს, ვიდრე ჰამა-სმის დაუოკე-

ბელი სურვილი. მაინც ბევრი თვლის, რომ ჯანმრთელობა უდიდესი სიამოვნებაა, ამასთან ერთგვარი საფუძველი და საწყისი ყველაფრისა, რასაც კი იძლევა ცხოვრების მშვიდი და სასურველი პირობები. ხოლო როდესაც კაცი ჯანმრთელად არ არის, როგორი სიამოვნებაც არ უნდა მიანიჭო, იგი მაინც ვერ შეიტკბობს, რამეთუ როცა რამე არ სტკივთ, მაგრამ არც ჯანმრთელად არიან, ისინი ამას უფრო უგრძობლობას ეძახიან, ვიდრე სიამოვნებას.

გულმოდგინე მსჯელობის შემდეგ უტოპიელებმა უკვე დიდი ხანია უარყვეს იმათი აზრი, ვისაც არ მიაჩნდა, რომ სიამოვნება მტკიცე და ურყევე ჯანმრთელობაშია. ისინი ამბობდნენ, რომ თუ ეს სიამოვნება არსებობს, მისი შეგრძნება მხოლოდ რაღაც გარეგანი მოძრაობის დროს შეიძლება. ახლა კი, პირიქით, თითქმის ყველა უტოპიელი იმ აზრს იზიარებს, რომ სიამოვნებისათვის ყველაზე მნიშვნელოვანი ჯანმრთელობაა. ისინი ამბობენ, რომ თუკი ავადმყოფობას ატლავს ტანჯვა, რომელიც სიამოვნების ისეთივე შეურიგებელი მტერია, როგორიც ჯანმრთელობისა — ავადმყოფობა, მაშინ ურყევი ჯანმრთელობა თავის თავში რატომ არ უნდა შეიცავდეს სიამოვნებას? მათ მიაჩნიათ, რომ აქ სულაც არაა მნიშვნელოვანი — ავადმყოფობაა ტანჯვა თუ ტანჯვაა ავადმყოფობისათვის დამახასიათებელი — ორივე შემთხვევაში ერთი და იგივე გამოდის. თუკი ჯანმრთელობა სიამოვნებაა ანდა ის აუცილებლად წარმოშობს სიამოვნებას, როგორც ცეცხლი სითბოს, მაშინ, რა თქმა უნდა, ორივე შემთხვევაში გამოდის, რომ სიამოვნებას მოკლებული არ შეიძლება იყოს ის, ვინც ჯანმრთელია.

გარდა ამისა, უტოპიელები ამბობენ: სხვა რა ხდება ჰამის დროს, თუ არა ბრძოლა ჯანმრთელობისა (რომელიც ნელ-ნელა ირყევა) შიმშილთან? (ამასთან, საკვები აქ ჯანმრთელობის თანამებრძოლია). სანამ ჯანმრთელობა ამ ბრძოლაში თანდათან ძალებს იკრებს, ამ წარმატებას ჩვეულ სიძლიერემდე მიჰყავს სიამოვნება, რომელიც ჩვენ ესოდენ მოგვწონს. ნუთუ ჯანმრთელობა, რომელსაც ამხნევეებს ბრძოლა, არ გაიხარებს, როცა გაიმარჯვებს? ნუთუ ის უგრძობი გახდება, როდესაც ბედნიერად დაიბრუნებს ძველ ძალას, რომელსაც ის ასე ესწრაფოდა მთელი ამ ბრძოლის განმავლობაში? არ შეიცნობს თავის კეთილდღეობას და არ დააფასებს მას? უტოპიელები ფიქრობენ, რომ გამოთქმა — ჯანმრთელობის შეგრძნება შეუძლებელია, ძალზე შორსაა ჰუმბარტებისაგან. ვინ არ გრძობს თავს ჯანმრთელად, კითხულობენ ისინი, თუკი მხნედ არის და თუკი ის მართლაც ჯანმრთე-

ლია? ვისზე მოქმედებს უგრძობლობა და ლეთარგია ისე, რომ არ აღიაროს, რა ტკბილი და სასიამოვნოა მისთვის ჯანმრთელობა? და რა არის სიტკბოება, თუ არა სიამოვნების სხვა სახელწოდება?

უტოპიელები უფრო აფასებენ სულიერ სიამოვნებას (ისინი მას მთავარ და უპირველეს სიამოვნებად თვლიან). მისი უმნიშვნელოვანესი ნაწილი, ფიქრობენ ისინი, სათნოებაში ვარჯიშით და ცხოვრების კეთილდღეობის შეცნობით წარმოიშობა: იმ სიამოვნებიდან, რომლებსაც სხეული გვანიჭებს, პირველობა ჯანმრთელობას ეკუთვნის, რაც კი აღამიანს ამგვარად ახარებს, საჭიროა სწრაფვა, სწრაფვა მხოლოდ ჯანმრთელობისაკენ! რამეთუ ყველაფერი ეს სასიამოვნოა, არა თავისთავად, არამედ იმიტომ, რომ იგი ჩუმად შემოპარულ სენს ეწინააღმდეგება, რამდენადაც ბრძენისათვის უფრო ნიშანდობლივია გაექცეს ავადმყოფობას, ვიდრე ეძიოს შისგან განკურნების საშუალება — ავადმყოფობის თავიდან აცილება სჯობს მის შემსუბუქებას, ასევე უტოპიელებიც ფიქრობენ, სჯობს ამგვარ სიამოვნებას არ საჭიროებდე, ვიდრე მათი განკურნებით სიამოვნებას ღებულობდე. თუკი ვინმე ფიქრობს, რომ განიცდის ამგვარ ნეტარებას, მაშინ უნდა აღიაროს კიდევ, რომ უდიდეს ბედნიერებას ის მხოლოდ მაშინ ეწევა, თუ მას წილად ხვდება იცხოვროს მუდმივ შიმშილში, წყურვილში, ქავილში, ჭამაში, სმასა და ფხანაში. მაინც ვინ ვერ მიხვდება, რომ ამგვარი ცხოვრება არა მარტო საშინელი, არამედ შესაბრალისიცაა? რა თქმა უნდა, ეს სიამოვნებანი, როგორც ყველაზე ნაკლებად ჭეშმარიტნი, ყველაზე უფრო მდაბალია, და ისინი მხოლოდ საწინააღმდეგო განცდებთან ურთიერთობაში მელავნდებიან, რამეთუ ჭამისაგან მიღებულ სიამოვნებას შიმშილი უკავშირდება, ისიც სხვადასხვა ზომით, რამეთუ ტანჯვა რაც უფრო ძლიერია, მით უფრო ხანგრძლივია. ის სიამოვნებაზე აღრე წარმოიშვება და არ ქრება, სანამ მასთან ერთად სიამოვნებაც არ მოკვდება.

უტოპიელები ფიქრობენ, რომ ამგვარი სიამოვნებანი, თუკი მხოლოდ აუცილებლობამ არ გამოიწვია, მაღლა არ უნდა დავაყენოთ. მაინც უტოპიელები ამით ბედნიერი არიან და მადლობას სწირავენ დედაბუნებას, რომელიც უნაზესი სიტკბოებით ეწევა თავის შთამომავლობას იქითკენაც კი, რაც საჭიროა, აუცილებელია და მუდმივად კეთდება. რა საშინელი იქნებოდა ცხოვრება, რომ მსგავსად სხვა დაავადებებისა, რომლებიც შედარებით იშვიათად გვაწუხებენ, შიმშილი-



სა და წყურვილისგან გამოწვეული უსიამოვნებანიც უხამებითა და მწარე წამლებით მოგვეშორებინა?

უტოპიელები ყოველნაირად ცდილობენ შეინარჩუნონ სილამაზე, ძალა და სიმკვირცხლე — ბუნების ეს სასიამოვნო და განსაკუთრებული საჩუქარი. უფრო მეტიც, იმ სიამოვნებებს, რომლებიც აღიქმება ყურის, თვალის, ცხვირის საშუალებით და რაც ბუნებამ ადამიანს მიანიჭა როგორც მისი თვისება და თავისებურება (რამეთუ არ არსებობს სხვა ცოცხალი არსება, რომელსაც აღლელებს სამყაროს ხილვა და მშვენიერება, ანდა ატკობს სუნი — სხვა ცოცხალ არსებებს ეს გრძნობა მხოლოდ საკვების მიმართ აქვთ და ვერ არჩევენ განსხვავებას თანამჟღერ და განსხვავებულ ბგერებს შორის), — ყველაფერ ამას, ვამბობ მე, უტოპიელები ცხოვრების ერთგვარ სასიამოვნო საკაზმად მიიჩნევენ, ოღონდ ყველაფერ ამაში მათ ასეთი შეზღუდვა აქვთ: მცირე სიამოვნებამ ხელი არ უნდა შეუშალოს დიდს, სიამოვნებას არ უნდა მოსდევდეს რაიმე ტანჯვა, რომელიც გარდაუვალია, თუკი სიამოვნება უზნეოა.

უტოპიელები ფიქრობენ, რომ სილამაზის შეძლება, ძალების მოდუნება, სიმკვირცხლის სიზარმაცედ გადაქცევა, სხეულის დაუძლურება მარხულობით, ჭანჭრთელობის ვნება და ბუნების სხვა სიკეთის უარყოფა უდიდესი უგუნურებაა, შენი თავის დაუნდობლობა და ბუნებისადმი შენი დიდი უმადურობაა. ეს ნიშნავს უარყო შენი ვალდებულებანი, თავიდან აიცილო ყველა მისი სიკეთე. მხოლოდ ზოგიერთს შეუძლია უარყოს თავისი უპირატესობანი და უფრო მხურვალედ იზრუნოს სხვა ადამიანებსა და საზოგადოებაზე იმ იმედით, რომ ამ გარჯისათვის ღმერთი მას უფრო დიდ სიამოვნებას მიანიჭებს. სხვა შემთხვევაში ეს ნიშნავს ეწამო სათნოების ფუჭი მოჩვენებისათვის, რომელიც არც არავისთვის არის სასარგებლო და არც იმისათვის, რომ ნაკლები წვალებით გადაიტანო ტანჯვა, რომელიც შესაძლოა არასოდეს შეგხვდეს.

ასე მსჯელობენ უტოპიელები სათნოებასა და სიამოვნებაზე. მათ სწამთ, რომ თუკი ზეციდან მოვლენილი რელიგია ადამიანს რაიმეს უფრო წმინდას არ შთააგონებს, მაშინ ადამიანის გონების დახმარებით უფრო სარწმუნო რამის გამონახვა შეუძლებელია. ჩვენ ახლა დრო არ გვაძლევს საშუალებას, გავარჩიოთ სწორად ფიქრობენ თუ არა ისინი ამაზე. ჩვენ მხოლოდ მათი საფუძვლების გაცნობა ვიცისრეთ და არა დაცვა.

ასეა თუ ისე, ღრმად ვართ დარწმუნებულნი, რომ როგორც არ უნდა იყოს მათი დებულებები, უკეთესი ხალხი და უფრო ბედნიერი სახელმწიფო არსად მეგულება. სხეულით ისინი ღონიერი არიან; ძალები მოსალოდნელზე მეტი აქვთ, თუ ვიმსჯელებთ მათი სიმაღლის მიხედვით, თუმცა იგი არცთუ ისე მცირეა. მიუხედავად იმისა, რომ უტოპიელების მიწები ყველგან ნოყიერი არ არის და ჰავაც არასაკმარისად ჯანსაღია, ცუდი ამინდის წინააღმდეგ ისინი თავს იკაუებენ ზომიერი კვებით, ხოლო მინდვრებს გულმოდგინედ ამუშავებენ. ასე რომ, არც ერთ სხვა ხალხს არა აქვს ასეთი დიდი მოსავალი და არა ჰყავს ასე მრავალრიცხოვანი საქონელი, არ არსებობს სხვა უფრო ძლიერი და ჯანმრთელი ხალხი. შენ იქ შეხვდები არა მარტო მიწათმოქმედთა ჩვეულებრივ საქმიანობას, როდესაც ბუნებით უნაყოფო ნიადაგს ეხმარებიან თავისი ხელოვნებითა და შრომით, არამედ ნახავ, რომ ხალხს ტყე ერთი ადგილიდან ხელით გადააქვს მეორე ადგილზე. ამ შემთხვევაში მათ ის კი არ აწუხებთ, მიწა უფრო ნაყოფიერი იყოს, არამედ ის, რომ შრომა გაუადვილდეთ — შეშა ახლოს იყოს ზღვასთან, მდინარეებთან, ანდა თვით ქალაქებთან, რადგან ხმელეთით დიდ მანძილზე პურის გადაზიდვა უფრო ადვილია, ვიდრე შეშისა. ხალხი გულღია და მხიარულია, გონებაშეკრებილი და გართობის მოყვარული<sup>108</sup>. ხოლო როცა ეს აუცილებელია, შრომასაც საქმაოდ იტანს. სხვა საქმეებს ისინი მაინცდამაინც არ ეტანებიან, მაგრამ გონებრივი მისწრაფებებით დაუცხრომელნი არიან. როდესაც მათ ვესაუბრებთ ბერძნული ლიტერატურისა და მეცნიერების შესახებ<sup>109</sup>, საოცარი იყო, რა თავგამოდებით მოინდომეს, რომ ნება დაგვერთო ჩვენი ახსნა-განმარტებებით შეესწავლათ ისინი (რამეთუ ლათინურში<sup>110</sup>, მათი აზრით, ისტორიისა და პოეზიის გარდა არაფერი იმსახურებს დიდ მოწონებას), ამიტომ ჩვენ დავთანხმდით, თუმცა წარმატების იმედი არ გვქონდა. დავთანხმდით უფრო იმიტომ, რომ არ მოჩვენებოდათ, თითქოს ამ შრომაზე უარს ვამბობდით. მაგრამ როგორც კი საქმე წინ წავიდა, მათმა გულმოდგინებამ დაგვარწმუნა, რომ ჩვენი შრომა უქმად არ ჩაივლიდა. უტოპიელებმა ძალიან ადვილად დაიწყეს ასოების გამოხატვა და ძალზე მოხერხებულად გამოთქვამდნენ სიტყვებს, ადვილად იმახსოვრებდნენ მათ, ისე ზუსტად დაიწყეს თარგმნა, რომ ჩვენ ეს საოცრებად გვეჩვენებოდა, თუკი არ ჩავთვლით იმას, რომ ვინც სწავლას შეუდგა, მათი უმრავლესობა საამისოდ არა მარტო საკუთარი სურვილით, არამედ

სენატის ბრძანებითაც აღეგზნო. ესენი იყვნენ განსაკუთრებული ნიჭის მქონე მოსწავლეები და მოწიფული ასაკის ხალხი, ამიტომ ენის მხრივ სამ წელზე უფრო ადრეც მათთვის უკვე არავითარი სიძნელე არ არსებობდა. ისინი შეუფერხებლად კითხულობდნენ საინტერესო მწერლებს. ზოგჯერ მათ ხელს მხოლოდ ტექსტის დაზიანებული ადგილები უშლიდათ. სწორი გითხრათ, ვფიქრობ, რომ ისინი ადვილად დაეუფლნენ ამ მეცნიერებებს იმის გამო, რომ რაღაც ჰქონდათ საერთო. მგონი ეს ტომი ბერძნებიდან მოდის, რადგან მათ ენაში, რომელიც, სხვათაშორის ძალიან ჰგავს სპარსულს, ქალაქებისა და თანამდებობის პირთა სახელებს ბერძნულის რაღაც კვალი აქვს შემონახული. შემდგომში მე მათ ჩაუუტანე პლატონის ბევრი თხზულება, უფრო მეტი არისტოტელესი, აგრეთვე თეოფრასტეს<sup>111</sup> წიგნი მცენარეებზე — სამწუხაროა, რომ ბევრ ადგილას ის დაზიანებული იყო. (როდესაც მეოთხედ გავემგზავრე სამოგზაუროდ, სხვა ბარგის მაგივრად გემზე წიგნების საკმაოდ დიდი შეკვრა წავიღე, რადგან მტკიცედ გადავწყვიტე, რომ ჩქარა დაბრუნებას სჯობდა არასდროს დაგბრუნებულისა). სანამ ზღვაში ვიყავით, თეოფრასტეს წიგნი, ჩემი დაუღვერობით, ხელთ ჩაუვარდა მაიმუნს<sup>112</sup>, რომელმაც თამაშსა და გართობაში სხვადასხვა ადგილიდან რამდენიმე ფურცელი ამოხია და დაგლიჯა. გრამატიკის წიგნებიდან უტოპიელებს მხოლოდ ლასკარის<sup>113</sup> წიგნი აქვთ, თეოდორეს ნაშრომები არ ჩამიტანია, ისევე როგორც არ ჩამიტანია არც ერთი ლექსიკონი, გარდა ჰესიხიოსისა და დიოსკორიდუსის<sup>114</sup>. უტოპიელებს ძალიან უყვართ პლუტარქეს<sup>115</sup> წიგნები, მოსწონთ აგრეთვე ლუკიანეს დაცინვები და ხუმრობები<sup>116</sup>. პოეტებიდან მათ აქვთ არისტოფანე<sup>117</sup>, ჰომეროსი<sup>118</sup>, აგრეთვე ევრიპიდე<sup>119</sup>, შემდეგ სოფოკლე<sup>120</sup>, დაბეჭდილი ალდუსის მინუსკულით<sup>121</sup>. ისტორიკოსებიდან აქვთ თუკიდიდე<sup>122</sup> და ჰეროდოტე<sup>123</sup>, აგრეთვე — ჰეროდოტე<sup>124</sup>. გარდა ამისა, სამედიცინო წიგნებიდან ჩვენმა ამხანაგმა ტრიციანუს პინატუსმა<sup>125</sup> თან ჩაიტანა ჰიპოკრატეს<sup>126</sup> რამდენიმე მცირე თხზულება, გალენუსის<sup>127</sup> „მცირე ხელოვნება“. ეს წიგნები მათთვის ძალიან ძვირფასი აღმოჩნდა და მიუხედავად იმისა, რომ უტოპიელებს მედიცინა სხვა ხალხებთან შედარებით ყველაზე ნაკლებად სჭირდებათ<sup>128</sup>, ის მაინც არსად არ ფასდება ამ დონეზე, თუნდაც მარტო იმ მიზეზით, რომ მის ცოდნას ისინი ფილოსოფიის საუკეთესო და ძალზე სასარგებლო ნაწილად მიიჩნევენ. როდესაც ამ ფილოსოფიის დახმარებით იკვლევენ ბუნების საიდუმლოებებს, მათ ეჩვენებათ, რომ ისინი არა მარტო სი-

ამოვნებას ღებულობენ, არამედ მისი შემქმნელისა და შემოქმედის მფარველობაში ექცევიან. ისინი ფიქრობენ, რომ სხვა შემოქმედთა მსგავსად ღმერთმა სამყარო ადამიანს შესაცნობად და საჭვრეტად წარმოუდგინა. (მხოლოდ და მხოლოდ ადამიანს მიანიჭა მან ამის უნარი). ამიტომ შემოქმედისათვის უფრო ძვირფასია ბეჯითი და ყურადღებია-ნი დამკვირვებელი, მისი ქმნილების ქომაგი, ვიდრე ის, ვინც გონებით სუსტი ცხოველის მსგავსად, თავისი სიბრყვიით და უგუნურებით ამ დიადსა და უჩვეულო სანახაობას არაფრად აგდებს.

ამის გამო უტოპიელთა მეცნიერებაში გაწაფულ გონებას საოცარი უნარი აქვს შექმნას ნიმუშები, რომელთა შემწეობითაც ცხოვრება უფრო მყუდრო და უკეთესი ხდება. უტოპიელები ჩვენგან ორი რამით არიან დავალებულნი. ესენია წიგნის ბეჭდვა და ქალაქის დამზადება<sup>129</sup>. თუმცა ამას მართო ჩვენ კი არა, უფრო მეტად თავის თავს უნდა უმადლოდნენ, ვინაიდან, როდესაც ჩვენ მათ ვაჩვენებთ ალღუსის ქალაქის წიგნებში დაბეჭდილი ასოები და ვუამბებთ, თუ რისგან მზადდებოდა ქალაქი და როგორ შეიძლებოდა ასოების ბეჭდვა, ჩვენ მხოლოდ ვსაუბრობდით ყოველივე ამაზე, რადგან არც ერთი ჩვენგანი არც ერთში და არც მეორეში არ ერკვეოდა. უტოპიელები კი მაშინვე ძალზე გონიერულად მიხედნენ, რაში იყო საქმე. ადრე მხოლოდ პერგამენტზე, ხის ქერქსა და პაპირუსზე წერდნენ, ახლა კი ქალაქის დამზადებას და ასოების დაბეჭდვას შეეცადნენ. თავიდან არც ისე კარგად გამოსდიოდათ, მაგრამ გულმოდგინე მეცადინეობის შემდეგ წარმატებას მიაღწიეს როგორც ერთ, ისე მეორე. საქმეში და ბერძენ ავტორთა ყველა წიგნი რომ ჰქონოდათ, მათი ასლების ნაკლებობას ვეღარ იგრძნობდნენ. ახლაც მათ მეტი არაფერი აქვთ, რაც ჩამოვთვალე, მაგრამ ბეჭდავენ წიგნებს და, რაცა აქვთ, მათ ათასობით ავრცელებენ.

უტოპიელები სიამოვნებით იღებენ ყველას, ვინც მათი ქვეყნის სანახავად მიდის, თუკი გამოირჩევიან რაიმე ნიჭით, ანდა ხანგრძლივი მოგზაურობის გამო ბევრ ქვეყანას იცნობენ (ამიტომ იყო მათთვის სასიამოვნო ჩვენი იქ მისვლა). ისინი ხალისით ისმენენ, რაც ქვეყანაზე ხდება, თუმცა მათთან სავაჭროდ არც ისე ხშირად მიდიან. ანდა რა უნდა ჩაიტანონ რკინის, ოქროსა და ვერცხლის გარდა, რომლებიც ყველას სურს აქედან გაიტანოს. უტოპიელებს ურჩევნიათ, ის, რის გატანაც საჭიროა, თვითონ გაიტანონ, ვიდრე სხვას შემოატანინონ,

რადგან მიაჩნიათ, რომ სხვა ხალხებს ასე უკეთესად გაიცნობენ, თანაც ნაოსნობის ჩვევებს არ დაივიწყებენ და გამოცდილებას გაიმძივებენ.

## მონათავის

უტოპიელები მონებად არ თვლიან არც ომში დატყვევებულებს, იმათ გარდა, ვისაც ბრძოლის ველზე თვითონვე შეიპყრობენ, არც მონათა შვილებს და არც სხვა ხალხების მონობაში მყოფთ, რომელთა ყიდვაც შეუძლიათ. ისინი მონებად აქცევენ იმათ, ვინც უტოპიაში სამარცხვინო დანაშაულს ჩაიდენს, ან კიდევ ვისაც სხვა ქვეყნებში ბოროტმოქმედებისათვის სიკვდილი აქვს მისჯილი (მსგავსი აღამიანები კი ძალიან ხშირად გვხვდებოდა). ასეთებს უტოპიელები ზოგჯერ ძალიან იაფად იძენენ, უფრო კი მუქთად შოულობენ. ამგვარი მონების ხედვითაა მუდამყამს მუშაობა და ბორკილები. მონებად ქცეულ თანამოქალაქეებს უტოპიელები უფრო მკაცრად ეპყრობიან, რადგან მიაჩნიათ, რომ მათ უარესიც ეკუთვნით, რადგან, მიუხედავად იმისა, რომ კარგად იყვნენ აღზრდილნი, შესანიშნავად ჰქონდათ შეთვისებული სიკეთე და სათნოება, ბოროტმოქმედებისაგან თავი მაინც ვერ შეიკავეს.

არსებობს მონობის სხვა სახეობაც, როცა სხვა ქვეყნის რომელიმე შრომისმომყვარე და ღარიბი მუშაკაცი თავისი ნებით იტვირთავს ზოლმე მათ სამსახურს. ასეთებს უტოპიელები კარგად ექცევიან, არანაკლებ, ვიდრე თავიანთ მოქალაქეებს, ოღონდ ცოტა მეტ სამუშაოს აძლევენ, რადგან თვითონ მონები არიან ამას მიჩვეული. თუკი ასეთი მონა უტოპიიდან წასვლას მოისურვებს (რაც იშვიათად ხდება), ძალით მას არც დააკავებენ და არც ხელცარიელს გაისტუმრებენ.

როგორც უკვე აღვნიშნე, უტოპიელები ავადმყოფებზე რაღაც განსაკუთრებულად ზრუნავენ, არაფერს იშურებენ, რომ არც წამლები დააკლდეთ და არც საკვები. უფრო მეტიც, უკუჩრებელი სენით შეპყრობილთ ისინი თავითი უსხედან, ესაუბრებიან, ანუგეშებენ და ცდილობენ ოღნავ მაინც მოჰკვარონ შვება. მაგრამ თუ უკუჩრებელი სენი ავადმყოფს გაუთავებლად ტანჯავს და აწამებს, მაშინ მღვდლები და მოხელეები ურჩევენ, რომ მისთვის უმჯობესია საიქიოს გამგზავრება, რადგან არავითარი სასიცოცხლო მოვალეობის შესრულება აღარ ძალუძს, თავი მოსძულებია, სხვას აწევს მძიმე ტვირთად, თვითონ კი თითქმის უკვე გადასახლებულია იმ ქვეყნად, თვითონაც ხომ უკვე დარწმუნებულია, რომ სიცოცხლე მისთვის ტანჯავა და სხვა არაფერი.

კეთილი იმედით ნუგეშცემულმა, დაე, თვითონ იხსნას თავი ამ გამწარებული სიცოცხლისაგან, სისასტიკისა და საპყრობილისაგან, ან არა და სხვას დართოს ნება გაარიდოს იგი ამ ქვეყანას. ეს მეტად გონივრული საქციელია, რადგან სიკვდილით შეწყდება წამება და არა ბედნიერი ცხოვრება; გონივრულია იმიტომაც, რომ თუ ღვთის ნების გამოხატველი მღვდლების რჩევას დაჰყვება, მისი საქციელი წმინდა და ღვთის სამებელი იქნება. ვინც კი ამაში დარწმუნდება, იგი საკუთარი ნებით ისწრაფავს სიცოცხლეს ან შიმშილით, ან სამუდამო დაძინებით; ასეთ დროს ისინი სიკვდილის მიახლოებას ხომ ვერც კი გრძობენ ხოლმე, ისე აღესრულებიან. ავადმყოფის სურვილის საწინააღმდეგოდ უტოპიელები ავადმყოფს როგორ მოკლავენ და ან მასზე ზრუნვას როგორ შეანელებენ. ისინი დარწმუნებული არიან, რომ მხოლოდ ავადმყოფის ნებართვით არის საიქიოს წასვლა საპატიო. მაგრამ თუ სხვა შემთხვევაში ვინმე საკუთარ თავზე ხელს აღმართავს და მღვდლებსა და სენატს ამის გამომწვევ მიზეზს ვერავინ განუმარტავს, მაშინ გარდაცვლილს არც მიწას აღირსებენ, არც ცეცხლზე დაწვავენ, ისე გადაადგებენ სამარცხვინოდ საღმე ჰაობში<sup>130</sup>.

ქალი თვრამეტ წელზე ადრე არ თხოვდება, მამაკაცი კი ამ ასაკზე ოთხი წლით უფროსი მაინც უნდა იყოს. თუ ქორწინებამდე<sup>131</sup> ქალი და მამაკაცი საიდუმლო კავშირით შეერთდებიან, ორივეს სასტიკად სჯიან. ასეთებს საერთოდ ეკრძალებათ ქორწინება, თუ მმართველი მათზე მოწყალებას არ მოიღებს. იმ ოჯახის უფროსებს, სადაც ეს დანაშაული მოხდა, საშინელი შერცხვენა ელით, რადგან ცუდი მეთვალყურეობის გამო თავისი მოვალეობა ვერ შეასრულეს. უტოპიელები ამ ბოროტმოქმედებას ასე მკაცრად იმიტომ სჯიან, რომ ზრუნავენ მოშავალზე. თუ ადამიანებს არ აუკრძალავენ შემთხვევით კავშირებს, ცოლქმრობაში სიყვარული იშვიათად იხარებს, არადა მთელი ცხოვრება ხომ ერთად უნდა გაატარონ და მოუწვევთ უსიყვარულო ურთიერთობის მთელი სიმძიმის გადატანა.

მეუღლის არჩევასას ისინი მკაცრად მისდევენ, ჩვენის აზრით, ერთ მეტად სულელურსა და სასაცილო ადათს: ქალიშვილსაც და ქვრივ ქალსაც ვინმე ღირსეული და დარბაისელი მანდილოსანი სასიძოს შიშვლად წარუდგენს; ასევე, რომელიმე პატივცემული მამაკაცი ქალიშვილს საქმროს შიშველს წარუდგენს. როცა ჩვენ სიცილით დავგმეთ ეს უცნაური ჩვეულება, უტოპიელებმა, პირიქით, გაცემა გამოთქვეს სხვა ხალხთა იშვიათი სისულელის გამო და აღნიშნეს: კვი-

ცის შექმნისას ისინი მცირე საფასურს იხდიან, სიფრთხილეს კი დიდს იჩენენ და, თუმცა კვიცი ისედაც თითქმის შიშველია, უნაგირსა და აღკაზმულობას მაინც ხდიან, ქვეშ რაიმე წყლული არ იფარებოდესო. მეუღლის არჩევისას კი, რამაც ადამიანს მთელი ცხოვრების მანძილზე ან ბედნიერება უნდა მიანიჭოს ან უბედურებას გადაჰკიდოს, ისე ქარაფშუტულად იქცევიან, რომ მთელი სხეული ტანსაცმლითაა დაფარული და ქალის ღირსებას მხოლოდ სახის მიხედვით განსაზღვრავენ (რადგან მხოლოდ სახელა მოუჩანს). ქორწინება მათვის საკმაოდ სახიფათოა, რადგან ადვილად შეიძლება გაუბედურდნენ (თუკი მოგვიანებით რაიმე იჩენს თავს). ყველა ხომ ისეთი ბრძენი არ არის, მხოლოდ ზნეობრივი თვისებებით დაკმაყოფილდეს. თვით ბრძენიც კი ქორწინებისას სულიერ ღირსებებთან ერთად გარეგნობას მაინც აქცევენ ყურადღებას. მოკლედ რომ ვთქვათ, ამ წამოსასხამებს შეუძლია დაფაროს აუტანელი სიმახინჯე, ეს კი ადამიანს ცოლს შეაძულებს, თავის დაღწევა კი უკვე გვიანი იქნება. თუ ერთი მხარე ქორწინების შემდეგ რაიმე მიზეზით დამახინჯდება, ეს ხვედრი ორივემ უნდა ზილოს. მაგრამ სანამ ეს მოხდებოდეს, ვინმე რომ ხაფანგში არ გაებას, საჭიროა კანონმდებლობით თავის დაზღვევა. ამაზე ისინი დიდი მონღომებით ზრუნავენ — იქაურ ქვეყნებში მხოლოდ უტოპიელები სჯერდებიან ერთ ცოლს<sup>132</sup>. განქორწინება იქ იშვიათია, ცოლ-ქმარს უმეტესწილად მხოლოდ სიკვდილი თუ დააშორებს. გამონაკლისია მაშინ, თუ მეუღლემ დალატი ჩაიდინა ან აუტანლად მძიმე ხასიათი გამოამჟღავნა. დაზარალებულ მხარეს სენატი მეუღლის შეცვლის უფლებას აძლევს, ხოლო მიტოვებული მხარე სამუდამოდ შერცხვენილი რჩება და მეორედ დაქორწინების უფლება წართმეული აქვს. სხვა შემთხვევაში უდანაშაულო ცოლის ნება-სურვილის საწინააღმდეგოდ მისი განდევნა არ შეიძლება, გარდა იმ შემთხვევისა, თუ სხეულზე რაიმე ნაკლი გამოაჩნდება, რადგან უტოპიელებს სისასტიკედ მიაჩნიათ ადამიანის მიტოვება მაშინ, როცა იგი ყველაზე მეტად საჭიროებს ნუგეშისცემას. მათი აზრით, სიბერისაგან ხომ ვერავის იხსნი, რადგან სიბერე ადამიანს აძაბუნებს, თან მოაქვს სნეულებები და თვითონაც საშინელი სნეულებაა.

მაგრამ თუ ცოლ-ქმარი ერთმანეთს ვერ ეთვისება და ორივე იპოვის თავისთვის უფრო შესაფერს, ვისგანაც მეტ სიტკბობას მიიღებს, მაშინ ორივე მხარის თანხმობით შესაძლებელია მათი განქორწინება და ხელახალი ქორწინება, მაგრამ მხოლოდ და მხოლოდ სენატის ნე-

ბართვით, რომელიც არ დაუშვებს განქორწინებას, სანამ საქმეს სრული ყურადღებით არ განიხილავს და ადვილად არც მაშინ თანხმდება, რადგან მშვენივრად იცის, რომ ხელახალი ქორწინების იმედი და ადვილად ხელმისაწვდომი უფლება არ შეუწყობს ხელს ცოლქმრული სიყვარულის განმტკიცებას.

ცოლქმრული კავშირის შემაგინებლებს უმძიმესი მონობით სჯიან და თუ თითოეული მათგანი ცალ-ცალკე ქორწინებაში იმყოფება, მაშინ მათი შეურაცხყოფილი მეუღლეები (თუკი მათ ეს სურთ) მოლა-ლატეს უარყოფენ და ერთმანეთს შეირთავენ, ან მათთვის სასურველ პიროვნებაზე დაქორწინდებიან. მაგრამ თუ რომელიმე შეურაცხყოფილს თავისი მეუღლე მაინც უყვარს, მაშინ კანონი არ ეწინააღმდეგება მის სურვილს მონობაში თან ახლდეს თანამეცხედრეს. ისეც ხდება ხოლმე, რომ ერთის მონანიება და მეორის გულმოდგინება მმართველს გულს მოუღობს ხოლმე და დამნაშავეს თავისუფლებას ანიჭებენ. მაგრამ ასეთი საქციელის ხელშეორედ ჩამდენი უკვე სიკვდილით ისჯება.

სხვა ბოროტმოქმედებისათვის არ არსებობს კანონით გათვალისწინებული რაიმე გარკვეული სასჯელი, მაგრამ თუ ვინმე სასტიკ, მიუტევებელ დანაშაულს ჩაიდენს, სასჯელი სენატმა უნდა განსაზღვროს. ისე კი ცოლები ქმრებმა უნდა აღზარდონ, შვილები—მშობლებმა. გარდა იმ შემთხვევისა, როცა ვინმე ისეთ დანაშაულს ჩაიდენს, რისთვისაც სახალხოდ უნდა დაისაჯოს, თითქმის ყველა მძიმე დანაშაულისათვის უტოპიელები ადამიანებს მონობით სჯიან. მათ შიამჩნიათ, რომ ეს არ არის მცირე სასჯელი ბოროტმოქმედებისათვის; სახელმწიფოსთვის იგი უფრო ხელსაყრელია, ვიდრე აჩქარება და დამნაშავეს სიკვდილით დასჯა. მონის შრომა ხომ მეტ სარგებლობას მოიტანს, ვიდრე მისი მოკვლა. მისი მაგალითი კი სხვებს დიდხანს ემახსოვრებათ. თუ დამნაშავე არც ასეთი მოპყრობის შემდეგ გამოსწორდება და წესრიგს ისევ დაარღვევს, მაშინ მას ბოლოს და ბოლოს კლავენ, როგორც მძვინვარე მხეცს, რადგან არც ციხემ უშველა და არც ბორკილებმა. მომთმენი მონებისათვის კი ყველა იმედი არ არის გადაწურული. თუ ხანგრძლივი ტანჯვა მათ მოათვინიერებს და მონანიება კი ცხადყოფს, რომ მათ დანაშაული უფრო ემძიმება, ვიდრე სასჯელი, მაშინ მმართველის უპირატესობა ან სახალხო კენჭისყრა მათ მონობას უმსუბუქებს ან საერთოდ ათავისუფლებს.



გარყვნილებისაკენ წაქეზება არანაკლებ საშიშია, ვიდრე თვით გარყვნილება და საერთოდ დანაშაულის განზრახ ჩადენის მცდელობას უტოპიელები ბოროტმოქმედებას უტოლებენ. დანაშაული თუ არ მოხდა, ეს არ უნდა იყოს გასამართლებელი საბუთი იმათთვის, ვინც მას წინ არ გადაეღობა.

მასხარები უტოპიელებს გასართობად ჰყავთ. დიდ სირცხვილად ითვლება მათი შეურაცხყოფა, მათი სისულელეებით თავის გართობა კი არავის ეკრძალება. ფიქრობენ, რომ ეს ისევე მასხარებისათვისაა სასარგებლო. თუ რომელიმე პიროვნება იმდენად კუშტი და პირქუშია, რომ არც რაიმე საქციელი მოჰგვრის სიცილს და არც ნათქვამი, ასეთს მასხარაზე ზრუნვას არ დაავალებენ, შიშობენ, რომ იგი საჭირო შემწყნარებლურ დამოკიდებულებას ვერ გამოიჩენს მისდამი, რადგან ამისაგან ვერავითარ სიამოვნებას და სარგებლობას ვერ მიიღებს (ხოლო მასხარათა ერთადერთი ნიჭი გართობაა). სიმახინჯისა და ავთვალადობის დაცინვა უტოპიელებს სამარცხვინოდ მიაჩნიათ სწორედ იმისათვის, ვინც დასცინის, და არა იმისათვის, ვისაც დასცინიან, რადგან რეგვენობაა, უკეთინო ადამიანს ის ნაკლი, რომლისგანაც თავის დაღწევა მას არ შეუძლია.

უტოპიელები ფიქრობენ, რომ ადამიანები ბუნებრივ სილამაზეს სიზარმაცისა და სიზანტის გამო უარყოფენ; ფერუშარლის ხმარების მიზეზად მათ სამარცხვინო ქედმაღლობა მიაჩნიათ, რადგან საკუთარი გამოცდილებით იციან, რომ ვერავითარი გარეგნული სილამაზით ვერ მოიგებს ქალი ქმრის გულს ისე, როგორც სათნო ბუნებითა და თავმდაბლობით. მართალია, ზოგიერთს მხოლოდ გარეგნული სილამაზე იტაცებს, მაგრამ ცოლი ქმარს მთელი ცხოვრების მანძილზე მხოლოდ სათნოებითა და მორჩილებით ინარჩუნებს.

უტოპიელები ადამიანებს ბოროტმოქმედებისაგან განარიდებენ არა მარტო დასჯის შიშით, არამედ საყოველთაო პატივისცემითაც, რაც სიკეთისაკენ მოუწოდებს მათ. ვაჟკაცებს, რომლებსაც უდიდესი დამსახურება მიუძღვით ქვეყნის წინაშე, მოედნებზე ძეგლს უდგამენ მათი გმირობის სადიდებლად და მომავალი თაობებისათვის წინაპართა სასახლო მაგალითის საჩვენებლად. ვისაც ცბიერებით სურს რაიმე თანამდებობის მიღება, მას ყოველგვარ იმედს უსპობენ. უტოპიელები შეხმატებილებულად ცხოვრობენ, რადგან იქ თანამდებობის პირები არ ქედმაღლობენ და მათი შიში არც არავის აქვს, მათ მამებს უწოდებენ და ისინიც ყველას მამობრივი მზრუნველობით ეპყრობიან. მათ

ღირსების შესაბამისად ექცევიან: პატივს ნებაყოფლობით მიაგებენ და არა ძალდატანებით. თვით მმართველი სხვებისაგან არ განსხვავდება განსაკუთრებული ჩაცმულობით ანდა გვირგვინით, მას მხოლოდ თავთავების კონით გამოარჩევ, ისევე როგორც მღვდელმთავარს — ცვილის სანთლით, რომელიც მის წინ მიაქვთ.

უტოპიელებს ძალზე ცოტა კანონები აქვთ. ასეთი მოწესრიგებულ ურთიერთობის ადამიანებს მეტი არც სჭირდებათ. მათ არ მოსწონთ, სხვა ხალხებს რომ კანონების მთელი ტომებიც კი არ ყოფნით თავისი განმარტებებიანად. უდიდეს უსამართლობად მიაჩნიათ ადამიანთა შეზღუდვა ისეთი კანონებით, რომელთა წაკითხვაც კი შეუძლებელია მათი უზომო რაოდენობის, ხოლო გაგება — მეტისმეტი ჩახლართულობის გამო. უტოპიელები საერთოდ უარყოფენ ვეჰილებს, რომლებიც საქმეს ეშმაკურად არჩევენ და კანონებს მოხერხებულად განმარტავენ. უტოპიელთ უფრო სწორად მიაჩნიათ, რომ ადამიანს თავისი საქმე თვითონვე მიჰყავდეს და მოსამართლეს იმასვე უამბობდეს, რასაც დამცველს ეტყოდა. ასე უფრო ადვილია ბუნდოვანების თავიდან აცილება და ქვემარტების დადგენა. სანამ ილაპარაკებდეს ადამიანი, რომლისთვისაც არც ერთ დამცველს თვალთმაქცობა არ უსწავლებია, მოსამართლე აწონ-დაწონის წვრილმანებს და შედარებით მიამიტებს გაუადვილებს გაქნილთა ცილისწამების თავიდან აცილებას. ამას სხვა ხალხები ვერ მოახერხებენ, რადგან მათ საოცრად დახლართული კანონების მთელი გროვა აქვთ. უტოპიელები კანონებში კარგად ერკვევიან, რადგან, როგორც აღვნიშნე, მათი რაოდენობა ძალზე მცირეა. ამასთან, რაც უფრო ადვილად გასაგებია კანონი, მით უფრო სამართლიანად მიიჩნევა. უტოპიელები კანონს იმისთვის ქმნიან, რომ თითოეულს თავისი მოვალეობა შეახსენონ. ძირფესვიანად მის ახსნას ცოტა ვინმე თუ შეძლებს, მაშინ როცა კანონების უფრო სადა და ნათელი აზრი ყველასათვის გასაგებია. უბრალო ხალხისთვის კი, რომლებიც რაოდენობით მეტნი არიან და სხვებზე მეტად სჭირდებათ სწავლება და ახსნა-განმარტება, სულერთია, სულ არ გამოსცემენ კანონებს, თუ მათ ისე ჩახლართავენ, რომ დიდი ნიჭი და ხანგრძლივი განსჯა იქნება საჭირო მათი აზრის ამოსაცნობად. ამას კი ვერ შესძლებს უბრალო ადამიანთა უბირი გონება და არც დრო ეყოფათ საამისოდ, რადგან მთელ სიცოცხლეს საზრდოს მოპოვებაში ატარებენ.

უტოპიელების ასეთი მალალი ზნეობა იზიდავს მეზობელ ხალხებს, რომლებიც თავისუფალი არიან და საკუთარ ნებას ემორჩილებიან. მა-

თი უმრავლესობა უტოპიელებმა იხსნეს ტირანიისაგან. ისინი სთხოვენ უტოპიელებს გაუგზავნონ მათ მოხელეები, ზოგი ერთი, ზოგი — ხუთი წლით. როცა ვადა თავდება, მათ დიდი პატივითა და ქება-დიდებათ ისტუმრებენ უკან და მათი შემცვლელები მიჰყავთ. ექვი არ არის, ეს მეზობელი ხალხები შესანიშნავად და სამაგალითოდ ზრუნავენ საკუთარ სახელმწიფოზე. თუ მათი ცხოვრების კარგი და ავი მოხელეთა კეთილზნობაზეა დამოკიდებული, რასაკვირველია, უტოპიელებზე უკეთესს ვერავის ნახავენ, ვისაც ვერავითარი გასამრჯელო ვერ აცდუნებს (ეს უაზრობა იქნებოდა, უტოპიელები ხომ მალე უკან უნდა დაბრუნდნენ). მოხელეებს მოქალაქეები არ იცნობენ და ამიტომ მათ არ შეუძლიათ რომელიმე მათგანის მხარეზე დადგომა ბოროტი მიყვარძობის ან მტრობის განზრახვით. როგორც კი მართლსაყულებაში დაიხადგურებს ბოროტების ორი სახეობა — სიხარბე და მიყვარძობა, ირღვევა ყოველგვარი სამართლიანობა — სახელმწიფოს უმთავრესი ბურჯი. უტოპიელები მოკავშირეებს უწოდებენ იმ ხალხებს, რომლებიც მათ მმართველობას სთხოვენ, ხოლო მეგობრებად თვლიან იმათ, ვისაც სიკეთეს უკეთებენ.

უტოპიელები არ დებენ ხელშეკრულებებს სხვა ხალხებთან, განსხვავებით იმათგან, რომლებიც უთვალაუკერ დებენ შეთანხმებებს, არღვევენ მათ და შემდეგ ისევ განაახლებენ. რა საჭიროა შეთანხმებები? — კითხულობენ უტოპიელები, — ბუნება ხომ უფრო უკეთ აკავშირებს ადამიანებს. და თუ ვინმე ამ ბუნებრივ კავშირს უარყოფს, ის სიტყვებს უერთგულებს? ამ აზრზე უფრო იმიტომ დგანან, რომ მიმდგომ მხარეებში მმართველთა შეთანხმებები და შეკავშირებები ჩვეულებრივ არცთუ პატიოსნად ხდება ხოლმე.

ევროპაში, განსაკუთრებით კი იმ ადგილებში, სადაც ქრისტიანული რწმენა და რელიგიაა გავრცელებული, შეთანხმებები წმიდათაწმიდაა და ურღვევი, როგორც მმართველთა სამართლიანობისა და სიკეთის, ისე უმაღლესი მღვდელმთავრისადმი შიშისა და მოწიწების მეოხებით. ისინი ხომ არც თვითონ იკისრებენ ისეთ რამეს, რასაც ზუსტად ვერ შეასრულებენ და ყველა სხვა მმართველისგანაც მოითხოვენ დანაპირების ყოველმხრივ დაცვას. ვინც ამას თავს არიდებს, მას პასტორული სიმკაცრით მოძღვრავენ. უტოპიელებს სამარცხვინოდ მიაჩნიათ, და სავსებით სამართლიანადაც, შეთანხმების ლალატი, განსაკუთრებით ერთგულად მიჩნეული ადამიანებისა.

მაგრამ იმ ახალ სამყაროში, რომლისგანაც ევკატორი გვეოფს, და

გვეოფს არა იმდენად მანძილით, რამდენადაც ცხოვრების განსხვავებული წესით და ზნეობით, შეთანხმებებს სულ არ ენდობიან. ასეთი შეთანხმებები ხომ, რაც უფრო მეტი ლოცვა-კურთხევა ახლავს, მით უფრო სწრაფად ირღვევა. სიტყვების კორიანტელში ადვილია სუსტი ადგილის გამოძებნა, შეთანხმებები კი ხომ განზრახ ეშმაკურადაა დაწერილი, მათ შორის ძნელია მტკიცე კავშირის დამყარება და ამიტომ შეთანხმების ერთგულებისაგან თავის დაღწევა ყოველთვის ხერხდება. ასეთი ფანდი, ხრიკი და ეშმაკობა შემთხვევით კერძო პირთა გარიგებაში რომ აღმოაჩინონ, ქედმაღლურად დაიწყებენ ყვირილს, რომ ეს საბრძოლელის ღირსი მკრეხელობაა, ისინი კი, ვინც მმართველებს ამგვარ რჩევას აძლევენ, კიდევ ტრახახობენ ამით.

და გამოდის ისე, რომ სამართლიანობა სხვა არაფერია, თუ არა მდაბიოთა ქველობა, რომელიც მეფური დიდებისაგან საკმაოდ შორს ღვას. ან არადა, ორი სამართლიანობა მაინც არსებობს, რომელთაგან ერთი მდაბიო ხალხს შეეფერება და ქვეითად დიხარება, მიწაზე დახობავს, ღობეს ვერ გადაახტება, რადგან გზა ყოველმხრივ შეკრული აქვს; და მეორე — ღირსება მეუფეთა, რომელიც უფრო დიდებულია, ვიდრე ხალხისა, უფრო თავისუფალიც, რადგან მისთვის აკრძალული არაფერია, გარდა იმისა, რაც მას თავად არ სურს.

ვგონებ მეუფეთა ასეთი ზნე, შეთანხმებათა ასეთი ორჭოფობაა იმის მიზეზი, რომ უტოპიელები არავითარ შეთანხმებას არ დებენ. ისინი რომ აქ ცხოვრობდნენ, შესაძლოა, ამ საკითხზე აზრიც შეცვლოდათ. თუმცაღა მათ ჰგონიათ, რომ შეთანხმებები კიდევაც რომ ზუსტად სრულდებოდეს, მაინც ცუდია მათი წესად შემოღება. გამოდის, რომ სულ მცირე მანძილით, ნაკადულით ან გორაკით დაშორებულ ხალხებს ერთმანეთთან ბუნებრივად დაკავშირებულად არ მიაჩნიათ თავი. მათ ჰგონიათ, რომ მტრებად და მოწინააღმდეგეებად დაიბადნენ და ერთმანეთს სამართლიანად გაუღეტენ, თუკი ამას წინ შეთანხმება არ ეღობება. უფრო მეტიც, შეთანხმების დადება მათ შორის მეგობრულ კავშირს კი არ ამყარებს, არამედ ძარცვის თავისუფლებას იძლევა, რადგან შეთანხმების შედგენისას უგუნურების გამო მის პირობებში არაფერი იყო ჩაწერილი, რაც ამას ხელს შეუშლიდა. უტოპიელები კი, პირიქით, ფიქრობენ, რომ მტრად არავინ არ უნდა ჩათვალოს, თუ მან დაჩაგვრა არ დაგიბრია. შეთანხმების ნაცვლად ბუნებაში უნდა არსებობდეს ძმობა, ის უფრო კარგად და მტკიცედ შეაკავშირებს ადამიანების სულსა და გულს, ვიდრე ლიტონი სიტყვები.

## სამხედრო საქმისათვის

უტოპიელებს ომი უკიდურესად სძაგთ, როგორც ნამდვილად მხეცური მოქმედება. თუმცა რომელი მხეცი იბრძვის ისე გაუთავებლად, როგორც ადამიანი. თითქმის ყველა სხვა ხალხისაგან განსხვავებით, უტოპიელებს არაფერი არ მიაჩნიათ ისე სამარცხვინოდ, როგორც ომით მოპოვებული დიდება. მაგრამ განსაზღვრულ დღეებში ისინი მაინც ბეჯითად ატარებენ საომარ ვარჯიშებს. ვარჯიშობენ როგორც მამაკაცები, ისე ქალები, რათა საჭიროების შემთხვევაში ომს მოუშაადებლად არ შეხვდნენ. ომს კი ტყუილუბრალოდ არ იწყებენ. ისინი ომში ებმებიან მხოლოდ მაშინ, როცა საკუთარ საზღვრებს იცავენ ან მომხდურ მტერს ერეკებიან, ან ტირანიით დაჩაგრულ სხვა ხალხებს საკუთარი ძალებით ათავისუფლებენ მონობისა და ტირანთა უღლისაგან (ამას ისინი კაცთმოყვარეობით სჩადიან).

მეგობრებს უტოპიელები არა მარტო იცავენ, არამედ შურსაც კი იძიებენ ხოლმე მათთვის მიყენებული შეურაცხყოფისათვის. ასე მხოლოდ მაშინ იქცევიან, თუ ისინი თხოვნით მიმართავენ ომის დაწყების წინ, და თანაც მხოლოდ მაშინ ესხმიან თავს უთანხმოების წამომწყებთ, როცა ყველაფერს შეამოწმებენ, ახსნა-განმარტებას მოითხოვენ და ვერ მიიღებენ. ასევე იქცევიან არა მარტო მაშინ, როცა მტერი მათ დაარბევს და ნადავლს წაიღებს, არამედ მაშინაც, და უფრო სასტიკადაც, როცა მეგობარი ხალხების ვაჭრებს სამართლიანობის ნიღბით, სამართლიანი კანონების დამახინჯებით და არახელსაყრელი კანონების მოშველიებით უსამართლოდ დასწამებენ ცილს. სწორედ ეს იყო იმ ომის მიზეზიც, რომელშიც იყვნენ ჩაბმულნი უტოპიელები ჩვენს ჩასვლაზე, — ისინი იბრძოდნენ ალაოპოლიტების წინააღმდეგ ნეფელოგეტების<sup>133</sup> დასაცავად.

ალაოპოლიტებს მიაჩნდათ, რომ კანონიერად იქცეოდნენ, სინამდვილეში კი უსამართლოდ მოექცნენ ნეფელოგეტელ ვაჭრებს. სამართლიანად იყო თუ უსამართლოდ, ამას მოჰყვა სასტიკი ომი, რომლის დროსაც ორივე მხარის საკუთარ ძალებსა და სიძულვილს დაემატა მეზობელ ტომთა თავგამოდება და სახსრები (თანხები), ისე რომ ზოგი ხალხის ბედნიერი ცხოვრება შეირყა, ზოგი კი საშინლად გაჟამდა. ბოროტება ბადებდა ახალ ბოროტებას და ალაოპოლიტებისათვის ყველაფერი დამთავრდა იმით, რომ ისინი ნეფელოგეტების ძალაუფლებას დამორჩილდნენ (უტოპიელები ხომ თავიანთთვის არ იბრძოდნენ).

აღაოპოლიტებს კი ვერაფერს შეეხებოდა, როცა მათი საქმე წარმატებით მიდიოდა.

უტოპიელები მათი მეგობრებისათვის მიყენებული ფინანსური ზარალისათვის სასტიკად იძიებდნენ ხოლმე შურს, საკუთრისათვის კი — ნაკლებად. თუ მათ ვინმე მოატყუებს და ქონებას წაპგლეჯს (სხეულის დაზიანების გარეშე), სანამ არ აღნაზღაურებენ ზარალს, განრისხებული უტოპიელები მათთან აღარ ვაჭრობენ. ეს იმიტომ კი არ ხდება, რომ საკუთარ მოქალაქეებზე ნაკლებად ზრუნავენ, ვიდრე მოკავშირეებზე. სრულიადაც არა. მაგრამ როცა სხვებს ართმევენ ფულს, უტოპიელებს ამის ატანა უფრო უჭირთ, რადგან მეგობარი ხალხების ვაჭრები პირად თანხას კარგავენ და ეს დანაკარგი მათთვის უფრო მეტად მძიმეა. უტოპიელები კი კარგავენ საერთო სახელმწიფო ქონების მხოლოდ ნაწილს, თანაც ისეთი ქონებისას, როგორც სახლში ისედაც უხვად აქვთ, კარბადაც კი. სხვა შემთხვევაში ამის გატანა სახელმწიფოდან ძნელიც იქნებოდა, ასე რომ დანაკარგი თითქოს არავისთვის არ არის საგრძნობი, ამიტომ მათ მიაჩნიათ, რომ ზარალისათვის ადამიანების დახოცვით სამაგიეროს გადახდა მეტისმეტი სიასტიკეა. არც ერთ მათგანს მიყენებული ზარალის გამო არც ცხოვრების წესი დარღვევია, არც კვების მხრივ რაიმე შეფერხება მოსვლია. მაგრამ თუკი რომელიმე უტოპიელს უსამართლოდ დაასახიჩრებენ ან მოკლავენ, სულერთია, რომელიმე კერძო პირის თუ მთელი სახელმწიფოს მიზეზით, უტოპიელები ელჩების საშუალებით საქმეს გამოიძიებენ და მანამ არ მოისვენებენ, სანამ დამნაშავეებს მათ არ გადასცემენ. წინააღმდეგ შემთხვევაში ამ ქვეყანას ომს გამოუცხადებენ. გადმოცემულ დამნაშავეებს კი ისინი ან სიკვდილით დასჯიან, ან სამუდამო მონობას მიუხვნიან.

სისხლიანი გამარჯვებები უტოპიელების მართო სიბრაზეს კი არ იწვევს, არამედ სირცხვილსაც. მათ მიაჩნიათ, რომ მეტისმეტი საფასურით თვით უძვირფასესი საქონლის შეძენაც უგუნურებაა. თუ უტოპიელები მტერზე ეშმაკობთა და მოხერხებულობით<sup>134</sup> გაიმარჯვებენ, ამით ძალიან ამაყობენ და, თითქოს დიდი გმირობა ჩაედინოთ, სახელმწიფო ტრიუმფს აწყობენ და ქანდაკებებს დგამენ. ისინი ტრაბახობენ, რომ იმამაცეს და ომი ვაჟაკურად გადაიხადეს, რადგან ადამიანის გარდა არც ერთ სულიერს არ ძალუძს გონების ძალით გამარჯვება. დათვები, ლომები, ტახები, მგლები, ძაღლები და სხვა ცხოველები ფიზიკური ძალის მეოხებით იბრძვიან. ზემოჩამოთვლილთა უმრავლესობა

ადამიანს ძალ-ღონითა და მძვინვარებით სჯობნის, მაგრამ გონიერებითა და გამჭრიახობით ჩამორჩება.

ომის დროს უტოპიელები პირველ რიგში იმის მიღწევას ცდილობენ, რომ ომის გაჩაღება საჭირო აღარ გახდეს. თუ ეს ვერ მოხერხდება, მტერს ისინი სასტიკად სჯიან იმ იმედით, რომ მომავალში დაშინდებიან და სიამეც მეორედ აღარ ჩაიდენენო. ისინი განსაზღვრავენ ხოლმე თავიანთ მიზნებს და ცდილობენ სრულად მიაღწიონ დასახულს, ისე რომ პირველ რიგში საფრთხისაგან თავის დაღწევაზე იზრუნონ და არა სახელისა და დიდების მოხვეჭაზე.

უტოპიელები ომის გამოცხადებისთანავე ცდილობენ მტრის ტერიტორიის ყველაზე თვალსაჩინო ადგილებში ფარულად და ერთდროულად გააკრან უტოპიელთა სახელმწიფო ბეჭდიანი უამრავი ფურცელი, რომლებშიც ისინი უდიდეს გასამრჯელოს პირობებიან იმათ, ვინც მტრის მმართველს მოკლავს; შედარებით ნაკლებს, მაგრამ მაინც საკმაო თანხას აწესებენ ისინი იმ ცალკეული პირების მოკვლისათვის, ვინც სიაში ჰყავთ შეყვანილი. ეს პიროვნებები, მათი აზრით, ყველაფერში მხარს უჭერენ მმართველს და ამიტომ მასავით დამნაშავენი არიან ომის გაჩაღებაში. გასამრჯელოს უორკეცებენ იმას, ვინც სიაში შეყვანილ რომელიმე პირს ცოცხლად მოიყვანს. სიაში ჩაწერილებსაც მოუწოდებენ იმოქმედონ თავისივე ამხანაგების საზიანოდ, რის სანაცვლოდაც გასამრჯელოსა და ხელშეუხებლობას აღუთქვამენ.

ამიტომ სულ მალე მოწინააღმდეგეები ყველა მოკვდავს ეჭვის თვლით უყურებენ, ერთმანეთს აღარავინ ენდობა. ისინი შეპყრობილნი არიან საშინელი შიშით და საფრთხეში ვარდებიან, რადგან აღარავინ მიაჩნიათ ერთგულად. ხშირად ყოფილა შემთხვევა, მმართველიც და სიაში შეყვანილი ადამიანებიც სწორედ იმას გაუყიდა, ვისზედაც ადრე უდიდეს იმედებს ამყარებდნენ. ასე უბიძგებს გასამრჯელო ადამიანს ნებისმიერი ბოროტებისაკენ. გასამრჯელოს კი უტოპიელები უხვად გასცემენ. მათ კარგად უწყიან, რა საფრთხეშიც აგდებენ ადამიანს ამ დაპირებებით და ცდილობენ ნაკისრი საქმე აუნაზღაურონ საგრძნობი თანხით. ასევე პირდებიან ისინი პირად და მუდმივ მფლობელობაში საკმაოდ შემოსავლიან მამულებს ყველაზე უსაფრთხო ადგილებში, რომლებიც მათ მეგობრებს ეკუთვნის. დანაპირებს კი ზედმიწევნით საიმედოდ ასრულებენ.

სხვა ხალხები არ იწონებენ მტრების მოსყიდვის ამ ჩვეულებას და მას გადაგვარებულ სულის ბოროტ გამოვლინებად თვლიან. უტო-

პიელები კი ამას ღირსებად მიითვლიან, რადგან ფიქრობენ, რომ შეტაკების ნაცვლად ამგვარად დაბოლოებული თვით ყველაზე დიდი ომიც კი უფრო გონივრულია. ასევე ადამიანურად და მოწყალებ მიაჩნიათ იმათი საქციელი, ვინც რამდენიმე დამნაშავეს სიკვდილის საფასურად იხსნის ურიცხვი უდანაშაულო ადამიანის სიცოცხლეს (როგორც თავისიანის, ასევე მტრებისას), რომლებიც ბრძოლის ველზე უნდა დაღუპულიყვნენ. მტრის ურიცხვი მეომრები და უბრალო ხალხი უტოპიელებს საკუთარ მოქალაქეებზე ნაკლებად როდი ებრალებათ, მათ იციან, რომ ისინი თავის ნებით არ მიდიან საომრად, მათ მმართველთა უგუნურება ერეკება.

თუ ამგვარი ხერხით არაფერი გამოდის, მაშინ უტოპიელები გათიშვის პოლიტიკას მიმართავენ: ან მმართველის ძმას, ან რომელიმე დიდებულს ძალაუფლების იმედს უნერგავენ. თუ ქვეყნის შიგნითა დაჯგუფებები შესუსტდება, მაშინ მათ წინააღმდეგ მეზობელ ხალხებს ამხედრებენ მათ შორის დადებული შეთანხმების რომელიმე ძველი მუხლის გამოჩხრეკით, შეთანხმებები ხომ ხელმოწიფებებს არასოდეს არა აქვთ მოწესრიგებული.

ომისთვის განკუთვნილ ფულად სახსრებს უტოპიელები უხვად გაიღებენ ხოლმე, მაგრამ მოქალაქეებს ადვილად ვერ ელევიათ; იმდენად ძვირფასია მათთვის თითოეული მათგანი, იმდენად აფასებენ ერთმანეთს, რომ არავითარი გაცვლა არ სურთ ხოლმე მტრების მმართველზე. ოქრო-ვერცხლს კი სწორედ ასეთი საჭიროებისათვის ინახავენ და დაუნანებლად ხარჯავენ, მით უმეტეს, რომ მთლიანადაც რომ გასცენ, მათი ცხოვრება ოდნავადაც არ დაზარალდება. სახლებში დაცული სიმდიდრის გარდა მათ აურაცხელი განძი აქვთ საზღვრებს იქით, რადგან, როგორც ადრე აღვნიშნე, ბევრ ქვეყანას აქვს მათი ვალი.

ომში ისინი ყოველი მხრიდან, განსაკუთრებით ზაპოლეტელებისაგან<sup>135</sup> დაჭირებულ ჯარისკაცებს აგზავნიან. ეს ხალხი მათგან აღმოსავლეთით ცხოვრობს, 500 მილის დაშორებით; ეს საშიში, უხეში და ველური ადამიანები საცხოვრებლად ტყე-ღრეს ირჩევენ, ფიზიკურად ძლიერი, სიცხის, სიცივისა და შრომის ამტანნი არიან, მაგრამ მოკლებულნი ყოველგვარ სიხარულს. მიწას ისინი არ ამუშავებენ, ჩაცმაზე და სადგომზე არ ზრუნავენ, მხოლოდ საქონელს უვლიან. თავს უმთავრესად ნადირობითა და ძარცვით ირჩენენ. ისინი თითქოს მხოლოდ საომრად არიან გაჩენილები და ყოველთვის ცდილობენ იბრძოლონ. როგორც კი საომარ მიზეზს იპოვიან, ხარბად დაეძგვრებიან და თა-



ვის საკმაოდ მრავალრიცხოვან ლაშქარს ჩალის ფასად სთავაზობენ ყველას, ვინც კარგ მეომარს დაეძებს. მათ მხოლოდ ერთი ხელობა იციან — სიკვდილის თესვა.

ისინი ვაჟაკურად, მოუსყიდველი ერთგულებით ემსახურებიან დამპირაველებს, მაგრამ არასოდეს იზღუდავენ თავს რაიმე გარკვეული ვადით და დგებიან მათ სამსახურში იმ პირობით, რომ თუ სხვა მეტს შემოსთავაზებთ, მეორე დღესვე მის მხარეს გადავლენ და ასევე მესამე დღეს უკანვე დაბრუნდებიან, თუკი მეტ გასამრჯელოს მიიღებენ.

იშვიათია სადმე ომი დაიწყოს და რომელიმე მხარეს ზაპოლუტელთა საკმაოდ დიდი რაზმი არ იბრძოდეს. თითქმის ყოველდღე მეორდება შემთხვევები, როცა ბრძოლის ველზე ერთმანეთს მტრად ხვდებიან ნათესავეები, რომლებიც აქამდე სიამტკბილობით ცხოვრობდნენ, ადრე ერთსა და იმავე მხარეს იბრძოდნენ, მაგრამ შემდეგ მოწინააღმდეგეთა ბანაკში აღმოჩნდნენ. მაშინ ერთმანეთს ისინი მტრულად დაერევიან ხოლმე, არ ახსოვთ არც მეგობრობა, არც საერთო წარმოშობა; ამ სისხლისღვრას სხვა არავითარი მიზეზი არა აქვს, გარდა იმისა, რომ რაღაც გროშების საფასურად ისინი სხვადასხვა მმართველმა დაიქირავა. ზაპოლუტელები ისეთი არასანდოები არიან, რომ დღიურჯამაგირზე თუნდაც ერთი გროშის მომატებით აღვილად შეიძლება მათი გადაბირება მოწინააღმდეგის მხარეს. თუმცა კი ძვალ-რბილში გამჯდარ სინაზებს მათთვის დიდი სარგებელი მაინც არ მოაქვს, რადგან სისხლით მოპოვებულს მაშინვე ხარჯავენ ქარაფშუტული ფუფუნებისათვის.

ეს ხალხი უტოპიელთა გულისთვის ნებისმიერი მტრის წინააღმდეგ იბრძვის, რადგან ესენი დაქირავებისას მათ გაცილებით მეტს უხდიან, ვიდრე სხვები. უტოპიელები ცდილობენ როგორც კარგი, ისე ცუდი ადამიანების გამოყენებას, ესენი მათ ბოროტი საქმეებისათვის ესაჭიროებათ. როცა კი ეს საჭირო ხდება, უდიდესი დაპირებებით მოხიბლულთ ისინი დიდ საფრთხეში აგდებენ, საიდანაც უმრავლეს შემთხვევაში ბევრი ველარც ბრუნდება დანაპირების მისაღებად. გადარჩენილებს ზედმიწევნით პატიოსნად მიუთვლიან ხოლმე კუთვნილ თანხას, რომ მათში მსგავსი სიმამაცე კვლავ გააღვივონ. უტოპიელებს სულაც არ ენალეგებათ რამდენი ზაპოლუტელი დაიღუპება, რადგან მიაჩნიათ, რომ კაცობრიობა მათი მადლიერი იქნება, თუკი ასეთი უდიდესი და ბილწი ხალხი სულაც აღიგვება პირისაგან მიწისა. მათ შემდეგ

უტოპიელები ჯერ იმ ქვეყნის ლაშქარს იყენებენ, ვისთვისაც იარაღს მოჰკიდეს ხელი, შემდეგ — სხვა მეგობრების დამხმარე რაზმებს, სულ ბოლოს კი მათ შეუერთებენ საკუთარ მოქალაქეებს, რომელთაგან რომელიმე გამოცდილ მამაც ვაჟაკს ბთელი ლაშქრის სარდლად აცხადებენ. მას ორი შემცვლელი ჰყავს, მაგრამ სანამ იგი უვნებელია, ესენი კერძო პირებად ითვლებიან, ხოლო თუ მეთაურს რამე დაემართება — მოკლავენ ან დაატყვევებენ, მაშინ მას მემკვიდრეობით ერთ-ერთი ამათგანი შეცვლის, მას კი, საჭიროებისდა მიხედვით, — მესამე. ასე იმიტომ იქცევიან, რომ სარდლის საფრთხეში ჩავარდნამ ლაშქარი არ არიოს. ომის ბედი ხომ ყოველთვის სასწორზე ჰკიდია.

უტოპიელები ყოველ ქალაქში აგროვებენ მონალისეებს, რომლებსაც ომში სურთ წასვლა. ძალით არავის ერეკებიან საზღვარს მიღმა სამსახურად, რადგან ისინი დარწმუნებულნი არიან, რომ მხდალი ადამიანი ვერც თვითონ გამოიჩენს ვაჟაკობას და ამხანაგებსაც შიშს გადასდებს, მაგრამ თუ სამშობლოს დაატყდება თავს ომი, მაშინ ასეთ გაუბედავ, მაგრამ ჭანმგაარ ადამიანებს ხომალდებზე საუკეთესო მოქალაქეებს შეურევენ. ან არადა აქა-იქ კედლებთან მიუჩენენ ადგილს, რომ გაქცევა ვერ შეძლონ. ამრიგად, თავისიანების წინაშე სირცხვილი, მტრის სიახლოვე და გაქცევის ყოველგვარი იმედის წარკვეთა მათში შიშა ორგუნავს და ხშირად ეს გამოუვალი მდგომარეობა ვაჟაკობასაც კი აღვიძებს ხოლმე მათში. მაგრამ ძალით არავის ერეკებიან საზღვარს იქით საომრად. ქალებს, რომლებსაც სურთ თან ახლდნენ ქმრებს სამხედრო სამსახურში, არა თუ უშლიან ამას, არამედ ხოტბას ასხამენ და ამისკენ მოუწოდებენ. ქალებს მწკრივში ქმრის გვერდით აყენებენ, შემდეგ მათი ბავშვები, ახლობლები და ნათესავები ახვევიან გარს, რომ უახლოესი თანამემწენი ისინი იყვნენ, ვისაც თვით ბუნებამ დაუწესა ერთმანეთის მხარეში ამოდგომა. უდიდეს სირცხვილად მიაჩნიათ უტოპიელებს, თუ ცოლი უქმროდ დაბრუნდება ბრძოლის ველიდან, ან ვაჟი — უმამოდ. იმიტომ ხდება ისე, რომ თუ საქმე ხელჩართულ ბრძოლამდე მიდის და მტერი მედგარ წინააღმდეგობას უწევს, ხანგრძლივი და მძიმე ბრძოლა ერთმანეთის სრულ განადგურებამდე გრძელდება.

უტოპიელები ყოველ ღონეს ხმარობენ, რომ თვითონ არ მოუხდეთ ბრძოლა და ცდილობენ ომი დაქირავებული ჯარისკაცების მეშვეობით გადაიხადონ. მაგრამ თუ ეს შეუძლებელი ხდება, მაშინ ისინი ისევე მამაცურად იბრძვიან, რამდენადაც გონივრულად გაურბოდნენ ამას, სანამ შესაძლებელი იყო. ისინი პირველი შემოტევისთანავე კი

არ აენტებიან საბრძოლველად, არამედ თანდათანობით, ხელა და შეუპოვრად; და როცა გულს გაიმხნეებენ, მაშინ უფრო ადვილია მათი მოსპობა, ვიდრე უკუქცევა. უტოპიელებმა იციან, რომ სახლში ყველას აქვს საკვები, შთამომავლობაზე ფიქრი და დარდი არ აწუხებთ (ასეთი საზრუნავი ზომ ყველგან ახშობს კეთილშობილ მისწრაფებებს) და ამიტომ მათ ნძნეობა ემატებათ და დამარცხებას ზიზლით ეკიდებიან. სამხედრო ხელოვნების ცოდნა მატებს მათ რწმენას, ხოლო სწორი განსჯის უნარი, რაც მათ ბავშვობიდანვე აქვთ შეთვისებული სწავლითა და კეთილგონიერული სახელმწიფო წყობილებით, უნერგავს მამაცობას. ამიტომ მათ სიცოცხლე ფუქად არ უღირთ, რომ ტყუილუბრალოდ ხარჯონ, მაგრამ არც ისე ძვირფასად მიაჩნიათ, რომ სამარცხვინოდ ჩაებლაუჭონ მას იმ შემთხვევაში, როცა სიკვდილი უფრო ღირსეულია.

ფიცხელი ბრძოლის დროს რამდენიმე რჩეული ახალგაზრდა, რომელთაც აღთქმა და ფიცი აქვთ დადებული, ორთაბრძოლაში იწვევს მტრის სარდალს. ესენი მას ყველას თვალწინ შეერკინებიან; ხან ჩაუსაფრდებიან, ხან შორიდან ებრძვიან, ხან პირისპირ შეეყრებიან, ხან კი თავს ესხმიან გრძელი და უწყვეტი სოლისებრი მწყობრით, რომელშიც ერთმანეთს ენაცვლებიან დაქანცული და ძალმოკრებილი მეომრები. ძალიან იშვიათია, რომ სარდალმა გაქცევა შეძლოს და ან ტყვედ არ ჩაბარდეს, ან არ დაიღუპოს.

თუ უტოპიელები გაიმარჯვებენ, ისინი ხოცვა-ჟლეტას მაშინვე წყვეტენ და გაქცეულების დახოცვას მათ დატყვევებას ამჯობინებენ. ისინი არასოდეს დაედევნებიან გაქცეულთ, თუ საბრძოლო მზადყოფნაში არა ჰყავთ ერთი რაზმი მაინც. თუკი მთელი ლაშქარი გაწყდა და ომი უკანასკნელმა რაზმმა მოიგო, მაშინ ურჩევნიათ მტერი გაექცეთ, ვიდრე მათ დაედევნონ და რაზმი აიხრ-დაიხროს. მათ მშვენივრად უწყიან. თუ რა ცვალებადია ომის ბედი. თვითონაც ხშირად მოსვლიათ, რომ მათი ლაშქრის დიდი ნაწილი დამარცხებულა და გაჟლეტილა, მტერს კი თავი გამარჯვებულად მიუჩნევია და ყოველი მხრიდან გამოსდგომია გაქცეულებს. თადარიგში მყოფი უტოპიელთა მცირე რაზმი კი მარჯვე შემთხვევას დალოდებია და მოულოდნელად თავს დასხმია მტრის გაფანტულ რაზმებს, რომლებიც უზრუნველად იქცეოდნენ და დროზე აღრე დაიგულეს თავი სამშვიდობოს. უეჭველი და ნაღდი გამარჯვება მტერს ხელიდან გამოეცლებოდა ხოლმე, თითქმის დამარცხებულნი კი იმარჯვებდნენ.

ძნელია აიხსნას, როდის უფრო მოხერხებულნი და წინდახედულნი არიან უტოპიელები: ჩასაფრების მოწყობისას, თუ მისი გვერდის ავლისას. როცა მოწინააღმდეგე ფიქრობს, რომ ისინი გასაქცევად არიან მზად, მათ ეს აზრადაც არ მოსდით, ხოლო როცა ისინი გაქცევას გადაწყვეტენ, ისე ჩანს, თითქოს ამაზე არც კი უფიქრიათო. თუ იგრძნობენ, რომ მტერი ან რიცხობრივად, ან უფრო მოხერხებული განლაგებით სჯობნის მათ, უტოპიელები ღამით ბანაკს წყნარად აშლიან და რომელიმე საომარი ხერხის მომარჯვებით გაილაღებიან ხოლმე; ანდა დღისით შეუმჩნევლად იხევენ უკან ისე, რომ უკანდახევისას მათზე თავდასხმა კიდევ უფრო საშიშია, ვიდრე შეტევისას.

უტოპიელები ღრმა და ფართო თხრილით გულმოდგინედ ამაგრებენ ბანაკს. ამოთხრილ მიწას ისინი შიდა მხარეს ყრიან. ამ საქმისათვის დაქირავებულ მუშებს კი არ იყენებენ, არამედ თვით ჯარისკაცებს; ამ საქმეზე მუშაობს მთელი ლაშქარი, გუშაგების გარდა. ამდენი მუშახელის წყალობით დიდ სიმაგრეებს უტოპიელები საოცრად სწრაფად აგებენ.

შეტევის მოსაგერიებლად უტოპიელები ძლიერ იარაღს იყენებენ, რომლის ტარება მოსახერხებელია და მოძრაობისას ხელს არ უშლის. ცურვის დროსაც კი არავითარ სიმძიმეს არ გრძნობენ. აღჭურვილობით ცურვას ისინი სამხედრო სწავლების დასაწყისშივე ეჩვევიან. შორ მანძილზე საბრძოლველად იყენებენ ისრებს, რომლებსაც ძლიერად და ზუსტად ისვრიან ქვეთონიც და მხედრებიც. ხელჩართულ ბრძოლაში ხმლით კი არ იბრძვიან, მოწინააღმდეგეს ცულისპირით ან ყუით უპობენ თავს ან ჩეხავენ. უტოპიელები საოცარი მოხერხებულობით აგებენ სხვადასხვა საომარ მანქანას, რომელთაც გამოყენებამდე მალავენ, რომ სარგებლობის მოტანამდე დაცინვა არ დაიმსახურონ. ისე კი ცდილობენ, რომ ეს მანქანები ადვილად გადასაზიდი და მოხერხებულად სამართავი იყოს.

თუ მტერთან ზავს დადებენ, უტოპიელები წმინდად იცავენ მას და არაფრით არ დაარღვევენ, კიდევაც რომ ვინმე ეცადოს ამას. მოწინააღმდეგის მიწა-წყალს არ არბევენ, ნათესებს არ წვავენ, უფრო მეტიც, რამდენადაც შესაძლებელია, ცდილობენ, რომ ყველაფერი არ გადათელონ ცხენებმა და ადამიანებმა. უიარაღოებს ისინი არ ერჩიან, თუ ჯაშუშები არ არიან. თავისი სურვილით დანებებულ ქალაქებს იცავენ, ხოლო დაპყრობილებს არ ანგრევენ. ვინც ტყვედ დანებებას წინ აღუდგება, მას კლავენ, ქალაქის დანარჩენ დამცველებს კი მონებად

აქცევენ. მშვიდობიან მოსახლეობას არ ერჩიან. თუ გაიგებენ, რომ რომელიმე მათგანი სხვებს დანებებას ურჩევდა, ასეთებს დასჯილთა ქონებიდან წილს აძლევენ, დანარჩენ ნადავლს მოკავშირეებს უნაწილებენ. არც ერთ უტოპიელს ნადავლი შინ არ მიაქვს.

ომის დამთავრებისას თავის ზარალს იმ მეგობრებს კი არ ანაზღაურებინებენ, ვისთვისაც იბრძოდნენ, არამედ დამარცხებულებს. ამ საბაბით ისინი მოითხოვენ ფულს, რომელსაც შემდეგ ამგვარი ომებისათვის ინახავენ, აგრეთვე ძვირფას მამულებს, რომლებიც მათ სამუდამო მფლობელობაში გადადის. ამგვარი შემოსავალი ახლა ბევრი ხალხისაგან აქვთ, რაც წელიწადში 700 000 დუკატს აღემატება. იმ ქვეყნებში უტოპიელები ხაზინადრის ტიტულით აგზავნიან რომელიმე თავის მოქალაქეს იმისათვის, რომ იქ მდიდრულად იცხოვროს და ელჩებად ითვლებოდნენ. მაგრამ ფული მაინც ბევრი რჩებათ და ის ხაზინაში შეაქვთ. ზოგჯერ უტოპიელები ამჯობინებენ ფული იმავე ხალხს ანდონ. ასე იქცევიან იმ დრომდე, სანამ იგი არ დასჭირდებოთ. მაგრამ თითქმის არასოდეს არ თხოულობენ მთლიანად ყველაფერს. მამულების ნაწილი კი განეკუთვნება იმას, ვინც მათივე წაქეზებით თავს იღებს იმ სახიფათო საქმეს, რომლის შესახებაც ზემოთ გიამბეთ.

თუ რომელიმე მმართველი მათ იარაღით დამორჩილებას დაუპირებს, უტოპიელები მაშინვე მათ შესახვერდად გაემართებიან დიდძალი ლაშქრით, რადგან ალაღბედზე ისინი არ იბრძვიან თავიანთ მიწაზე და არასოდეს არაა იმის აუცილებლობა, რომ საკუთარ კუნძულზე მოკავშირეთა უცხო ჯარები შემოუშვან.

## უტოპიელთა რელიგიისათვის

უტოპიელთა კუნძულის თითოეულ ქალაქს თავისი განსხვავებული რელიგია აქვს. ზოგი მზეს სცემს თაყვანს, ზოგი — მთვარეს, ზოგი — რომელიმე ცდომილს. სხვებს მიაჩნიათ, რომ მარტო ღმერთები კი არა, უზენაესი უფალიც კი ადამიანი იყო, რომელმაც ოდესღაც თავისი ღირსებების წყალობით მოიხვეჭა სახელი და შემდეგ განადიდეს. მაგრამ უტოპიელთა მომეტებული და უფრო გონიერი ნაწილი თვლის, რომ არა ის ღმერთები, არამედ რაღაც ერთიანი, მზარდიული, იდუმალი, შეუცნობელი ღვთაებაა ქვეყნად განფენილი, თანაც არა თავისი სიდიდით, არამედ თვისი ძალით. მას დაშბადებულს უწოდებენ,

მიაწერენ ყოველი არსის დასაბამს, ზრდას, მატებას, ცვლილებას, და სასრულს და მხოლოდ მას ეთაყვანებიან.

სხვა რწმენის მქონე უტოპიელებიც ეთანხმებიან მათ იმაში, რომ სამყარო, განგება და ადამიანები უზენაესმა არსებამ შექმნა. მშობლიურ ენაზე უტოპიელები მას მითრას უწოდებენ, მაგრამ ვერ შეთანხმებულან — იგი ყველა ხალხისათვის ერთია თუ სხვადასხვა. ცალ-ცალკე ყველა აღიარებს, რომ ვინც არ უნდა იყოს ეს უზენაესი ღვთაება, იგი ერთიანი ბუნებისაა და მხოლოდ მის ნება-სურვილსა და სიდიადეს მიაწერენ უფლებას ყოველთა არსთა ზედა. უტოპიელთა რელიგიურ შეხედულებებს შორის განსხვავება თანდათან ქრება და ყალიბდება ერთიანი რჯული, რომელიც გონიერებით ვგონებ სხვებს აღემატება. ყველა სხვა რელიგია აქამდე უეჭველად მოისპობოდა, მაგრამ საკმარისია ვინმემ რჯულის გამოცვლა დააპიროს და ბედმა ამ დროს რაიმე საქმეში ხელი მოუცაროს, შიში მაშინვე აფიქრებინებს, რომ ეს შემთხვევითი არაა, რისხვა ზეციით არის მოვლენილი და უარყოფილი. ღმერთი სჯის მას უკეთური განზრახვისათვის.

ხოლო როდესაც ჩვენ ვუამბეთ უტოპიელებს ქრისტეს მოძღვრების, მისი ცხოვრებისა და მის მიერ მოხდენილი სასწაულების შესახებ, როდესაც შეიტყვეს, თუ წმინდა მოწამეთა სულიერმა სიმტკიცემ და დანთხეულმა სისხლმა ხანგრძლივი დროის განმავლობაში უზარმაზარ ტერიტორიაზე ადამიანთა რა ურიცხვი რაოდენობა მოაქცია ქვეშაირტების გზაზე, არ დაიჯერებ, რა მალე იწამეს მათ ქრისტეს რჯული. არ ვიცი, ეს რაიმე ილუმალის ღვთაებრივი ძალის მეოხებით მოხდა, თუ ეს რელიგია მათთან ყველაზე ძლიერ ერესს უახლოვდება. აქ მხედველობაში მისაღებია ისიც, რომ მათ ყური მოჰკრეს, ქრისტეს მოსწონდათ თავის მოწაფეებთან ერთად ცხოვრება და ეს წესი ახლაც შემონახულია ყველაზე თანმიმდევრულ ქრისტიანულ თემებში. და, აი, — სულ ერთია რა მიზეზით მოხდა ეს, — უტოპიელთა საკმაოდ დიდმა რაოდენობამ მიიღო ჩვენი რწმენა და მოინათლა.

ჩვენ ოთხნილა დავრჩით (ორი კაცი სიკვდილმა გამოგვაცალა) და არც ერთი არ ვიყავით სამღვდელო პირი. ამიტომ უტოპიელები თუმცა კი ქრისტიანობის ყველა საიდუმლოს გაეცნენ, მაინც ზოგ რამეს ვერ ეზიარენ, რადგან მათი შესრულების უფლება ჩვენში მხოლოდ მღვდლებსა აქვთ. წარმოიდგინეთ, უტოპიელებმა ეს საიდუმლოებებიც კარგად შეიცნეს, მთელი სულითა და გულით მიიღეს. ისინი იმაზეც კი ბჭობდნენ, ხომ არ შეიძლებოდა მათთან ქრისტიანი ეპისკოპო-

სის დანიშვნის გარეშე ვინმე მღვდლად ეკურთხებიანთ, და, ვგონებ, აპირებდნენ კიდევ ასეთის არჩევას, მაგრამ ჩემი წამოსვლისას საქმე ჯერ კიდევ არ ჰქონდათ მოთავებული.

ვინც ქრისტეს მცნებას არ იზიარებს, ისინი არ სდევნიან ამის ამაღიარებელთ და არც ცდილობენ სხვანი განარიდონ მას. თუმცა კი ერთი ჩვენგანი იქ ყოფნის დროს საკმაოდ დასაჯეს. იგი განწმენდის წესის შესრულების უმაღლეს სახალხოდ მსჯელობდა ქრისტიანობის თაობაზე, რასაც ჩვენ არ ვურჩევდით. მის მსჯელობაში გულფიცხომა მეტი იყო, ვიდრე გონივრულობა. იგი, გაცხარებული, არა მარტო ჩვენს სალოცავებს აყენებდა სხვისაზე მაღლა, არამედ სხვებს საერთოდ უარყოფდა, უწოდებდა წარმართულს, რომელსაც მხოლოდ უკეთურნი და მკრეხელნი ეთაყვანებიან, და ამბობდა, ისინი ჯოჯოხეთის ცეცხლზე უნდა დაინთქანო. დიდხანს ჭადაგებდა იგი ასე, ვიდრე არ სტაცეს ხელი და გაასამართლეს. იგი დასაჯეს არა მისი რწმენისათვის, არამედ ხალხის აფორიაქებისათვის. უტოპიელთა უძველესი ადათის თანახმად მას განდევნა მიუსაჯეს, საკუთრივ რწმენის გამო ხომ, მათი აზრით, არავის დასჯა არ შეიძლება.

როდესაც უტოპუსმა შეიტყო, რომ მის გამოჩენამდე კუნძულის მცხოვრებნი რელიგიის თაობაზე ერთმანეთს გამუდმებით ებრძოდნენ და სხვადასხვა სექტა სამშობლოს ცალ-ცალკე იცავდა, ისარგებლა ამით და ყველა დასძლია. მან უმაღვე დააკანონა რელიგიის თავისუფლება. თუ ვინმე შეეცდებოდა თავის რჯულზე სხვის მოქცევას, მას ეს დინჯად და გონივრულად, საკმაოდ დასაბუთებით უნდა გაეკეთებინა; თუ რჩევით ვერაფერს გახდებოდა, ძალის გამოყენება სასტიკად ეკრძალებოდა და არც შეუარაცხოფის უფლება ჰქონდა. ვინც ამგვარ თემებზე გაცხარებული კამათობს, უტოპიელები მას განდევნიან ან მონად აქცევენ.

ამას რომ აწესებდა, უტოპუსი მარტო მშვიდობიანობაზე კი არ ფიქრობდა და მხოლოდ გამუდმებულ ომსა და შეურიგებელ მტრობას კი არ იცილებდა თავიდან, არამედ მიაჩნდა, რომ ეს თვით რელიგიას სჭირდებოდა, რომლის გარკვეულად ჩამოყალიბება მან ვერ გაბედა. იგი თითქოსდა ფიქრობდა, ხომ არ მოითხოვსო ღმერთი სხვადასხვა სახის მრავალნაირ თაყვანისცემას და ამიტომ ხომ არ უნერგავსო აღამიანებს განსხვავებულ რწმენას. უტოპუსს საოცარ სისულელედ მიაჩნდა ძალითა და მუქარით სხვების დარწმუნება საკუთარი რწმენის ჭეშმარიტებაში. კიდევ მეტი, მან ადვილად განჰკრიტა, რომ ბოლოსდა-

ბოლოს, ადრე თუ გვიან, ეს ჭეშმარიტება თვითონ გამოაშკარავდება (თუკი საქმეს დინჯად და გონივრულად წარმართავ). ხოლო თუ ჭეშმარიტებისათვის იარაღითა და ამბოხით იბრძოლებ, მაშინ თვით საუკეთესო და უწმინდესი რელიგიაც მოისპობა ფუჭი ცრურწმენების გამო, როგორც თავთავი ილუპება კვრინჩხებსა და ბუჩქებს შორის (უვარგისი ადამიანები ხომ ყველაზე ჭიუტნი არიან).

ამიტომ უტოპუსმა ეს საკითხი გადაუწყვეტლად დატოვა: ყოველ უტოპიელს დართო ნება, ჰქონოდა რწმენა საკუთარი სურვილის მიხედვით, მაგრამ მკაცრად დაუდგინა, არავის ისე არ დაეპარგა ადამიანური ღირსება, რომ დაეჭვებინა, თითქოს სული სხეულთან ერთად კვდება და სამყაროს განგება კი არ მართავს, არამედ თავისთვის საითკენაც მიექანებაო. ამიტომაც სჯერათ უტოპიელებს, რომ მიწიერი ცხოვრების შემდეგ ცოდვებისათვის სასჯელია დაწესებული, ხოლო სათნოებისათვის — ჭილდო. თუ ვინმე სხვაგვარად ფიქრობს, მას ადამიანად არ თვლიან, რადგან მან ამაღლებული სული თავის უღირს ცხოველურ სხეულამდე დაამდაბლა. ასეთი პიროვნება მათ არც მოქალაქედ მიაჩნიათ, რადგან მას შიში რომ არ თრგუნავდეს, ხომ არაფრად ჩააგდებდა კუნძულის კანონებსა და ადამიანებს. განა საეჭვოა, რომ თუ არა კანონების შიში, იგი მხოლოდ საკუთარი სხეულის იმედზე იქნებოდა და განა არ შეეცდებოდა მალულად, თვალთმაქცობით დაერღვია ეს კანონები ანდა ძალა ეხმარა მათ წინააღმდეგ?

ამიტომ ამგვარ ადამიანებს უტოპიელები პატივს არ სცემენ, თანამდებობაზე არ ნიშნავენ და არავითარ მოვალეობას არ აკისრებენ, ასეთები ყველას ფუჭ და მდაბალ პიროვნებებად მიაჩნია. დასჯით კი არ სჯიან, რადგან დარწმუნებულნი არიან, რომ არავის ძალუძს სხვას რაიმე შეაგნებინოს. უტოპიელები არც მუქარით აიძულებენ ვინმეს აზრების დაფარვას და არც არსად აჭაჭანებენ თვალთმაქცობასა და სიცრუეს, რაც შორს არაა ღალატისაგან, რაც მათ საშინლად სძავთ.

ამგვარად მოაზროვნე ადამიანებს უკრძალავენ თავისი აზრების სახალხოდ დაცვასა და მსჯელობას, მაგრამ დარბაისელ ხალხთან და საეკლესიო პირებთან საუბარს, პირიქით, ურჩევენ, რადგან სწამთ, რომ გონიერება ბოლოსდაბოლოს სძლევს უმეცრებას.

უტოპიაში სხვა რიგის ხალხიც არსებობს და არცთუ მცირერიცხოვანი; მათ არ სდევნიან და ბრიყვებად და უმეცრებად არ მიიჩნევენ. მათ სულ სხვაგვარი მანკიერი აზრი აქვთ, როცა ამბობენ პირუტყვის სულიც უკვდავიაო, თუმცაღა მათი სულიერი ღირსებების ადამიანთან



გაიგივება არ შეიძლება და არც ცხოველები არიან შექმნილი ადამიანისდარი ბედნიერებისათვის. თითქმის ყველა უტოპიელს მტკიცედ სჯერა, რომ ადამიანთა სულებს უზომო სიამე ელით, ამიტომ ავადმყოფებს ისინი, მართალია, დასტირიან, მაგრამ არავის სიკვდილს არ დარდობენ, გარდა იმ შემთხვევისა, როცა ვინმე ამ ცხოვრებას ჰმუნვითა და საკუთარი სურვილის გარეშე ტოვებს. ეს მათ ცუდის მომასწავებლად მიაჩნიათ, რადგან ფიქრობენ, რომ საშინელია აღსასრული სასოწარკვეთილი სულისათვის, რომელმაც უწყის რაღაც ბოროტება და იღუმალად გრძნობს მოახლოებულ სასჯელს. უტოპიელთა აზრით, არც ღვთისათვის იქნება საამო მიიღოს ისეთი ადამიანის სული, რომელიც მოხმობისთანავე სიხარულით კი არ გაეშურება, არამედ ჭიუტობს და ფეხები უკან რჩება. ასეთი ადამიანის სიკვდილი შემაძრწუნებელია, მიცვალებულს სევდიანი ღუმლით აბარებენ მიწას და მოწყალე ღმერთს შეავედრებენ მის სულს, რათა მიუტევოს ეს სისუსტე. ხოლო ვინც სიხარულით, კეთილი იმედით აღსავსე აღესრულება, მას არ დაიტირებენ, სიმღერით კრძალავენ და მის სულს ღმერთს ჩააბარებენ, ხოლო ცხედარს დიდი პატივით დაწვავენ, ამ ადგილზე სვეტს აღმართავენ და ზედ წარწერას ამოკვეთენ. შინ მობრუნებულნი იხსენებენ მიცვალებულის ღვაწლს, მის ღირსებებს და მომეტებული სიამოვნებით სწორედ მის სასიხარულო აღსასრულზე საუბრობენ.

უტოპიელები ფიქრობენ, რომ გარდაცვლილთა სულიერი სიმტკიცის ხსოვნა ცოცხალთათვის არის წამახალისებელი სათნოების გზაზე და რომ ეს ადათი თვით გარდაცვლილთათვისაა სასიამოვნო, უხილავად ისინიც ხომ მონაწილეობენ ამ საუბრებში (სუსტი მხედველობის გამო მოკვდავნი მათ ვერ ხედავენ). სულებისათვის მათი სურვილისამებრ გადასახლების შესაძლებლობის აღკვეთა არ შეესაბამება ბედნიერთა ხედვას. მიცვალებულნი უმადური იქნებოდნენ, თუ არ მოისურვებდნენ მეგობართა ნახვას, რომლებთანაც მთელი ცხოვრება სიყვარულსა და სიკეთეში გაუტარებიათ. კარგ ადამიანებს ხომ მშვენიერი თვისებები არ აკლდებათ, არამედ ემატებათ. სწამთ, რომ გარდაცვლილნი კვლავ ცოცხლებში ტრიალებენ, მათ სიტყვებსა და საქციელს აკვირდებიან. ასეთ დამცველებზე დაყრდნობით უტოპიელები ყოველგვარ საქმეს ენერგიულად ჰკიდებენ ხელს და თავიანთ შორის წინაპართა სულის ყოფნის რწმენა უსინდისო საქციელის ფარულად ჩადენისაგანაც კი აკავებთ.

უტოპიელები ვერ იტანენ და დასცინიან კიდეც ფუჰკი ცრუმორ-წმუნეობისაგან გამომდინარე მკითხაობას და ყოველგვარ წინასწარ-მეტყველებას, რაც სხვა ხალხებთან დიდ პატივშია. ბუნების ძალთა მონაწილეობის გარეშე მომხდარ სასწაულებს ისინი ღვთაებრივ ძალას მიაწერენ და მისი არსებობის დადასტურებად მიაჩნიათ. უტოპიელები ამბობენ, ასეთი რამ ხშირად ხდებაო და რთული და დიდი საქმეების ჟამს ყველა ერთად, ღრმა რწმენით აღაველენს ხოლმე ლოცვას და მიზანსაც აღწევს.

ბუნების ჰვრეტა და მისი ქება ღვთის საამებელი საქმეა. რელიგიით ალტყინებულ უტოპიელთა ერთ, არცთუ მცირე ნაწილს მეცნიერებანი არაფრად მიაჩნია და ცოდნის შეძენისაკენ არ ისწრაფვის. ისინი არასდროს არიან უქმად. მათ ირჩიეს მოიპოვონ ბედნიერება, რომელიც სიკვდილის შემდგომად მიიღწევა ღვაწლითა და სხვათათვის კეთილის ქმნით. ერთნი ავადმყოფებს უვლიან, მეორენი გზებცისა და ხიდების შეკეთებაზე მუშაობენ, თხრილებს წმენდენ, ბელტებს ჰკრიან, ქვებს და ქვიშას თხრიან, ხეებს ჰკრიან და აშუშავენ, ქალაქებში საზიდრებით მიაქვთ შეშა, მარცვლეული და სხვ.; ემსახურებიან არა მარტო სახელმწიფოს, არამედ კერძო პირებსაც, ასე რომ მონებზე მეტსაც შრომობენ. ისინი მხიარულად და დიდი ხალისით იტვირთავენ ხოლმე ყველაზე მძიმე და ჰუჰყიან საქმეს, რომელსაც ბევრი ზიზლით გაუბრის, სხვების გართობა-სიამოვნებაზე ფიქრობენ, თვითონ კი დღენიადაგ შრომობენ და ამას არავის აყვედრიან, სხვებს არ დასცინიან და თავს არ იწონებენ. რაც უფრო ემსგავსებიან მონებს, სხვათა თვალში მით უფრო მეტ პატივისცემას იმსახურებენ.

კუნძულზე ცხოვრების ორი განსხვავებული წესი არსებობს: მოქალაქეთა ერთი ნაწილი უცოლოა. ისინი მარტო ვენუსის საქმეს კი არ ერიდებიან, არამედ ხორცსაც არ ჰკამენ. ზოგი მათგანი საერთოდ არ ეკარება ცხოველურ საკვებს. ისინი გაუბრის მიწიერი ცხოვრების ყოველგვარ სიამეს, როგორც რაიმე მავნეს, და ლოცვითა და მარხულობით ცდილობენ მალე ეწიონ იმქვეყნიურ ცხოვრებას. ეს იმედი მატებს მათ სიმხნევესა და ხალისს.

მეორენიც არანაკლებ შრომობენ, მაგრამ ურჩევნიათ ქორწინების სიამეზე უარი არ ფქვან, თანაც მიაჩნიათ, რომ ბუნებისა და ქვეყნის წინაშე ვალდებულნი არიან შთამომავლობა იყოლიონ, არც არავითარ სიამოვნებას არ იკლებენ, თუკი ამით სამუშაოს არ მოსცდებიან. საქონლის ხორცს მშვენივრად მიირთმევენ, ფიქრობენ, რომ ამით

მათ ძალა შეემატებათ და ყოველგვარი სამუშაოს შესრულებას შეძლებენ.

უტოპიელების აზრით, ეს მეორე ნაწილი უფრო გონიერია, პირველი — უფრო ღვთისმოსავი. ვინც უტოლობას ირჩევს და არა ქორწინებას, მკაცრ ცხოვრებას და არა განცხრომას, ამას რომ ჰკუთის კარნახით სჩადიოდეს, მას სასაცილოდ აიგდებდნენ. მაგრამ რადგან ეს რწმენის საფუძველზე ხდება, ამიტომ სხვების თვალში დიდ პატივისცემას იმსახურებს. უტოპიელები ხომ განსაკუთრებით ცდილობენ უკეთური არაფერი წამოსცდეთ არც ერთი რჯულის შესახებ. ამ ტიპის ადამიანებს თავიანთ ენაზე ისინი „ბუთრესკებს“<sup>136</sup> უწოდებენ, რაც „წმინდანება“ ნიშნავს.

რწმენის მსახური მეტისმეტი ღვთისშოსაობით გამოირჩევიან, ამიტომაც თითოეულ ქალაქში ისინი ძალზე ცოტანი არიან. ტაძართა რაოდენობა ყველგან თანაბარია და მღვდლებიც ცამეტნი არიან, თუ ომიანობა არ არის და ვინმე ომში არ წავა. ომიანობის დროს შეიდი მაინც მიდის და ამდენივე შეენაცვლება. ომის შემდეგ თითოეული თავის ადგილს უბრუნდება. მათი არყოფნის დროს ტაძარში დარჩენილნი თან ახლავან ხოლმე მღვდელმთავარს და ომში დაღუპულთა ადგილებს რიგრიგობით იკავენებენ. მათ მღვდელმთავარი მეთაურობს. მღვდლებს ხალხი ირჩევს ფარული კენჭისყრით, — ისევე როგორც მოხელეებს, — რათა ვინმე ვინმეს არ მიემხროს. არჩეულს სამღვდლო ძმობა აკურთხებს.

მღვდლები ღვთისმსახურებას ასრულებენ, ისინი რწმენის დაცვა-სა და მრევლის ზნეობაზე ზრუნავენ. უტოპიელს დიდ სირცხვილად ეთვლება, თუ მას მღვდელი დაიბარებს და უპატიოსნო ცხოვრებისათვის გააციცხავს.

მღვდელს ადამიანის რჩევა-დარიგება და დარწმუნება ევალება, მმართველსა და მოხელეებს კი — ბოროტმოქმედთა ალაგმვა და დასჯა. თუ მღვდლები ვინმეს უღირსად სცნობენ, მას ღვთისმსახურებაზე დასწრება აეკრძალება. უტოპიელებისათვის ამ სასჯელზე საშინელი რამ არ არსებობს, რადგან ამ დროს თავს უმძიმესი შერცხვენა ატყდებოდათ, გულს ფარული რელიგიური შიში უღრღნიოდა და მათი სიცოცხლეც საფრთხეშია: თუ შეცოდებას მღვდელთან სასწრაფოდ არ მოინანიებენ, მათ ატუსაღებენ და სენატი სასჯელს მიუზღავს.

მღვდლები ბავშვებსა და მოზარდებს ასწავლიან. საგნების სწავლაზე არანაკლები ყურადღება ზნეობასა და სათნოებებს ექცევა. ისი-

ნი ცდილობენ სახელმწიფოს საკეთილდღეოდ სასარგებლო და კეთილი აზრები ბავშვის ნაზ და ადვილად დამყოლ სულს თავიდანვე შეუხისხლხორკონ. ბავშვობაშივე ჩანერგილი ასეთი აზრები ადამიანს მთელი ცხოვრების მანძილზე გაჰყვება და უღიდეს სარგებლობას მოუტანს სახელმწიფოს, რომელსაც სწორედ მცდარად წარმართული მსჯელობით გამოწვეული ცოდვები ღუპავს.

ქალთა სქესს დიდ პატივს სცემენ. მღვდლად ქალსაც ირჩევენ, ოღონდ შედარებით იშვიათად, თანაც მხოლოდ ქვრივს ან დარბაისელ, ხანშიშესულ მანდილოსანს. მღვდლებსაც საუკეთესო ქალები ჰყავთ ცოლად.

არც ერთ თანამდებობის პირს არ მიაგებენ უტოპიელები ისეთ პატივს, როგორსაც მღვდლებს. რომელიმე მათგანმა დანაშაული რომ ჩაიდინოს, საზოგადო სამართალს არ ექვემდებარება. მის განსჯას მხოლოდ ღმერთსა და მისსავე სინდისს მიანდობენ ხოლმე. უტოპიელებს შეუძლებლად მიაჩნიათ მოკვდავის ხელი შეეხოს მღვდელს, რომელმაც, მართალია, დანაშაული ჩაიდინა, მაგრამ ღმერთთან ისეა მიახლოებული, როგორც წმინდა ზვარაკი. ასეთი ადათის დაცვა მათთან ძალიან ადვილია, რადგან მღვდლები ცოტა ჰყავთ და დიდი სიფრთხილით ხდება მათი არჩევა. ამიტომ არცაა მოსალოდნელი, რომ ცოდვის ჩადენის ცდუნებამ დასძლიოს საუკეთესოთა შორის საუკეთესო ადამიანი, რომელიც ამალეებულია სწორედ თავისი ღვთისმოსაობითა და სათნოებით. მაგრამ რომც მოხდეს ასე (ადამიანის ბუნება ხომ ცვალებადია), ეს საშიში არ არის, ქვეყანა ამით არ დაიქცევა, რადგან მღვდლები ძალზე ცოტანი არიან და მინიჭებული პატივის გარდა არავითარი უფლება არ გააჩნიათ. უტოპიელებს იმიტომაც ჰყავთ ასე მცირერიცხოვანი მღვდლები, რომ საყოველთაო პატივისცემით გარემოსილი მათი ღირსება არ გაიფუტოს, რაკი ბევრზე განაწილდება. თანაც ძნელია მღვდლად კურთხევის ღირსი ბევრი პიროვნების გამოჩენვა. ამ დროს ხომ უბრალო სათნოება საკმარისი არ არის.

უტოპიელთა მღვდლებს სხვა ხალხებიც თვით უტოპიელებზე ნაკლებად როდი აფასებენ, და აი რატომ: ომში, ბრძოლის ველზე მღვდლები შორიანლო იმყოფებიან და დაჩოქილნი და ხელაპყრობილნი შესთხოვენ ღმერთს ჯერ საყოველთაო მშვიდობას, შემდეგ თავისიანების გამარჯვებას ორივე მხარეზე სისხლის დაუღვრელად; როცა უტოპიელები იმარჯვებენ, მღვდლები შუაგულ ბრძოლაში ჩაერევიან და აკავებენ თავისიანებს, რომლებიც გამძვინვარებულნი მისდევენ

დამარცხებულებს. სიცოცხლე რომ იხსნას, მტრისათვის საკმარისია მხოლოდ მღვდლის მოხმობა. მღვდლის ტანსაცმლის აფრიალებულ კალთაზე შეხება იცავს მტრის ქონებას ომით გამოწვეული ყოველგვარი ზარალისაგან.

სხვა ხალხები უტოპიელთა მღვდლებს ასეთ დიდ პატივს მიაგებენ და ქება-დიდებას ასხამენ კიდევ იმიტომ, რომ მათ მტრისაგან თავისიანებიც ხშირად უხსნიათ. როდესაც მათი ლაშქარი უკან დახევას იწყებდა, მდგომარეობა იძაბებოდა და ამ უკუქცევისას მტერი მზად იყო ხოცვა-ჟლეტისა და ძარცვა-გლეჯისათვის, სისხლისღვრას სწორედ მღვდლების ჩარევა შეწყვეტდა, მშვიდობა ჩამოვარდებოდა და სამართლიანი ზავი დაიდებოდა ხოლმე. არ ყოფილა შემთხვევა, თვით ყველაზე სასტიკისა და ველურ ხალხსაც არ შეეგნო, რომ უტოპიელი მღვდლები ხელშეუხებელი არიან.

უტოპიელები ყოველი თვისა და ყოველი წლის პირველსა და უკანასკნელ დღეს დღესასწაულობენ. თვეებს ისინი მთვარის ფაზებით, ხოლო წელიწადს — მზის მოქცევის მიხედვით ანგარიშობენ. დასაწყის დღეებს ცინემერულს<sup>137</sup> უწოდებენ, ბოლოს კი — ტრაპემერულს<sup>137</sup>, რაც ჩვენებურად დაახლოებით „პირველ დღესასწაულს“ და „ბოლო დღესასწაულს“ ნიშნავს.

მშვენიერი სანახავია მათი ოსტატურად ნაგები ტაძრები, რომლებიც დიდძალ ხალხს იტევს, რაც ტაძართა მცირე რაოდენობით არის გამოწვეული. ნაგებობაში, ცოტა არ იყოს, ბნელა. როგორც აგვისსნეს, ეს მშენებლობის ნაკლი კი არ არის, არამედ მღვდლების რჩევი-თაა გაკეთებული, რომლებსაც მიაჩნიათ, რომ კარბი სინათლე აზრებს ფანტავს, ზომიერი და ბინდშერეული კი — გულისყურის მოკრებას უწყობს ხელს და ღვთისმოსაობას აძლიერებსო.

თუმცა აქ ბევრნაირი რწმენა არსებობს, სიმრავლისა და მრავალფეროვნების მიუხედავად სხვადასხვა საშუალებით ყოველი მათგანი საბოლოოდ ერთი მიზნისკენ მიდის — ყველა ეთაყვანება ღვთაებრიობას. ტაძრებში არაფერია ისეთი, რაც ყველასათვის არ იყოს მისაღები. თუ რომელიმე რწმენას თავისი განსაკუთრებული სამსახური ახლავს, მორწმუნენი მას შინ ასრულებენ. საზოგადო ღვთისმსახურება კი ცალკეულ აღმსარებლობას არ ეწინააღმდეგება; ამიტომაც არ არის ტაძრების კედლებზე ღმერთის არავითარი გამოსახულება, ყოველ ადამიანს ნება აქვს ღვთის ხატება თვითონვე წარმოიდგინოს. ღმერთს ისინი მხოლოდ მითრას უწოდებენ და სხვანაირად არ მიმარ-

თავენ. მითრა მათთვის ნებისმიერი ღვთაებრივი სიდიადის. ერთიანი ბუნების აღმნიშვნელია. უტოპიელთა ლოცვებში არაფერია ცალკეული მორწმუნის რელიგიის შეურაცხმყოფელი.

ბოლო დღესასწაულის დროს ზოგი დღის ნამარხულევი ხალხი ტაძარში მიდის, რათა ღმერთს მადლობა უძღვნას კეთილად ჩავლილი თვის ან წლისათვის. მეორე დღეს დგება პირველი დღესასწაული და ხალხი დილიდანვე მიეშურება ტაძრებისაკენ, რომ ღმერთს ახლა ბედნიერი მომავალი თვე და წელი შესთხოვოს.

ბოლო დღესასწაულის დროს ტაძარში წასვლის წინ ცოლი ქმრის წინაშე იჩოქებს, შვილები — მშობლების წინაშე. მათ უნდა აღიარონ ჩადენილი შეცოდებანი და პატიება ითხოვონ. ოჯახში რომც ყოფილიყო რაიმე უკმაყოფილება მოსალოდნელი, ასეთი აღიარების შემდეგ საშიშროება გაქრება და ყველას შეეძლება სულგანწმენდილმა მიიღოს მონაწილეობა ღვთისმსახურებაში, რაც აღელვებულებს ეკრძალებათ და მკრეხლობად ეთვლებათ. ვინც გულში მტრობასა და სიძულვილს გრძნობს, მხოლოდ განწმენდისა და გულის დაწყნარების შემდეგ მიდის ტაძარში, რადგან უფრთხის სასტიკსა და მსწრაფლ შურისძიებას.

ტაძარში მამაკაცები მარჯვენა მხარეს იკავებენ, ქალები — მარცხენას. შემდეგ ისე განლაგდებიან, რომ ყოველი ოჯახის უფროსის წინ ამ ოჯახის მამაკაცები დასხდნენ, ხოლო დიასახლისის წინ — მამვე ოჯახის ქალები, რადგანაც საზოგადო ადგილებში საჭიროა ყველას ოჯახის უფროსების მკაცრი თვალი დარაჯობდეს. ამასთანავე, აუცილებელია, რომ უმცროსები უფროსების გვერდით ისხდნენ, რადგან მეთუალყურეობის გარეშე დარჩენილი ბავშვები ცელქობაში გაფლანგავენ დროს, რომელიც მათში ღვთისადმი შიშის ჩანერგვას უნდა ხმარებოდეს. ღვთისმომოწმობა ხომ სათნოების მისაღწევად ერთადერთი გზაა.

ღვთისმსახურების დროს უტოპიელებმა ცხოველების შეწირვა არ იციან. მათ მიაჩნიათ, რომ ღმერთმა ადამიანს სიცოცხლე სიკეთისათვის მიანიჭა და დასჯა და სიკვდილი არ შეეფერება მას. ისინი საკმევლს და კეთილსურნელებას აფრქვევენ, ცვილის სანთლებს ანთებენ. განა მათ არ ესმით, რომ ღვთაებრივ ბუნებას სანთელი და ლოცვა ვერაფერს შემატებს, მაგრამ თაყვანისცემის ამგვარი სახე მოსწონთ და შინაგანად გრძნობენ ამ ადამიანებისა და სანთელ-საკმევ-

ლის მეშვეობით როგორ მადლდება ადამიანის სული და როგორ უჩნდება სურვილი მეტი სიხარულით ეთაყვანოს უზენაესს.

ტაძარში ხალხი თეთრად შემოსილი მიდის. მღვდლის სამოსი არაჩვეულებრივად ფერადოვანი და ლამაზია, თუმც კი არც ძვირფასი ნაჭრისგან არის შეკერილი, არც ოქრომკედლითაა ნაქარგი, არც ძვირფასი ქვებით მოოპვილი. იგი ისეთი ნატიფი ოსტატობითაა ნაქსოვი ჩიტის ბუმბულისაგან, რომ ხარისხით ყველა ძვირფას ქსოვილს აღემატება. თანაც ფრთოსანთა ბუმბულში და მათ გარკვეულ განლაგებაში ჩაქსოვილია რაღაც იდუმალი აზრი, რომელმაც მრევლს ღვთის წყალობა, მისადმი კრძალვა და მოყვასის წინაშე ვალი უნდა შეახსენოს.

როდესაც ამგვარად შემოსილი მღვდელი მრევლის წინაშე გამოდის. ყველა ძირს ემხობა და ისეთი სამარისებური სიჩუმე ღდება, რომ ადამიანს შიში იპყრობს, თითქოს ღმერთი გამოეცხადაო. ცოტა ხნის შემდეგ მღვდლის ნიშანზე ძირს გართხმულნი წამოდგებიან და ღმერთს გალობით მადლობას სწირავენ, შიგადაშიგ რაღაც მუსიკალურ საკრავებზე უკრავენ, რომელთა ჟღერადობა გაცილებით სჯობია ჩვენსას, შედარებაც კი არ შეიძლება. ერთ რამეში კი ისინი ჩვენგან ძლიერ განსხვავდებიან—დაკვრაშიც და სიმღერაშიც ისინი საოცარი ბუნებრიობით ბაძავენ ადამიანურ გრძნობებს და გადმოსცემენ მათ. სასიხარულო, შემრიგებლური, შფოთიანი, სევდიანი თუ რისხვით აღსავსე ლოცვის აღსრულებისას მუსიკის ჟღერადობა ისე ერწყმის შინაარსს, ჰანგი ისე შეესატყვისება აზრს, რომ არაჩვეულებრივ ზემოქმედებას ახდენს მსმენელებზე, აღაფრთოვანებს და აღანთებს მათ გულებს.

ბოლოს მღვდელი ხალხთან ერთად საზეიმოდ იმეორებს საღვთისწაულო ლოცვებს. ლოცვის ტექსტი ისეა შედგენილი, რომ ერთად კი სრულდება, მაგრამ თითოეულს შეუძლია მხოლოდ თავისად იგულოს. ლოცვებში ღმერთს შემოქმედად, სამყაროს მმართველად, სიკეთის წყაროდ აღიარებენ და ყველა წჭალობისათვის მადლს უძღვნიან. განსაკუთრებით კი იმისათვის ემადლიერებიან, რომ ასეთ ბედნიერ სახელმწიფოში მოახვედრა და ასეთ ჭეშმარიტ რაჯულს აზიარა. თუ ღვთის მონა-მორჩილი ცდება და სადმე არსებობს ღვთისათვის უფრო საამო, უკეთესი რწმენა და სახელმწიფო, მაშინ იგი ევედრება ღმერთს მოიღოს მოწყალება და აღიაროს იქ მოხვედრა. იგი ხომ მზადაა უზენაესს ყველგან გაჰყვას, ხოლო თუ უტოპიელთა სახელმწიფოა საუკეთესო და რწმენა უჭეშმარიტესი, დაე მისცეს მას ღმერთმა სიმტკიცე-

ცე და შეაძლებინოს ღვთის ამგვარად შეცნობა, ცხოვრების ასეთ წესს კი სხვა მოკვდავნიც აზიაროს, თუკი თვით ღმერთის მიუწვდომელ ბუნებას არ ახარებს რწმენათა ასეთი მრავალფეროვნება.

ბოლოს, უტოპიელი ევედრება ღმერთს, მალე მიიღოს მისი სული და აღიაროს უმტკივნეულო აღსასრულს, თუმც კი თვითონ უფლება არა აქვს განსაზღვროს, ადრე უნდა მოხდეს ეს თუ გვიან. ხოლო თუ ღმერთი არ განრისხდება, უტოპიელს ურჩევნია მიეახლოს მას ტანჯვით სიკვდილის გზით, ვიდრე მისგან მოშორებულმა ბედნიერად იცხოვროს.

ალავლენენ რა ამ ლოცვას, ისინი კვლავ მიწაზე ემხოზიან, მერე მიდიან შინ და დარჩენილ დროს თამაშობებსა და სამხედრო ვარჯიშში ატარებენ.

აი, რამდენადაც შემეძლო, სიმართლით აღვწერე უტოპიელთა სახელმწიფოს წყობილება, რომელიც მე პირადად საუკეთესოდაც მიმაჩნია და ერთადერთადაც, რომელსაც შეიძლება სამართლიანად ეწოდოს სახელმწიფო. სხვაგან შეიძლება ბევრს ლაპარაკობენ საზოგადოების კეთილდღეობაზე, მაგრამ მხოლოდ საკუთარ თავზე ზრუნავენ. აქ კი, სადაც პირადი არაფერი არსებობს, ყველა საზოგადო საქმეს ემსახურება. ცხადია, თავისებურად ყველა მართალია.

სხვა ქვეყნებში ყოველმა ადამიანმა იცის, თვითონ თუ არ იზრუნებს საკუთარ თავზე, რაც არ უნდა ჰყვაოდეს სახელმწიფო, იგი მაინც შიმშილით მოკვდება. აუცილებლობა აიძულებს მას პირველ რიგში თავის თავზე იზრუნოს და არა ხალხზე, ე. ი. სხვა ადამიანებზე.

აქ კი, სადაც ქონება საერთოა, გაჭირვებაში ჩავარდნისა არავის ეშინია, თუკი სახელმწიფო ბელის გავსებაზე იზრუნებს. რადგან დოვლათს ისინი თანაბრად ანაწილებენ და არ ძუნწობენ, აქ არ არსებობს ღარიბი და უპოვარი. და თუმც კი თითოეულს პირადი ქონება არ გააჩნია, მაინც ყველა მდიდარია.

განა უზრუნველი, უშფოთველი და სიხარულით აღსავსე ცხოვრება თავისთავად სიმდიდრე არ არის? რა საჭიროა ჭამა-სმებაზე ზრუნავდე, ცოლის წუწუნი გტანჯავდეს, ვაჟიშვილის მომავალ სიღარიბეზე და ქალიშვილის მზითვზე წუხდე. თითოეული უტოპიელი დარწმუნებულია, რომ მაძლარი და ბედნიერი იქნება თვითონაც და მისი ახლობლებიც: ცოლი, შვილი, შვილიშვილები, შვილთაშვილები და მთელი მისი შთამომავლობა, რაზედაც კეთილშობილნი წინასწარ ზრუნავენ.



ახლა იმის შესახებ გიამბობთ, როგორ ზრუნავენ უტოპიელები მომეტებულად მათზე, ვინც აღრე შრომობდა და ამჟამად დაუძღურებულა, ვიდრე იმათზე, ვინც ახლა ეწევა ცხოვრების ჭაპანს. კარგი იქნებოდა მათი ეს სიკეთე ვინმეს სხვა ხალხების სამართლიანობისათვის შეედარებინა. თავს მოვიჭრი, თუ სხვაგან მსგავს რამეს, რაიმე კვალსაც კი იპოვნო. სადაური სამართალა, რომელიმე დიდებული, ოქრომჭედელი, მეფასზე ან მისთანანი არაფერს აკეთებდნენ, ან მათი საქმიანობა სახელმწიფოს არაფერს რგებდეს, ცხოვრებას კი უსაქმურობაში, გართობაში, ფუფუნებასა და განცხრომაში ატარებდნენ! ამ დროს მოჯამაგირე, მეეტლე, ხელოსანი, მიწის მუშა დღენიადავ მუშაობს, მუშაობს იმდენს, რომ სახედარიც ვერ აიტანს, მათი შრომის გარეშე ხომ სახელმწიფო ერთ წელსაც ვერ იარსებებდა! და შიმშილით კი სული სძვრებათ, პირუტყვის მდგომარეობაც კი უკეთ მოგეჩვენება. საქონელიც კი ყველგან არ არის ასეთ მძიმე შრომაში, მათ საკვები ღარიბებისაზე ოდნავ ნაკლები თუა და მათ სავსებით შეეფერებათ. თანაც პირუტყვის ხომ მომავლის შიში არა აქვს. ადამიანს კი სტანჯავს ფუჭი, უნაყოფო შრომა და გულს უხეთქავს სიღარიბისა და სიბერის შიში. მისი დღიური გასამრჩელო ისე მცირეა, რომ არ ჰყოფნის და შავი დღისათვის ორიოდ გროშის გადანახვასაც ვერ ახერხებს.

შეიძლება სამართლიანად ჩაითვალოს ისეთი სახელმწიფო, რომელიც დოვლათს თავზე აყრის ეგრეთ წოდებულ დიდებულებს, ოქრომჭედლებს, ფუჭი გართობის მოყვარულ ყველა ჯურის მლიქვნელებსა და უსაქმურებს, ხოლო არავითარ ყურადღებას არ აქცევს მიწათმოქმედს, მენახშირეს, მოჯამაგირეს, მეეტლესა და ხელოსანს, რომელთა გარეშეც იგი ვერც კი იარსებებდა?! სახელმწიფო ბოროტად იყენებს მშრომელების საუკეთესო წლებს, ხოლო როცა ისინი უძღურდებიან და ცხოვრება უჭირთ, მათ ნაღვაწს ივიწყებს, მათი სიკეთე აღარ ახსოვს და მადლიერების ნაცვლად უბედურებს საცოდავ აღსასრულს უმზადებს.

კიდევ უფრო უარესი ისაა, რომ მდიდრები ღარიბთა დღიური სარჩოს გარკვეული ნაწილის გამოძალვას მარტო მოტყუებით კი არა, კანონის ძალითაც ახერხებენ. თუ წინათ უსინდისობად ითვლებოდა ქვეყნის წინაშე დიდი დამსახურების საზღაურად მცირე ვასამრჩელოს მიცემა, ახლა ყველაფერი გაუკუღმართდა და ამ უსამართლობამ კანონის სახე მიიღო.

მე ყურადღებით ვაკვირდებოდი და ვსწავლობდი სხვადასხვა აყვავებულ სახელმწიფოს. პატიოსან სიტყვას გაძღვეთ, არაფერი დამინახავს, გარდა მდიდართა მისწრაფებისა სახელმწიფოს სახელით მხოლოდ საკუთარ გამორჩენაზე იფიქრონ. ისინი ათასგვარ ხრიკებს ეძებენ, რომ შეინარჩუნონ უკეთური გზებით შექმნილი ქონება და მცირედი გასამრჩელოს ფასად ისარგებლონ ღარიბთა შრომით. ამგვარი საქმენი უკვე დაკანონდა, რადგან ერთხელ და სამუდამოდ დადგინეს სახელმწიფოს, ე. ი. ღარიბთა სახელითაც.

და აი, ამ უკეთურმა, გაუმაძლარმა ხალხმა ხელთ იგდო ყველაფერი ის, რაც სხვებსაც ეყოფოდათ! რა უფსკრულია მათსა და ბედნიერ უტოპიელთა სახელმწიფოს შორის! ფულის მოსპობით უტოპიელებმა სიხარბეც ამოძირკვეს. განა ცნობილი არ არის, რომ ფულის მოსპობასთან ერთად მას თან გაჰყვება სიცრუე, ქურდობა, ძარცვა, შფოთი, განწეიქილება, აღშფოთება, გულისწყრომა, დავა, უფლი, მკვლელობა. ღალატი, მოწამვლა, რომელთა გამოც დასჯა შურისძიება უფროა, ვიდრე მათი ალაგმვის ცდა. ფულთან ერთად გაქრება შიში, მღელვარება, ზრუნვა, წუხილი, უძილო ღამეები. სიღარიბეც კი, რომელსაც ყველაზე მეტად სჭირდება ფული, მისი მოსპობისთანავე თავისთავად გაქრება.

ეს უფრო ცხადი გახდება, თუ შენ წარმოიდგენ უნაყოფო და მოუსავლიან წელიწადს, რომელმაც უკვე ათასობით ადამიანი იმსხვერპლა, დაუფარავად შემოძლია განვაცხადო: შიმშილობის დასასრულს მდიდართა ბედლები რომ გაესინჯათ, იმდენი პური აღმოჩნდებოდა, შიმშილით დაღუპულებისათვის დროზე რომ გაენაწილებინათ, ყველას ეყოფოდა. რა ადვილი იქნებოდა სარჩოს შოვნა, ეს ნეტარსხენებული ფული რომ არ არსებობდეს. იგი თითქოს საქმის გასაადვილებლად შემოიღეს, სინამდვილეში კი ლუკმა-პურის მოსაპოვებელ გზაზე ბორკილად იქცა.

ექვი არ მეპარება, ამას თვით მდიდრებიც გრძნობენ, მათაც მშვენივრად უწყიან, რომ სჯობს არაფერი გაგაჩნდეს ისეთი, რაც არ არის აუცილებელი, ვიდრე ზედმეტი გქონდეს. რა ჯობია, თავი დააღწიო უამრავ ფათერაკს, თუ აურაცხელი სიმდიდრის მონად გადაიქცევი?! უეჭველია, მთელი მსოფლიო დიდი ხანია გადაიღებდა უტოპიელთა კანონებს საკუთარი სარგებლობის გამოც და ქრისტე-მაცხოვრის გავლენითაც (რომლის სიბრძნეს არ შეიძლება არ სცოდნოდა, რა არის უმჯობესი, ხოლო კეთილმოწყალებას არ შესძლებოდა აერჩია ის, რაც

არ იყო საუკეთესო), მაგრამ ამას წინ ელოდება ერთი რამ ურჩხული, სათავე ყველა განსაცდელისა — მედიდურობა! იგი ბედნიერებას საზღვრავს არა საკუთარი წარმატებებით, არამედ სხვისი მარცხით. ზოგი გაღმერთებასაც კი არ მოისურვებს, თუ არ იარსებებენ უპოვარნი, რომლებზეც შეიძლება იბატონო და დაამცირო ისინი, რათა საკუთარი ბედნიერება მათი უბედურების ფონზე უფრო გამობრწყინდეს და მისმა სიძლიერემ ხაზი გაუსვას მათ სიღარიბეს. ავერნის გველივით<sup>138</sup> ბორკავს იგი მოკვდავთა სულს, რომ ისინი არ ისწრაფოდნენ უკეთესი ცხოვრებისაკენ, თავის მომაბეზრებლად უშლის მათ ხელს და ყველა გზას უღობავს.

მედიდურობა ადამიანთა სულში ისე მკვიდრად დაბუდებულა, რომ მისი ამოძირკვა ძნელია; მოხარული ვარ, რომ უტოპიელებს მაინც ერგოთ ისეთი სახელმწიფო, როგორსაც ყველას ვუსურვებდი. მათ ცხოვრების საუკეთესო ნორმები შეიმუშავეს და სახელმწიფო წყობას საფუძვლად მარჯვედ და საიმედოდ დაუდეს. უტოპიელებმა სხვა მანკიერებებთან ერთად პატივმოყვარეობის ფესვებიც ამოძირკვეს. მათ არ ემუქრება შინაური უთანხმოება, რამაც ბევრი კარგად დაცული მდიდარი ქალაქი დაღუპა. როცა შინაურობაში სრული თანხმობა სუფევს და სახელმწიფო წყობილება მყარია, მას მეზობელი ქვეყნების ქიშპობა ვერ შეარყევს (კარგა ხანია უტოპიელთა მეზობლებმა სცადეს ეს, მაგრამ არაფერი გამოუვიდათ).

როდესაც რაფაელი ამას მიაბობდა, მომეჩვენა, რომ ამ ხალხის კანონებსა და ადამ-წესებში ბევრი რამ იყო ახირებული. ეს არა მარტო საომარ ხერხებს, წეს-ჩვეულებებსა და რწმენას ეხება, არამედ ყველაზე მთავარს მათ წეს-წყობილებაში — ერთად ჭამა-სმას და საერთო ცხოვრებას ყოველგვარი ფულის გარეშე. მარტო ესეც კი კმარა, რომ მოისპოს ყოველგვარი დიდგვაროვნება, წარჩინებულობა, ბრწყინვალება, დიდებულება, რასაც ყველა სახელმწიფო ღირსებად და მშვენიებად მიიჩნევს.

მაგრამ, როგორც შევატყვე, რაფაელი თხრობამ დაქანცა და შეკამათებასა და საწინააღმდეგოს თქმას ვერ აიტანდა, თანაც გამახსენდა, როგორ კიცხავდა იგი ადამიანებს, რომლებიც შიშობდნენ, საკმარისად ჰკვიანნი არ. გამოვჩნდებით, თუკი სხვის აზრებში სასაცილოს ვერაფერს დავინახავთო. ამიტომ შევაქე უტოპიელთა წყობილება, მოვიწონე რაფაელის ნაამბობი და ვახშამზე მოვიწვიე, თან ვუთხარი, დრო ბევრი გვექნება, უფრო ღრმად განვსაჯოთ მოსმენილი და ვისა-

უბროთ ამ თემებზე-მეთქი. ო, ნეტავ ეს ნატვრა ოდესმე ამსრულებო-  
და!

მართალია, ყველაფერში ვერ დავეთანხმები ამ უეჭველად განათ-  
ლებული და გამოცდილი კაცის ნაამბობს, მაგრამ ვაღიარებ, რომ უტო-  
ბიელთა სახელმწიფოში ბევრი რამაა ისეთი, რასაც ჩვენს ქვეყნებს  
ვუსურვებდი, თუმც კი ამ სურვილების აღსრულების არავითარი იმე-  
დი არა მაქვს.

### მეორე წიგნის დასასრული

რაზაელ ჰითლოდვისის უზადლის საუბრის  
მეორე წიგნის დასასრული,  
აქამოვად მცირეთათვის ცნობილი  
უტოკიელთა კუნძულის წუგობილებისა  
და კანონების შესახებ, გადმოცემული  
უგანათლებულესი და უკეთილშობილესი  
ვაჟაკის, ლონდონელი მოქალაქისა და  
ვიკონტის ტოგას მორის მიერ.

## შ ე ნ ი შ ვ ნ ე ბ ი

1. სახელი უტოპია შედგენილია ბერძნ. უარყოფითობის ნაწილაკის *οὔ-სა* და „ადვილის“ აღმნიშვნელი სიტყვის *τοπος* შეერთებით: „უტოპია“ — არარსებული ადგილი.

2. პეტრე ეგიდიუსი (Petrus Aegidius ან Cillius, 1486—1533). ტომას მორისა და ერაზმ როტერდამელის (1466—1536) მეგობარი, ნიდერლანდელ პუმანისტი, ანტვერპენის ქალაქის საბჭოს წევრი, ანტიკური ლიტერატურის. ბერძნული და ლათინური ენებისა და სამართლის მკოდნე, ესოპეს იგავების ლათინურ ენაზე მთარგმნელი.

3. ნაუტობადევი და მოუშადადებელი... — კინტილიანუსი თავის თხზულებაში „ორატორის აღზრდა“ აღნიშნავს, რომ ორატორმა უნდა შესძლოს მოუშადადებლად სიტყვის წარმოთქმა.

4. იოანე კლემენტი — ჯონ კლემენტი (Clement John, გარდაი. 1572 წელს) — აღიზარდა ტომას მორის სახლში და ცოლად შეირთო მისი შვილობილა მუშაობდა ოქსფორდის უნივერსიტეტში ბერძნული ენის კათედრაზე, შემდეგ კი ექიმად — ლონდონში.

5. სახელი „პითლოდეესი“ შექმნილია ბერძნ. სიტყვებიდან *πυθ* — „უბედობა“, „ლაქლაქი“ და *δει* — „გამოცდილი“, რაფაელ პითლოდეესის სახელით ტომას მორი გაბედულად გადმოგვეცემს საკუთარ აზრებს.

6. ამაუროტი — სახელწოდება მომდინარეობს ბერძნ. სიტყვიდან *αμαυρος* — „შეუცნობელი“, „ბნელი“. ამ სახელით მორი უარყოფს სინამდვილეში მსგავსი ქალაქის არსებობას და ამ სახელწოდებაში ამავე დროს გულისხმობს ნისლიან ლონდონს, რომლის დამახასიათებელ ნიშნებსაც ამაუროტის აღწერის დროს ჩამოთვლის.

7. ანიდრუსი — მომდინარეობს ბერძნ. სიტყვიდან *ανιδρα* „უწყლო“, ე. ი. „უწყლო მდინარე“, მაგრამ, როგორც აღწერიდან ჩანს, მორი აქ მდინარე ტეზას გულისხმობს.

8. დამქდარი ერთს აქებს, ფეხზე წამომდგარი — მეორეს... — ციტატა „ციცერონის წინააღმდეგ ინვექტივებიდან“, რომელიც სალუსტიუსს მიეწერება: „... ფეხზე მდგომი რესპუბლიკის შესახებ ერთს ფიქრობს, დამქდარი მეორეს“.

9. შენს მეუღლესთან ერთად... — იგულისხმება პეტრე ეგიდიუსის მეორე ცოლი კორნელია სანდრი.

10. მეფე ჰენრი — ჰენრი VIII ტიუდორი, ინგლისის მეფე (1509—1547).

11. კასტილიის მეფე კარლოსი — კარლოს I (მოგვიანებით გერმანიის იმპერატორი კარლ V) 1516 წლის იანვარში თავისი პაპის ფერდინანდ არაგონელის გარდაცვალების შემდეგ კასტილიის მეფედ გამოცხადდა.

12. ელჩად. ფლანდრიაში... — იგულისხმება 1515 წლის პისნი ჰენრი VIII-ის ელჩობა. კომერციული და დიპლომატიური კონფლიქტების მოსაგვარებლად ტ. მორი ფლანდრიაში გაემგზავრა. ეს კონფლიქტი ინგლისსა და ნიდერლანდს შორის წარმოიშვა მატყლით და მიუღიეთ ვაჭრობის შესახებ დადებული ხელშეკრულების გამო, რომელიც ჭერ კიდევ 1496 და 1506 წლებში ჰენრი VII მიერ იქნა ხელმოწერილი. კონფლიქტი წარმოიქმნა კარლ პაბსბურგსა (გერმანიის მომავალი იმპერატორი კარლ V) და ჰენრი VIII დას შორის დინასტიური ქორწინების პროექტის დარღვევის გამო, რამაც გამოიწვია ინგლისსა და ნიდერლანდს შორის ვაჭრობის დროებითი შეწყვეტა. ინგლისელ ვაჭრებს აეკრძალათ მატყლის ნიდერლანდში გატანა. ერთდროულად აიკრძალა ინგლისიდან ფლამანდური ქსოვილების გაზიდვა. ამან ორივე ქვეყნის ვაჭართა ინტერესების შელახვა გამოიწვია. 1515 წლის მაისში ტომას მორი კატბერტ ტუნსტალთან, რიჩარდ სიმპსონთან და ელჩობის სხვა წარმომადგენლებთან ერთად მოლაპარაკების საწარმოებლად ბრიუგეში გაემგზავრა. მან ეს რთული მისია წარმატებით შეასრულა.

13. კატბერტ ტუნსტალი (Tunstall Cuthbert, 1424—1559) — ტომას მორისა და ერაზმ როტერდამელის მეგობარი. 1511 წლიდან იგი კენტერბერის არქიეპისკოპოსის გენერალური ვიკარიუსი (თანაშემწე), 1522 წლიდან კი ლონდონის ეპისკოპოსი იყო.

14. ბრიუგე — დასავლეთ ფლანდრიის დედაქალაქი (ამჟამად ბელგიის ერთ-ერთი ქალაქი).

15. გეორგ ტემსეიუსი (Theimseke George, გარდაიქ. 1536 წელს). შეკვლევებს მიაჩნიათ, რომ იგი გეორგ ვან ტემსეკია, ჩრდილოეთ საფრანგეთის ქ. კასელის მონასტრის წინამძღვარი.

16. პალინურუსი — ვერგილიუსის თხზულების „ენეიდის“ გმირის ენესის შესაქე.

17. ულისე — ჰომეროსის პოემის „ოდისეას“ მთავარი გმირის ოდისეუსის ლათინური სახელი.

18. პლატონი (427—347 ძვ. წ.) — ცნობილი ბერძენი ფილოსოფოსი, რომლის თხზულებებს უაღრესად დიდი მნიშვნელობა ჰქონდა ტომას მორის მსოფლმხედველობის ჩამოყალიბებისათვის. სხვადასხვა წერილობითი წყარო მოგვითხრობს პლატონის მოგზაურობათა შესახებ. იმ ქვეყნებს შორის, რომლებიც მოუვლია პლატონს, წყაროებში ნახსენებია ასურეთი, ბაბილონი, სპარსეთი, იტალია, სიცილია.

19. ლუციუს ანეუს სენეკა (ახ. წ. 4—65)—რომაელი ფილოსოფოსი, ტრაგიკოსი, იმპერატორ ნერონის აღმზრდელი.

20. მარკუს ტულეუს ციციერონი (106—43 ძვ. წ.) — რომაელი ორატორი, პოლიტიკური მოღვაწე და ფილოსოფოსი.

21. ლუბიტანია — ახლანდელი პორტუგალია.

22. ამერიგო ვესპუჩი (1451—1512) — ფლორენციელი მეზღვაური, რომლის სახელსაც ატარებს ამერიკის კონტინენტი. მან ოთხჯერ შემოიარა ახალი სამ-

ყარო. მეოთხე მოგზაურობის დროს (1503—1504 წწ.) რამდენიმე მისი თანამგზავრობაში დაჩაზა.

23. ვიხარებ ურნა არ გააჩნია, მას ზეცა დაიფარავს... — ციტატა რომელი პოეტის მარკუს ანეუს ლუკანუსის თხზულებიდან „ფარსალია“ რომელიც ეძღვნება კეისრის ბრძოლას პომპეუსთან.

24. „საიქიოსკენ მიმავალი გზა ყოველგნით ერთია“... — შეცვლილი ციტატა ციცერონის „ტუსკულანური საუბრებიდან“ (I, 43.104): „ჩინებულად უპასუხა ანაქსაგორამ, როდესაც ლამფსაკოსში კვდებოდა, მეგობრების შეკითხვაზე ვადესვენებინათ თუ არა მისი სხეული მის მშობლიურ კლადომენეში: „არ არის ამის არავითარი საჭიროება — ჯოჯობისავე მიმავალი გზა ყოველგნით ერთია“. ტომას მორმა სიტყვა „ჯოჯობით“ „საიქითი“ შეცვალა.

25. ტაპრობანა — ახლანდელი კუნძული შრი-ლანკა.

26. კალიკეტი — ინდოეთის საზღვაო ნავსადგური, თანამედროვე კალიკუტი (და არა კალკუტა), ოდესღაც აყვავებული სეაპრო ქალაქი. 1498 წლის მისში აქ იმყოფებოდა ცნობილი პორტუგალი მზღვარი ვასკო და გამა (1469—1524).

27. მაგნეტის გამოყენება... — ზღვისნობის დროს მაგნეტის გამოყენების შესახებ წერდა ნეტარი ავგუსტინე თავის თხზულებაში „ღვთიური სახელმწიფოს შესახებ“. (De Civitate Dei, 21.4).

28. სკილა (ბერძნ. მით.) — ზღვის ურჩხული იტალიასა და სიცილიას შორის, მესინის სრუტეში.

29. კელენო (ბერძნ. მით.) — ერთ-ერთი სამ პარპიათაგან მითური ურჩხული ქალის სახით, რომელსაც ძერას სხეული და უზარმაზარი ბრქვალები ჰქონდა.

30. ლესტრიგონები (ბერძნ. მით.) — ძველი იტალიის მკვიდარი, რომლებიც თითქოს ჭერ კამპანიაში, შემდეგ სიცილიაზე ცხოვრობდნენ. ვადმოცემის თანახმად, ისინი კაციკამები იყვნენ. მათი ქვეყანა აღწერილია „ოდისეაში“. პომპროსის „ილიადაში“ აქილევსი ავამეზონს „კაციკამის“, „ხალხის მყლაპავს“, უწოდებს.

31. უმორწყალო განადგურება... — საუბარია პენრი VII წინააღმდეგ კორნუელის (ჩრდილო-დასავლეთ ინგლისი) საგრაფოს მცხოვრებთა აჯანყებასა და მათ მიერ განცილი მარცხზე.

32. იოანე მორტონი — ჯონ მორტონი (Morton John, 1420—1500). გამოჩენილი სახელმწიფო და საეკლესიო მოღვაწე, კენტერბერის არქიეპისკოპოსი და კარდინალი, ლორდ-კანცლერი პენრი VII მეფობის დროს (1485—1509). მან კეთილი გავლენა იქონია ტომას მორზე, რომელმაც ახალგაზრდობის წლები მის სახლში გაატარა.

33. კორნუელთან და ცოტა უფრო ადრე... ვალიასთან ბრძოლის შემდეგ—ვადსახადების ზრდას ჩრდილოეთ ინგლისში 1484—1491 წლებში მოჰყვა აჯანყებანი. 1497 წლის აჯანყება ცნობილია კორნუელის ამბოხების სახელით.

34. პირად მცველთა უზარმაზარ ბრბო... — ტომას მორს მხედველობაში აქვს ფეოდალთა რაზმები, ე. წ. „ლივრეის ხალხნი“, რომლებიც ჭერ კიდევ მრავალრიცხოვანი იყვნენ ტიუდორთა მმართველობის პერიოდში.

35. რაც შეეხება ვალიას... — აქ იგულისხმება 1515 წელი, როცა საფრანგეთში შევიცარელი დაქირავებული ჯარისკაცები შემოვიდნენ.

36. სალუსტიუსი (86—34 ძვ. წ.) — რომელი ისტორიკოსი. ციტატა აღებულია მისი თხზულებიდან „კატონის შეთქმულება“.

37. ამრიგად მას შემდეგ... — ეს ადგილი მოტანილია კ. მარქსის „კაპიტალის“ I ტომში, გვ. 590—591.

38. ოლიგოპოლია — უმცირესობის უფლება ვაქრობაზე. ბერძნ. სიტყვებიდან ბλῆγος — „უმცირესობა“, πᾶσις „ყველი“, „ყვეკრობ“ ე. ი. „მცირერიცხოვანთა ვაქრობა“.

39. მანლიუსის კანონები... — რომელი ტიტუს მანლიუსი ძვ. წ. 362 წელს სამხედრო ტრიბუნი იყო, ძვ. წ. 353 და 349 წლებში კი დიქტატორი. მის მიერ გატარებული კანონები გამოირჩევიან განსაკუთრებული სიმკაცრით (მან ხომ საკუთარი ეატიშვილი სიკვდილით დასაჯა სამხედრო დისციპლინის დარღვევის გამო).

40. სტოელნი და მათი მიმდინარეობა სტოიციზმი — ერთერთი მნიშვნელოვანი ფილოსოფიური მიმდინარეობა ძველ საბერძნეთში. იგი დააარსა ძენონმა ძვ. წ. IV ს. ბოლოს, ჭადაგებდა ყოველგვარი გაჭირვების ამტანობას.

41. სპარსეთში... — ტომან მორს სპარსეთის შესახებ ამბები გაგებული ჰქონდა უწინარეს ყოვლისა ანტიკური ავტორების პეროდოტესა (დაახლ. 484—425 ძვ. წ.) და სტრაბონისაგან (გარდაი. ახ. წ. 25 წელს).

42. პოლიტიკები... — სახელწოდება წარმოშობილია ბერძნ. სიტყვებიდან πολις „ბევრი“ და კῆρος „ცარიელი, უაზრო ყბედობა“. ამით მორს სურს თქვას, რომ ასეთი ხალხის არსებობის დაჭერება უაზრობაა.

43. ცდა ბედის მონახვევაო... — ანდაზა „კამათლებს ხშირად თუ გააგორებ, შეიძლება ვენერაც დასვა“. „ვენერას“ რომელები თამაშის დროს კამათლების ხელსაყრელ განლაგებას უწოდებდნენ. ერაზმ როტერდამელის „ადაგიასი“ ეს ანდაზა შემდეგნაირადაა ახსნილი: „ხშირი თამაშით შეიძლება მოიგო არა ოსტატობის, არამედ შემთხვევის წყალობით“. (Crebo iacti iaci aliquando Venerem).

44. ბენედიქტინელთა მონასტრები... — დასავლეთ ევროპის უძველესი კათოლიკური ორდენი, დაარსებული წმ. ბენედიქტე ნურსაელის მიერ (482—543) მონტე კასინოში. ბენედიქტინელთა სააბატო უმნიშვნელოვანეს კულტურულ ცენტრს წარმოადგენდა.

45. „რისხავდეთ, მაგრამ არა სცოდავდეთ“... — ფსალმუნი, 4, 5.

46. „შენს სახლზე ექვიანობამ შემკამა...“ — ფსალმუნი, 68, 10.

47. ელისე — ძველ ებრაელთა წინასწარმეტყველი. მის მელოტ თავს ერთხელ ბიჭებმა დასცინეს. ელისე ვანისხდა, მუდართ შესთხოვა ღმერთს დახმარებოდა შურისძიებაში. უსმინა ღმერთმა: ტყიდან ორი დთვი გამოვიდა და ორმოცდარი ბავშვი დაგლიჯა.

48. „სულელს მისი სისულელის მიხედვით უპასუხე“ — შეცვლილი ციტატა სოლომონისეულ იგავთა წიგნიდან, სადაც ნათქვამია: „სულელს მისი სისულელის მიხედვით არ უპასუხო, რათა თვითონ შენ მას არ დაემსგავსო“.

49. მეფენი გაფილოსოფოსდებიან... — „თუ სახელმწიფოში არ იმეფებენ ფილოსოფოსები, — აღნიშნავს პლატონი, — ან ე. წ. მეფენი და მფლობელნი არ იფილოსოფოსებენ, სანამ სახელმწიფო ძალაუფლება და ფილოსოფია არ



50. დიონისიოსის კარზე... — დიონისიოს უმცროსი — სიცილიის მმართველი (ძვ. წ. 367—343). მან პლატონი თავის კარზე მიიწვია, რათა სახელმწიფოს მართვა-გამგებლობა შეესწავლა, მაგრამ პლატონმა დიონისიოსზე სერიოზულ გავლენა ვერ მოახდინა, თვითონ პლატონი კარისკაცთა ინტრიგების ქსელში გაება და მისი სიცოცხლე საფრთხეში აღმოჩნდა.

51. გალიის მეფის კარზე... — 1515 წელს საფრანგეთის სამეფო ტახტზე ავიდა ფრანსუა I (1515—1547), რომელიც აგრძელებდა თავისი წინაპრების — შარლ VIII და ლუი XII მიერ დაწყებულ პოლიტიკას — ომებს იტალიაში. საუბარია იმის შესახებ, თუ ვის ეკუთვნის მილანო და ნეაპოლი (საფრანგეთს თუ იტალიას).

52. მედიოლანუმი... — თანამედროვე მილანო, რომელიც იმ დროისათვის ეკუთვნოდა ვისკონტთა გვარის მთავრებს. ვალენტინა ვისკონტი ფრანგთა მეფის ლუი XII (1498—1515) ბეგია იყო.

53. ხელიდან გამსხლტარი ნეაპოლი... — ეს ეპითეტი იმ გარემოებით აიხსნება, რომ ნეაპოლი ცდილობდა შეენარჩუნებინა დამოუკიდებლობა და არ დანებებოდა ფრანგ მეფეებს, რომლებიც მის ხელში ჩაგდებას ლაპობდნენ.

54. ვენეტების დარბევა... — კამბრეს 1508 წლის ხელშეკრულების თანახმად, ვენეტია (ახლანდელი ვენეცია) და მისი ოლქი განწილდა ლუი XII, ფერდინანდ არაგონელს, მაქსიმილიანე I ავსტრიელსა და პაპ იულიუსს შორის.

55. მთელი იტალიის დამორჩილება... — იმ დროისათვის იტალია შედგებოდა ხუთი დამოუკიდებელი სახელმწიფოსა (მილანო, ფლორენცია, რომი, ვენეცია და ნეაპოლი) და წერილი ფეოდალური სამფლობელოებისაგან.

56. ძალაუფლების მოპოვება ფლანდრიაზე, ბრახანტზე... მთელ ბურგუნდიასზე... — 1477 წელს საფრანგეთის მეფე ლუი XI ბურგონის პერცოვას შარლ თამაშის დაღუპვის შემდეგ ხელთ იგდო ბურგონი. შარლ თამაშის ასულის მარი ბურგონელისა და მაქსიმილიანე I ავსტრიელის ქორწინების შემდეგ ფლანდრია და ბრახანტი ავსტრიის ხელში გადავიდა.

57. გერმანელთა დაქირავება... — გერმანელებსა და შვეიცარიელებს იმ დროისათვის ხშირად ქირაობდნენ სხვადასხვა სახელმწიფოები სამხედრო საშახურისათვის.

58. უდიდებულესობა იმპერატორი... — იგულისხმება „რომის საღვთო იმპერიის“ იმპერატორი მაქსიმილიანე I ავსტრიელი (1493—1519).

59. არაგონის მეფე... — ფერდინანდ არაგონელი (1474—1516) — ინგლისის მეფის ჰენრი VIII პირველი ცოლის ეკატერინე არაგონელის მამა. 1512 წელს ფერდინანდმა დაიპყრო ნავარის სამეფოს სამხრეთი ნაწილი, რომელიც 1515 წელს კასტილიის სამეფოს შემოუერთა.

60. ნავარის სამეფო... — საფრანგეთსა და ესპანეთს შორის, პირენეის კალთებზე. იგი დინასტიური ქორწინების მეშვეობით გადადიოდა ხან ერთი და ხან მეორე ფრანგი დიდებულის ხელში, თუმცა არაგონის მეფეები მუდამ აცხადებენ პრეტენზიას მასზე.

61. კასტილიის მეფე... — კასტილია — ესპანეთის ოლქი, ესპანეთის

უდიდესი სამეფო. „უტოპიის“ შექმნის წლებში წარმოებდა მოლაპარაკება კასტილია-საფრანგეთის კავშირის თაობაზე, კასტილიის პრინცი კარლოსისა და ლუი XII-ის ასულის დინასტიური ქორწინების გზით.

62. შეემაართულა უნდა გვეყავდნენ სკოტები... — საფრანგეთი მხარს უჭერდა სკოტების ანუ შოტლანდიელების მტრობას ინგლისის მიმართ და ომის შემთხვევაში იმედოვნებდა მათთან კავშირის დამყარებას.

63. ახორციელები... — ბერძნ.  $\alpha$  — უარყოფითი ნაწილაკი და  $\chi\rho\alpha\mu$  — „ქვეყანა“, ე. ი. „აარასებული ქვეყნის“, „გამორგონილი ქვეყნის“ მცხოვრებნი.

64. გაზარდონ მონეტის ღირებულება... — ამგვარ ოპერაციებს მიმართავდნენ ინგლისის მეფეები ედუარდ IV და ჰენრი VII.

65. შეწყვიტა სისხლისღვრა... — აქ საუბარია იმის შესახებ, რომ ინგლისის მეფემ ჰენრი VII 1492 წელს საომარი ოპერაციების დაწყებამდე საფრანგეთთან ზავი დადო.

66. ამოუქექია კიანაქამი კანონები... — ეს ფაქტი მართლაც მოხდა ჰენრი VII-ის მეფობის ხანაში.

67. ხელმწიფის უცილობელი პეროგატივა... პეროგატივა განსაკუთრებულ უფლებას, უპირატესობას ნიშნავს. აქ ტომას მორს მხედველობაში აქვს ცნობილი ინგლისური გამოთქმა: „მეფე არ ცდება“ (King does no wrong).

68. კრასუსი... — მარკუს ლიკინიუს კრასუსი, უმდიდრესი კაცი მთელ რომში, ძვ. წ. 60 წელს პირველი ტრომვირატის წევრი იყო კეისარსა და პომპეუსთან ერთად. დაიღუპა, ძვ. წ. 53 წელს, პართელების წინააღმდეგ ლაშქრობის დროს.

69. მწყემსის მოვალეობა... — შდრ. პლატონის აზრს — „შენ ფიქრობ, რომ მეცხვარეები ან მებრეები ცხვრის ან ხარების გამოკვებაზე ზრუნავენ, კვებავენ მათ, უვლიან და მხედველობაში აქვთ სხვა რამ და არა ბატონთა და საკუთარი თავის კეთილდღეობა“ (იხ. პლატონი, სახელმწიფო, I, 343).

70. ფაბრიციუსი... — რომაელი კონსული და მხედართმთავარი ძვ. წ. II საუკუნეში.

71. მაკარიელები... — ბერძ. სიტყვიდან  $\mu\alpha\chi\alpha\rho$  „ნეტარი“, „ბედნიერი“.

72. სქოლასტიკური ფილოსოფია... (ბერძნ. სიტყვიდან  $\sigma\chi\omicron\lambda\alpha\sigma\tau\iota\kappa\acute{\alpha}\rho\varsigma$  სწავლული) — შუა საუკუნეებში გაბატონებული ფილოსოფიური მიმდინარეობა, რომელიც ცდილობდა თეორიულად ფორმალურ-ლოგიკური არგუმენტებით დუსაბუთებინა ეკლესიის დოგმატები.

73. პლავტუსი... — ტიტუს მაქციუს პლავტუსი (ძვ. წ. 254—184), რომაელი კომედიოგრაფი.

74. „ოქტავია“ — რომაელი ფილოსოფოსის სენეკას ტრაგედია. ოქტავია იყო ნერონის მიერ უარყოფილი ცოლი. აქ იგულისხმება ტრაგედიის მეორე აქტი.

75. ტერენციუს მიკიონი... — პუბლიუს ტერენციუს აფრიკელი (190—159 ძვ. წ.) — რომაელი კომედიოგრაფი. საუბარია კომედია „ძმების“ ერთ-ერთ გამირზე.

76. უტოპიელთა კუნძული... — მრავალი მოსაზრება არსებობს, თუ რომელ ქვეყანას გულისხმობდა ტომას მორი უტოპიის ცნებაში. მკვლევართა ერთი

ნაწილის აზრით, კუნძული უტოპია ინგლისია (იხ. Ritter G. The Corrupting Influence of Power, ed. by R. W. Pick. Hadleigh, Essex, 1952, p. 46, ან პერე (იხ. Morgan A. E. Nowhere Was Somewhere. Chapel Hill, 1946, p. 212); ზოგი მეკლევიარი პლატონის მიერ აღწერილ კუნძულ ატლანტიდას ასახელებს (იხ. Gerber R. The English Island Myth, Remarks of the Englishness of Utopian Fiction.—Critical Quarterly, 1959, p. 37—38); საბჭოთა ისტორიკოსი მ. ბ. ალექსევი კი თვლის, რომ „უტოპია-ში“ მორი მოგვიტობროს სამხრეთსლავურ თემზე, რის შესახებაც მას, შესაძლებელია, ლონდონის ვენციელი ელჩის ლონარდო ჟუსტინიანისაგან შეეცყო (Алексеев М. П. Из истории английской литературы), М.-Л., 1960. გვ. 40).

77. ა ბ რ ა ქ ს ა... — კობტურ ენაზე ეს სიტყვა (აბრაქსას, ან აბრასაქსის ფორმით) ნიშნავს წმინდა სახელს. იგი გვხვდება შუა საუკუნეების ხანის გნოსტიკოსებთან (ფილოსოფოსებში, რომლებიც ცდილობდნენ ბერძულ-რომაული და ძველი აღმოსავლური მსოფლმხედველობის საფუძვლების ქრისტიანულ მოძღვრებასთან გაერთიანებას) და ალქიმიკოსებთან. მორი აღნიშნავს, რომ უტოპიელები ეთაყვანებოდნენ ღმერთ მითრას. გნოსტიკოსთა გემებზე, ე. ი. ქვის ამულეტებზე სიტყვა აბრაქსა ხშირად მითრას სახელთან იყო გაიგივებული.

78. ო რ მ ო ც დ ა თ ო თ ხ მ ე ტ ი ქ ა ლ ა ქ ი... — იმდროინდელ ინგლისსა და უელსში რომოცდათოხმეტი ქალაქი იყო.

79. ა მ ა უ რ ო ტ ი... — იხ. შენ. 6.

80. ფ ი ლ ა რ ქ ო ს ი — ბერძნ. სიტყვიდან *φύλαρχος* — „ფილეს მეთაური“. ფილების შესახებ ფრ. ენგელის კლასიკური ნაშრომი „ოჯახის, კერძო საკუთრების და სახელმწიფოს შესახებ“, თავი V.

81. წ ი წ ი ლ ე ბ ი ს გ ა მ ო ჩ ე კ ა... — წიწილების ხელოვნური გამოჩეკა ჯერ კიდევ ჩვენს ერამდე ცნობილი იყო ეგვიპტეში, ჩინეთსა და ინდოეთში. იგი წარმოებდა ღუმელებში, რომლებსაც აქლემისა და ცხენის პატრით ახურებდნენ. პირველი ინკუბატორი, ამ სიტყვის თანამედროვე გაგებით, 1777 წელს შეიქმნა.

82. ჭ ი რ ი თ შ ი ა ხ ა ლ გ ა ზ რ ღ ო ბ ი ს გ ა ს ა წ ვ რ თ ე ლ ა დ... — (იხ. პლატონი, სახელმწიფო, V, 467); „ბავშვები ადრეულ ასაკში ცხენზე ჯდომას შიგაჩვიოთ, როცა სიარულს ისწავლიან, ომის მსველელობის სამზერად გაივიცილიოთ...“

83. შ ე ს ვ ლ ა ყ ვ ე ლ ა ს შ ე უ ძ ლ ი ა — (იხ. პლატონი, სახელმწიფო, III, 416). „უპირველეს ყოვლისა, არც ერთ მათგანს (იგულისხმება სამხედრო ფენა პლატონის იდეალურ სახელმწიფოში) არ უნდა გააჩნდეს არავითარი საკუთრება, ფრთხილ საჭირო და აუცილებელის გარდა... არც ერთ მათგანს არ უნდა ჰქონდეს ისეთი არც საცხოვრებელი და არც საწყობი, სადაც არ შეეძლოს შესვლა ყოველ მსურველს“.

84. მ ი ნ ა... — მორის ეპოქაში მინის ფანჯრები მხოლოდ მდიდართა სახლებში იყო. ჯერ კიდევ 1567 წელს მინის ფანჯრების, როგორც იშვიათობის, დასაცავად განსაკუთრებული განკარგულებები ქვეყნდებოდა.

85. ქ ა რ ვ ა — აქ გაუგებარია, რას გულისხმობს მორი. ტაციტუსი თავის „გერმანიაში“ მოგვიტობროს გამდნარი ქარვის, როგორც ფისის შესახებ. მორი ცდება, როდესაც ვარაუდობს, რომ ამგვარი გამდნარი ქარვით შესაძლებელია ტილოს გამოხება.

86. ს ი ფ რ ა გ რ ა ნ ტ უ ს ი — შესაძლებელია ეს სახელწოდება წარმოშობილია ბერძნ. სიტყვებიდან *σφιδρ* — „ბრძენი“ და *γράφειν* — „უფროსნი“.

87. ტ რ ა ნ ი მ ო რ უ ს ი, ამჟამად პროტოფილარქოსი — შესაძლებელია სახელწოდება წარმოშობილია ბერძნ. სიტყვებიდან *τράνιμος* — „ხელისუფალი“ და *βίος* — „შინამტკმელი“.

88. ს ე ნ ა ტ ა ც ე ო ბ ე ბ ე ნ — (იხ. ტატიტუსი, „გერმანია“, XI); „ნაკლებად მნიშვნელოვანი საქმეების შესახებ უხუცესები თათბირობენ, ხოლო უფრო მნიშვნელოვანის შესახებ ხალხი. ამასთანავე უხუცესები წინასწარ მსჯელობენ იმ საქმეებზე, რის გადაწყვეტის უფლებაც მხოლოდ ხალხს ეკუთვნის“.

89. ა დ რ ე დ ი ლ ი დ ა ნ გ ე ი ა ნ ს ა ლ ა მ ო მ დ ე... — XIV—XV სს. ინგლისის მუშათა კანონმდებლობა სამუშაო დღის ხანგრძლივობას დღის 5 საათიდან საღამოს 7—8 საათამდე განსაზღვრავდა. პენრი VII დროს 1496 წელს გამოცემულ სტატუსში სამუშაო დღის ხანგრძლივობა მიწათმოქმედი მუშისათვის მარტიდან სექტემბრამდე უნდა გაგრძელებულიყო დღის 5 საათიდან შებინდებამდე. (იხ. კ. მარქსი, კაპიტალი, ტ. I, გვ. 119; გვ. 344—345).

90. მ ე ც ნ ი ე რ ე ბ ი ს შ ე ს წ ა ე ლ ა ს უ თ მ ო ბ ს... — შდრ. ვ. ი. ლენინის აზრს: „შეუძლებელია წარმოვიდგინოთ მომავალი საზოგადოების იდეალი უიმისოდ, თუ ახალგაზრდა თაობის სწავლება ნაყოფიერ შრომასთან არ იქნება შეკრთებული: ვერც სწავლა-განათლება ნაყოფიერი შრომის გარეშე და ვერც ნაყოფიერი შრომა სწავლებისა და განათლების გარეშე ვერ იქნება აყვანილი იმ სიმაღლემდე, რომელსაც ტექნიკის დონე და მეცნიერული ცოდნის მდგომარეობა მოითხოვს. ეს აზრი გამოთქვეს ჯერ კიდევ ძველმა დიდმა უტოპისტებმა“ (ვ. ი. ლენინი, თხზ., ტ. 2. გვ. 584).

91. გ ა რ ი ე რ ა ე ა მ დ ე... — ოქსფორდში მეცადინეობა დღის 6 საათზე იწყებოდა, ზოგიერთ უნივერსიტეტებსა და კოლეჯებში გაზაფხულობით — დღის 5 საათზე, ზამთრობით—7-ზე. მაგ., 1517 წელს პარიზში მეცადინეობა 5 სთ-ზე იწყებოდა, სალამანკაში—6-ზე. ჰუმანისტები თვლიდნენ, რომ დღის საათები მეცნიერებისათვის ძალზე ნაყოფიერია.

92. ბ ა რ ზ ა ნ ი... — შესაძლოა ეს სიტყვა ირანული წარმოშობისაა და ნიშნავს „მაღალს“. „ასე უწოდებდნენ სომხეთის მეფეს და ალექსანდრე მაკედონელის თანამედროვე ერთ-ერთ სატრავს. შესაძლებელია ამ სიტყვის პირველი ნაწილი ძველებრადული სიტყვა „ბარ“—იდან იყოს წარმოშობილი, რაც „ძეს“ ნიშნავს. მეორე ნაწილი კი შესაძლოა მომდინარეობდეს ბერძნული დორიული ფორმის სიტყვიდან „Ζάκ“—ზევისი, ვ. ი. შესაძლებელია „ბარზანი“ „ზევისის ძეს“, „დმერთის ძეს“ ნიშნავს.

93. ა დ ე მ უ ს ი — „უხალხო“, ხალხის გარეშე. აქ შეერთებულია ბერძნ. *ἀδελφός* — უარყოფითი ნაწილაკი და *ἄνθρωπος* „ხალხი“.

94. ც ო ლ ე ბ ი ე მ ს ა ხ უ რ ე ბ ი ა ნ ქ მ რ ე ბ ს... — ტ. შორს აქ მხედველობაში აქვს ბიბლიის შემდეგი ადგილი: „ცოლებო, დამორჩილდით ქმრებს, ვითარცა ბატონებს, რამეთუ ქმარი ცოლის მბრძანებლად ითვლება“...

95. ო თ ხ ი ს ა ა ვ ა დ მ ყ ო ფ ო... — იმდროინდელ ლონდონში ოთხი დიდი საავღმყოფო არსებობდა ღარიბთათვის და მოხუცებულთათვის.

96. ო ქ რ ო ს ა დ ა ვ ე რ ც ხ ლ... — შდრ. პლტარნი, კანონები, V, 742. „...ქერძო პირთაგან არავისა აქვს ოქროსა და ვერცხლის ფლობის უფლება...“.

97. ღამის ქოთნებს და უსუფთაო მოხმარებისათვის განკუთვნილ ჭურჭელს ამზადებენ... — შდრ. ვ. ი. ლენინის აზრს: „როცა ჩვენ გავიმარჯვებთ მსოფლიო მასშტაბით, ვფიქრობ, ოკროსაგან გავაკეთებთ საზოგადოებრივ საპირფარეოებს მსოფლიოს რამდენიმე ყველაზე დიდი ქალაქის ქუჩებში...“ (ვ. ი. ლენინი, თხზ., ტ. 33. გვ. 117).

98. ანემოლიელი ელჩები... — ბერძნული სიტყვიდან ἀνεμόλιος — ცარიელი, ფუქი, ქარაფშუტა. „ანემოლიელები“ — ხალხი, სიტყვეს რომ ქარს ატანს.

99. იმ ფილოსოფოსთა შესახებ... — აქ ფილოსოფოსებს უწოდებდნენ იმ ადამიანებს, რომლებიც მეცნიერებასა და ხელოვნებას თეორიულ საფუძვლებს აძლევდნენ.

100. დიალექტიკა... — აქ ეს სიტყვა პლატონისეული გაგებით (როგორც უმაღლესი მეცნიერება, იდეების შეცნობის მეთოდი) კი არ იხმარება, არამედ როგორც ლოგიკის გამომხატველი.

101. ახალ დიალექტიკოსთა... — აქ ტ. შორს მხედველობაში ჰყავს პეტრე ესპანელი (XIII ს.) — პაპი ინოკენტი XXI, ავტორი ლოგიკის სახელმძღვანელოსი, რომელიც XIII—XVI საუკუნეებში დაახლოებით 150-ჯერ გამოიცა.

102. „მეორე ლოგიკაში“ — იგულისხმება პეტრე ესპანელის ნაშრომი.

103. „მეორე ინტენციები“... — ლოგიკის „მეორე მისწრაფების“ ტერმინი. პირველი მისწრაფება განასხვავებს საგნებს მათი ინდივიდუალობისდა მიხედვით, მეორე განიხილავს საგანთა სახეებსა და ბუნებას.

104. სიამოვნებათა მომხრეების დაჭრუფება... — „სიამოვნებათა მომხრეს“ უწოდებენ ბერძენ ფილოსოფოს ეპიკურეს (ძვ. წ. 341—270). ჰუმანისტებმა ეპიკურეს შესახებ ციცირონის, სენეკას, ლუციანეს და დიოგენეს თხზულებებიდან შეიტყვეს.

105. მოწინააღმდეგეთა ჭრუფი — ფილოსოფოს-სტოიკოსები, ეპიკურელთა მოწინააღმდეგენი.

106. კოკით თამაში... — შდრ. ერაზმის აზრს: ყოვლად სულები, სასაცილო ხალხი თამაშით იმ ზომამდეა გატაცებული, რომ როგორც კი კოქის კაყუნს გაიგებენ, გული მკერდში მოშტებულად აუჭგარდებათ („ხოტბა სისულელისა“, 39).

107. ნადირობა და ჩიტბადეობა... — შუა საუკუნეებში ნადირობასა და ჩიტბადეობას სხვადასხვანაირად უყურებდნენ: ერთნი იწონებდნენ ამ საქმიანობას, მეორენი უარყოფდნენ.

108. გართობის მოყვარული... — ეს ერთადერთი ადგილია „ეტოპიაში“, სადაც გართობაზე საუბარია არა როგორც უსაქმურობაზე, არამედ როგორც თავისუფალი დროის გონივრულად გატარებაზე.

109. ბერძნული ლიტერატურისა და მეცნიერებების შესახებ... — XVI საუკუნეში ინგლისელი ჰუმანისტები ბერძენ ავტორთა შესწავლას განსაკუთრებულ მნიშვნელობას ანიჭებდნენ.

110. ლათინურში... — იმ დროს ისტორიკოსებიდან განსაკუთრებით თაყვანს სცემდნენ იულუს კეისარსა და სალუსტუსს, პოეტებიდან — პლავტუსს, ტერენციუსს, ვერგილიუსს, ჰორაციუსს.

111. პლატონი... არისტოტელი... თეოფრასტი... — პლატონი

იმ პერიოდში „ფილოსოფოსთა ღმერთად“ მიიჩნეოდნენ. არისტოტელესადმი ავტორიტეტი საუკუნეთა განმავლობაში უდავოდ იყო მიჩნეული. თეოფრასტე (ძვ. წ. 372—287) — ძველი ბერძენი ფილოსოფოსი, ლოგიკოსი და ბუნებისმეტყველი, არისტოტელეს მოწაფე და მიმდევარი იყო. არისტოტელეს სიკვდილის შემდეგ სათავეში ჩაუდგა პერიპატოელთა სკოლას.

112. ხ ე ლ თ ჩ ა უ ვ ა რ დ ა მ ა ი მ უ ნ ს... — ტომას მორს სახლში ჰყავდა შიშუნე. პანს პოლბინის მიერ შესრულებულ ნახატზე, სადაც მორის მთელი ოჯახია გამოსახული, მორის ცოლის ფეხებთან ზის ეს შიშუნე.

113. კ ა ნ ს ტ ა ნ ტ ი ნ ე ლ ა ს კ ა რ ი ს ი — (გარდ. 1150 წ.) — ბიზანტიელი მეცნიერი. 1476 წელს მილანოში გამოიყა მისი ბერძნული ენის გრამატიკა.

114. პ ე ს ი ხ ი ო ს ი დ ა დ ი ო ს კ ო რ ი დ უ ს ი... — პესიხიოსი ჩვ. წ. V ან VI ს.-ის ბერძენი გრამატიკოსი, მისი წიგნი 1514 წელს გამოიყა ვენეციაში. დიოსკორიდუს პედანიუსი — ნერონის თანამედროვე, ექიმი, მისი თხზულებები 1499 წელს გამოიყა ვენეციაში.

115. პ ლ უ ტ ა რ ქ ე — ახ. წ. I ს-ის ბერძენი ისტორიკოსი, მისი თხზულებანი „პარალელური ბიოგრაფიები“ და „მორალია“ დიდად ფასობდა როგორც შუა საუკუნეებში, ასევე აღორძინების ეპოქაშიც.

116. ლ უ კ ი ა ნ ე ს დ ა ც ი ნ ე ვ ზ ი დ ა ხ უ მ რ ო ბ ე ბ ი... — ლუკიანე — ძველი ბერძენი მწერალი-სატირიკოსი. მორმა მისი თხზულებები თარგმნა: ლათინურ ენაზე. ერაზმ როტერდამელი ლუკიანეს ცნობილი ორატორის დემოსთენეს და ისტორიკოს პეროდოტეს გვერდით აყენებდა. ლუკიანეს თხზულებები დასავლეთში XV საუკუნის პირველ შერთხედში გახდა ცნობილი. აღდუს მანუციუსმა მისი თხზულებები 1503 წელს გამოიყა ვენეციაში.

117. ა რ ის ტ ო ფ ა ნ ე — ძვ. წ. 445—385. ძველი ბერძენი კომედიოგრაფი, „კომედიის მამა“, მისი კომედიები პირველად 1498 წლის იენისში გამოიყა ვენეციაში.

118. პ ო მ ე რ ო ს ი — „ილიადასა“ და „ოდისეას“ ავტორი. ნაწარმოებები გამოიყა 1504 წლის ოქტომბერში ვენეციაში.

119. ე ვ რ ი პ ი დ ე — ძვ. წ. 485—406. ძველი ბერძენი დრამატურგი, მისი ტრაგედიები 1504 წლის თებერვალში გამოიყა.

120. ს ო ფ ო კ ლ ე — ძველი ბერძენი დრამატურგი, ტრაგიკოსი. სოფოკლეს ტრაგედიები პირველად გამოიყა 1502 წელს ვენეციაში.

121. ა ლ დ უ ს მ ა ნ უ ც ი უ ს ი (1449 — 1515) — აღორძინების ეპოქის ვენეციელი ჰუმანისტი, მესტამბე და გამოცემელი. 1494 წლს დააარსა სტამბა და გამოსყა ძველ ბერძენ, რომეულ და აღორძინების ეპოქის კლასიკოსთა მეცნიერულად დამუშავებული თხზულებები. მის გამოცემებს „აღინებს“ უწოდებენ. მინუსკული—განსაკუთრებული შრიფტი. ასეთი შრიფტით აღდუს მანუციუსმა პირველი წიგნი 1501 წელს გამოსყა.

122. თ უ კ ი დ ი დ ე (ძვ. წ. 465/460—400/395) — უდიდესი ძველი ბერძენი ისტორიკოსი. „ისტორიის მამის“ პეროდოტეს უმცროსი თანამედროვე, სოფისტების მოწაფე და მიმდევარი. მას ეკუთვნის თხზულება „ისტორია 8 წიგნად“, რომელიც ეძღვნება პელოპონესის ომს. აღდუს მანუციუსმა თხზულება 1508 წელს გამოსყა.



134. ეშმაკობითა და მოხერხებულობით... — „თუმცა სიცრუის გამოყენება ცხოვრებაში საძაგლობა იქნებოდა, ომში ეს საქციელი სასარგებლო სარწმუნო ხდება; და ის, ვინც ამარცხებს თავის მოწინააღმდეგეს ამგვარი საშუალებით, ისეთსავე ქებას იმსახურებს, როგორც ის, ვინც იარაღით ამარცხებს. ამგვარ მოსაზრებას გამოთქვამდნენ ისინი, ვინც დიდ ადამიანთა ისტორიას წერდნენ...“.

„Макнавелли, Рассуждение о Тите Ливии“, СПб., 1854, გვ. 488, წიგნი III, თავი 40).

135. ზაკოლეტელები — ხალხის გამოგონებული სახელწოდება. წარმოშობილია ბერძნული სიტყვიდან *παλῆτες* — „გამყიდველი“. აქ იგულისხმება შვეიცარიელი დაქირავებული ჯარისკაცები.

136. ბუთრესკები — შორის შიერ გამოგონებული სახელწოდება ბერძნ. *βουτρες* და *φάρμακος* — „ღვთისმოსავი“ შეერთებით. „ბუთრესკები“, „უალრესად რელიგიური“.

137. ცინემერული... ტრაპემერული — „გაუგებარი სახელწოდებები“. საფიქრებელია სახელწოდების მერე ნაწილი წარმოშობილია ბერძნული სიტყვიდან *ψέμα* — „ღლე“.

138. ავერნის გველი... — ავერნის ტბა მდებარეობს იტალიის სამხრეთით, კამპანიაში, იგი მიწისქვეშა სამყაროს შესასვლელად ითვლებოდა.



პირთა ღა გვიგრაფიულ სახელთა  
საქიეგელი

- აბრაქსა 72  
 აღემუსი 81.  
 ალაოპოლიტები 117  
 აღდუს მანუციუსი 107  
 ამაუროტი, ამაუროტელეები 28, 72, 74,  
 75, 89  
 ანიდრუსი 28, 74, 75  
 ანემოლიელები 92, 93, 94  
 ანტევერპენი 33  
 არაგონელი ეკატერინე 12  
 არაგონია 56  
 არისტოტელე 107  
 არისტოფანე 107  
 ახორიელები 57
- ბარზანი 81  
 ბარტონი ელისაბედ 12  
 ბენედიქტინელთა მონასტრები 53  
 ბელგია 10  
 ბოლეინი ანა 12  
 ბრაბანტი 56  
 ბრიტანეთი 31  
 ბრიუსელი 33  
 ბრიუგე 10, 33  
 ბუთრესკები 131  
 ბურგუნდია 56
- გალენუსი კლავდიუს 107  
 გალია, გალელი 41, 43, 56, 57  
 გვიჩარდინა 16  
 გერმანელები 56  
 გროსინი უილიამ 8
- დამოკლე 11  
 დიონისიოსი 55  
 დიოსკორიდუს პედანიუსი 107
- მგვიპტელები 67  
 მგიდოუსი პეტრე 10, 27, 28, 29, 30, 33,  
 34, 35, 37, 38, 40, 67, 68  
 ელუარდ IV 7  
 ევრიპიდე 107  
 ევროპა 115  
 ელისე 54
- ვენეტები 56  
 ვესპუჩი ამერიგო 35
- ზაპოლეტელები 120, 121
- თეოფრასტე 107  
 თუკიდიდე 107
- ინგლისი, ინგლისელები 33, 40, 51, 56  
 იტალია 56, 57
- კალე 10  
 კალიკეტი 35  
 კართაგენელები 43  
 კარლოს (I) V 33  
 კასელი 33  
 კასტილია 33, 56  
 კელენოები 37  
 კემბრიჯი 7  
 კენტერბერის არქიეპისკოპოსი 40

კენტი 10  
კინგსტონი უილიამ 13  
კლემენტ იოანე 28  
კოლეტი ჯონ 13  
კორნუელი 41  
კრასუსი 59

ლანკასტერი 11  
ლასკარისი კონსტანტინე 107  
ლესტრიგონები 37  
ლინაკრი ტომას 8  
ლონდონი, ლონდონელი 7, 31, 69  
ლუვენი 9, 10  
ლუზიტანელი 35  
ლუთერი მარტინ 9, 11  
ლუკიანე 107

შაკარიელები 61  
მაკიაველი 16  
მანლიუსი 48  
მედიოლანუმი 56  
„შეორე ინტენციები“ 95  
მორი ტომას 7, 9, 10, 11, 12, 13, 14, 15, 31, 39, 40, 54, 64, 69  
მორი ჯონ 7, 8  
მორტონი იოანე (ჯონ) 8, 40  
მოსე 48  
„მცირე ლოგია“ 95  
„მცირე ხელოვნება“ 107

ნაეარა 56  
ნეპოლი 56  
ნერონი 62  
ნეფელოგეტები 117  
ნიდერლანდი, ნიდერლანდელი 9, 11

„ოქტავია“ 62  
ოქსფორდი 8, 10

პალინურუსი 34  
პარიზი 9  
პიკო დელა მიჩანდოლა 9  
პოლიღერიტები 49, 50

პობი ტომას 13  
პლატუს ტიტუს მაკიუსი 62  
პლატონი 34, 55, 63, 64, 65, 107  
პლუტარქე 107  
პროტოფილარქოსი 76

„რჩიარდ III ისტორია“ 9  
რომელი, რომაელები 43, 49, 67  
როტერდამელი ერაზმ 10, 11, 13

ხალუსტუსი 43  
საფრანგეთი 9  
„სახელმწიფო“ 63  
სენეკა 62  
სირიელები 43  
სიფოგრანტუსი 68, 76, 78, 81, 85, 87, 88, 89

სკილები 37  
სკოტები 56  
სოლომონი 54  
სოფოკლე 107  
სპარსეთი 49  
სტოელები 48  
სქოლასტიკური ფილოსოფია 62

ტაიბერნი 13  
ტაპრობანა 35  
ტაუერი 8, 12, 13  
ტუნტონი 7  
ტემზიციუს გეორგ 33  
ტერენციუსი 64  
ტრანიბორუსი 76, 77, 89  
ტრიციანუს აბინატუსი 107  
ტუნსტალ კატბერტ 33

უოლსი 10, 11  
ულისე 34  
„უტოპია“ 9, 10, 14, 15, 20  
უტოპუსი 71, 72, 76, 127, 128

ფაბრიციუსი 60  
ფილარქოსი 73, 76  
ფლანდრია 9, 33, 56

ქრისტე 63, 64, 126, 127, 136

ციცერონი 35

„ზოტა სისულელისა“ 9

მელეტები 56

პენრი VII 8, 9, 11

პენრი VIII 11, 12, 33

პერკულესი 100

პესიხიოსი 107

პეროდინე 107

პეროდოტე 107

პითლოდეესი რაფაელ 27, 28, 29, 30, 31,  
34, 35, 36, 37, 38, 47, 55, 63, 66,  
67, 68, 74, 139, 140

პიპოკრატე 107

პომეროსი 107

## შ ი ნ ა ა რ ს ი

ტომას მორი და მისი „უტოპია“ . . . . .	7
უთვალსაჩინოესი და ენამზეობით გამორჩეული ვაჟკაცის, ლონდონის სახელ- ლოვანი მოქალაქისა და ვიკონტის ტომას მორის — არანაკლებ სასარ- გებლო, ეიდრე გასართობი, — კეშმარიტად ოქროს წიგნი სახელმწი- ფოს საუკეთესო წყობილებისა და ახალი კუნძულის უტოპიის თაობაზე	25
ტომას მორი სალამს უძღვნის პეტრე ეგიდიუსს . . . . .	27
პ ი რ ვ ე ლ ი წ ი გ ნ ი საუბრისა, რომელიც გამართა გამოჩენილმა კაცმა რა- ფაელ ჰიტლოდექსმა სახელმწიფოს საუკეთესო წყობილების თაობა- ზე და გადმოსცა უსაჩინოესმა ვაჟკაცმა, ბრიტანეთის სახელოვანი ქა- ლაქის ლონდონის მოქალაქემ და ვიკონტმა ტომას მორმა . . . . .	31
მ ე ო რ ე წ ი გ ნ ი საუბრისა, რომელიც გამართა რაფაელ ჰიტლოდექსმა სა- ხელმწიფოს საუკეთესო წყობილების თაობაზე ლონდონელ მოქალაქე- სა და ვიკონტთან ტომას მორთან . . . . .	69
შენიშვნები . . . . .	141
პირთა და გეოგრაფიულ სახელთა საძიებელი . . . . .	153

თბილისის უნივერსიტეტის „ბერძნულ-ლათინური ბიბლიოთეკის“  
გამოცემები:

1. ქსენოფონტი, მოგონებები სოკრატეზე, სოკრატეს აპოლოგია
2. ჰეროდოტი, ისტორია, ტ. I, II
3. ორფიული არგონავტიკა
4. საფო, ლირიკა
5. ვერგილიუსი, ენეიდა
6. ოვიდიუსი, მეტამორფოზები
7. არისტოტელე, რიტორიკა
8. ჰორაციუსი, პოეტური ხელოვნებისათვის
9. ჰომეროსის ჰიმნები
10. ტომას მორი, უტოპია

გამომცემლობის რედაქტორი მ. ჩხაიძე  
მხატვარი მ. ახვლედიანი  
მხატვრული რედაქტორი ი. ჩიქვინიძე  
ტექნიკური რედაქტორი ი. ხუციშვილი  
კორექტორი ნ. ქანთარია  
სბ 919

გადაეცა წარმოებას 21.12.82.  
ხელმოწერილია დასაბუქლად 28.03.83.  
საბუქლი ქაღალდი 60×841/18.  
პირობითი ნაბუქლი თაბახი 10.  
სააღრ.-საგამომც. თაბახი 8,11.  
ტირაჟი 30000.  
შეკვეთის № 4295.  
ფასი 1 ზან.

თბილისის უნივერსიტეტის გამომცემლობა, თბილისი, ი. ჭავჭავაძის პროსპექტი, 14.  
Издательство Тбилисского университета, Тбилиси, пр. И. Чавчавадзе, 14.

---

საქ. სსრ მეცნ. აკადემიის სტამბა, თბილისი, 380060, კუტუზოვის ქ. 19  
Типография АН Груз. ССР, Тбилиси, 380060, ул. Кутузова, 19

**ТОМАС МОР**

**УТОПИЯ**

**Перевод Нины Николаевны Гомартели  
(на грузинском языке)**

**Издательство Тбилисского университета  
Тбилиси 1983**